



Santu Alfons Maria bilong Liguori

Rot bilong Salvesen

*Laip na i dai i stap long han bilong ol manmeri.
Na wanem samting ol manmeri i laik kisim, bai Bikpela i givim long ol.
(Sirak 15:17)*

SANTU ALFONS MARIA BILONG LIGUORI

Rot bilong Salvesen

*Laip na i dai i stap long han bilong ol manmeri.
Na wanem samting ol manmeri i laik kisim,
bai Bikpela i givim long ol.*

(Sirak 15:17)

Imprimatur: ✠ Francis Meli
Bisop bilong Vanimu

© IVE Fathers in Papua New Guinea
ive.png@gmail.com

Insait

Tok i go pas.....	1
-------------------	---

Eterniti

1 - Eternal salvesen.....	5
2 - Yumi mas tinting long eterniti	8
3 - Yumi mas sevim sol bilong yumi.....	12
4 - Sevim sol bilong yumi em i nambawan bisnis.....	15
5 - Yumi mas wok hat bilong sevim sol bilong yumi	19
6 - Taim em i bikpela samting tru	23
7 - Yumi go long eterniti.....	27
8 - Heven o hel. I no gat narapela rot.	30
9 - Longlong pasin bilong ol manmeri i no save wari long sol bilong ol.....	33
10 - Yumi mas wok hat bilong sevim sol	37
11 - Yumi mas bihainim laik bilong God tasol.....	40

Sin

12 - Sin i bagarapim nem bilong God.....	47
13 - Sin i sakim tok bilong God.....	50
14 - Sin i daunim nem bilong God.....	53
15 - Sin i rausim God long sol bilong yumi	56
16 - Sin i tok bilas long God.....	59
17 - Sin i givim baksait long God	62
18 - Sin i mekim nogut long hat bilong God.....	65
19 -Man o meri i no gat grasia long sol bilong em, em i longlong tumas.....	68
20 - Man o meri i mekim mortal sin i mas pret nogut tru.....	71
21 - Satan i save giamanim ol manmeri bilong sin	75
22 - Man o meri bilong sin i no inap painim gutpela taim	78
23 - Man o meri bilong sin i no gat helpim bilong God	82
24 - Pasin bilong stap hat liklik tasol em i samting nogut tru.....	86
25 - Pasin nogut bilong ol manmeri i no save wari long grasia bilong God	89
26 - God i wetim yumi, tasol em i no wetim yumi inap oltaim	92
27 - God i save kaunim ol sin bilong yumi	95

28 - God i save givim advais long yumi, long wanem em i no laik panisim yumi.....	98
--	----

Indai

29 - Indai bai i bungim yumi.....	105
30 - Yumi olgeta i mas i dai	108
31 - Indai em i samting tru	111
32 - Indai i kam klostu nau.....	114
33 - Indai i ken bungim yumi long taim yumi no redi.....	117
34 - Laip bilong yumi em i olsem wanpela driman i save pinis hariap	120
35 - Long indai yumi mas lusim olgeta samting.....	124
36 - Long indai i no gat wanpela samting inap long helpim yu	127
37 - Indai em i dua bilong eterniti	131
38 - Taim bilong indai	134
39 - Oltaim yumi mas tingting long indai	137
40 - Ol samting bilong graun em i samting nating.....	140
41 - Ol samting bilong graun i no inap helpim yumi liklik.....	143
42 - Long taim bilong indai ol manmeri nogut i save pret long kot bilong God	147

43 - Long taim bilong indai	
tingting bilong yumi bai i paul.....	150
44 - Piksa bilong wanpela man nau tasol i dai pinis.....	153
45 - Piksa bilong wanpela man i stap long matmat.....	156
46 - Bihain long indai ol manmeri	
bai i lustingting long yumi	159
47 - Ya mas tingting long indai bilong yu yet.....	162
48 - Indai nogut bilong wanpela man bilong sin.....	165
49 - Naispela indai bilong wanpela gutpela man	168
50 - Tingting long las minit bilong laip bilong yu.....	171
51 - Yumi mas stretim laip bilong yumi hariap	174

Kot

52 - Yumi mas stretim dinau wantaim Jisas	
pastaim long kot.....	179
53 - Kot bilong wanpela man i dai pinis	183
54 - Sol i kamap long kot.....	186
55 - Jisas bai i skelim olgeta pasin bilong yumi	189
56 - Jisas bai i givim pe inap long pasin yumi bin mekim	191
57 - Las Kot bilong God	194
58 - Olgeta manmeri bai i bung	
long ples daun bilong Jehosafat	197
59 - God bai i givim pe inap long ol pasin bilong yumi.....	201

60 - Pe nogut bilong ol manmeri bilong sin.....	204
61 - Gutpela pe bilong ol gutpela manmeri.....	207
62 - Long Las Kot ol daimanmeri bai i kirap bek.....	210

Hel

63 - Hel i no save pinis	217
64 - Paia bilong hel i no save dai.....	220
65 - Pen bilong memori, tingting na laik bilong ol manmeri bilong lus.....	223
66 - Pen bilong sol bilong ol manmeri i stap long hel	226
67 - Long hel i gat pen tasol	230
68 - Hel i no gat marasin bilong em	233
69 - Long hel ol manmeri bilong lus i givim pen wanpela narapela.....	236
70 - Bikpela sori bilong ol manmeri i stap long hel.....	240

Jisas na Maria

71 - Jisas i dai bilong kisim bek yumi	247
72 - Jisas i hangamap long diwai kros	250
73 - Pen na Indai bilong Jisas i kirapim laik bilong yumi.....	253
74 - Ol nil bilong Jisas i mas sutim lewa bilong yumi	256
75 - Indai bilong Jisas	259

76 - Indai bilong Jisas i kisim bek yumi	262
77 - Lem bilong God i laik i dai bilong tekewe ol sin bilong yumi	266
78 - Pen na Indai bilong Jisas i stretim dinau bilong yumi	269
79 - God i dai bilong helpim mi, na mi bai i givim baksait yet long em?	272
80 - Jisas em i King bilong laikim pasin	275
81 - Amamas bilong Jisas long painim sipsip i lus	278
82 - Jisas i stretim dinau bilong mipela	281
83 - Yumi mas onarim santu Maria	284
84 - Santu Maria i save laikim olgeta manmeri	287
85 - Santu Maria em i meri bilong harim tok	291

Marimari bilong God

86 - Peisens bilong God	297
87 - Marimari bilong God i singautim ol manmeri long mekim penans	300
88 - God i laik kisim yumi i go long heven	303
89 - God i laik kisim bek ol manmeri bilong sin	306
90 - Yumi no inap long trikim marimari bilong God	309
91 - Na sapos God i les long singautim mi gen?	313
92 - God i save amamas long ol manmeri i tanim bel	316

93 - Bikpela laik bilong God	
i givim Pikinini bilong em yet long yumi	319
94 - God i laikim tumas sol bilong yumi	323
95 - God i save givim em yet olgeta	
long ol manmeri i laikim em tru.....	326
96 - Laik bilong God i winim olgeta samting.....	329
97 - Grasia bilong God em i bikpela samting tumas	332
98 - God i save kaunim ol grasia em i givim long yumi	336
99 - Tok piksa bilong papa i gat tupela pikinini man	339

Tok i go pas

Santu Alfons Maria bilong Liguori (1696 - 1787) em i wanpela bikpela santu insait long Katolik Sios. Katolik Sios i save kolim em «Tisa», long wanem ol gutpela skul na buk bilong em i save skulim ol manmeri long planti samting bilong God.

Santu Alfons i bin raitim dispela buk bilong helpim ol pris tasol, long wanem em i laik helpim ol long redim ol gutpela skul. Tasol taim ol manmeri bilong kantri bilong em i bin lukim dispela buk, ol tu i bin baim na ritim, long wanem ol i save pinis long bikpela save bilong santu Alfons na long ol gutpela skul bilong em. Na i no longtaim, ol manmeri bilong ol narapela kantri tu i bin harim long dispela buk na ol tu i laik ritim, olsem na ol i bin tanim dispela buk long kain kain tok ples.

Long wanpela pas santu Alfons i bin salim long wanpela pren bilong em, em i tok: «Mi amamas tumas long harim olsem planti manmeri i

save ritim dispela nupela buk bilong mi. Dispela buk i pulap long planti gutpela meditesen, na ol dispela meditesen bai i helpim olgeta manmeri. **Mi yet i save ritim oltaim dispela buk, na oltaim dispela buk i stap long han bilong mi.**

Insait long dispela buk yu bai i painim **99-pela meditesen** bilong helpim yu long bihainim Jisas gut.

Olsem na mipela i laik askim santu Alfons long blesim olgeta manmeri husat bai i ritim dispela buk. Na mipela i laik askim santu Maria long helpim olgeta manmeri long painim Jisas, long wanem Jisas tasol em i rot i go long heven. Em yet i tok: «***Mi yet mi rot, na mi as bilong tok tru, na mi as bilong laip. I no gat wanpela man inap i kam long Papa long narapela rot. Nogat. Long mi tasol***» (Jon 14:6).

IVE Fathers

(Fathers of the Institute of the Incarnate Word)

Eterniti

1

Eternal salvesen

Planti taim yumi save mekim kain kain bisnis bilong winim mani, tasol i gat wanpela bisnis i winim ol narapela bisnis bilong dispela graun: **eternal salvesen**. Long wanem, sapos yumi no mekim gut dispela bisnis, orait yumi bai i lus olgeta long hel inap oltaim oltaim. Tasol sapos yumi gat save na yumi wok hat bilong mekim gut dispela bisnis, orait yumi bai i go long heven na amamas inap oltaim oltaim. Dispela wok bisnis nau mi toktok long em i save pinis long indai bilong yumi, long wanem, taim indai i bungim yumi, yumi no inap mekim wanpela samting moa bilong sevim sol bilong yumi. **I gat tupela rot tasol: o yumi amamas oltaim oltaim long heven, o yumi lus olgeta oltaim oltaim long hel.**

O God bilong mi! Na mi olsem wanem? Bai mi sevim sol bilong mi, o bai mi lus olgeta long hel? Mi inap long mekim tupela samting: mi inap long wok hat na sevim sol bilong mi, na tu mi inap long bihainim

laik bilong mi na lus olgeta long hel. Na sapos mi save pinis long dispela samting, olsem wanem na planti taim mi save les long bihainim ol gutpela pasin? Olsem wanem na mi les long tanim bel na lusim ol pasin nogut bilong mi?

O Jisas bilong mi, yu bin dai bilong sevim mi! Tasol planti taim mi bin givim baksait long yu, na mi lusim yu. Amamas bilong oltaim oltaim i stap wantaim yu tasol, olsem na yu mas helpim mi long pas strong wantaim yu.

Planti manmeri i save amamas taim ol i winim kot, o taim ol i painim sampela wok, o taim ol i kisim biknem long ai bilong ol manmeri. **Tasol ol dispela samting i save pinis**, olsem na yumi no ken tingting planti long ol samting bilong dispela graun. **Dispela graun wantaim olgeta samting i stap long em bai i pinis**, na yumi bai i lusim olgeta samting yumi i bin kisim taim yumi i bin stap laip. Olsem na yumi mas lustingting long ol samting bilong dispela graun, long wanem wampela de yumi mas lusim ol dispela samting, na yumi mas sanap long kot. **Olsem na bikpela bisnis bilong yu i olsem: yu mas painim rot bilong sevim sol bilong yu**. Yes, yu mas painim dispela rot hariap. Sapos nogat, orait long taim bilong indai yu bai i lusim olgeta samting bilong yu i stap long graun, na yu bai i lus olgeta long hel.

O Jisas, yu Sevia bilong mi! Yu sapos long givim baksait long mi, long wanem planti taim mi bin givim baksait long yu. Mi save pinis olsem mi man bilong sin, tasol nau mi sori long ol sin mi bin mekim,

na mi sori tru long bikpela pen na sori mi bin givim long yu. Bipo mi bin mekim planti sin tumas, tasol nau mi laik i stap wantaim yu oltaim. Mi laik bai yu kamap nambawan samting long laip bilong mi. Yu mas sori long mi, long wanem mi bin mekim planti sin tumas, tasol nau mi kam long yu wantaim bikpela sori na daunpasin. Ol sin bilong mi i bikpela tumas, olsem na laik bilong mi i go long yu tu i mas kamap bikpela tumas. **Wanem samting bai i kamap long mi sapos mi dai wantaim ol sin bilong mi? Bai mi go we?** Tasol yu bin wetim mi inap long tude, olsem na tude mi laik kam bek long yu. Yu mas helpim mi long inapim gut dispela tok nau tasol mi mekim long yu.

Olsem na yumi no ken lustinting! **I gat tupela rot tasol: heven o hel.** Em tasol. Na yumi mas wokabaut long wanpela bilong dispela tupela rot tasol.

Olsem wanem na planti taim mi bin givim baksait long yu, dia Jisas? Mi save pinis olsem i gat tupela rot tasol, tasol mi no bin wari liklik na mi bin mekim planti sin long ai bilong yu. Mi save pinis olsem yu Sevia na Ridima bilong mi, tasol planti taim mi bin les long yu na givim baksait long yu. O Bikpela bilong mi! Nau mi sori long ol pasin nogut bilong mi. Mi sori long olgeta taim mi bin givim baksait long yu. Nau mi laikim yu antap long olgeta samting. Mi no laik mekim sin gen. Nogat. Mobeta mi laik i dai pastaim. Jisas, helpim mi long bihainim yu oltaim.

O Maria, yu hop bilong mi! Yu mas pre bilong helpim mi.

2

Yumi mas tinging long eterniti

Santu Ogastin i tok: «**Dispela pasin bilong tingting long eterniti, em i “Tinging i winim olgeta tingting bilong graun”**», long wanem, sapos yumi tingting gut long eterniti, orait yumi bai inap long go long heven na amamas inap oltaim oltaim. Dispela pasin bilong tingting long eterniti i bin pulim planti manmeri long mekim kain kain sakrifais bilong sevim sol bilong ol. Planti manmeri i bin lusim olgeta samting bilong ol, na i go stap long ples nating bilong mekim penans. Na planti king na kwinq i bin lusim olgeta samting bilong ol, na i bin joinim ol monk na ol sista long ol monasteri. Na planti manmeri i bin lusim haus bilong ol na famili bilong ol, na ol i bin kamap rilijis, olsem pris, brata na sista. Na planti manmeri i bin kapsaitim blut bilong ol, na i bin dai olsem martir. Na ol dispela lain manmeri i bin mekim olsem long wanem ol i gat wanpela tingting tasol: **ol i laik sevim sol bilong**

ol na i go long heven, long wanem, sapos nogat, ol i save olsem ol bai i lus long hel.

I gat stori bilong Santu Jon bilong Avila i bin wok hat bilong helpim wanpela meri long tanim bel. Tasol dispela meri i les long tanim bel, long wanem em i tingting tumas long amamas bilong dispela graun tasol. Dispela meri i bisi long ol bilas bilong bodi, na em i save tingting long em yet tasol. Olsem na wanpela de santu Jon bilong Avila i tokim dispela meri olsem: «Meri, yu mas tingting long dispela samting tasol: **Eterniti. Laip bilong oltaim oltaim**». Em i tok olsem bai dispela meri i ken save olsem dispela graun wantaim olgeta amamas bilong em bai i pinis, olsem na bihain long dispela laip i gat eterniti long heven o eterniti long hel. Na i gat stori tu bilong wanpela monk i bin pasim em yet insait long wanpela hul, na oltaim em i save singaut strong olsem: «Eterniti! Eterniti!». Dispela monk i no laik go ausait long hul, long wanem em i pret long ol amamas bilong graun i ken pulim em long mekim sin.

O God bilong mi! Planti taim yu sapos long salim mi i go long hel pinis! Mi bin mekim planti sin tumas! Olsem na nau mi askim yu long helpim mi long sori long ol sin mi bin mekim. Yu mas marimari long mi!

Santu Jon bilong Avila i tok moa olsem: «**Man o meri i bilip long eterniti na i no wok long kamap santu, orait ol i mas pasim em wantaim ol longlong man**». Na dispela tok bilong em, em i tru olgeta, long wanem sapos yumi save olsem bihain long dispela laip i

gat wanpela eterniti i wetim yumi, orait yumi sapos long tanim bel nau na bihainim laik bilong God oltaim!

Bai mi givim wanpela tok piksa: man o meri i wok long kamapim wanpela nupela haus, em i tingting gut long haus em i laik mekim, long wanem em bai i stap planti yia insait long dispela haus. Em i tru o nogat? Olsem wanem na yumi no save tingting gut long kamapim wanpela haus bilong yumi long heven? Wanpela de yumi bai i stap inap oltaim oltaim long heven o long hel. Olsem wanem na yumi no save tingting long eterniti? **Long eterniti i gat tupela kain haus tasol: o yu stap long wanpela haus king long heven, o yu stap long wanpela hul namel long paia long hel.** I no gat narapela ples yu bai i go long em. Nogat tru. Na long heven o long hel yumi bai i stap inap hamaspela yia? I no 50-pela yia yu bai i stap long em. I no 100-pela yia yu bai i stap long em. Nogat olgeta. **Yu bai i stap long em inap oltaim oltaim, inap long God i stap laip yet.**

Ol santu i bin mekim planti penans na sakrifais bilong sevim sol bilong ol. Na yumi olsem wanem? Yumi i save mekim wanem pasin bilong sevim sol bilong yumi?

O God bilong mi! Indai bilong mi i wok long kam klostu nau. Olgeta de mi stap laip em i wanpela de mi kam klostu long indai bilong mi. Na mi bin mekim wanem samting inap nau? Helpim mi, gutpela God, na givim lait na strong long mi, bai mi no ken paul moa, na mi ken i stap gut olgeta de inap long indai bilong mi. **Inap nau long mekim sin!** Mi laik bihainim laik bilong yu tasol.

Santu Pol i skulim yumi olsem: ***Nau yupela i mas pret na guria na wok strong long kisim tru dispela presen God i makim bilong yupela*** (Filipai 2:12). Olsem na yumi mas pret na guria, nogut yumi lus olgeta long hel! Yumi mas wok hat bilong sevim sol bilong yumi. **Na yumi mas pret tu long mekim sin, long wanem, sin tasol i save pulim yumi i lus long hel.** Man o meri i save pret long mekim sin, em i save ranawe tu long ol samting i laik pulim em long pundaun long sin. Na ol dispela man na meri i save trastim God oltaim na askim em long helpim ol. Man o meri i mekim olsem, em bai i go long heven. Tasol man o meri i no save stap longwe long ol samting i save pulim em long mekim sin, em bai i lus olgeta. Santu Bernard i tok: **«Yumi no ken stap nating na tingting olsem yumi bai i go long heven. Nogat. Yumi mas guria na wok hat inap long las de bilong laip bilong yumi».**

O gutpela Ridima bilong mi! Blut bilong yu tasol i save givim hop long mi! Mi trastim yu, long wanem yu bin kapsaitim blut bilong yu bilong kisim bek mi. Mi bin lusim yu long ol sin mi bin mekim, tasol sapos mi sori na tanim bel, yu redi long welkamim mi gen insait long banis bilong yu. Olsem na nau mi sori tru long ol sin bilong mi. Mi sori long pen mi bin givim long yu. Mi laikim yu, Jisas, moa long olgeta samting! Yu gat bikpela laik long kisim mi i go long heven, olsem na mi laik wok hat bilong sevim sol bilong mi. Mi laik givim mi yet olgeta long yu inap oltaim oltaim.

O gutpela Mama bilong God! Yu mas pre long Jisas bilong helpim mi.

3

Yumi mas sevim sol bilong yumi

Long Buk Baibel Jisas i tok: «***Yu mas tingting long wanpela samting tasol***» (Luk 10:42). **Dispela wanpela samting tasol em i sol bilong yumi.** Jisas i laik bai yumi tingting oltaim long wok hat bilong sevim sol bilong yumi. Yumi no nidim long kamap bikman long ai bilong ol manmeri... Yumi no nidim long kamap maniman na hipim hipim planti samting... Yumi no nidim long stap strong na abrusim ol sik bilong bodi... Nogat tru. **Yumi nidim wanpela samting tasol: sevim sol bilong yumi.** Long dispela as tasol God i bin kamapim yumi na putim yumi long dispela graun. God i no kamapim yumi bai yumi kamap maniman o bikman. Nogat olgeta! **Em i kamapim yumi bai yumi ken mekim planti gutpela pasin na sevim sol bilong yumi na go long heven.** Olsem na God i save givim dispela bikpela pe long ol manmeri i save bihainim em na pait wantaim Satan na ol traim nogut bilong em.

O Jisas bilong mi! Bipo planti taim mi bin harim tok bilong Satan na mi bin mekim planti sin tumas! Mi bin lusim yu na grasia bilong yu. Tasol mi no sori tumas long mi bin lusim heven. Nogat. Mi sori tumas long wanem mi bin lusim yu. Na long ol sin bilong mi, mi no pren bilong yu moa. Olsem na nau mi askim yu long kirapim bikpela sori insait long sol bilong mi, bai mi ken sori tru long ol sin m bin mekim. Jisas, mi askim yu long pogivim mi!

Sapos yumi i sevim sol bilong yumi na yumi go long heven, orait yumi no ken wari tumas sapos yumi i no gat planti samting, o yumi sik, o ol manmeri i givim baksait long yumi. **Sapos yumi go long heven, yumi no ken wari long ol samting bilong graun, long wanem heven i no save pinis na yumi bai amamas inap oltaim oltaim.** Na sapos yumi karim planti pen na yumi no komplein na i gat peisens, orait, ol dispela pen bai i givim bikpela glori na amamas long yumi long heven. Tasol sapos yumi pulap long planti mani na yumi gat biknem long ai bilong ol manmeri, tasol yumi lus olgeta long hel, orait ol dispela samting bilong yumi bai i no inap long helpim yumi liklik. Sapos yumi go long hel, orait ol samting yumi bin lusim long dispela graun, bai givim moa pen long yumi, taim yumi i kukim yumi yet long hel.

O God bilong mi! Yu mas givim lait long mi, bai mi ken save gut olsem: sapos mi givim baksait long yu, mi bai i lus olgeta. Tasol sapos mi bihainim yu na mi laikim yu, orait mi bai i sevim sol bilong mi. Olsem na mi askim yu long strongim mi, bai mi ken mekim ol pasin i save givim amamas long yu tasol inap long las de bilong laip bilong mi.

I gat tupela rot tasol: wanpela rot i go long heven, na narapela rot i go long hel. Em tasol. I no gat wanpela rot namel long tupela. Olsem na yumi bai i go long heven o yumi bai i go long heven. Olsem na yumi no ken tingting olsem God bai kisim yumi i go long hel nating. Nogat. Yumi mas pulap long planti gutpela pasin na stap pren bilong em. Sapos yumi no mekim olsem, orait yumi bai i lus olgeta. **Eterniti i stap long han bilong yumi: o amamas inap oltaim oltaim long heven, o paia i no save dai wantaim Satan na ol spirit nogut inap oltaim oltaim long hel.** O yumi sevim sol bilong yumi na i go long heven, o yumi lus olgeta na go long hel. I no gat narapela rot namel long dispela tupela rot.

O Jisas bilong mi! Bipo planti taim mi bin wokabaut long rot i go long hel, tasol yu pulap long marimari, olsem na yu bin helpim mi long kam bek long gutpela rot. Olsem na nau mi laik tok tenkyu long yu, gutpela Ridima bilong mi! Na mi sori tru long olgeta taim mi bin givim baksait long yu. Nau mi no laik wokabaut moa long rot i go long hel. Nogat. Mi laikim yu tru, long wanem yu olgeta gutpela samting bilong mi. Na mi laik pas wantaim yu inap oltaim oltaim. Yu mas helpim mi long inapim gut ol promis mi mekim long yu. Na tu yu mas tingim blut bilong yu i kapsait long diwai kros, na kisim bek mi.

O Maria! Yu hop bilong mi! Yu mas pre long Jisas bilong helpim mi oltaim.

4

**Sevim sol bilong yumi
em i nambawan bisnis**

Dispela pasin bilong sevim sol bilong yumi em i nambawan bisnis insait long laip bilong yumi. Planti manmeri i save wok hat na tuhat planti long mekim ol bisnis bilong dispela graun. Ol i save tingting planti na westim planti taim, na ol i save wok hat bilong mekim ol bisnis bilong ol i kamap gut. Sampela taim ol dispela manmeri i no save kaikai, long wanem ol i bisi long mekim bisnis bilong ol. Na planti taim ol i no save slip tu, long wanem ol i save wok long nait tu. Tasol ol dispela manmeri i no save tingting tumas long nambawan bisnis bilong ol: sevim sol. Ol i save mekim kain kain sakrifais bai bisnis bilong ol i ken kamap gut, tasol ol i no save mekim wok bilong sevim sol bilong ol. **Eterniti em i nambawan bisnis bilong yumi. Long wanem, sapos yumi sevim sol bilong yumi, yumi**

bai i go long paradais. Tasol sapos yumi no sevim sol bilong yumi, yumi bai i lus olgeta long hel.

O God bilong mi! Givim lait long mi, bai mi ken tingim oltaim olsem eterniti em i nambawan bisnis insait long laip bilong mi. Bipo mi bin olsem wanpela aipas i no save gut long ol samting, olsem na nau mi askim yu long givim lait long mi, bai mi ken kisim save na stap gut.

Sapos haus bilong yumi i bagarap, orait yumi save wok hat bilong stretim em. Na sapos yumi lusim wanpela naispela naispela bis, orait yumi save wok hat bilong painim em. **Tasol planti taim yumi save lusim grasia bilong God na yumi wok long lusim sol bilong yumi, na yumi no save wari!** Olsem na yumi save kaikai, na lap, na stap nating... na sol bilong yumi i wok long lus long hel. Yumi save wari tumas long ol samting bilong bodi, tasol planti taim yumi no save wari tumas long sol bilong yumi. **Yumi wari sapos bodi bilong yumi i kisim sik, tasol yumi no save wari sapos sol bilong yumi i pulap long sin na i no gat grasia insait long em.** Olsem na ol santu i ken amamas tru, long wanem ol i no bin wari long ol samting bilong dispela graun! Ol i bin wari long sevim sol bilong ol tasol, olsem na nau ol i stap amamas inap oltaim oltaim long heven. Tasol planti taim yumi save tingting long ol samting bilong graun tasol, na yumi lustingting long sevim sol bilong yumi.

O Jisas bilong mi! Yu bin laikim sol bilong mi tumas! Olsem na yu bin kapsaitim blut bilong yu, na yu bin lusim laip bilong yu tu. Tasol

bipo mi yet no bin wari long sol bilong mi, olsem na planti taim mi bin lusim grasia bilong yu long ol sin bilong mi. O Bikpela bilong mi! Mi sori tumas long ol taim mi bin sakim tok bilong yu. Nau mi laik lustingting long ol samting bilong dispela graun, na mi laik laikim yu tasol, long wanem yu masta bilong lewa bilong mi.

Yumi putim yau nau: **Pikinini bilong God i save wok hat bilong kisim yumi i go long heven, na Satan tu i save wok hat bilong kisim yumi i go long hel. Olsem wanem na planti taim yumi save stap nating na yumi no wari long sol bilong yumi?** Santu Filip Neri i tok: «Ol manmeri i no save wari long sol bilong ol, ol i olsem ol longlong man». Olsem na yumi mas mekim bilip bilong yumi i kamap bikpela moa moa yet, long wanem taim laip bilong yumi i pinis hia long graun, eterniti i wetim yumi. **Na eterniti i min olsem: o heven o hel, inap oltaim oltaim.** God i givim sans long yumi bai yumi ken skelim gut, olsem na eterniti i stap long han bilong yumi. Buk Baibel i tok: ***Laip na i dai i stap long han bilong ol manmeri. Na wanem samting ol manmeri i laik kisim, bai Bikpela i givim long ol*** (Sirak 15:17). Olsem na yumi mas skelim gut na kisim laip i stap gut oltaim oltaim!

O God bilong mi! Yu mas givim gutpela tingting long mi, bai mi ken save gut long ol rong mi bin mekim long taim mi bin lusim yu long ol sin bilong mi. Mi bin laikim tumas ol samting bilong dispela graun, olsem na mi bin lusim yu. Mi sori tru wantaim olgeta hat bilong mi, na mi askim yu long holim mi strong, long

wanem mi no laik lusim yu gen. **Mi laikim yu moa long olgeta samting, na nau mi no wari long lusim ol samting bilong dispela graun, long wanem grasia bilong yu em i nambawan samting insait long laip bilong mi!** Yu mas tingim Pen na Indai bilong yu, na helpim mi oltaim!

O Maria, yu Mama bilong God! Yu mas helpim mi long taim bilong kot!

5

Yumi mas wok hat bilong sevim sol bilong yumi

Satan em i as bilong olgeta giaman tok, olsem na planti taim em i save giamanim ol manmeri, na tokim ol olsem em i hat nogut tru long sevim sol bilong yumi. Em i tok olsem bai ol manmeri i ken lusim hop na i no wok moa long sevim sol bilong ol. Em i tru olsem planti santu i bin go stap long ples nating o ol i bin go long ol monasteri bilong sevim sol bilong ol, tasol God i no laik bai yumi olgeta i mekim wankain pasin olsem ol. Nogat. **I gat 3-pela samting God i laik bai yumi olgeta i mekim: Nambawan samting em i olsem:** God i laik bai yumi kisim planti taim ol sakramen (na konpesio na komunio i mas stap nambawan!). **Nambatu samting em i olsem:** em i laik bai yumi i abrusim ol samting i save pulim yumi long mekim sin. **Na namba tri samting em i olsem:** em i laik bai yumi pre oltaim long em. Em tasol. Dispela 3-pela samting

bai helpim yumi long sevim sol bilong yumi. Na long taim bilong indai, yumi bai luksave olsem em i bin isi tru long inapim ol dispela 3-pela samting. Tasol sapos yumi bin les, orait yumi bai i krai sori long lespasin bilong yumi, long wanem em i bin isi tumas long bihainim ol dispela 3-pela samting.

Olsem na yumi mas pasim tok wantaim yumi yet na i tok: «Mi laik sevim sol bilong mi, na mi no ken les long mekim sakrifais». Yumi ken lusim olgeta samting bilong yumi, tasol yumi no ken lusim sol bilong yumi. Yumi ken lusim ol pren na ol samting bilong dispela graun, tasol yumi no ken lusim sol bilong yumi. Nogat tru! Maski yumi mas lusim planti samting na mekim planti sakrifas bilong sevim sol bilong yumi, em yumi i mas sevim! Eterniti i wetim yumi, olsem na yumi bai i stap amamas inap oltaim oltaim long heven, o yumi bai i krai sori inap oltaim oltaim long hel. Olsem na yumi mas redi oltaim long mekim planti sakrifas bilong sevim sol bilong yumi. Santu Bernard i tok: **«Sapos yu no laik i go long hel, orait yu mas redim yu yet long mekim planti sakrifais, long wanem em i no isi».**

O God bilong mi! Mi sem long kam long ai bilong yu, long wanem planti taim mi bin givim mi yet long amamas bilong dispela graun, na mi bin givim baksait long yu. Planti taim mi bin lusim grasia bilong yu nating, long wanem mi bin bihainim laik bilong mi tasol. Tasol nau mi no laik birua bilong yu moa. Nogat. Mi no laik lusim yu gen. Olsem na mi laik tok strong olsem: ***Yu mas harim prea bilong mi, na kisim bek mi kwiktaim. Yu stap olsem bikpela***

maunten ston mi ken hait long em. Na yu mas banisim mi gut, bai mi stap gut na ol birua i no inap daunim mi (Buk Song 31:2). Mi no laik lusim yu gen, Jisas, mobeta mi laik i dai pastaim.

Na sapos bipo yumi bin lusim grasia bilong God, orait nau yumi mas stretim dispela rong bilong yumi. **Yumi mas tanim bel hariap! Yumi no ken westim taim!** Hel i pulap long planti manmeri i no bin tanim bel long lespasin bilong ol. Ol i pulim taim na tingting olsem bihain ol bai i tanim bel, tasol indai i bungim ol long taim ol i no redi. Sapos long de bilong indai bilong ol God i givim las sans long ol long tanim bel, mi ting ol bai i tanim bel hariap! Tasol taim bilong ol i pinis, olsem na nau ol i lus olgeta long hel. Tasol yumi stap laip yet, olsem na God i wok long givim sans long yumi, bai yumi lusim ol sin bilong yumi na kam bek long em.

O God bilong mi! Olsem wanem na mi wok long pulim taim yet? Olsem wanem na mi no givim mi yet olgeta long yu? Nogut mi westim taim nating na mi tingting olsem bihain bai mi tanim bel! Tasol mi no save long wanem de indai bai kisim mi. Olsem na mi laik tok tenkyu long yu, long wanem mi stap laip yet, na yu givim sans long mi long tanim bel. Mi laikim yu, God bilong mi! Mi laikim yu wantaim olgeta strong bilong mi, na mi laik i stap pren bilong yu oltaim. Mi no laik mekim sin moa, mobeta mi laik i dai pastaim. Na nau mi tokim yu olsem santu Katerin i save tokim yu oltaim: «**O Jisas, yu lewa bilong mi! Mi no laik mekim sin moa, mi no laik mekim sin moa**». Tasol yu save pinis olsem bipo mi bin mekim planti

sin, long wanem mi wik na mi no gat strong, olsem na nau mi askim yu long helpim mi oltaim. Helpim mi, gutpela Jisas bilong mi! Mi trastim yu!

Na mi trastim yu tu, naispela Mama bilong God, long wanem oltaim yu save harim ol singaut bilong mi.

6

Taim em i bikpela samting tru

Taim em i bikpela samting tumas, na yumi no inap mekim wanpela samting bilong baim em. Nogat. God i makim pinis hamaspela de yumi bai i stap laip, na yumi no inap long senisim dispela samting. Olsem na yumi mas yusim gut taim bilong yumi, long wanem taim bilong yumi inap long helpim yumi long sevim sol, na tu em i inap long helpim yumi long lus olgeta. **Ol manmeri i stap long hel i save tingim ol de ol i bin stap laip, na ol i krai nogut tru, long wanem nau tasol ol i luksave olsem ol i no bin yusim gut taim bilong ol.** Tasol nau taim bilong ol i pinis, olsem na ol i no inap long mekim wanpela samting. Ol bai i stap long hel inap oltaim oltaim. Mi ting olsem ol manmeri i stap long hel bai amamas tru sapos God i givim wanpela aua moa long ol, long wanem ol bai i yusim dispela aua bilong tok sori long em na go long heven. Tasol nogat! Na ol manmeri i stap long heven ol i no inap

long bel hevi, tasol mi ting sapos ol inap long bel hevi, orait ol bai bel hevi liklik tu, long wanem ol bai i skelim laip bilong ol, na ol tu bai luksave olsem planti taim ol i bin westim taim bilong ol nating.

O God bilong mi! Mi tok tenkyu long yu, long wanem yu givim taim long mi, bai mi ken sori long ol sin mi bin mekim, na laikim yu tasol.

Taim i winim olgeta samting bilong dispela graun, long wanem em i givim sans long sevim sol bilong yumi. Tasol planti manmeri i save westim taim bilong ol long ol samting bilong graun, na ol i no save givim taim long God. Planti manmeri i save pilai na amamas wantaim ol pren bilong ol planti aua tumas! Sampela i save sindaun na pilai na stori inap long 5-pela o 6-pela aua... Na sampela i save sindaun long ol ples bung, na toktok wantaim ol lain i wokabaut long ples... Na sampela i save stap nating long haus... **Sori tumas long ol dispela manmeri i westim taim bilong ol! Long taim bilong indai, ol bai i mangal long wanpela moa aua, tasol bai i nogat!** Ol bai i laik i stap laip yet wanpela moa aua long graun bilong redim ol yet long indai, tasol ol bai i no inap. Na taim ol bai i harim: «O sol, yu mas lusim dispela graun nau!», ol bai i sori tumas long olgeta yia, na de na aua ol i bin westim nating taim bilong ol. Na ol bai i tok insait long ol yet olsem: «Sori long mi nau! Mi westim nating laip bilong mi! Mi bin stap planti yia long graun na mi no bin kamap santu! Mi westim taim bilong mi nating, olsem na nau mi no inap long stretim ol rong bilong mi». **Tasol dispela krai bilong ol bai i no inap long helpim ol liklik. Nogat tru. Taim i pinis nau.**

Jisas i tok: «***Nau yupela i gat lait yet, olsem na yupela i mas wokabaut long lait, nogut tudak i karamapim yupela***» (Jon 12:35). Dispela tudak Jisas i toktok long em, em i piksa bilong indai, long wanem long tudak yumi no inap mekim wanpela samting, long wanem yumi no inap lukim. Jisas i tok moa olsem: «***Nau em i tulait yet, na yumi mas mekim wok bilong God... Tudak bai i kamap, na ol man bai i no inap mekim wanpela wok***» (Jon 9:4). Olsem na Holi Spirit i singautim yumi long wokabaut long gutpela rot long taim bilong lait, em i dispela laip yumi gat nau. Yumi mas tingting olsem de bilong indai i wok long kam klostu, na yumi bai i lusim olgeta samting bilong dispela graun, na eterniti i wetim yumi. **Goan! Yumi mas tanim bel nau na stretim dinau wantaim God!** Long wanem i no longtaim em bai i kam bilong kotim yumi. Jisas yet i tok: «***Yupela tu i mas redi. Pikinini Bilong Man bai i kam long wanpela taim yupela i no ting em bai i kam***» (Luk 12:40).

O Jisas bilong mi! Nau tasol yu mas pogivim mi! Mi no laik westim taim bilong mi moa! Mi wetim wanem samting? Nogut mi westim taim bilong mi, na mi go long kalabus bilong hel inap oltaim oltaim! Mi no laik bungim ol manmeri i stap long hel! Nogat tru! Mi no laik krai wantaim ol na singaut olsem: «***Gutpela taim i pinis... Tasol God i no kisim bek yumi yet***» (Jeremaia 8:20). No, Bikpela bilong mi, mi no laik givim baksait moa long yu! Mi laik bihainim yu tasol, nogut dispela meditesen nau tasol mi wok long ritim em i las sans yu givim long mi long tanim bel. Mi sori, dia Jisas, long ol taim mi bin sakim

tok bilong yu! Nau mi laik givim olgeta taim bilong mi long yu, inap long las aua bilong laip bilong mi! Mi askim yu long helpim mi long wokabaut gut long rot i go long yu! Mi no laik mekim sin moa, na mi laik pas wantaim yu tasol.

O Maria, yu gutpela ples hait bilong ol manmeri bilong sin! Mi trastim yu!

7

Yumi go long eterniti

Buk Baibel i tok: *Na bai yupela i dai na i go long ples yupela bai i stap oltaim oltaim long em. Na ol manmeri long taun bilong yupela, bai ol i krai na singsing sori. Yupela i mas tingim God long taim yupela i no i dai yet* (Eklisiastis 12:5-6). Dispela ples graun nau yumi stap long em, em i no trupela ples bilong yumi. Yumi olgeta i olsem pasindia long dispela graun, na yumi wok long redim yumi yet long go long trupela ples bilong yumi long eterniti. Olsem na dispela ples na haus nau mi i stap long em, em i no trupela ples na haus bilong mi. Nogat. I no longtaim bai mi lusim dispela ples graun wantaim olgeta samting i stap long em, na mi bai i go long eterniti. **Bodi bilong mi bai i bagarap long matmat, na sol bilong mi bai i go long trupela ples bilong em long eterniti.** Sapos mi save bihainim laik bilong God, orait bai mi go long heven. Tasol sapos mi save bihainim laik bilong mi tasol, orait bai mi lus olgeta

long hel. Mi longlong tumas sapos mi givim lewa bilong mi long ol samting bilong dispela graun, na mi lustingting long redim haus bilong mi long eterniti!

Buk Baibel i tok klia olsem: ***Na bai yupela i dai na i go long ples yupela bai i stap oltaim oltaim long em*** (Eklisiastis 12:5). I min olsem yumi olgeta bai i dai na i kisim pe inap long pasin yumi bin mekim taim yumi stap laip. Ol pasin bilong yumi tasol bai i makim long wanem ples yumi mas i go long em. **Olsem na dispela ples yumi bai i go long em i stap long han bilong yumi.** Bilip bilong yumi i tok klia olsem: heven o hel. Em tasol. I no gat narapela rot. Long eterniti i gat tupela kain haus tasol: o wanpela haus king we ol i save amamas oltaim long heven, o wanpela kalabus we ol i save krai na skripim tit bilong ol oltaim long hel. Olsem na yumi mas skelim gut taim yumi stap laip yet! Olsem na sapos yumi laik go long heven, orait nau yumi mas wokabaut long rot i go long em. Sapos yumi les long wakabaut long dispela rot, orait yumi bai i go stret long hel.

Olsem na, dia Jisas, givim lait na strong long mi! No ken larim mi i lusim yu gen!

Na bai yupela i dai na i go long ples yupela bai i stap oltaim oltaim long em (Eklisiastis 12:5). Sapos mi sevim sol bilong mi, mi bai i stap long haus bilong mi long heven na amamas inap oltaim oltaim. Sapos mi lusim sol bilong mi, orait mi bai i krai nogut tru inap oltaim oltaim long hel. **Olsem na mi mas sevim sol bilong mi!** Mi laik bai ai bilong mi i lukluk long eterniti tasol. Man o meri i

tingting oltaim long eterniti, i no save givim em yet long ol samting bilong dispela graun, olsem na em bai inap long sevim sol bilong em. Olsem na nau mi laik mekim planti gutpela pasin, bai ol gutpela pasin bilong mi i ken kisim mi i go long paradais.

O God bilong mi! Mi save bilip long laip bilong oltaim oltaim! Olsem na long tude inap long las de bilong laip bilong mi, mi laik i stap gut long ai bilong yu. Bipo mi bin lusim yu long ol sin mi bin mekim. Tasol nau mi no laik lusim yu gen. Mi laik mekim wok bilong yu, na laikim yu inap long las aua bilong laip bilong mi. O Jisas bilong mi, yu mas helpim mi! Yu no ken lusim mi!

O Maria, yu Mama bilong mi! Yu mas sambai long mi oltaim.

8

Heven o hel. I no gat narapela rot.

Santu Pol i tok: *Yupela i mas pret na guria na wok strong long kisim tru dispela presen em i makim bilong yupela* (Filipai 2:12). Em i tok olsem yumi mas pret na guria, long wanem i no gat narapela rot: o yumi bai i go long heven o yumi bai i go long hel. Em tasol. I no gat narapela rot namel long dispela tupela rot. Olsem na man o meri i no save pret na guria, em bai i no wari long sevim sol bilong em, na em bai i go long hel. Man o meri i no save pret long eterniti, em bai i tingting long ol samting bilong dispela graun tasol, na bihain em bai i lus olgeta. **God i laik bai yumi olgeta i go long heven, tasol em i laik bai yumi wok hat bilong sevim sol bilong yumi tu.** Olgeta manmeri i save tok olsem ol i laik i go long heven, tasol i no planti manmeri i save wok hat bilong i go long heven. Planti manmeri i save pulap long planti gutpela toktok na tingting, tasol ol i sot long gutpela pasin, olsem na ol dispela toktok na tingting bai i no inap long helpim

ol liklik. Santu Filip Neri i tok: «**Ol manmeri i stap nating na i no save mekim sakrifais, ol i no redi long go long heven**».

Bikpela bilong mi! Givim lait long mi, bai mi ken luksave gut long wanem samting mi mas mekim bilong sevim sol bilong mi. Na mi laik save tu long olgeta samting i save pulim mi long mekim sin, bai mi ken stap longwe long ol. Mi laik sevim sol bilong mi tasol!

Santu Terese i save tokim ol sista olsem: «**Ol sista bilong mi, yumi no ken lustingting: yumi gat wanpela sol tasol, na wanpela eterniti tasol**». Em i tok olsem bilong kirapim tingting long ol sista long ol i mas wok hat bilong sevim sol bilong ol, na lustingting long olgeta samting bilong graun. Long wanem, sapos yumi lusim sol bilong yumi, orait yumi lusim olgeta samting. Na taim yumi lusim sol bilong yumi, yumi bai i lus inap oltaim oltaim.

I gat stori bilong Pop Benedik namba 12 i olsem: wanpela strongpela king i askim Pop Benedik long mekim wanpela tok giaman, long wanem dispela tok giaman bilong Pop bai i helpim king long winim planti samting. Olsem na Pop i bekim tok bilong king olsem: «Harim. Sapos mi gat tupela sol, orait mi ken mekim olsem yu tok. **Tasol mi gat wanpela sol tasol, na mi no laik lusim em**. Olsem na mi no laik long mekim dispela sin yu askim mi long mekim». Wankain toktok yumi mas mekim long Satan na long ol pren nogut, taim ol i laik pulim yumi long mekim sin.

O God bilong mi! Planti taim mi bin lusim grasia bilong mi, long wanem mi bin mekim planti sin tumas! Tasol yu bin pogivim mi,

olsem na nau mi no laik mekim sin moa. Mi laikim yu moa long olgeta samting!

Santu Fransis Sevia i tok: «I gat wangepela gutpela samting na wangepela samting nogut tasol. Dispela gutpela samting, em i olsem: sevim sol. Na dispela samting nogut, em i olsem: lus long hel». Na ol narapela samting nogut bilong dispela graun (olsem ol sik, o stap olsem rabisman, o kisim bagarap long han bilong ol birua) i ken kamap gutpela tu, sapos yumi ofarim ol dispela pen long Jisas, long wanem Jisas bai i givim pe long peisens bilong yumi. Tasol ol manmeri bilong sin, maski ol i gat planti samting long dispela graun, ol i save yusim ol samting bilong graun bilong mekim sin, na bihain ol bai i lus olgeta long hel.

O God bilong mi! Yu mas kisim bek mi na sevim mi! Yu ken mekim long mi long laik bilong yu! Mi trastim yu, long wanem tingting bilong yu i winim tru tingting bilong mi. Olsem na mi laik putim mi yet long han bilong yu, bai yu ken mekim long mi olsem yu laik. Yumi mas tok olsem Profet Devit: ***Mi putim spirit bilong mi long han bilong yu. Bikpela, yu God bilong mekim pasin tru tasol, yu kisim bek mi pinis*** (Buk Song 31:5). Mi sori tumas long ol taim mi bin givim baksait long yu. Nau mi laikim yu, na mi no laikim narapela samting. Nogat tru. Mi laik i stap wantaim yu inap long las de bilong laip bilong mi. Yu tu i mas laikim mi, Jisas, na helpim mi long stap gut oltaim.

O santu Maria! Yu mas helpim mi oltaim.

9

**Longlong pasin bilong ol manmeri
i no save wari long sol bilong ol**

Jisas yet i tok: «*Sapos wanpela man i kisim olgeta samting bilong graun, tasol sol bilong em yet i lus, orait dispela olgeta samting bai i helpim em olsem wanem?*» (Matyu 16:26). Planti maniman, na planti king na bikman, nau ol i stap long bikpela paia bilong hel! Na ol mani na gol na silva bilong ol i stap we? Nau ol dispela lain i tingting long ol dispela samting bilong graun, na ol i krai nogut tru na skripim tit bilong ol! Ol i bin givim ol yet long ol samting bilong graun, tasol nau ol i lus long hel inap oltaim oltaim.

O God bilong mi! Yu mas givim lait na strong long mi! Mi no laik lusim grasia bilong yu moa. Nogat tru. Yu mas marimari long mi, long wanem mi man bilong sin, tasol nau mi laik givim mi yet long yu.

Na wanpela saveman bilong Sios, nem bilong em Salviano, i tok: «**Olsem wanem? Ol manmeri i save bilip long indai, long kot, long hel na long eterniti... tasol ol i stap nating, na ol i no pret long sol bilong ol?!**». Olgeta manmeri i bilip long hel, tasol planti i les long tanim bel, olsem na ol i go long hel tu. Olsem wanem? Ol i go long hel long wanem ol i bilip long hel long tingting bilong ol, tasol ol i les long tanim bel na mekim gupela pasin.

O God bilong mi! Bipo mi tu i olsem wanpela longlong man i no bin wari long sol bilong mi. Mi save pinis olsem ol sin bilong mi i pulim mi i go long hel, tasol mi no bin wari long dispela. Nau mi laik tok wantaim Profet Devit olsem: *Putim nupela spirit insait long mi na bai mi bihainim yu tasol. Nogut yu rausim mi na mi stap longwe long yu. Spirit bilong yu yet i stap long mi, na yu no ken rausim long mi. Yu mas kirapim laik bilong mi long bihainim tok bilong yu, na yu ken strongim mi long mekim olsem... God, yu God bilong kisim bek mi, yu ken marimari long mi na yu no ken kilim mi i dai* (Buk Song 51:10-12.14). O gupela Sevia bilong mi! Mi save pinis long ol rong mi bin mekim, olsem na mi askim yu strong: **plis, yu no ken rausim mi i go longwe long yu!**

I gat stori bilong santu Filip Neri i olsem: wanpela pater bilong taun bilong em i no save mekim planti gupela pasin, na em i wari tumas long hipim hipim planti samting. Olsem na santu Filip i go lukim em na i tokim em olsem: «**Yu gat planti samting. Orait... na bihain? Wanem samting bai i kamap bihain long sol bilong yu?**». Olsem na

dispela pater i tingting gut long sol bilong em, na em i tanim bel na i tingting long mekim wok bilong sevim sol bilong em tasol. Buk Baibel i save toktok long ol manmeri i save tingting planti long ol samting bilong dispela graun olsem: «***Ol i no gat gutpela tingting. Tingting bilong ol i sot tru. Sapos ol i gat tingting, ol inap save long as bilong dispela samting i bin bagarapim ol***» (Lo 29:28-29). Yumi mas tingting oltaim long indai bilong yumi, long wanem indai em i pinis bilong olgeta samting bilong graun! Na yumi mas tingting oltaim long kot bilong God, long wanem yumi bai i stretim dinau wantaim God long ol pasin yumi bin mekim! Yumi mas tingting oltaim long eterniti! O amamas long heven o paia long hel! Sapos yumi tingting long ol dispela samting, mi ting olsem yumi olgeta bai i go long heven. **Tasol planti manmeri i no save tingting long indai bilong ol na long kot bilong God na long eterniti, olsem naol i save lus long hel inap oltaim oltaim.**

Mi laik tok tenkyu long yu, God bilong mi, long wanem yu bin wetim mi wantaim bikpela peisens! Mi tenkim yu long ol gutpela tingting yu save kirapim nau long bel bilong mi. **Bipo mi bin lustingting long yu, tasol yu no bin lustingting long mi.** Mi sori tumas long oltaim mi bin givim baksait long yu, na nau mi laik givim mi yet olgeta long yu. Olsem na mi no ken westim taim moa, nogut indai i bungim mi na mi no redi. Nogat tru. Tude tasol mi bai i stat long senisim ol pasin nogut bilong mi! Mi no laik mekim sin moa, long wanem mi laik i stap gut long ai bilong yu inap long las de bilong

laip bilong mi. Mi laikim yu, gutpela God bilong mi, na mi askim yu long strongim mi, bai mi ken bihainim laik bilong yu oltaim.

O Maria, yu ples hait bilong ol manmeri bilong sin! Yu mas pre long Jisas bilong helpim mi.

10

Yumi mas wok hat bilong sevim sol

Sapos yumi laik sevim sol bilong yumi, orait yumi mas wok hat. **Em bai i no inap sapos yumi wok long abrusim ol mortal sin tasol. Nogat. Yumi mas wok hat long abrusim ol venial sin tu.** Long wanem sapos yumi no wok long abrusim ol venial sin tu, orait ol venial sin bai i pulim yumi isi isi long pundaun long ol mortal sin tu. Na sapos yumi pundaun long mortal sin na yumi dai, orait sol bilong yumi bai i lus. Bai mi givim wanpela tok piksa: sapos wanpela king i singautim yu long mekim wok bilong helpim em long haus king bilong em, orait yu bai i wok hat bilong abrusim olgeta samting em i save les long em, nogut em bel nogut long yu na rausim yu. **Na God olsem wanem? Olsem wanem na planti taim yumi no save wok hat bilong abrusim tu ol venial sin i save mekim Jisas i bel hevi?** Planti taim yumi save mekim planti sakrifais bai bodi bilong yumi i ken stap gut na strong na abrusim ol sik, tasol yumi no save wok hat bilong

mekim sol bilong yumi i stap klin olgeta. Yumi save pret long ol birua bilong bodi, tasol yumi no save pret tumas long ol birua bilong sol.

O God bilong mi! Bipo mi tu mi no bin putim yau long ol dispela samting, na mi no bin mekim gut wok bilong yu! Tasol nau mi laik senis, olsem na mi askim yu long helpim mi.

O bratasusa bilong mi! Sapos God i no mekim planti gutpela samting bilong helpim yu, yu bai i lus olgeta. Olsem wanem na yu no save mekim planti gutpela samting bilong mekim em i amamas? Sapos God i no helpim yu, yu bai i lus long hel, long wanem long strong bilong yu yet, yu bai i no inap long stap gut na sakim ol tok bilong Satan. Sapos God i no helpim yu, yu bai i pundaun long kain kain mortal sin, na yu bai i go stret long hel. **Tasol God i save helpim ol manmeri i save helpim ol yet tasol. Sapos yu no save helpim yu yet long abrusim ol venial sin tu, orait God bai i no inap long helpim yu long abrusim ol mortal sin tu.** Buk Baibel i tok: *Yupela tingting gut long dispela. Man i planim liklik kaikai, em bai i kisim liklik kaikai tasol. Na man i planim planti, em bai i kisim planti* (2 Korin 9:6). Sapos yu mekim liklik wok bilong sevim sol bilong yu, orait God bai i helpim yu liklik. Na sapos yu mekim planti wok bilong sevim sol bilong yu, orait God bai i helpim yu planti.

Tasol yu, God bilong mi, yu bin wetim mi inap long tude! Mi bin givim planti pen long yu long ol sin bilong mi, tasol oltaim yu bin helpim mi na pulapim mi long planti grasia. Olsem na nau mi no laik givim baksait moa long yu. Nogat. Mi laik senisim ol pasin nogut bilong bipo.

Yumi no ken lustingting: sevim sol bilong yumi em i no isi. Em i hat, na em i hat nogut tru. Long wanem sol bilong yumi i gat planti birua i wok oltaim long bagarapim em. **Namba wan birua bilong yumi em i bodi bilong yumi**, long wanem em i save pulim yumi oltaim long givim amamas long em na mekim kain kain sin. **Namba tu birua bilong yumi em i dispela graun**, long wanem em i save pulim yumi long tingting long hipim hipim planti mani na planti samting bilong i stap gut. **Na namba tri birua bilong yumi em i Satan yet**, long wanem em i save kirapim kain kain tingting nogut insait long bel bilong yumi, bai yumi pundaun long sin. Na em i tru olsem God i redi long helpim yumi oltaim wantaim grasia bilong em, tasol em i tru tu olsem em i save helpim ol manmeri i save wok hat bilong abrusim ol samting nogut. **Sapos yumi no wok long abrusim ol samting nogut, orait God i no inap helpim yumi, long wanem long laik bilong yumi yet yumi bai i pundaun long sin.** Olsem na yumi mas pre oltaim long God, bai em i ken helpim yumi na strongim yumi long abrusim ol mortal sin na ol venial sin tu.

O Jisas bilong mi! Mi no laik i stap longwe long yu moa. Bipo mi bin givim baksait long yu, tasol nau mi laikim yu wantaim olgeta strong bilong mi. Mi pret long lusim yu gen, olsem na mi askim grasia long yu. Yu save pinis olsem mi wik, olsem na yu mas strongim mi. Mi trastim yu, dia Jisas!

Maria, yu Kwin bilong mi! Yu tu i mas pre bilong helpim mi oltaim.

11

Yumi mas bihainim laik bilong God tasol

Laikim pasin i save mekim man i bihainim laik bilong meri bilong em, na meri i bihainim laik bilong man bilong em. Na laikim pasin i save mekim laik bilong man na meri i pas, na laik bilong tupela i kamap wanpela tasol. Na God i laikim yumi tumas, olsem na em i laik bai yumi givim laik bilong yumi long em tu. Em yet i tok: ***Pikinini, yu mas trastim mi na amamas long lukim pasin bilong mi*** (Provep 23:26). Olsem na as bilong salvesen bilong yumi i olsem: **yumi mas bihainim laik bilong God oltaim**. Buk Baibel i tok: *Em i save kros long sotpela taim tasol. Na em i tingting gutpela long yumi na i mekim gut long yumi olgeta taim yumi stap long graun* (Buk Song 30:5). Olsem na man o meri i pas long laik bilong God, em bai i stap gut na sevim sol bilong em. Na man o meri i les long bihainim laik bilong God, em bai i lus olgeta long hel.

O God bilong mi! Mi no laik bihainim laik bilong mi moa! Mi laik pas long laik bilong yu tasol. Tasol yu mas givim grasia long mi, na bihain yu ken mekim long mi long laik bilong yu.

Ol manmeri i save laikim God tru i wok oltaim long bihainim laik bilong em tasol. Na taim Jisas i skulim yumi long pre, em yet i tokim yumi long yumi mas pre olsem: «***Mipela i mas bihainim laik bilong yu long graun olsem ol i save bihainim long heven***» (Matyu 6:10). Santu Terese i save ofarim laik bilong em long God inap long 50-pela taim long wan wan de. Oltaim em i save askim God long strongim em long bihainim laik bilong God. Na Profet Devit tu i tok: ***God, long bel bilong mi, mi redi long bihainim laik bilong yu*** (Buk Song 57:7). Sapos yumi bihainim oltaim laik bilong God, yumi ken amamas! Long wanem dispela pasin bilong bihainim laik bilong bai i helpim yumi long senisim laip bilong yumi na lusim ol pasin nogut bilong bipo. Buk Baibel i stori yumi long santu Pol. Bipo em i man nogut na em i save kalabusim ol kristen manmeri, tasol bihain em i tokim Jisas olsem: «***Bikpela, bai mi mekim wanem nau?***» (Wok bilong ol Aposel 22:10). Na taim em i redim em yet long bihainim laik bilong Bikpela, em i tanim bel na i kamap Aposel bilong Jisas.

O God bilong mi! Mi promis olsem mi no ken komplein moa long ol samting nogut i save kamap long mi. Mi save pinis olsem olgeta samting nogut i save helpim mi long kam klostu long yu. Oltaim mi laik tokim yu olsem: «***Bikpela, mi laik bihainim laik bilong yu***», na tu: «***Mi laik akseptim olgeta samting i kam long han bilong yu***». Jisas yet

i skulim yumi long pre olsem: «**Yes, Papa, yu bin bihainim laik bilong yu tasol na mekim olsem**» (Matyu 11:26). Jisas i tok olsem, long wanem laik bilong God i winim tru laik bilong yumi, olsem na yumi mas bihainim laik bilong God oltaim.

Sapos yumi laik save sapos wanpela man o meri i gutpela o nogat, yumi mas putim yau long dispela samting: **sapos dispela man o meri i akseptim ol samting nogut i kamap long em na em i bel isi, orait dispela man o meri i gutpela tru long ai bilong God**. Tasol sapos dispela man o meri i save komplein oltaim, orait dispela man o meri i no gutpela tumas long ai bilong God.

Na taim ol manmeri i givim hevi long yumi na mekim yumi i karim pen, orait yumi mas save olsem dispela em i wanpela sans God yet i givim long yumi, bilong traim peisens na bel isi bilong yumi. God i no laik bai ol manmeri i mekim pasin nogut, tasol sapos ol i mekim rong long yumi, orait yumi mas akseptim ol dispela rong wantaim bel isi. Long Buk Baibel i gat stori bilong Jop: planti samting nogut i bin kamap long em, na ol i bin stilim ol samting bilong em, na tu olgeta pikinini bilong em i dai wantaim. Na Jop i no komplein. Nogat. Em i akseptim ol dispela samting nogut i bin kamap long em wantaim bel isi, na em i tok: «**Bikpela yet i bin givim mi olgeta samting, na nau em i rausim pinis ol dispela samting. Olsem na mi litimapim nem bilong em**» (Jop 1:21).

O God bilong mi! Bipo planti taim mi bin sakim laik bilong yu, na mi bin bihainim laik bilong mi tasol. Tasol nau mi laikim yu moa

long mi save laikim mi yet, olsem na mi pas strong long laik bilong yu. Mi redi long akseptim olgeta samting i kam long han bilong yu. Yu save pinis olsem mi wik, olsem na mi askim yu long strongim mi. O laik bilong God, mi laik bihainim yu oltaim!

O Maria! Mi laik bihainim laik bilong God inap long las de bilong laip bilong mi.

Sin

12

Sin i bagarapim nem bilong God

Buk Baibel yet i skulim yumi olsem: *Yupela yet i save kalapim lo, na long dispela pasin yupela i bagarapim nem bilong God* (Rom 2:23). Taim ol manmeri i tingting long mekim sin, em i olsem ol i kisim wanpela skel long han bilong ol, na ol i skelim grasia bilong God na pasin bilong mekim sin wantaim. Na taim ol i wanbel long mekim sin, em i olsem ol i tok: «Dispela pasin nogut mi laik mekim i winim tru grasia bilong God». Olsem na long sin bilong ol, ol i save bagarapim tru nem bilong God, long wanem ol yet i skelim, na ol i laik bihainim laik bilong ol yet na i bagarapim pasin bilong i stap pren wantaim God.

O God bilong mi! Planti taim mi tu i bin lusim grasia bilong yu, na mi wok long tingting long amamas bilong graun tasol!

Na long dispela as tasol God yet i bel hevi na i tok: «*Yupela i save giaman na tokim ol manmeri long yupela i save autim tok*

bilong God. Tasol nogat. Yupela i save daunim nem bilong mi tasol» (Esekiel 13:19). Sapos taim yumi givim baksait long God ol i givim wanpela bokis mani o wanpela kingdom long yumi, orait yumi i longlong tumas, long wanem God i winim olgeta bokis mani na olgeta kingdom. Tasol planti taim yumi save givim baksait long em, long wanem yumi laik kisim liklik amamas bilong graun tasol. Na dispela amamas i save pinis wantu tasol, olsem na yumi i longlong moa moa yet! Planti manmeri i save wok long kisim ol liklik amamas bilong bodi, tasol ol i lusim God yet, em i as bilong olgeta gutpela samting.

O God bilong mi! Olsem wanem na planti taim mi tu i bin givim baksait long yu na tingting long givim amamas long bodi bilong mi? Tasol nau mi laikim yu moa long olgeta samting, olsem na mi sori long ol taim mi bin lusim yu. Nau mi no laik lusim yu moa, mobeta mi laik lusim olgeta samting bilong mi pastaim. Na mi redi long lusim laip bilong mi tu bilong givim amamas long yu. Yu mas marimari long mi. Mi no laik lusim grasia bilong yu gen. Sapos mi laik mekim sin, mobeta mi laik i dai pastaim.

Buk bilong Song i tok: ***Bikpela, i no gat wanpela olsem yu*** (35:19). O God, i no gat wanpela samting i bikpela na naispela olsem yu! Yu winim olgeta samting, long wanem yu no save pinis! Olsem wanem na planti taim mi bin givim baksait long yu? Olsem wanen na planti taim mi bin givim mi yet long olgeta samting bilong graun i save pinis?

O Jisas bilong mi! Blut bilong yu em i hop bilong mi. Yu bin promis long harim ol manmeri i singaut long yu. Mi no askim yu long givim planti samting bilong dispela graun long mi. Nogat. Mi askim yu tasol long pogivim mi long ol sin mi bin mekim, long wanem mi sori tru. Mi askim yu long strongim mi, bai mi ken wokabaut gut long rot i go long yu. Mi laik biahinim yu inap long las de bilong laip bilong mi. Sol bilong mi i laikim yu olsem wangepela yangpela marit meri i laikim man bilong em. O Bikpela bilong mi, yu mas helpim mi! Mi laik pas wantaim yu long dispela laip, na long laip bilong oltaim tu. Olsem na yu ken mekim long mi long laik bilong yu. Yu olgeta gutpela samting bilong mi! Mi no laik lusim yu gen.

O Maria, yu Mama bilong God! Yu mas harim prea bilong mi, na helpim mi long pas wantaim God, bai mi ken i stap wantaim em oltaim, na em i ken stap wantaim mi oltaim.

13

Sin i sakim tok bilong God

God yet i tok long Buk bilong Profet Aisaia olsem: «*Skai, yu putim yau, na graun, yu tu yu harim. Ol pikinini mi bin was long ol na ol i kamap bikipela, nau ol i sakim tok bilong mi*» (1:2). Em i olsem God i tok: «Mi bin was long ol pikinini bilong mi... mi bin lukautim ol gut na pulapim ol long planti gutpela samting... mi bin givim kaikai long ol, na ol i no bin sot long wanpela samting... **tasol ol i no wari long mi, na ol i bin sakim tok bilong mi**». Na husat em i dispela God i save komplein long pasin bilong ol pikinini bilong em? Dispela God em i God i bin kamapim heven na graun. Dispela God i bikipela tumas na i no gat pinis bilong em. Olgeta ensel na ol manmeri i olsem das nating long han bilong em. Buk Baibel i tok: ***Bikipela i lukim ol manmeri bilong graun i olsem samting nating. Ol i olsem das bilong graun na i olsem liklik wara i pundaun*** (Aisaia 40:15). Olgeta samting bilong heven na

graun i olsem samting nating long han bilong God! Buk Baibel yet i tok moa olsem: ***Olgeta manmeri bilong graun, ol i samting nating long ai bilong Bikpela. Ol i samting nating tru*** (Aisaia 40:17).

Olsem na nau mi kam long ai bilong yu, gutpela God bilong mi! Bipo mi bin sakim tok bilong yu planti taim tumas, tasol nau mi askim yu long pogivim mi, long wanem mi save olsem marimari bilong yu i no gat pinis bilong em. Mi laikim yu, Bikpela bilong mi, olsem na mi sori long ol sin mi bin mekim. Yu mas marimari long mi.

Mi bin givim baksait long yu, God! Tasol mi wanem samting? Mi samting nating! Mi olsem liklik binatang bilong graun long ai bilong yu. Na liklik strong bilong mi na ol samting bilong mi, i kam long yu tasol. Yu bin givim bodi na sol long mi. Yu bin givim tingting na save long mi. Yu bin givim planti gutpela samting long mi. Tasol mi bin givim baksait long yu. Na yu save givim taim long mi yet, bai mi ken tanim bel na kam long yu, nogut mi dai wantaim ol sin bilong mi, na mi go stret long hel. **O gutpela Sevia bilong mi! Peisens bilong yu i bikpela tumas!** Mi sapos long go long hel long ol sin bilong mi, tasol yu bin wetim mi inap long tude, olsem na yu givim sans long mi long tanim bel na lusim ol sin bilong mi. **Sapos mi bin dai wantaim ol sin bilong mi, bai mi stap we nau? Mi sapos long stap long paia bilong hel!** Tasol yu no laik bai mi lusim hop, olsem na mi trastim yu. Pen na Indai bilong yu bai strongim mi long senisim laip bilong mi. Yu bin kapsaitim blut bilong yu bilong kisim bek mi, olsem na mi no laik bai dispela blut bilong yu i lus nating. Nogat tru! Mi laik

sevim sol bilong mi.

Nau mi wok long skelim ol pasin bilong mi, na mi sori tumas! O Ridima bilong mi! Yu bin kapsaitim blut bilong yu bilong helpim mi, na mi bin givim baksait long yu na mekim kain kain sin. Mi bin man bilong kros, na man bilong givim amamas long bodi bilong mi, na man bilong bihainim laik bilong mi tasol... olsem na mi bin lusim yu planti taim tumas. **Bilim bilong mipela i tok olsem yu save marimari long ol manmeri i save sori long ol sin bilong ol, olsem na mi trastim yu.** Mi no trast long mi yet. Nogat. Mi trast long bikpela marimari bilong yu tasol. Olsem na mi givim planti kis long ol sua bilong yu, na mi askim yu long tingim ol sua bilong yu, na pogivim mi. Yu yet long Buk Baibel i skulim mi olsem: «*Tasol sapos wanpela man nogut i lusim sin bilong em, na em i bihainim ol lo bilong mi na mekim stretpela pasin tasol, orait bai em i no inap i dai. Nogat. Em bai i stap gut. Mi no ken tingim moa ol sin em i bin mekim bipo. Nau em i mekim stretpela pasin, olsem na em bai i stap gut*» (Esekiel 18:21-22). Mi sori nau long ol sin mi bin mekim, na long olgeta taim mi bin sakim tok bilong yu. Yu mas marimari long mi olsem yu yet i bin promisim mipela long Buk Baibel. Mi laikim yu moa long mi save laikim mi yet, olsem na mi no laik lusim grasia bilong yu moa.

O Maria, yu ples hait bilong ol manmeri bilong sin! Yu mas helpim mi, long wanem mi kam long yu.

14

Sin i daunim nem bilong God

Long Buk bilong Eksodas i gat stori bilong Moses tupela Aron i go lukim king bilong Isip. Na tupela i tokim king olsem Bikpela i laik bai ol Israel i lusim kantri Isip, na i go bek long kantri bilong ol. Tasol king i bekim tok olsem: «*Bikpela em i husat? Bilong wanem mi mas harim tok bilong em na larim yupela Israel i go? Mi no save long Bikpela, olsem na mi no ken larim yupela i go*» (5:2). Man o meri i save mekim sin, em i save mekim wankain toktok olsem king bilong Isip. Taim tingting nogut i kirap long bel bilong ol, na ol i save gut olsem dispela pasin i egensim God, tasol ol i laik mekim sin, ol i tokim God olsem: «Bilong wanem mi mas harim tok bilong Bikpela? Mi no save long em, olsem na mi les long bihainim tok bilong em».

O God bilong mi! Long ol sin mi bi mekim mi yet i bin mekim dispela toktok long yu! Tasol mi save olsem yu dai long diwai kros

bilong kisim bek mi, olsem na mi trastim yu long pogivim mi. Mi laik bai yu marimari long mi, dia Jisas, long wanem mi sori tumas long ol taim mi bin daunim nem bilong yu na sakim tok bilong yu. Mi no laik mekim sin moa, Jisas, mobeta mi laik i dai pastaim.

Long Buk bilong Profet Jeremaia, God i tokim ol Israel olsem: **«Bipo yet yu bikhet long mi na yu lusim wok mi bin givim yu, na yu tok, “Mi no ken mekim wok bilong yu moa”»** (2:20). Ol manmeri bilong sin tu i save tokim God olsem: *«Mi no ken mekim wok bilong yu moa»*. Taim God i tokim ol olsem: «Yu no ken krosim dispela man», o «yu no ken mekim dispela pasin pamuk», o «yu no ken stilim dispela samting»... ol manmeri bilong sin i bekim tok bilong God olsem: *«Mi no ken mekim wok bilong yu moa. Mi laik mekim dispela sin, olsem na mi les long harim tok bilong yu»*.

O God bilong mi! Planti taim mi tu i bin tokim yu: *«Mi no ken mekim wok bilong yu moa»*! Ol pasin bilong mi i bin egensim yu planti taim! Em i tru olsem maus bilong mi i no bin mekim dispela tok, tasol ol pasin nogut bilong mi i bin soim yu olsem mi no laik mekim wok bilong yu. Tasol nau mi askim yu: ***Nogut yu rausim mi na mi stap longwe long yu. Spirit bilong yu yet i stap long mi, na yu no ken rausim long mi*** (Buk Song 51:11). Nau tasol mi luksave long bikpela rong mi bin mekim, olsem na mi tok sori long yu. Na mi tokim yu olsem: mi no laik lusim yu gen, mobeta mi laik i dai pastaim.

God em i Papa bilong olgeta samting bilong heven na graun, long wanem em yet i bin kamapim olgeta samting. Buk Baibel i tok klia

olsem olgeta samting i kam long han bilong em tasol, long wanem long bikpela strong bilong em, em i mekim olgeta samting i kamap. Olgeta samting bilong skai i save harim tok bilong God. Olgeta samting bilong solwara na ol animal bilong graun i save harim tok bilong God. **Yumi ol manmeri tasol i save sakim tok bilong God, na lusim grasia bilong em.** Em i laikim yumi moa long olgeta samting, tasol yumi oltaim i save givim baksait long em, na daunim nem bilong em!

Mi laik tok tenkyu long yu, God bilong mi, long wanem yu bin wetim mi. Mi bai stap we nau, sapos mi bin dai wantaim ol sin bilong mi? Tasol yu bin wetim mi, olsem na marimari bilong yu i kamap ples klia. Mi luksave olsem yu laik pogivim mi, dia Jisas! Mi sori tru long ol taim mi bin daunim nem bilong yu. Mi laikim yu nau wantaim olgeta strong bilong mi, na mi redi long lusim laip bilong mi, tasol mi no laik mekim sin moa. Yu save laikim tumas ol manmeri i laikim yu, olsem na nau mi laik pas wantaim yu na laikim yu inap long las de bilong laip bilong mi.

O Maria, yu ples hait bilong mi, helpim mi long inapim gut ol promis mi mekim long God.

15

Sin i rausim God long sol bilong yumi

Sapos wanpela man o meri i laikim God tru na i gat grasia insait long sol bilong em, orait God i save laikim tumas tu dispela man o meri. **Olsem na God i kam i stap insait long sol bilong dispela man o meri, na em i stap long sol oltaim inap long taim dispela man o meri i mekim mortal sin na i rausim em.** Kaunsil bilong Trent i tok klia olsem: «**God i lusim yu sapos yu lusim em pastaim**». I min olsem: taim yumi mekim sin, orait **yumi yet i givim baksait long God** na sakim tok bilong em, olsem na yumi lusim em long dispela pasin nogut bilong yumi. **Na taim yumi lusim God, orait em i lusim yumi tu.** Man o meri i mekim mortal sin i save tokim God olsem: «Bikpela, yu go! Lusim mi. Mi no laikim yu moa insait long sol bilong mi. Mi laikim sin bilong mi tasol». Buk Baibel i tok: ***Ol man bilong mekim pasin nogut i save tokim God olsem, «Yu lusim mipela na yu go. Mipela i no laik harim na bihainim tok bilong yu»*** (Jop 21:14).

O God bilong mi! Planti taim mi bin rausim yu long sol bilong mi! Planti taim mi tu i bin tokim yu olsem: «Yu lusim mi na yu go!». Tasol yu no laik bai mi lusim hop. Nogat. Yu laik bai mi tanim bel na kam bek long yu. Yes, Jisas bilong mi, mi sori tumas long ol sin mi bin mekim, na mi laikim yu tru.

God na mortal sin i no inap stap wantaim, olsem na man o meri i mekim mortal sin, i rausim God long sol bilong em. Sapos God i stap long sol bilong yu tasol yu mekim mortal sin, orait **dispela sin bai i kam insait long sol bilong yu na kisim ples bilong God.** Olsem na man o meri i mekim mortal sin i save tokim God olsem: «Mi save pinis olsem dispela sin mi laik mekim bai i rausim yu long sol bilong mi. Tasol mi laik mekim sin, olsem na yu mas i go na lusim mi nau. Sin bilong mi i winim yu, God». **Na taim God i lusim sol bilong dispela man o meri, Satan i save kam insait na kisim ples bilong God. Olsem na man o meri i mekim mortal sin i gat Satan olsem masta bilong em,** long wanem Satan i stap insait long em, na em i papa bilong sol bilong em. **Long mortal sin yumi rausim God na mekim Satan i kam insait long yumi.** God i laikim yumi tumas, tasol yumi no wari long dispela samting, na yumi rausim em. Na Satan i no laikim yumi na em i laik kisim yumi i go long hel, tasol yumi opim dua bilong sol bilong yumi long em, bai em i kam insait na kamap papa bilong yumi.

O Bikpela bilong mi! Bipo planti taim mi bin rausim yu long sol bilong mi! Nau mi laik pilim ol sin bilong mi wankain olsem yu bin

pilim ol long gaden Getsemani. O gutpela Ridima bilong mi! Mi sori tumas long ol sin mi bin mekim!

Taim wanpela pikinini i kisim baptais, pris i save mekim prea bilong rausim Satan i stap long sol bilong dispela liklik pikinini. **Tasol taim wanpela man o meri i mekim mortal sin, em i askim Satan long kam gen insait long sol bilong em.** Long baptais ol pris i save tok: «Yu, spirit nogut! Yu lusim dispela sol nau, bai Holi Spirit i ken kam insait long em!». Na long mortal sin, ol manmeri i save tok: «Yu, Bikpela! Yu lusim sol bilong mi, bai Satan i ken kam insait long em».

O God bilong mi! Mi luksave long ol rong mi bin mekim. Planti taim mi bin mekim wankain samting long yu. Yu laikim mi tumas, tasol mi no bekim gut long yu, olsem na planti taim ol sin bilong mi i bin rausim yu long sol bilong mi. Yu bin lusim heven na i kam long graun bilong kisim bek mi, long wanem mi olsem wanpela pikinini sipsip i lus, na i wokabaut long rot nogut. Tasol nau mi laik holimpasim strong lek bilong yu, na mi no laik lusim yu gen. Mi laikim yu tumas, Bikpela bilong mi! Helpim mi oltaim na pulapim long grasia, bai mi ken i stap gut.

O Maria, yu Kwin Bilong mi! Yu tu i no ken lusim mi.

16

Sin i tok bilas long God

Buk Baibel i tok: *Yupela i save litimapim nem bilong yupela yet na tok, «Mipela i save long lo bilong God». Tasol ating yupela yet i save kalapim lo, **na long dispela pasin yupela i bagarapim nem bilong God*** (Rom 2:23). Em i olsem santu Pol i tokim yumi olsem: «Harim, yupela ol manmeri bilong mekim sin! Taim yupela i kalapim lo bilong God, yupela i wok long bagarapim nem bilong em, na yupela i tok bilas long em». Man o meri bilong mekim sin i save tok bilas long God, long wanem long pasin bilong em, em i soim olsem em i no wari liklik long tok bilong God, na em i no wari long lo bilong em tu.

Lukim mi, God! Nau mi kam long yu, long wanem planti taim mi bin kalapim ol lo bilong yu, na mi bin tok bilas long yu. **Mi sapos long go long hel, tasol yu no ken lustingting olsem yu bin dai bilong kisim bek mi.** Yu no laik long mi i go long hel, olsem na yu bin kapsaitim blut bilong yu bilong helpim mi.

Ol manmeri bilong sin i tok bilas long God taim ol i sakim tok bilong em na ol i amamas long mekim sin. Ol i save pinis olsem ol sin bilong ol i daunim nem bilong God, tasol ol i no wari long God, olsem na ol i amamas long mekim sin. Em i olsem ol manmeri bilong sin i tok: «God, mi no laik i stap pren bilong yu moa. Nogat. Mi laik bihainim laik bilong mi tasol, olsem na mi laik tingting long mi yet, na bihainim ol pasin nogut. Mi no laikim yu, God. Mi laikim ol pasin nogut bilong mi tasol. Mi amamas long pasin bilong kros, pasin pamuk na tingting long ol bisnis bilong dispela graun tasol». Na long dispela toktok ol manmeri bilong sin i save mekim, ol i daunim nem bilong God na i tok bilas long em. **Ol i putim ol pasin nogut olsem nambawan samting long laip bilong ol, na ol i daunim God na i putim em olsem las samting tru.** Ol sin bilong yumi i daunim God na givim baksait long em!

O God bilong mi! Yu olgeta gutpela samting, na ol gutpela samting bilong yu i no gat pinis! Na long ai bilong yu, mi olsem wanpela liklik binatang nating. Tasol mi sakim tok bilong yu na i givim baksait long yu, long wanem mi laik bihainim laik bilong mi tasol. Tasol mi no lusim hop, long wanem mi tingim gut olsem yu tok long yu save pogivim ol manmeri bilong sin i kam bek long yu. Olsem na mi sori long ol taim mi bin daunim yu na tok bilas long yu long ol sin bilong mi. O Pen na Indai bilong Jisas, yu mas helpim!

God em i as bilong laip bilong yumi. Em i kamapim yumi na putim yumi long graun, bai yumi ken stap gut na go long heven, na stap

wantaim em inap oltaim oltaim. Tasol man o meri i mekim sin i givim baksait long em, na i tokim em olsem: «God, mi les long stap gut na go long heven. Mobeta mi laik mekim sin na kisim amamas long graun, maski bihain bai mi go long hel». **Man o meri i mekim sin i putim ol sin olsem god bilong ol.**

O gutpela Ridima bilong mi! Mi laikim yu tumas! Yu no laik bai mi lusim hop. Nogat. Yu laik bai mi hop long yu na trastim yu oltaim. **Yu laik bai mi trastim long marimari bilong yu, long wanem yu gat bikpela laik long pogivim mi.** Mi luksave long ol rong mi bin mekim, na mi sori tru. Nau mi no laik mekim sin moa. Nogat tru! Mobeta mi laik i dai pastaim, tasol mi no laik givim baksait long yu moa. Tasol mi pret planti, long wanem mi wik na mi no gat strong long sakim ol tok bilong Satan. Mi trastim yu, na mi askim yu long strongim mi, bai mi ken stap gut inap long indai bilong mi. **O Jisas bilong mi, yu lewa bilong mi na yu hop bilong mi!**

O Maria, ol prea bilong yu bai i helpim mi long go long heven!

17

Sin i givim baksait long God

Santu Ogastin na santu Tomas i tok klia olsem: «**Pasin bilong mekim mortal sin i wankain olsem pasin bilong givim baksait long God**». I min olsem: long mortal sin bilong yumi, yumi givim baksait long God na holimpasim ol samting bilong graun. Bai mi givim wanpela tok piksa: sapos wanpela king i tokim wokboi bilong em long mekim wanpela wok, tasol wokboi i givim baksait long king na i tokim em olsem: «Mi les long harim tok bilong yu, mi laik kalapim dispela tok bilong yu». Orait, dispela wokboi bai kisim wanem kain pe? Em bai kisim pe nogut na king bai bagarapim em nogut tru. **Orait, wankain samting tasol yumi save mekim long ol mortal sin bilong yumi.** Long mortal sin yumi save givim baksait long God, olsem na yumi sapos long kisim pe nogut long hel. O God bilong mi! Planti taim mi bin givim baksait long yu na lusim yu! Tasol yu no bin lusim mi. Nogat. Yu save singautim mi long kam bek

long yu, long wanem oltaim yu save ofarim marimari bilong yu long mi. Yes, Bikpela bilong mi, mi sori tumas long ol sin bilong mi, na mi askim yu long marimari long mi.

Buk bilong Profet Jeremaia i tok olsem: «***Mi Bikpela, mi tok stret, yu bin givim baksait long mi na yu wok long go longwe long mi***» (15:6). God yet i save mekim dispela toktok long yumi, taim yumi mekim mortal sin. Yumi mas pret na guria, nogut long taim yumi sanap long kot bilong God, God i givim baksait long yumi na rausim yumi i go longwe long em.

O Sevia bilong mi! Yu skulim mi long ol dispela samting taim mi stap laip yet, long wanem yu laik givim sans long mi long tanim bel na kam bek long yu. ***Yu no laik long mi i lus long hel, olsem na nau yu save toksave long mi long ol samting nogut bai i kamap long mi, sapos mi no tanim bel.*** Yes, Jisas bilong mi, mi sori tumas long ol sin bilong mi. Planti taim mi bin wok long kisim amamas bilong graun, na mi bin givim baksait long yu. Tasol nau mi kam long yu na tok sori long yu.

Buk Baibel i tok: «***Bilong wanem yupela Israel i laik i dai? Mobeta yupela i lusim olgeta pasin nogut yupela i wok long mekim, na senisim olupela tingting na bel bilong yupela na kisim nupela bel na nupela spirit. Mi God, Bikpela, mi no save amamas long taim wanpela man o meri o pikinini i dai. Olsem na yupela i mas lusim sin na tanim bel na bai yupela i stap gut***» (Esekiel 18:31-32). Na nau Jisas i tokim yumi olsem: «***O yupela, ol manmeri bilong sin! Mi bin dai***

bai yupela i ken i go long heven! Olsem wanem na yupela i laik mekim sin na i go long hel? Goan! Yupela i mas kam bek long mi na kisim grasia bilong mi».

O Jisas bilong mi! Ol sin bilong mi i mekim mi i lusim hop, tasol Pen na Indai bilong yu i strongim mi long kam bek long yu na tok sori long yu. Planti taim mi bin givim baksait long yu na long grasia bilong yu! Tasol yu save singautim mi oltaim long kam bek long yu, olsem na mi trastim yu. Yu no ken rausim mi i go longwe long yu, long wanem nau mi laikim yu wantaim olgeta strong bilong mi. Yu olgeta gutpela samting bilong mi! Helpim mi long tenkim yu oltaim long bikpela marimari bilong yu.

O Maria, yu Kwin na Mama bilong mi! Helpim mi long i stap gut inap long las de bilong laip bilong mi.

18

Sin i mekim nogut long hat bilong God

Buk Baibel i tok: *Tasol ol Israel i traim God Antap Tru na i bikhet long em. Ol i no bihainim lo bilong em. Ol i bikhet na sakim tok bilong em* (Buk Song 78:56-57). **Ol manmeri bilong sin i save mekim wankain pasin tasol: ol i save sakim tok bilong God Antap Tru na bikhet long em.** God i no inap long karim pen, tasol sapos em i inap, orait ol sin bilong yumi bai i mekim em i bel hevi na karim planti pen tumas.

O God bilong mi! Yu bin laikim mi tumas, tasol mi bin bikhet long yu planti taim! Planti taim mi bin givim baksait long yu, long wanem mi bin bihainim laik bilong mi tasol. Yu mas marimari long mi, long wanem yu olgeta gutpela samting bilong mi.

Santu Bernard i tok: «God i no inap long i dai, tasol sapos em i inap, **orait wanpela mortal sin tasol i gat strong bilong kilim em i dai**». Na narapela saveman bilong Sios i tok: «Em i tru. God i no

inap i dai. Tasol sapos em i inap, mi ting olsem mortal sin i gat strong bilong kilim em i dai. **Long wanem, mortal sin i save givim bikpela pen tumas long God, na mekim bel bilong em i hevi nogut tru**». Sapos wanpela man o meri yu laikim em tumas i givim baksait long yu, yu bai i karim bikpela pen tumas. Na sapos yu bin pulapim dispela man o meri long planti gutpela samting, na yu bin helpim em planti taim tumas, orait pen bilong yu bai i kamap bikpela moa yet. Olsem tasol God i save karim pen long ol sin bilong yumi, long wanem em i save laikim yumi tumas na em i save mekim planti samting bilong helpim yumi. God i bin kapsaitim blut bilong em bilong kisim bek yumi, na em i bin dai bilong helpim yumi, olsem na taim yumi givim baksait long em na mekim sin, orait em i save karim bikpela pen tumas. Planti taim yumi save bihainim ol laik nogut bilong bodi (olsem sin i gat sem na pasin bilong kros), na yumi givim baksait long God. **Na ol dispela pasin nogut bilong yumi i save mekim bel bilong em i hevi tumas inap long kilim em i dai, tasol em i no inap i dai.**

O dia Jisas bilong mi! Mi dispela pikinini sipsip i lus, na yu gutpela wasman bilong mi! Yu bin givim laip bilong yu bilong kisim bek ol sipsip bilong yu, olsem na nau mi askim yu long pogivim mi na marimari long mi. Planti taim mi bin givim pen long yu na mekim bel bilong yu i hevi tumas. Tasol nau mi laik kam bek long yu, olsem na mi sori tru long ol sin mi bin mekim. Mi laikim yu, Jisas! Mi laikim yu wantaim olgeta strong bilong mi.

Taim Jisas i stap yet long dispela graun, oltaim em i bin karim pen. **Na em i bin karim pen, long wanem ol sin bilong yumi i bin stap oltaim long ai bilong em.** Maski yumi i no stap yet long dispela graun, Jisas i save pinis long yumi na em i save tu long ol sin bilong yumi. Olsem na long dispela as tasol em i karim bikpela pen tumas long gaden Getsemani. **Na tuhat bilong em i kamap olsem blut bilong soim olsem Jisas i wok long karim bikpela pen tumas long ol sin bilong yumi.** Em yet i tok: «*Bel bilong mi em i hevi tumas, na klostu mi laik i dai*» (Matyu 26:38). Ol sin bilong yumi i bagarapim Jisas long gaden Getsemani na klostu em i laik i dai...

O Jisas bilong mi! Mi laik karim pen wantaim yu. Na mi laik save gut long pen yu bin karim long ol sin bilong mi, bai mi tu i ken karim pen wantaim yu. Mi laik karim pen long ol sin mi bin mekim, long wanem ol sin bilong mi i bin bagarapim yu tru. Dia Jisas, mi no laik givim baksait gen long yu! Na mi no laik bikhet gen long yu! Mi laik pas wantaim yu tasol, long wanem mi laikim yu wantaim olgeta strong bilong mi. Helpim mi long i stap gut.

O Maria, yu hop bilong mi! Marimari long mi.

19

Man o meri i no gat grasia long sol bilong em, em i longlong tumas

Ol manmeri bilong sin i tingting olsem ol santu ol i olsem ol longlong man, na ol i tok: «Ol santu i longlong tumas, long wanem ol i bin les long ol naispela samting bilong graun (olsem mani, na sin i gat sem, na kisim namba) na ol i holimpasim ol samting nogut (olsem penans, na sakrifais, na stap olsem rabisman)». Tasol long las de bilong laip bilong ol, ol dispela manmeri bilong sin bai i singaut strong olsem: «*Ol dispela man yumi bin tok bilas long ol bipo na yumi bin ting ol i samting nating. Man, yumi bin longlong tru! Yumi bin ting ol pasin bilong ol i kranki stret*» (Gutpela na Strepela Tingting 5:4). Pasin bilong stap longwe long God em i longlong pasin tumas, long wanem dispela pasin i save pulim ol manmeri bilong sin i go long hel, olsem na ol bai i no inap long amamas long heven. Nogat. Ol bai karim pen inap oltaim oltaim.

O God bilong mi! Mi no laik westim taim bilong mi moa. Nogat. Nau tasol mi laik kam bek long yu, olsem na mi tokim yu: mi longlong tumas, long wanem mi tu i bin lusim yu planti taim. Na mi tokim yu moa olsem: «***Papa, mi bin mekim sin long God na long yu. Nau mi no gutpela man moa inap long yu kolim mi pikinini bilong yu***» (Luk 15:21). O God bilong mi! Mi no gutpela man inap long yu pogivim mi, tasol mi trast long blut bilong yu, long wanem blut bilong yu em i hop bilong mi. O Jisas bilong mi! Mi sori tumas long ol taim mi bin givim baksait long yu! Mi laikim yu tumas.

Sori tumas long ol manmeri bilong sin! Ol i olsem ol aipas i no inap long lukim gut ol samting. Sapos wanpela bikpela papa graun i salim olgeta graun bilong em long liklik mani tasol, orait yumi bai i tok olsem dispela man em i longlong tumas. **Tasol ol manmeri bilong sin i winim longlong pasin bilong dispela man, long wanem long mortal sin bilong ol, ol i lusim heven na grasia bilong God!** Ol i tingting long dispela laip tasol na long amamas bilong graun, na ol i lustingting long eterniti. **Ol i tingting long amamas bilong graun, tasol ol i lustingting olsem olgeta amamas bilong dispela graun bai i pinis, na bihain ol bai i sanap long kot bilong God.** Dispela laip bai i pinis, tasol hel bai i no inap pinis! Na ol manmeri i save mekim mortal sin bai i stap long hel inap oltaim oltaim. O God bilong mi! Opm ai bilong mi, bai mi no ken aipas moa! Bipo mi tu i bin laikim tumas ol amamas bilong dispela graun, tasol nau mi no laik givim baksait gen long yu. Nau mi laik painim amamas long yu tasol.

Sori tumas long ol manmeri bilong sin! **I no longtaim ol bai i krai nogut tru na sori long ol sin ol i bin mekim, tasol ol bai i no inap long winim kot bilong God.** Ol bai i lus olgeta long kot, long wanem God bai i givim pe long ol inap long pasin ol i bin mekim. Olsem na ol bai i singaut strong olsem: «*Yumi bin bihainim ol kain kain rot bilong pasin nogut... Yumi bin i gat planti mani samting na yumi bikhet na yumi ting yumi moa yet. Tasol nau ol dispela samting i no inap helpim yumi. Ol dispela samting i lus pinis nau, olsem wanpela tok win yumi harim na wantu yumi lus tingting long em*» (Gutpela na Stretpela Tingting 5:7-9). Yes, em i tru olgeta: olgeta samting bilong dispela graun bai i pinis, na ol mani samting na ol amamas bilong bodi bai i no inap helpim yumi liklik! Na taim kot i pinis, orait ol manmeri bilong sin bai i go long hel, na long dispela ples ol bai i krai nogut na skripim tit bilong ol inap oltaim oltaim.

O dia Jisas bilong mi, yu mas marimari long mi! Planti taim mi bin lustingting long yu, tasol yu no bin lustingting long mi! Mi laikim yu wantaim olgeta strong bilong mi, na mi les long ol sin mi bin mekim. Plis, dia Jisas, pogivim mi! Yu mas lustingting long ol sin bilong mi! Na yu mas strongim mi, long wanem yu save pinis olsem mi wik tumas, na long strong bilong mi yet, mi no inap long i stap gut. Plis, givim lait long mi, bai mi ken skelim gut ol samting. Na tu givim strong long mi, bai mi ken winim ol traim nogut na givim amamas long yu.

O Maria, Mama bilong God, mi hop long yu tu!

20

Man o meri i mekim mortal sin i mas pret nogut tru

God i save hetim mortal sin, long wanem mortal sin i bagarapim tru laik bilong em na ol lo bilong em tu. Santu Bernard i tok: «**Mortal sin i egensim laik bilong God**», olsem na God i save hetim mortal sin. Na God i save les olgeta long ol manmeri i save mekim mortal sin, long wanem ol i egensim ol lo bilong em na i amamas long pas wantaim mortal sin bilong ol. Buk Baibel i tok: ***God i no laikim tru ol manmeri nogut na wok nogut bilong ol*** (Gutpela na Strepela Tingting 14:9). Olsem na ol manmeri i save mekim mortal sin i mas pret nogut tru, long wanem God i no laikim ol moa!

O God bilong mi, yu mas marimari long mi! **Yu bin pulapim mi long planti grasia na gutpela samting, na mi bin pulapim yu long planti sin na pasin nogut.** Olsem na nau mi askim yu long helpim mi long sori tru long ol sin mi bin mekim.

God em i Strong Olgeta, na long bikpela pawa na strong bilong em, em i kamapim heven na graun. Em i tok tasol, na wantu heven na graun i kamap: *Em i bin tok tasol, na dispela graun i kamap. Em i mekim strongpela tok, na olgeta samting i stap* (Buk Song 33:9). Na tu em i gat strong bilong pinisim olgeta samting tu long laik bilong em: *«Yumi save bilip long God I Gat Olgeta Strong. Sapos em i laik, nau tasol em inap... pinisim tu olgeta hap bilong graun olgeta»* (2 Makabi 8:18). **Na man o meri i mekim mortal sin i save egensim God I Gat Olgeta Strong, olsem na em i mas pret nogut tru, nogut God i laik bagarapim na pinisim em!** Buk Baibel i tok moa olsem: *«Taim nogut bai i kamap long ol man nogut, long wanem, ol i ting ol i antap tru long God I Gat Olgeta Strong, na ol i save bikhet na traim strong bilong em»* (Jop 15:25). Taim yumi egensim God, em i olsem yumi lukim wanpela liklik anis i egensim wanpela strongpela soldia: dispela soldia inap long krungutim na pinisim dispela liklik anis hariap. Orait, wankain olsem tasol God I Strong Olgeta i gat strong bilong pinisim yumi hariap! Olsem na yumi mas pret long mekim mortal sin, nogut God i les long yumi na pinisim yumi, na yumi lus olgeta long hel!

O God bilong oltaim, planti taim mi bin egensim yu! Planti taim mi bin givim baksait long yu, na mi no bin pret long yu. Tasol nau mi save olsem yu Strong Olgeta, olsem na mi no laik mekim sin gen. Mi tingting long Pen na Indai bilong yu, na mi trastim yu, long wanem yu bin dai bilong kisim bek mi.

Olgeta taim yumi stap long ai bilong God, long wanem yumi no inap hait long em. **Olsem na man o meri i mekim mortal sin, em i stap long ai bilong God!** Maski dispela man o meri i mekim sin long ples hait, em i stap yet long ai bilong God, long wanem God i stap long olgeta hap bilong graun. God yet i tok: «***Long ai bilong mi ol i wok long mekim olkain pasin bilong mekim mi i belhat na kros long ol***» (Aisaia 65:3). Sapos wanpela wokboi i save olsem king bilong em i wok long skelim em, em bai i wok hat bilong stap gut long ai bilong king, nogut king i lukim olsem em i kalapim wanpela lo, na bagarapim em. **Tasol man o meri i mekim mortal sin i save pinis olsem God i wok long skelim em, tasol dispela man o meri i no wari liklik long God, na em i go het long mekim sin.** Olsem na ol i mas pret nogut tru, nogut God i lusim peisens bilong em na pinisim ol!

O gutpela Sevia bilong mi! Mi bin mekim sin long ai bilong yu planti taim tumas! Mi sapos long go long hel, tasol mi trastim yu, long wanem yu Ridima bilong mi. Yu bin lusim heven na i kam long graun bilong kisim bek mi, olsem na mi trastim yu! Yu yet i tok: «***Pikinini Bilong Man i kam bilong painim ol man i lus na kisim bek ol***» (Luk 19:10). Mi sori tumas long ol sin mi bin mekim! Oltaim yu bin soim bikpela laik bilong yu i kam long mi, na oltaim mi bin sakim tok bilong yu! Tasol nau mi askim yu long helpim mi long stap gut, long wanem mi no laik mekim sin gen. Mi laikim yu tasol, Bikpela bilong mi! Mi guria na pret nogut tru,

taim mi tingting long lusim yu gen. Mi no laik lusim yu gen, dia Jisas! Na yu mas helpim mi long strong bilong yu.

O Maria, oltaim God i save harim ol singaut bilong yu! Olsem na yu mas askim em long helpim mi long stap gut.

21

Satan i save giamanim ol manmeri bilong sin

O sol bilong mi! Planti taim Satan i save giaman na i tok: «Goan! Yu mekim sin! No ken tingting planti. God i pulap long marimari na em bai i pogivim yu oltaim! Olsem na yu no ken pret long mekim sin». Tasol sapos Satan i mekim dispela toktok long yumi, orait yumi mas bekim tok bilong em olsem: **«God i save marimari tasol long ol manmeri i aninit long em, na em i no save marimari long ol manmeri i daunim nem bilong em na tok bilas long em»**. Santu Maria yet i tok: **«*Em i save marimari long ol manmeri i aninit long em*»** (Luk 1:50). Em i tru olsem God i pulap long marimari, tasol em i tru tu olsem em i save salim planti manmeri i go long hel! **God i pulap long marimari, tasol stretpela pasin tu i stap long em**. God i save marimari long ol manmeri i sori long ol sin bilong ol. Tasol long ol manmeri i save amamas long

mekim sin na ol i no wari liklik long tanim bel, God i save kotim ol long stretpela kot, na salim ol i go long hel.

O God bilong mi! Planti taim mi bin mekim sin na amamas long sin bilong mi! Mi bin daunim nem bilong yu long ol sin bilong mi!

Na Satan i save giamanim moa long yumi olsem: «Goan! Yu mekim sin! Bipo planti taim God i bin pogivim yu, olsem na sapos yu mekim sin gen, orait em bai i pogivim yu gen. Yu no ken pret long mekim sin, long wanem God bai i pogivim yu olgeta taim». Na sapos Satan i mekim dispela toktok long yumi, orait yumi mas bekim tok bilong em olsem: **«Nogat tru! Em i tru olsem planti taim God i bin pogivim mi pinis, olsem na mi pret nogut tru, nogut mi mekim sin gen na nau em i les pinis long pogivim ol sin bilong mi»**. Buk Baibel i tok: ***Yu no ken tok, «mi rong pinis, tasol i no gat asua i kamap long mi.» Long wanem, Bikpela i save wet long taim bilong mekim save long ol man. Yu no ken ting, «maski, Bikpela i save lusim olgeta sin,» na yu go het tasol long mekim pasin bilong sin*** (Sirak 5:4-5).

O God bilong mi! Yu bin pogivim mi planti taim tumas, na mi bin mekim rong long yu planti taim tumas tru! Tasol yu winim mi, long wanem nau mi no laik mekim sin moa. Peisens bilong yu i bikpela tumas! Olsem na nau mi askim yu long helpim mi long sanap strong long bilip bilong mi na i stap gut.

Na Satan i save giaman moa yet na i tok: «Goan! Dispela traim i no isi long winim! Dispela traim em i bikpela tumas, olsem na yu mas pundaun long sin». Na sapos em i tokim yumi olsem, orait yumi mas

bekim maus olsem: «Sapos mi no winim dispela traim nau, orait bihain bai mi wik moa yet, na mi bai i no inap long abrusim ol narapela traim tu. **Olsem na mobeta nau mi askim Jisas long strongim mi, nogut mi pundaun long sin na sol bilong mi i kamap wik moa moa yet**, na i pulim mi long mekim planti sin moa yet».

Tasol Satan i no save tait hariap long traim yumi, olsem na em bai i giamanim yumi moa yet na i tok: «Goan! Yu mekim sin! Sapos yu mekim sin, orait dispela sin i no inap pasim yu long i go long heven. Nogat tru. Dispela sin em i liklik samting, olsem na maski yu mekim sin, God bai i sevim yu na yu bai i go long heven». Na long dispela toktok bilong em, yumi mas bekim tok olsem: «Bikpela giaman bilong yu! **Sapos mi mekim sin, em bai hat long mi i go long heven!** Mi no laik kukim mi yet long bikpela paia bilong hel inap oltaim oltaim, olsem na mi no laik harim tok bilong yu. Yu no God bai yu tok olsem mi ken i go long heven. Yu no save long wanpela samting na yu giamanim mi tasol».

O Bikpela bilong mi! Yu gutpela tumas! Planti taim mi bin mekim ol bikpela sin long ai bilong yu, tasol yu bin marimari long mi. Na dispela samting i mekim mi i sori tumas, long wanem mi bin daunim yu planti taim tumas. Yu gutpela olgeta, olsem wanem na mi bin givim baksait long yu planti taim? O Jisas bilong mi, nau mi laik pas wantaim yu tasol!

O Maria, helpim mi long i stap gut inap long las de bilong laip bilong mi! Helpim mi long pas wantaim God, long wanem em i bin marimari planti taim long mi.

22

Man o meri bilong sin i no inap painim gutpela taim

Profet Aisaia i tok: *Bikpela i tok olsem, «Ol manmeri bilong mekim pasin nogut, bai ol i no inap painim gutpela taim»* (48:22). Satan i save giamanim tru ol manmeri bilong sin. Em i save giamanim ol na i tokim ol olsem, sin bai i mekim ol i painim amamas na gutpela taim. Satan i save tokim ol olsem: «Sapos yu mekim dispela sin, yu bai amamas». Tasol nogat! Narakain samting i save kamap long ol man na meri i mekim sin! **Man o meri i mekim sin i save pilim bel hevi, na taim ol i mekim sin pinis, ol i luksave olsem ol i no amamas tru na ol i no gat gutpela taim.** God i bin kamapim yumi long painim em na amamas long em tasol, olsem na ol samting bilong graun i no inap long givim amamas i stap oltaim oltaim. Ol animal tasol i save painim amamas long ol samting bilong graun. **Tasol ol manmeri bai i no inap**

painim trupela amamas long ol samting bilong graun, long wanem God i bin givim wanpela sol long ol, na dispela sol i mangal long God tasol.

O God bilong mi! Nau mi tingting long ol sin mi bin mekim, na mi luksave olsem ol dispela sin i no bin givim trupela amamas long mi! Amamas bilong sin i liklik tumas na i save pinis hariap. Na bihain sol bilong mi i bel hevi, na mi pilim nogut tru. Olsem na nau mi no laik mekim sin moa, long wanem yu laikim mi tumas, na yu laik bai mi harim tok bilong yu oltaim.

God yet i tok moa olsem: ***«Tasol ol manmeri bilong mekim pasin nogut, ol i no inap lusim pasin nogut bilong ol. Ol i olsem solwara i bruk oltaim na i bringim ol kain kain pipia na rabis samting i kam bagarapim nambis... Ol manmeri bilong mekim pasin nogut, bai ol i no inap painim gutpela taim»*** (Aisaia 57:20-21). Sol bilong ol manmeri bilong sin em i olsem solwara i bruk oltaim na i no gat malolo na gutpela taim. Sol bilong ol dispela manmeri i no inap long i stap gut, olsem solwara i bruk oltaim namel long bikpela win. Taim yumi stap yet long dispela graun, yumi no inap mekim olgeta samting long laik bilong yumi. Olsem na planti taim planti samting i no save kamap gut long yumi. Taim nogut i save bungim yumi oltaim. Na ol man na meri i laikim God i no save pret long taim nogut, long wanem ol i trastim God. Tasol ol man na meri bilong sin i save pret nogut tru, long wanem ol i save pinis olsem ol i givim baksait pinis long God long ol sin bilong ol, olsem na ol i birua bilong God. **Na tu ol**

manmeri bilong sin i save pret tumas long kot bilong God, long wanem ol i save pinis ol bai i kisim pe nogut. Buk Baibel i tok: ***Ol man bilong mekim pasin nogut i save pret nating na ranawe. Tasol ol stretpela man i save sanap strong olsem laion*** (Provep 28:1). Em i tru olgeta! Ol manmeri bilong pasin nogut i save pret, long wanem ol i save pinis ol bai i lus long kot.

O Bikpela bilong mi! Mi sori tumas long ol taim mi bin lusim yu! Yu mas pogivim mi, na helpim mi long i stap wantaim yu inap long indai bilong mi.

Profet Devit i tok: ***Yu mas amamas long Bikpela, na em bai i givim yu ol samting yu laikim tru*** (Buk Song 37:4). O yupela, ol manmeri! Sapos yupela i laik painim gutpela taim na amamas, orait yupela i mas wok strong long painim God, na em bai i givim long yupela ol samting yupela i laikim tru. Santu Ogastin i tok: **«Yu mas wok long painim God tasol. Na taim yu painim em pinis, orait yu bai i painim tu olgeta gutpela samting yu laikim tru»**. Na santu Fransis, taim em i lusim olgeta samting bilong em na i givim long ol tarangu, na em i stap olsem rabisman tru, em i singaut strong olsem: «O God bilong mi! Yu olgeta gutpela samting bilong mi! Sapos yu stap wantaim mi, mi no sot long wanpela samting!». Ol manmeri i wok long painim God wantaim olgeta strong bilong ol, ol i ken amamas!

O Jisas bilong mi! Yu sapos long lusim mi, long wanem mi bin mekim planti sin tumas. Tasol yu bin wetim mi na yu bin marimari

long mi. Nau mi kam bek long yu, na mi sori long ol sin bilong mi. Yu laikim mi tumas, na mi laik laikim yu tumas tu. Kisim mi olsem wokboi nating bilong yu, bai mi ken stap wantaim yu oltaim. Yu ken mekim long mi long laik bilong yu.

O Maria, yu naispela Mama bilong mi! Yu mas sori long mi!

23

Man o meri bilong sin i no gat helpim bilong God

Taim God i salim wanpela man o meri i go long hel, dispela pasin i save bagarapim stret dispela man o meri. **Tasol taim God i lusim i wanpela man o meri bilong sin na i no helpim em moa, dispela pasin tu i save bagarapim dispela man o meri.** Maski dispela man o meri i stap laip na em i no i dai yet, God i lusim em pinis! Olsem na sapos God i lusim yu na i givim baksait long yu, yu lus olgeta na yu wanpis olgeta.

O Jisas, mi laik tenkim yu, long wanem yu no bin larim indai i bungim mi long taim mi pulap long sin! Na tu mi laik tenkim yu, long wanem yu no bin givim baksait long mi. Sapos yu no bin holim mi long han bilong yu, mi ting olsem mi bai i pundaun long planti sin moa i winim olgeta sin bilong bipo. Olsem na mi askim yu gen,

gutpela Sevia bilong mi, yu mas holim mi oltaim long han bilong yu, na helpim mi long i stap gut.

Buk Baibel i givim wanpela tok piksa na i tok: «*Nau bai mi tokim yupela long samting mi ting long mekim long gaden wain bilong mi. **Bai mi rausim banis bilong gaden, na larim ol wel abus i go insait long gaden na kaikai na bagarapim ol diwai wain***» (Aisaia 5:5). Taim papa bilong gaden i rausim banis bilong gaden na i larim ol wel animal long kam insait, em i mak bilong soim olsem, em i no wari moa long gaden bilong em, na em i no laik lukautim moa diwai wain bilong em. **Olsem tasol God i save mekim long ol manmeri bilong sin i les long tanim bel na kam bek long em.** God i save rausim pasin bilong pret long mekim sin, na em i no save toktok moa insait long sol bilong ol, olsem na ol dispela manmeri i save bihainim ol laik nogut bilong ol, na ol i no wari moa long wanpela samting. God i save rausim ol gutpela tingting na lait em i bin putim bipo insait long sol bilong ol, olsem na ol samting nogut bilong Satan i save kam insait long sol bilong ol na bagarapim ol stret. **Na sapos God i no helpim ol moa, orait ol bai i pundaun long planti mortal sin, olsem na sol bilong ol bai i stap oltaim long tudak, na long taim bilong indai ol bai i go stret long hel.**

O Bikpela bilong mi! Mi sapos long go long hel long ol sin bilong mi, long wanem planti taim mi bin givim baksait long yu. Yu bin pulapim mi long planti gutpela tingting, tasol mi no bin putim yau long yu, na mi bin bihainim ol laik nogut bilong mi. Tasol yu no bin

lusim mi. Nogat. Oltaim yu bin helpim mi. Olsem na mi laikim yu tumas na mi trastim yu oltaim.

Buk Baibel i tok: «*Mipela... i bin traim long mekim Babilon i kamap orait gen, tasol em i no kamap orait... Maski, yumi lusim Babilon... long wanem, asua bilong Babilon i bikpela tru, na i go antap inap long skai*» (Jeremaia 51:9). Ol dokta i save givim marasin na gutpela advais long ol sikmanmeri. Tasol sapos dokta i lukim wanpela sikman i les long kisim marasin na i save tok bilas long ol gutpela advais bilong dokta, orait dokta bai i lusim dispela sikman i stap nating na em bai i no helpim em moa. **Olsem tasol God i save mekim long ol manmeri bilong sin: em i wok hat bilong mekim ol i kamap orait gen, tasol sapos ol i les long senisim ol pasin nogut, orait God i save lusim ol.** God i les long helpim ol gen, olsem na em i save givim liklik lait tasol long ol, bai ol i ken luksave long ol rong bilong ol. Tasol dispela liklik lait em i no inap, olsem na ol bai i lus long sin bilong ol. **Taim God i no helpim ol moa, hat bilong ol i kamap strong olsem ston, na tingting bilong ol i karamap long tudak, olsem na ol pasin nogut i wok long kamap bikpela moa moa yet.**

O God bilong mi, nau mi pilim olsem yu singautim mi long mekim penans long ol sin bilong mi. Mi inap long harim toktok bilong yu i singautim mi long tanim bel na lusim ol pasin nogut bilong bipo. Na dispela toktok bilong yu em i mak olsem yu no bin lusim mi. Na bikos yu no bin lusim mi, mi tu i no laik lusim yu gen. Mi laikim yu,

gutpela Jisas, na mi sori long ol sin mi bin mekim. Mi trastim yu, na mi trastim tu blut bilong yu i kapsait bilong kisim bek mi. Helpim mi long stap wantaim yu inap oltaim. Mi no laik lusim yu gen.

O santu Virgo Maria, yu mas helpim mi oltaim!

24

Pasin bilong stap hat liklik tasol em i samting nogut tru

Planti manmeri i save wok hat bilong abrusim ol mortal sin, tasol ol i no save wok hat bilong abrusim ol venial sin. Planti taim ol i abrusim ol mortal sin, tasol ol i no save wari liklik long ol venial sin, olsem na ol i save mekim planti venial sin. Ol i tingting olsem venial sin i no bikpela samting, olsem na ol i no wok hat bilong abrusim ol dispela sin tu. Tasol God yet i tokim ol olsem: «***Yu hat liklik tasol. Yu no hatpela tru na yu no kolpela tru. Olsem na mi laik trautilim yu long maus bilong mi***» (Revelesen 3:16). **Dispela pasin bilong trautilim ol long maus bilong em, em i mak bilong God i lusim ol manmeri i hat liklik tasol**, long wanem taim yumi trautilim kaikai, em yumi i no save kisim dispela kaikai gen. Ol manmeri i hat liklik i no inap long stap wantaim God, long wanem ol i no save laikim God wantaim olgeta strong bilong ol.

Em i tru, God bilong mi, mi tu i bin givim baksait long yu planti taim tumas! Tasol nau mi laik senis, na mi askim yu long helpim mi oltaim.

Santu Terese i no bin mekim wanpela mortal sin long laip bilong em, tasol taim em i yangpela em i no bin wok tumas long abrusim ol venial sin. Na em yet i stori olsem wanpela de Jisas i kamap long em na i soim hel long em. Na Jisas i soim wanpela hap bilong hel long Terese, na i tokim em olsem: **«Lukim! Dispela ples long hel em i ples mi bin redim bilong yu, long wanem yu hat liklik»**. Na taim yumi harim dispela samting yumi ken kirap nogut na i tok: «Olsem wanem? Mortal sin tasol i save pulim yumi i go long hel. Ol venial sin i no save pulim yumi i go long hel. Olsem wanem na nau yumi tok olsem ol venial sin tu i save kisim yumi i go long hel?». Na bekim long dispela askim i stap long Buk Baibel yet: ***Na ol manmeri i no save wari long ol liklik samting, wok bilong ol bai i no inap kamap gut. Nogat. Em bai i go bagarap olgeta*** (Sirak 19:1). **I min olsem: man o meri i no save wari long mekim venial sin, isi isi bai i pundaun long mortal sin tu**, long wanem sapos yu no wari long givim liklik pen long God long venial, orait i no longtaim yu bai i no wari tu long givim bikipela pen long em long mortal sin. Na tu yumi mas save olsem: **sapos yumi mekim planti venial sin, orait God bai i no inap helpim yumi long abrusim ol mortal sin**, olsem na yumi bai i pundaun long mortal sin tu.

O Bikipela bilong mi! Yu no ken larim mi i pundaun long mortal sin! Mobeta mi laik i dai pastaim.

Santu Pol i tok: *Man i planim liklik kaikai, em bai i kisim liklik kaikai tasol. Na man i planim planti, em bai i kisim planti* (2 Korin 9:6). **As bilong dispela tok i olsem: sapos yu no save mekim planti sakrifais bilong bihainim gut laik bilong God, orait God tu bai i no mekim planti samting bilong helpim yu.** Tasol sapos yu wok hat bilong givim amamas long God na abrusim ol venial sin tu, orait God tu bai i blesim yu na pulapim yu long planti grasia, na helpim yu oltaim.

Na Profet Jeremaia tu i tok: ***Bikpela i ken bagarapim ol man i les long mekim wok Bikpela i givim ol*** (48:10). Olsem na ol manmeri i no save inapim gut laik bilong God, ol i manmeri nogut long ai bilong em. Ol manmeri bilong sin i save luksave long ol sin ol i bin mekim, tasol ol manmeri i hat liklik i no save putim yau long ol sin bilong ol, na olsem ol i no luksave long ol sin ol i save mekim. Olsem na oltaim ol i wok long mekim sin, na ol i no save sori long ol dispela sin. Ol i tingting olsem ol venial sin ol i liklik samting, olsem na ol i no save wok hat bilong abrusim ol.

O God bilong mi! Bipo mi tu i bin hat liklik, olsem na mi no bin wari long ol venial sin. Mi bin pasim dua bilong sol bilong mi long grasia bilong yu. Tasol nau mi askim yu long helpim mi, long wanem mi laik senis. Mi laik givim planti long yu, long wanem yu bin givim laip bilong yu bilong kisim bek mi.

O Maria, Mama bilong mi, helpim mi! Mi trastim yu oltaim.

25

Pasin nogut bilong ol manmeri i no save wari long grasia bilong God

Olgeta grasia, na lait, na ol gutpela tingting God i save kirapim insait long bel bilong yumi, i kam long Pen na Indai bilong Jisas. Jisas i kapsaitim blut bilong em bai yumi i ken kisim grasia na i stap gut. Pen na Indai bilong Jisas em i as bilong olgeta grasia na blesing. **Olsem na man o meri i no save wari long grasia bilong God, em i no save wari long indai bilong Jisas tu.** Planti kristen manmeri i no bin wari long grasia bilong God, olsem na nau ol i wok long krai nogut long hel.

O God bilong mi! Mi sapos long stap long hel, long wanem planti taim mi tu no bin wari long grasia bilong yu! Mi laik tenkim yu, long wanem yu givim sans long mi long krai sori long ol sin mi bin mekim, olsem na mi ken kam bek long yu.

Ol manmeri i stap long hel i save tingim ol sans God i bin givim long ol taim ol i stap laip, na ol i bel hevi na i krai nogut tru! Nau ol i mangal long ol grasia bilong bipo, tasol nau ol i no inap long kisim! Taim ol i stap laip, ol i no bin wari liklik long grasia bilong God. **Nau ol i stap long hel, na ol i mangal stret long kisim grasia bilong God. Tasol nau ol i no inap, long wanem taim bilong ol i pinis.**

O gutpela Ridima bilong mi! Givim lait long mi, bai mi ken save gut long yu na laikim yu moa moa yet. Yu sapos long lusim mi, long wanem mi bin mekim planti sin, tasol yu no bin lusim mi! Yu gutpela tumas na yu pulap long marimari, olsem na oltaim yu save singautim mi, bai mi ken kam bek long yu. Nau mi laik bekim long yu na mi laik i stap wantaim yu.

O sol bilong mi! God i bin givim planti grasia long yu inap long yu kamap santu. Tasol yu no santu. Olsem wanem? Sem bilong yu! God i bin givim planti grasia long yu, tasol yu bin mekim planti sin tumas! Na sapos yu no senis na yu go het long sin bilong yu, orait God bai i gat olgeta rait long givim baksait long yu na lusim yu. **Goan! Inap long mekim sin nau! Yu mas poret na guria, nogut yu go het long mekim sin, na bihain God i les long yu na lusim yu.**

Yes, God bilong mi, yu bin karim planti pen bilong helpim mi! Nau mi no laik givim pen moa long yu. Mi laik tokim yu wantaim Profet Devit olsem: ***Putim nupela spirit insait long mi na bai mi bihainim yu tasol. Nogut yu rausim mi na mi stap longwe long yu... Yu mas kirapim laik bilong mi long bihainim tok bilong yu, na yu ken***

strongim mi long mekim olsem... God, yu God bilong kisim bek mi, yu ken marimari long mi (Buk Song 51:11-14). O Bikpela bilong mi! Yu no ken rausim mi i go longwe long yu. Mi laik pas wantaim yu inap oltaim. Strongim mi, bai mi ken inapim gut dispela tok bilong mi.

Maria, yu Mama bilong God, yu mas pre bilong helpim mi.

26

God i wetim yumi, tasol em i no wetim yumi inap oltaim

Sapos God i bin givim pogivim planti taim long yumi, orait yumi mas poret, nogut peisens bilong em i pinis na em i no pogivim yumi moa. Na sapos dispela samting i kamap, dispela tok i stap long Buk Baibel bai i kamap tru: «***Na Bikpela bai i bekim rong bilong ol na mekim save long ol***» (Lo 32:35). Sapos yumi les long lusim ol sin bilong yumi, orait God bai i les long pogivim yumi gen.

O Bikpela bilong mi! Mi laik tenkim yu, long wanem planti taim mi bin givim baksait long yu, tasol yu bin wetim mi inap nau. Givim gutpela tingting long mi, bai mi ken save gut long bikpela peisens yu bin yusim wantaim mi. Na helpim mi long sori tru long ol sin mi bin mekim. Mi no laik mekim sin moa, dia Jisas, nogut yu givim baksait long mi na yu les long lusim ol sin bilong mi gen.

Planti manmeri i save tok: «Bai mi mekim sin nau, na bihain bai mi konpes, na God bai i pogivim mi gen». **Dispela kain toktok em i toktok bilong Satan yet!** Dispela giaman promis bilong Satan i bin pulim planti manmeri i go long hel, long wanem ol i bin mekim sin, na bihain indai i bungim ol, taim ol i no bin konpes yet. Buk Baibel i tok: «*Tasol Bikpela em i God bilong mekim stretpela pasin tasol. Olsem na em i sori long yupela na em i wet long soim marimari bilong em long yupela*» (Aisaia 30:18). Profet Aisaia i tok klia olsem **God i save wet long yumi i lusim ol sin bilong yumi, tasol sapos yumi i no lusim ol sin, orait God bai i lusim yumi.** Olsem na sapos yumi no sori na mekim penans long ol pasin nogut bilong yumi na yumi go het long mekim sin, orait yumi mas pret na guria, nogut peisens bilong God i pinis na em i lusim yumi.

O God bilong mi! Yu mas pogivim mi, long wanem mi no laik mekim sin moa. Mi no laik pulim taim long senisim laip bilong mi, nogut yu salim mi i go long hel! **Mi luksave olsem planti taim yu bin marimari long mi, olsem na mi pret, nogut peisens bilong yu i pinis nau.** Inap long mekim sin nau! Mi sori tumas long ol sin bilong mi, na mi trastim blut bilong yu, long wanem yu bin kapsaitim em bilong kisim bek mi.

Buk Baibel i tok: *Oltaim Bikpela i save sori long yumi na givim bel bilong em moa yet long yumi* (Krai 3:22). Ol manmeri bilong mekim sin i mas mekim wankain toktok, long wanem Bikpela i bin marimari planti taim long ol. Ol i mas tenkim God, long wanem God i no bin mekim ol i dai wantaim ol sin bilong ol. Olsem na ol i mas pret, nogut ol i mekim sin gen, na Bikpela i tokim ol olsem: «*I gat wanpela samting moa bilong*

mekim, em mi no bin mekim, a?» (Aisaia 5:4). Sapos ol i no tanim bel na i go het long sin bilong ol, orait Bikpela bai i tokim ol olsem: «Yu man nogut! Yu no save tenkim mi long marimari bilong mi. Yu bin mekim rong planti taim long mi. Sapos yu bin mekim ol dispela rong long narapela man, orait dispela man bai i no inap long pogivim yu, na yu bai i lus olgeta. Tasol mi bin marimari long yu planti taim tumas. Mi bin givim planti save long yu, bai yu ken luksave long ol pasin nogut bilong yu. Olsem wanem na yu no lusim ol sin bilong yu yet? **Yu laikim wanem samting nau? Taim bilong marimari i pinis nau, olsem na nau bai mi panisim yu**». Dispela toktok God i bin autim pinis long planti man na meri, na nau ol i stap long hel. Na sapos God i bin pogivim yumi plati taim tasol yumi no tanim bel yet, orait ol pen bilong hel bai i kamap bikpela moa moa yet.

O Jisas, yu gutpela Ridima bilong mi! Mi sapos long harim dispela toktok bilong yu na i go long hel, long wanem mi bin mekim planti sin. Tasol yu bin wetim mi, na nau yu tokim mi olsem: ***Yupela i mas kam bek long Bikpela*** (Hosea 14:2). Mi les long ol sin bilong mi! Ol i bin pulim mi i go longwe long God! O Bikpela bilong mi, nau mi tokim yu olsem: yu olgeta gutpela samting bilong mi. Mi laikim yu, olsem na mi sori tru long ol sin mi bin mekim. Mi no laik mekim sin moa. Yu mas helpim mi long laikim yu wantaim olgeta strong bilong mi! Helpim mi long i stap gut na bihainim ol lo bilong yu inap long las de bilong laip bilong mi.

O Maria, yu ples hait bilong mi, helpim mi!

27

God i save kaunim ol sin bilong yumi

Santu Basil, na santu Jerom, na santu Ambros, na santu Ogastin na planti santu i save tok olsem: **God i save kaunim ol sin bilong yumi, na sapos yumi abrusim mak bilong ol sin bilong yumi, orait marimari bilong em bai i pinis, na yumi bai i lus olgeta.**

God i save kaunim olgeta samting. Em i makim pinis hamaspela de yumi bai i stap laip na hamaspela grasia em i laik givim long yumi. **Na tu em i save makim hamaspela sin em i laik pogivim yumi. Olsem na sapos yumi abrusim dispela mak, God bai i no inap long pogivim yumi moa, na em bai i panisim yumi.** Santu Ogastin i tok klia olsem: «Sapos wanpela man i mekim planti sin i winim peisens bilong God, orait God bai i mekim dispela man i lus olgeta». Peisens bilong God i gat arere bilong em, olsem na sapos yumi abrusim mak bilong em, orait bai i no gat moa marimari bilong pogivim yumi.

O God bilong mi! Mi luksave olsem mi bin mekim planti sin tumas long laip bilong mi! Tasol oltaim yu bin wetim mi na marimari long mi! Olsem na nau mi sori long ol sin bilong mi, long wanem mi luksave olsem yu laikim mi tumas. O God bilong mi, mi no laik givim baksait long yu moa! Olsem na mi askim yu long marimari long mi!

Buk Baibel i tok: ***God i save wet longpela taim inap sin bilong ol i kamap planti moa, na bihain tasol em i mekim save long ol*** (2 Makabi 6:14). Olsem na God i save wetim yumi inap ol sin bilong yumi i kamap planti, na bihain em i save lusim yumi, na yumi lus olgeta.

O Bikpela, yu no ken lusim mi nau! Mi trastim yu, olsem na mi laik bai yu helpim mi long stap gut. Mi sori long ol sin mi bin mekim, long wanem yu gutpela tumas! Mi promisim yu olsem mi bai i wok hat bilong abrusim ol sin. Mi laik i stap pren bilong yu, olsem na mi les long amamas bilong dispela graun.

Plant i taim yumi save mekim sin na yumi no wari liklik, tasol yumi mas pret, nogut yumi abrusim mak bilong ol sin bilong yumi. Long Buk Baibel i gat stori bilong king Belsasar. Dispela king i save mekim planti sin na em i no wari liklik long God, olsem na Profet Daniel i tokim em olsem: «***God i skelim pinis pasin bilong yu, na skel bilong em i soim olsem yu no save mekim gutpela pasin***» (Daniel 5:27). God i bin kaunim ol sin bilong dispela king, tasol taim king i abrusim mak bilong em, orait God i no marimari moa long em, olsem na em i lus olgeta.

Satan i save tokim yumi olsem: «Goan! Yu mekim sin! Planti taim yu bin mekim sin, na i no gat wanpela samting nogut i bin kamap long yu. Olsem na yu no ken pret long mekim sin nau». **Satan em i as bilong olgeta giaman tok na promis! Yumi no ken lustingting olsem em i laik pulim yumi i go long hel!** Inap long mekim sin nau, nogut skel bilong God i tok olsem ol sin bilong yumi i planti tumas, olsem na yumi mas lus long hel. **Yumi mas pret oltaim long mekim sin, long wanem yumi no save hamaspela sin God i laik pogivim yumi.** Yumi no save long mak God i bin skelim bilong pogivim yumi. **Olsem na yumi mas pret oltaim, nogut wanpela sin moa i abrusim dispela mak, na marimari bilong God i pinis.**

O God bilong mi! Yu bin pogivim mi planti taim tumas, olsem na nau mi pret long mekim sin gen, nogut mi abrusim dispela mak na mi lus long hel. Mi tenkim yu tu, long wanem yu bin wetim mi inap long tude. Inap long mekim sin! Planti taim pinis mi bin lusim yu, olsem na nau mi no laik lusim yu gen. Mi laikim yu tumas, God bilong mi! Na mi sori long olgeta taim mi bin givim baksait long yu. Mi no laik lusim yu gen. Nogat tru! Helpim mi oltaim!

Maria, yu Mama na Kwin bilong mi! Helpim mi oltaim.

28

**God i save givim advais long yumi,
long wanem em i no laik panisim yumi**

God i gupela tumas na em i laikim yumi wantaim olgeta strong bilong em, olsem na em i laik kisim yumi i go long heven. Na taim em i salim wanpela man o meri i go long hel, em i mekim olsem long wanem dispela man o meri i no bin sori long ol sin bilong em. **God i no laik salim ol manmeri i go long hel. Nogat. Tasol ol manmeri nogut i go long hel long planti sin ol yet i bin mekim.** Profet Aisaia i tok: *Bikpela bai i kirap i kam wantaim strong bilong em... Tasol yupela bai i lukim dispela wok em i narakain olgeta* (28:21). Profet Aisaia i tok olsem dispela wok bilong God bilong panisim ol manmeri nogut em i «*narakain olgeta*», long wanem trupela wok bilong God em i wok bilong marimari long ol manmeri. Tasol planti taim em i mas lusim dispela wok bilong marimari long ol manmeri, na em i

mas panisim ol. Na long dispela as tasol Profet Aisaia i tok olsem dispela wok em i «*narakain olgeta*», long wanem God i laik pogivim ol manmeri, tasol planti manmeri i no sori long ol sin bilong ol, olsem na ol i pulim God long bagarapim ol.

O God bilong mi! Yu gutpela tumas, tasol **planti manmeri i save sakim tok bilong yu, olsem na ol yet i pulim yu long panisim ol**. Sori long mi tu, long wanem planti taim mi tu i bin sakim tok bilong yu!

Olsem na yumi mas save gut olsem: **God i save toktok planti long hel, long wanem em i laik bai yumi i tanim bel na i kam bek long em**. Em i no laik bai yumi go long hel, olsem na oltaim em i save givim advais long yumi, bai yumi ken senisim ol pasin nogut. Profet Devit i tok: *God bilong yumi em i kam nau. Na em i no i stap isi. Nogat tru. Paia bilong kukim ol samting i go paslain long em* (Buk Song 50:3). **Plantitaim God i save toktok strong long yumi na i tok olsem yumi sapos long go long hel, tasol em i mekim dispela toktok bilong opim ai bilong yumi, bai yumi ken luksave long ol rong bilong yumi na tanim bel**. Olsem na planti taim God i save salim taim nogut long yumi tu, bai yumi ken luksave long ol sin bilong yumi na kam bek long em. Sori tumas long ol manmeri bilong sin i stap gut, long wanem ol bai no inap long luksave long ol rong bilong ol, na ol bai i lus olgeta!

O God bilong mi, mi bin mekim planti sin tumas, olsem na nau mi askim yu long salim taim nogut long mi, bai mi ken mekim

penans na sakrifais, na kam bek long yu! Ol mortal sin bilong mi i sapos long pulim mi i go long hel, tasol nau mi laik mekim penans na sakrifais bilong i stap gut. Givim grasia bilong yu long mi na helpim mi long abrusim hel, nogut mi lus olgeta! O Bikpela bilong mi, givim lait na strong long mi, bai mi ken stap gut oltaim na abrusim ol pasin nogut.

Tasol ol manmeri i no save wari liklik long hel i mas pret na guria, nogut indai i bungim ol taim ol i no redi, na ol i kisim bikpela bagarap long hel inap oltaim oltaim. Buk Baibel i tok: *Sapos ol i stretim wanpela man planti taim, tasol em i wok long kamap bikheth moa, orait wantu em bai i bagarap na i no gat rot bilong ol i helpim em* (Provep 29:1). Ol manmeri i no save wari long God na i go het long ol sin bilong ol, orait indai bai i bungim ol long taim ol i no redi, na ol bai i no inap long stretim ol rong bilong ol, olsem na ol bai i go stret long hel.

O Jisas bilong mi! Mi sapos long go long hel tu, long wanem mi bin mekim planti sin tumas. Tasol yu gutpela Ridima bilong mi, olsem na yu bin marimari long mi inap long tude. **Yu no bin marimari long planti manmeri na nau ol i stap long hel, tasol yu bin marimari long mi.** Yu no bin givim sans long ol long kisim grasia bilong yu gen, tasol long mi yu bin givim planti sans, na yu bin pogivim mi planti taim. Ol sin bilong mi i winim tru ol sin bilong planti manmeri i stap long hel, tasol yu bin pogivim mi na yu no bin pogivim ol. Olsem na nau mi laik tok tenkyu long yu, na mi laik tanim bel. Mi laik lusim

ol amamas bilong dispela graun na mi laik kam bek long yu. Yu God bilong mi na yu olgeta gutpela samting bilong mi, olsem na nau mi laik givim mi yet olgeta long yu. Mi bilip long olgeta tok bilong yu. Mi hop long yu. Mi laikim yu. Mi sori long ol sin mi bin mekim, na mi laik i stap gut nau. Helpim mi, nogut mi lusim yu gen. Mi no laik mekim sin moa. Nogat. Mobeta mi laik i dai pastaim.

O Maria, yu Mama bilong Jisas, yu mas pre long Pikinini bilong yu bilong helpim mi.

Indai

29

Indai bai i bungim yumi

Indai bai i bungim yumi! O bikpela samting tumas! **Yes, yumi mas i dai!** Santu Pol i tok: *Olgeta man i mas i dai wanpela taim tasol, na bihain ol i mas kamap long kot* (Hibru 9:27).

Yes, yu mas i dai! Santu Siprian i tok: «Taim mama i karim yumi em i olsem em i karim yumi wantaim wanpela rop i pasim nek bilong yumi. Na wan wan de yumi i stap laip, em i olsem dispela rop i pasim nek bilong yumi i wok long kamap tait, inap long de yumi bai i dai».

Yumi no save long wanem taim stret indai bai i bungim yumi, tasol yumi save pinis olsem wanpela de em bai i kam na bungim yumi. Ol longlong manmeri tasol i tingting olsem ol bai i no inap i dai! Maski yu maniman o yu rabisman! Maski yu wokboi nating o yu strongpela king! **Indai bai i bungim yu, na yu bai i no inap long ranawe long em!** Sampela manmeri i save dai taim ol i lapun pinis, na sampela i save dai taim ol i yangpela yet, tasol yumi olgeta i mas i

dai. Olsem na wanpela de mi tu i mas lusim dispela graun na go long eterniti. Na eterniti bilong mi bai i olsem wanem? Bai mi stap gut inap oltaim oltaim long heven, o mi bai i kisim pe nogut long hel inap oltaim oltaim? O Jisas bilong mi, yu gutpela Sevia bilong mi, yu mas sevim mi!

Sapos yumi tingting long ol tumbuna bilong yumi, orait ol i dai pinis, na nau ol i stap long matmat. Ol strongpela king bilong bipo tu i bin dai, maski ol i bikpela man tumas long ai bilong ol manmeri! Na sapos yumi go long matmat bilong ol, yumi bai i painim ol bun wantaim das tasol. Olgeta samting bilong ol i pinis, na nau ol bun bilong ol i stap long matmat.

O God bilong mi! Givim gutpela save long mi, bai mi no ken tingting moa long amamas bilong dispela graun. **Ol manmeri i tingting long amamas bilong graun i no save tingting long yu, olsem na ol bai i lus olgeta long hel inap oltaim oltaim.** Mi tu olsem wanpela longlong man, long wanem bipo mi tu i bin givim mi yet long amamas bilong dispela graun. Tasol nau yu bin opim yau bilong mi na yu bin skulim mi long rot i go long heven, olsem na mi laik tenkim yu.

Sapos yu kaunim 100-pela yia long tude, orait yu bai i no stap laip. Yes! Yu, man o meri i wok long ritim dispela buk, yu bai i stap long matmat. Na mi, i wok long raitim dispela buk, mi tu bai i stap long matmat. **I no longtaim yumi olgeta bai i stap long eterniti.** Wanpela de bai i kamap, na wanpela aua bai i kamap, na wanpela minit bai i

kamap, na dispela minit em bai i las minit bilong laip bilong mi. God i save pinis long wanem de na aua indai bai i bungim yumi, tasol yumi no save. God yet i bin makim dispela de na aua. Olsem na yumi mas tingting long God tasol, long wanem em bai i kotim yumi long stretpela kot bilong em. O sori long mi, long wanem mi no save sapos indai bai i bungim mi long taim mi redi o long taim mi gat sin!

O Jisas bilong mi, yu jas bilong mi! **Olsem na mi pret tumas, long wanem mi save pinis olsem mi mas sanap long kot bilong yu, na mi mas stretim dinau wantaim yu.** Yu mas pogivim mi pastaim long indai i bungim mi, nogut mi lus olgeta! Mi sori tru long ol sin bilong mi, na mi sori tu long olgeta taim mi no bin tingting long yu. Bipo mi no bin laikim yu tumas, tasol nau mi laikim yu wantaim olgeta strong bilong mi. Strongim mi, bai mi ken i stap gut inap long las minit bilong laip bilong mi!

O Maria, yu ples hait bilong ol manmeri bilong sin, yu tu i mas marimari long mi.

30

Yumi olgeta i mas i dai

Dispela toktok em i bikpela tumas: yumi olgeta i mas i dai. Yes, ol bratasusa bilong mi, wanpela de yumi mas i dai. **Sampela yia i go pinis ol i bin raitim nem bilong yu long buk bilong ol pikinini i bin kisim baptais, orait wankain olsem tasol wanpela de ol bai i raitim nem bilong yu long buk bilong ol manmeri i dai pinis.** God tasol i save long wanem de yu bai i dai, long wanem em yet i bin makim dispela de. Na wankain olsem nau yu save tingim ol tumbuna bilong yu i dai pinis, olsem tasol wanpela de ol manmeri bai i tingim yu, long wanem yu bai i no stap moa long dispela graun. **Plantu taim yu bin harim belo bilong haus lotu i pairap, na i singautim yu long kam long funeral bilong wanpela man o meri i dai pinis. Orait wanpela de belo bilong haus lotu bai i pairap bilong singautim ol manmeri i kam long funeral bilong yu.** Ol manmeri bai i kam long funeral bilong yu na bodi

bilang yu bai i stap insait long haus lotu, tasol sol bilang yu bai i stap pinis long eterniti.

O God bilang mi! Mi tingting long indai bilang mi! Na sol bilang mi baii go we? Ol bai i putim bodi bilang mi insait long bokis na kisim mi i go long haus lotu, tasol sol bilang mi bai i stap long eterniti. Mi laik tanim bel nau, pastaim long indai i bungim mi! O sori long mi sapos mi no lusim ol pasin nogut bilang mi, long wanem mi bai i lus olgeta long hel.

Sapos yumi lukim wanpela man nogut i stap long kalabus na jas i tok olsem em i mas i dai, na dispela man i lap na i tingting long amamas bilong graun, yumi bai i tingting olsem dispela man em i longlong man, long wanem em i sapos long redim em yet long indai, tasol em i wok long tingting yet long ol samting bilong dispela graun.

Orait yumi olgeta i olsem dispela man, long wanem yumi olgeta i mas i dai! Na indai bai i bungim yumi wanpela taim tasol, long wanem em i no save givim namba tu sans. **Sapos yu redi, yu bai i go long heven. Sapos yu no redi, yu bai i go long hel.** I no gat namba tu sans. Yumi bilip olsem taim dispela laip i pinis, yumi bai i go long eterniti. Yumi bilip tu long yumi mas sanap long kot bilong God. Na yumi bilip tu long heven na long hel. Olsem wanem na yumi no save stretim laip bilong yumi? Olsem wanem na yumi wok long tingting yet long amamas bilong dispela graun? **Dispela graun bai i pinis na laip bilong yumi tu bai i pinis! Olsem na yumi mas tingting long eterniti tasol.**

O God bilong mi! Givim lait long mi, bai mi ken tingting oltaim long indai bilong mi na long eterniti, long wanem mi save pinis olsem indai bai i bungim mi na eterniti i wok long wetim mi.

Olgeta matmat i pulap long ol bun bilong ol manmeri i dai pinis, na em i olsem ol dispela bun i tokim yumi olsem: «**Lukim mipela! Mipela i bin stap laip wankain olsem yu, tasol nau yumi i bun nating na yumi i stap long matmat**». Na taim yumi lukim piksa bilong wanpela tumbuna bilong yumi i dai pinis, orait yumi mas tingting olsem wanpela de yumi tu bai i dai, wankain olsem ol. Na taim yumi lukim haus o ol klos samting bilong ol tumbuna, yumi mas save olsem wanpela de yumi tu bai i dai na lusim haus na ol samting bilong yumi. **Ol dispela samting i save helpim yumi long tingim olsem indai i wok long kamap klostu nau.**

O Jisas bilong mi, yu hangamap long diwai kros bilong kisim bek mi! Olsem na mi laik kam long ples yu stap long em, na holim yu strong! Mi laik i dai wantaim grasia bilong yu, olsem na yu mas helpim mi. Yu lewa bilong mi! Bipo planti taim mi bin rausim yu long sol bilong mi, tasol nau mi laikim yu moa long mi save laikim mi yet. Mi sori tumas long ol sin mi bin mekim, na mi laik i stap oltaim klostu long yu. Long tude inap long las de bilong laip bilong mi, mi laik i stap wantaim yu, na mi laik bai i yu stap wantaim mi. Mi tingim Pen na Indai bilong yu, na mi trastim yu!

O Maria, mi trastim yu tu! Yu mas was long mi na sambai long mi oltaim!

31

Indai em i samting tru

O God bilong mi! Olsem wanem na planti kristen manmeri i no save wok hat bilong sevim sol bilong ol? Ol i longlong tumas! **Ol i save pinis olsem wanpela de ol bai i dai, na tu ol i save olsem bihain ol bai i kisim pe inap long pasin ol i bin mekim, tasol ol i save go het long mekim sin na ol i no tanim bel.** Ol i save pinis olsem eterniti i wetim ol, tasol ol i no save wari long sol bilong ol. Ol i save olsem i gat heven na i gat hel tu i stap, tasol ol i no wok hat long i dai wantaim grasia bilong yu na i go long heven.

O Bikpela, yu mas helpim mi long krai sori long ol sin mi bin mekim! Mi save pinis olsem ol mortal sin i save bagarapim grasia insait long sol bilong mi, tasol mi no bin wari liklik, na mi bin mekim planti sin tumas! Mi save pinis olsem ol mortal sin i save pulim mi i go long hel, tasol mi no bin tingting long dispela samting na mi bin

go het long mekim sin. O God bilong mi! Mi sori tumas long ol taim mi bin givim baksait long yu. Planti taim mi bin lusim yu na mi bin tingting long amamas bilong graun tasol. Yu mas marimari long mi.

Taim yumi harim long wanpela man o meri nogut i dai, yumi save tok: «Sori long em! Na sol bilong em bai go we nau?». Olsem wanem na planti taim yumi tu i no save tingting tumas long indai bilong yumi? **Wanpela de bai i kamap na yumi tu bai i lusim dispela graun. Maski yumi laik i dai o yumi les long i dai, yumi olgeta bai i dai na soim sol bilong yumi long God!** Indai bilong yumi i gat de na aua bilong em, na em bai i kam na kisim yumi, na yumi bai i lusim dispela graun. Na indai i wok long kam klostu nau, long wanem long wan wan de yumi i stap laip, em i wanpela de yumi wokabaut long indai bilong yumi. Olsem wanem na yumi no wok hat bilong redim yumi yet long indai? Olsem wanem na yumi no wok hat bilong pas wantaim Jisas, em i jas bilong yumi?

O Ridima bilong mi! Mi tingim indai bilong yu, na mi hop olsem indai bai i bungim mi long taim mi redi wantaim grasia bilong yu. Mi laikim yu, Jisas! Yu olgeta gutpela samting bilong mi. Mi laik pas wantaim yu olgeta de bilong laip bilong mi, bai mi ken i stap wantaim yu inap oltaim oltaim long eterniti.

Oltaim dispela samting i save kamap: long olgeta ples bilong graun i gat ol bikman i gat bikpela nem na pawa, tasol ol i dai na ol manmeri i planim ol long matmat. **Na nem na pawa bilong ol dispela bikman i pinis wantu tasol! Olgeta samting bilong ol i pinis hariap!** Na ol

i stap we nau? Ol i stap long eterniti! **Olsem na i no longtaim yumi tu bai i go long eterniti, na eterniti i ken i stap gutpela long heven, o nogut long hel. I no gat wanpela rot i go namel. Nogat. O heven o hel, inap oltaim oltaim.** O yu sevim sol bilong yu, o yu go long hel. O yu amamas inap oltaim oltaim long heven, o yu lus olgeta long hel. Wanpela bilong dispela tupela eterniti i wetim yu.

O God bilong mi! Mi laik sevim sol bilong mi, olsem na mi trastim yu. Tasol mi pret na guria, long wanem mi no save wanem samting bai i kamap long mi, nogut mi mekim sin na mi go long hel. **Olsem na mi askim mi yet olsem: olsem wanem na mi no wok hat bilong lusim ol pasin nogut na bihainim yu gut? Olsem wanem na planti taim mi save les long kam long yu?** O Bikpela bilong mi! Yu mas givim gutpela tingting long mi, bai mi ken save gut long ol pasin mi mas mekim bilong sevim sol bilong mi. Bipo mi bin lusim yu planti taim yumas, tasol yu no bin les long wetim mi. Mi les olgeta long ol sin mi bin mekim. Mi laikim yu, God bilong mi, wantaim olgeta strong bilong mi. Blesim mi na strongim mi, bai mi no ken lusim yu gen.

Maria, yu Mama bilong mi, yu mas marimari long mi tu.

32

Indai i kam klostu nau

Olgeta manmeri i save pinis olsem ol bai i dai, tasol planti i tingting olsem ol bai i dai taim ol i lapun. Ol i tingting olsem indai i stap longwe long ol, na ol bai i gat planti yia moa bilong i stap laip na amamas. **Tasol mi tokim ol dispela manmeri olsem: yu rong olgeta! Dispela laip em i sotpela tumas na indai i wok long kam klostu nau!** Yumi bai i stap liklik taim tasol long dispela graun. Laip bilong yumi em i olsem smok bilong paia, na win i save kam na rausim em hariap. Laip bilong yumi em i olsem gras i kamap long moning, na long belo san i kukim em na em i drai olgeta.

O God bilong mi! Yu no bin larim indai i bungim mi taim mi mekim mortal sin, long wanem yu no laik bai mi lus. Nogat tru. Yu laik bai mi go long heven, olsem na yu bin wetim mi inap long tude. Mi laikim yu tumas, na mi no laik lusim yu gen.

Jop i tok: «*Ol de bilong mi long i stap laip i save go pinis hariap*» (9:25). Indai i wok long ran i kam hariap bilong kisim yumi! Na olgeta de yumi i stap laip na olgeta taim yumi wok long kisim win, yumi wok long kamap klostu long indai. Planti taim yumi save westim nating taim bilong yumi, tasol long indai bilong yumi, yumi bai i krai nogut long taim yumi bin westim! Yumi bai i laik i stap laip wanpela moa aua, tasol nogat!

O Bikpela bilong mi! **Sapos indai i bungim mi nau, bai mi tingting long wanem gutpela pasin mi no bin mekim na mi bin sapos long mekim?** O helpim mi, nogut mi dai wantaim ol sin bilong mi! Helpim mi long sori tru long ol sin mi bin mekim, na givim laik bilong yu long mi, bai mi ken i stap gut oltaim.

Indai i wok long kam klostu nau, olsem na yumi mas hariap long mekim ol gutpela pasin na stretim dinau wantaim Jisas. Taim indai i bungim yumi, orait taim bilong stretim dinau bai i pinis tu. Olsem na yumi no ken westim taim bilong yumi nating. Nogat. Planti manmeri i bin tingting long stretim dinau wantaim Jisas long taim bilong indai, tasol indai i bungim ol long taim ol i no redi, olsem na ol i lus olgeta long hel.

O dia Ridima bilong mi! Mi no laik i stap moa olsem wanpela yaupas i no harim ol singaut bilong yu! Yu gat bikpela laik long pogivim mi, na mi laik kisim dispela marimari bilong yu. Mi askim yu long pogivim olgeta sin bilong mi. Yu bin i dai bilong kisim bek mi, olsem na mi tingim Pen na Indai bilong yu, na mi trastim yu. Yu

bin i dai bilong pogivim mi, tasol planti taim mi bin tingting long amamas bilong graun na givim baksait long yu. Long tude inap long las de bilong laip bilong mi, mi laik i stap wantaim yu. Mi laikim yu, God bilong mi, mi laikim yu. Yu olgeta gutpela samting bilong mi. Yu lewa bilong mi.

Maria, yu Mama bilong God, yu mas sambai long mi oltaim na marimari long mi.

33

**Indai i ken bungim yumi
long taim yumi no redi**

Yumi save pinis olsem yumi mas i dai, tasol yumi no save long wanem de na aua indai bai i kisim yumi. God tasol i save long dispela samting, long wanem em yet i bin makim de na aua bilong indai bilong yumi. **Na God i no laik toksave long yumi long wanem de na aua yumi bai i dai, bai yumi ken stap redi oltaim.**

Mi laik tenkim yu, gutpela Jisas bilong mi, long wanem yu no bin larim indai i bungim mi long taim mi no redi. Olsem na long tude inap long las de bilong laip bilong mi, mi laik krai sori long ol sin mi bin mekim, na tu mi laik pas wantaim yu wantaim olgeta strong bilong mi. Mi save pinis olsem mi bai i dai, olsem na mi laik i stap redi oltaim.

Jisas i tokim yumi olsem indai bai i bungim yumi long taim yumi i no save long em. De na aua bilong indai bilong yumi em i hait long

yumi, tasol em i klia long Jisas. Em yet i tok: «***Yupela tu i mas redi. Pikinini Bilong Man bai i kam long wanpela taim yupela i no ting em bai i kam***» (Luk 12:40). Na santu Bernard i tok: «Long taim yumi i no save indai bai i bungim yumi, olsem na yumi mas redi oltaim long bungim em».

O Jisas bilong mi, mi no laik pulim taim na wet inap long indai bilong mi bilong pas wantaim yu. Nogat. Nau tasol mi laik givim mi yet olgeta long yu. Yu yet i tok: «*Yupela i mas wok long painim samting na bai yupela i lukim*» (Matyu 7:7). Olsem na mi wok long painim yu, na mi askim yu long long kam long mi na stap wantaim mi oltaim. Mi laikim yu, Jisas, long wanem yu olgeta gutpela samting bilong. Mi sori long ol sin mi bin mekim, na mi no laik givim baksait gen long yu.

O yu man o meri i wok long ritim dispela buk, putim yau nau! Yu mas was oltaim, na taim yu tingting long mekim sin na tok olsem bihain yu bai konpes, yu mas tokim yu yet olsem: «**Na sapos dispela sin mi laik mekim em i las sin bilong mi? Wanem samting bai i kamap long mi? Sapos mi mekim sin na bihain mi dai, bai mi go we?**». Planti manmeri i bin go long hel, long wanem ol i mekim sin na ol i ting olsem bihain ol bai i gat sans long konpes, tasol indai i bungim ol hariap na ol i no konpes. Olsem na yu mas was gut, long wanem Satan bai i tokim yu olsem: «Giaman! Dispela samting i no inap kamap long yu. Yu no bai i dai hariap. Nogat. Yu bai i gat sans long konpes! Olsem na nau yu mekim sin na yu no ken tingting

planti». **Bikpela tok giaman bilong Satan!** Yu mas bekim tok bilong em olsem: «Yu no save long de na aua God i bin makim bilong mi. Olsem na mi no laik mekim sin, nogut mi i dai. Na sapos mi mekim sin na bihain mi dai, bai mi go we? Eterniti bilong mi bai olsem wanem? Bai mi i go long heven o long hel?».

O God bilong mi! Olsem wanem na yu wetim mi inap long nau? Planti manmeri i go pinis long hel, tasol yu no bin larim indai i bungim mi yet. Olsem na mi laik tok tenkyu long bikpela peisens bilong yu. Na tu mi tenkim yu long gutpela save yu wok long givim nau long mi. Planti taim mi bin mekim rong na mi bin lusim yu. Mi krai sori tumas long ol pasin nogut bilong mi. Yu wok long givim taim long mi, bai mi ken stretim ol pasin nogut bilong mi. Olsem na nau mi laik wok hat long senisim laip bilong mi, na laikim yu tasol. Helpim mi wantaim grasia bilong yu.

O Maria, yu tu i mas helpim mi long prea bilong yu.

34

Laip bilong yumi em i olsem wanpela driman i save pinis hariap

Profet Devit i tok: *Bikpela, ol [man nogut] i olsem man i driman na driman i pinis nating long moningtaim. Man i kirap long moningtaim na driman i no i stap moa long tingting bilong em* (Buk Song 73:20). Laip bilong ol manmeri long graun em i sotpela tumas olsem wanpela driman i save pinis nating hariap. Maski yu gat nem na yu pulap long mani na long amamas bilong graun, long taim bilong indai ol dispela samting bai i kamap long ai bilong yu olsem wanpela driman i pinis hariap. Laip bilong yumi hia long graun em i sotpela tru, olsem na ol samting bilong graun i no inap long helpim yumi liklik. Wanpela taim mi lukim matmat bilong wanpela saveman, na antap long em ol i bin raitim olsem: «**Man i slip long dispela matmat i klia olsem amamas bilong graun i save pinis hariap,**

olsem na em i no bin givim lewa bilong em long ol samting bilong graun». Na dispela em i tru, long wanem man o meri i tingting long indai bilong em, i no save givim lewa bilong em long ol samting bilong dispela graun. Ol manmeri i gat bilip i save pinis olsem yumi stap long graun olsem wanpela pasindia, na i no longtaim yumi bai i lusim dispela graun. **Olsem na em i no gutpela long yumi givim lewa bilong yumi long ol samting bilong graun, long wanem wanpela de yumi bai i lusim dispela graun wantaim olgeta samting i stap long em.**

O God bilong mi! Planti taim mi bin givim mi yet long amamas bilong graun, na mi bin givim baksait long yu! Long tude inap long las de bilong laip bilong mi, mi laik tingting long yu tasol. Mi laik mekim wok bilong helpim yu, na mi laik pas wantaim yu tasol. Tasol yu mas helpim mi oltaim.

Stori bilong santu Fransis Borgia i naispela tumas na i givim bikpela skul long yumi. Stori bilong em i olsem: Fransis em i wokman bilong Kwin Isabella. Dispela kwin em i yangpela tru, na em i naispela tumas na i pulap long gutpela save. Kwin tu i gat bikpela pawa na namba long ai bilong ol manmeri bilong kingdom bilong em, na gol na silva bilong em i winim tru gol na silva bilong olgeta manmeri bilong graun. Kwin Isabella i no sot long wanpela samting, na ol manmeri i save laikim em. Tasol taim em i yangpela yet, indai i kam na kisim em, na em i dai hariap. Olsem na ol i putim bodi bilong em insait long bokis, na Fransis i go lukim em.

Na taim Fransis i lukim bodi bilong kwin, em i lukim olsem kwin i no naispela moa, na olgeta gol na silva bilong em i no inap long helpim em liklik. Olsem na Fransis i tok: «**Inap nau. Lukim kwin! Ol samting bilong graun i save pinis hariap na i no inap long helpim yumi liklik!** Olsem na long tude inap long las de bilong laip bilong mi, mi no laik i stap aninit long wanpela king o kwin bilong dispela graun gen. Nogat. Inap nau! **Nau mi laik i stap aninit long wanpela King i no inap i dai, na dispela King em i Jisas tasol.** Long nau inap long las de bilong laip bilong mi, mi laik mekim wok bilong Jisas tasol». Olsem na yumi tu i no ken givim lewa bilong yumi long ol samting bilong dispela graun, long wanem wanpela de yumi tu bai i dai na lusim ol samting bilong yumi. Wanpela de yumi tu bai i dai wankain olsem dispela kwin, na sol bilong yumi bai i lusim dispela graun na i go long eterniti.

O Jisas bilong mi! Bipo mi no bin laikim yu tumas, tasol nau mi sori long dispela pasin nogut bilong mi! Planti taim mi bin mekim rong long yu! Tasol nau mi laik stretim ol rong mi bin mekim. Mi askim yu long laikim mi, na long lustingting long olgeta taim mi bin givim baksait long yu. Mi sori tumas long ol sin mi bin mekim! Mi laikim yu moa long mi save laikim mi yet. Marimari long mi, gutpela Jisas.

O God bilong mi, givim lait long mi bai mi ken luksave long olgeta pasin nogut bilong mi. Mi laik krai sori long olgeta taim mi bin givim baksait long yu. Mi no laik mekim sin moa, mobeta mi

laik i dai pastaim. Oltaim mi laik tok tenkyu long yu, long wanem yu bin wetim mi inap long tude. Gutpela Ridima bilong mi, mi laikim yu moa long olgeta samting, na mi laik givim laip bilong mi long yu. Helpim mi long strong bilong yu.

O Maria, helpim mi oltaim long prea bilong yu.

35

Long indai yumi mas lusim olgeta samting

Buk Baibel i tok: *Sotpela taim tasol na bai ol [manmeri nogut] i pundaun na bagarap olgeta* (Lo 32:35). Buk Baibel i save kolim indai olsem «De bilong bagarap», long wanem, long indai yumi bai i lusim olgeta samting bilong yumi. **Long de bilong indai, ol pren, na ol mani samting, na ol graun, na namba na biknem yumi i bin kisim long taim yumi stap laip, bai i pinis!** Olsem na yumi no ken westim taim long tingting planti long mekim bisnis na winim mani, long wanem long taim bilong indai ol dispela samting bai i no inap helpim yumi liklik. Nogat tru. Yumi bai i lusim ol dispela samting i stap long graun, na yumi bai i dai. Santu Ignasius i tok: «Ating yu save long wanpela king i bin kisim olgeta gol na silva i go long eterniti wantaim em, a? Nogat tru. Na yu save long wanpela maniman i bin kisim ol mani bilong em i go long eterniti, a? Nogat olgeta. **Long indai yumi bai i lusim olgeta samting, na sol**

bilang yumi wantaim ol pasin em i bin mekim tasol bai i go insait long eterniti». Nau yumi mas skelim yumi yet na askim: «**Ol pasin bilang i olsem wanem? Mi save mekim gutpela pasin o pasin nogut? Wanem kain pasin bai i kam wantaim mi long eterniti?**». Mi ting olsem yumi i no pulap long planti gutpela pasin tumas inap long go long heven.

Ol manmeri bilang graun i no wankain: sampela i save gat planti samting, na sampela i sot long planti samting. Sampela i gat bikpela nem, na sampela i stap las tru. **Tasol long taim bilang indai, olgeta i kamap wankain!** Sapos yumi lukim ol bun i stap long matmat, yumi bai i no inap long luksave husat i bin stap bikman na husat i bin stap las tru, long wanem insait long matmat ol bun i wankain. Indai bilang king na indai bilang wokboi nating em i wankain tasol. Na indai bilang maniman na indai bilang rabisman em i wankain tasol. **Indai i save mekim ol bikman na ol rabisman i kamap wankain!**

O God bilang mi! Planti manmeri i save bisi long mekim bisnis na winim mani, tasol mi laik tingting long grasia bilang yu tasol. Grasia bilang yu i olgeta gutpela samting bilang mi. Mi laik tingting long yu tasol, na lustingting long ol samting bilang dispela graun. Mi laikim yu tasol, na mi les long tingting long ol samting bilang graun. Mi laik pas wantaim yu long dispela graun, na tu long laip bilang oltaim.

Olgeta samting bilang dispela graun bai i pinis. Ol gutpela samting na ol samting nogut bai i pinis. Gutpela taim na taim nogut bai i pinis. Amamas bilang bodi na pen bilang bodi bai i

pinis. Na long taim bilong indai ol manmeri i no bin tingting long amamas bilong graun i ken amamas tru! Long taim bilong indai ol manmeri i bin karim pen wantaim bel isi i ken amamas tru! Long taim bilong indai ol samting bilong graun i no inap long helpim yumi. Nogat tru. Ol gutpela pasin yumi bin mekim tasol inap long helpim yumi long go long heven. Olsem na yumi no ken pret long karim pen wantaim God, long wanem em yet bai i givim bikpela pe long yumi long taim bilong indai.

O Jisas bilong mi! Helpim mi long rausim lewa bilong mi long ol samting bilong dispela graun, nogut indai i bungim mi na lewa bilong mi i pas yet long dispela graun. Givim grasia long mi na strongim mi, long wanem long strong bilong mi yet, mi no inap.

Helpim mi, dia Jisas, long mekim wok bilong yu tasol. Bipo mi bin tingting long mi yet, tasol nau mi laik tingting long yu tasol. Mi sori, Bikpela bilong mi, long olgeta taim mi bin givim baksait long yu. Mi laikim yu tru, na mi no laik lusim grasia bilong yu gen. Nogat. Mobeta mi laik i dai. **Tasol mi mas tok tru long yu olsem: planti traim i save kamap long mi na planti taim mi laik mekim sin, olsem na mi askim yu long helpim mi oltaim.** Mi no laik i go longwe long yu moa, dia Jisas.

O Maria, yu hop bilong mi! Yu mas askim Jisas long helpim mi long i stap gut inap long las de bilong laip bilong mi.

36

Long indai i no gat wanpela samting inap long helpim yu

Ol kristen i save pinis olsem yumi olgeta i mas i dai, tasol planti i no save tingting tumas long dispela samting, olsem na ol i givim ol yet long ol samting bilong graun. Planti kristen manmeri i no tingting long sol bilong ol, wankain olsem ol haiden i no save bilip long heven na long hel. **O yu man o meri i wok long ritim dispela buk, putim yau nau. Sapos yu laik i go long heven, orait yu mas wok hat long mekim planti gutpela samting, long tude inap long indai bilong yu.** Ol manmeri i save tingting long indai bilong ol, ol i gat bikpela save na ol i save skelim gut olgeta samting. Long wanem, **taim yumi tingting long indai, olgeta samting bilong graun i save kamap olsem pipia nating long ai bilong yumi,** na yumi inap long skelim gut ol samting. Yumi no ken lustingting olsem long indai yumi bai i lusim olgeta samting i stap yet long graun.

O God bilong mi! Yu givim taim long mi yet, bai mi ken stretim ol rong bipo mi bin mekim. Olsem na mi askim yu long helpim mi long bihainim laik bilong yu oltaim!

Bai mi givim wanpela tok piksa nau. Wanpela man i laik mekim wanpela nupela haus bilong meri na ol pikinini bilong em, olsem na em i go long wanpela longwe ples na mekim bisnis, long wanem long ples bilong em yet, em i no inap. Em i lusim famili bilong em i stap long ples, na em wan i go mekim bisnis long dispela longwe ples. Orait, i no longtaim em i mekim bisnis pinis na em i winim planti mani, na em i tingting long yusim dispela mani bilong mekim nupela haus bilong em. Olsem na em i laik kam bek long ples bilong em. Tasol taim em i wok long kam bek long ples bilong em, em i go insait long wanpela taun na westim planti mani nating nating. Bihain em i go insait long narapela taun, na em i mekim wankain samting. Na long olgeta taun em i go insait long em, dispela man i save westim planti mani nating nating. Olsem na olgeta mani bilong em i pinis. Na taim em i kam kamap long ples bilong em wantaim famili bilong em, em i luksave olsem olgeta mani bilong em i pinis, na em i stap rabis wankain olsem bipo. **Orait, wankain pasin i save mekim ol manmeri i tingting tumas long amamas bilong graun na i no tingting long redim wanpela naispela haus bilong ol long heven.** Dispela ol taun bilong tok piksa em i piksa bilong ol amamas bilong graun. Na dispela haus em i laik mekim, em i piksa bilong heven. Olsem na planti manmeri i save westim taim na strong bilong ol long

amamas bilong graun, tasol long taim bilong indai, ol bai i luksave olsem ol i stap rabis tru long ai bilong God, na ol bai i no inap long go long heven.

O God bilong mi! Sori tumas long mi sapos mi dai taim mi no redi! Tasol yu no bin larim indai i kisim mi long taim mi no redi, olsem na mi laik tenkim yu tru. Yu no ken larim mi long lusim yu, long wanem mi laik i stap wantaim yu inap oltaim oltaim. O God, yu olgeta gutpela samting bilong mi! Mi laikim yu moa long olgeta samting!

Indai em i olsem wanpela stilman i save stilim olgeta samting bilong yumi, na yumi i stap nating. Long taim bilong indai yumi bai i no inap long kisim wanpela samting i kam wantaim yumi long eterniti, na yumi bai i lusim olgeta samting i stap yet long graun. Long taim bilong indai ol manmeri bai i putim bodi bilong yumi insait long wanpela bokis, na em tasol. **Dispela bokis bai i kamap haus bilong yumi.** Na i no longtaim dispela bokis tu bai i bagarap insait long matmat, na ol bun bilong yumi bai i stap nating long graun, inap long Jisas i kam bek wantaim bikpela bilas bilong em bilong mekim kot. Long dispela kot Jisas bai i kirapim bek bodi bilong ol manmeri i dai pinis, na ol bodi bai i go long ples sol bilong ol i stap pinis long em. **Sapos sol bilong wanpela man o meri i stap long heven, orait bodi bilong em tu bai i go long heven. Tasol sapos sol bilong wanpela man o meri i stap long hel, orait bodi bilong em bai i long hel tu.** Olsem na long taim bilong indai yumi bai i no inap long kisim wanpela samting i kam wantaim yumi. Nogat

tru. Ol pasin yumi i bin mekim tasol bai i kam wantaim yumi. Olsem na mi askim long mi yet nau: sapos mi dai nau, bai mi go we? Mi pulap long planti gutpela pasin, o mi pulap long ol pasin nogut? Skel bilong God bai i tok wanem samting long ol pasin bilong mi? Inap long westim taim nau! Nau tasol mi mas lusim ol pasin nogut bilong mi, na wok hat bilong go long heven.

O God bilong mi, mi laik tanim bel nau! Bipo mi bin sakim tok bilong yu planti taim. Tasol nau mi no laik bihainim laik bilong mi moa. Nogat. Mi laik bihainim laik bilong yu tasol. Mi laikim yu, God bilong mi. Mi laikim yu moa long olgeta samting. Helpim mi long marimari bilong yu.

O naispela Mama bilong God! Yu mas helpim mi long prea bilong yu.

37

Indai em i dua bilong eterniti

Bilip bilong yumi i tok klia olsem: **sol bilong yumi i no inap dai, na em bai i stap laip inap oltaim oltaim.** Na bilip bilong yumi tu i tok klia olsem: **olgeta manmeri i mas i dai, na indai bai i bungim ol long de na long aua ol i no save long em.** Olsem na yumi mas wok hat bilong redim wanpela naispela haus i no save pinis long heven, long wanem ol samting bilong graun bai i pinis long indai bilong yumi. Planti strongpela king bilong bipo (kain olsem king Aleksander o Sisar Ogastus) i bin bosim dispela graun na ol i pulap long olgeta samting, tasol indai i bungim ol, na ol samting bilong ol i pinis. Na sol bilong ol i go we? Mi ting olsem ol i no stap long ples bilong amamas, long wanem ol i bin pulap long ol pasin nogut na ol i sot long ol gutpela pasin. Na ol bai i stap long dispela ples bilong karim pen inap oltaim oltaim.

O God bilong mi! Bipo mi no bin laikim yu tru! Mi bin westim laip bilong mi! Mi bin mekim planti sin tumas long ai bilong yu, na nau mi pilim nogut long dispela samting. Tasol yu givim sans long mi, bai mi ken senisim ol pasin nogut bilong mi na kam bek long yu. Olsem na mi laik bihainim laik bilong yu oltaim na givim amamas long yu. Long tude inap long las de bilong laip bilong mi, mi no laik tingting moa long mi yet. Nogat. Mi laik krai sori long ol sin mi bin mekim, na mi laik pas wantaim yu oltaim.

Sapos mi kisim olgeta amamas bilong dispela graun, na bihain mi go long hel inap oltaim oltaim, orait dispela amamas bai inap long helpim mi olsem wanem? Ol manmeri i tingting long amamas bilong graun tasol i wankain olsem ol longlong man tingting bilong ol i paul olgeta! **Planti manmeri i bilip long hel, tasol ol i go het long mekim sin! Ol dispela manmeri i longlong tumas! Yu no pret long indai? Yu no pret long hel? Yu no pret long eterniti? Sori tumas long ol! Ol i bisi long amamas bilong graun, tasol indai bai i bungim ol na ol bai i go long hel inap oltaim oltaim. Yumi mas tingting long eterniti na wok hat bilong i dai wantaim grasia bilong God long sol bilong yumi!**

O Holi Spirit, givim lait na strong long mi, bai mi ken i stap gut inap long indai bilong mi. Mi no laik lusim grasia bilong God gen. Nogat olgeta. Mi laik bai grasia bilong God i ken i stap insait long sol bilong mi oltaim. Mi save pinis long ol rong mi bin mekim, tasol nau mi no laik mekim sin moa. Mi laikim yu moa long olgeta samting.

Yumi no ken lustingting olsem: **amamas bilong graun bai i pinis. Ol mani samting bai i pinis. Ol naispela samting bilong graun bai i pinis. Yu bai i dai, na ol bai i mekim funeral bilong yu, na bihain ol bai i putim bodi bilong yu insait long matmat. Na em tasol.** Indai bai i stilim olgeta samting bilong yu, na yu bai i no gat wanpela samting moa. Olsem na ol manmeri i wok long bihainim laik bilong God oltaim i ken amamas! Ol dispela manmeri bai i go long heven, long wanem ol i bin bihainim God taim ol i bin i stap laip.

O Jisas bilong mi, mi sori tumas, long wanem planti taim mi no bin tingting long yu. Mi bin tingting long mi yet na long kisim amamas bilong dispela graun, olsem na mi bin sakim tok bilong yu planti taim. Tasol nau mi laikim yu, na mi mangal long heven tasol. Long tude inap long indai bilong mi, mi laik givim lewa bilong mi long yu tasol. Mi no laikim narapela samting. Nogat tru. Mi laik pas wantaim yu long dispela laip na long laip bilong oltaim long heven. Yu tingim Pen na Indai bilong yu, na helpim mi long i stap gut.

Maria, yu Mama bilong God, yu hop bilong mi.

38

Taim bilong indai

Wanpela bisop, nem bilong em William, i bin raitim long rum bilong em olsem: «**Long taim bilong indai, God bai i givim eterniti long mi**». Long taim yu pulim las win bilong yu, God bai i givim eterniti long yu. Dispela tingting bilong indai na bilong eterniti em i bikpela samting tumas! Dispela eterniti bai i pulap long amamas inap oltaim, o bai i pulap long paia i no save dai inap oltaim. Olsem na yumi longlong tumas, long wanem planti taim yumi save mekim sin, na dispela sin i save pulim yumi long eterniti long hel! **Wanpela sotpela amamas bilong bodi i ken pulim yumi long paia i no save dai inap oltaim oltaim!**

O God, long las minit bilong laip bilong mi, bai mi redi o nogat? O Jisas bilong mi! Yu bin kapsaitim blut bilong yu bilong kisim bek mi, olsem na yu no ken larim mi i lus olgeta. Yu olgeta gutpela samting bilong mi, olsem na mi no laik lus long hel.

Sapos long taim bilong indai, ol i tokim yu olsem yu gat sans bilong baim wanpela aua moa bilong i stap laip, ating yu no bai i redi long givim olgeta samting bilong yu bilong baim dispela aua na i stap laip liklik taim moa? **Orait, i no longtaim dispela las aua bilong yu bai i kamap, na yu bai i no inap long mekim wanpela samting bilong abrusim em.** Na long las minit bilong laip bilong yu, yu bai i tok olsem: «Taim bilong mi i pinis nau. Nau God bai i skelim ol pasin bilong mi na givim pe inap long pasin mi bin mekim. Nau bai mi save long eterniti bilong mi. I gat tupela rot tasol: o amamas wantaim God long heven, o paia i no save dai long hel».

No, God bilong mi, mi no laik i stap longwe long yu. Mi no laik lusim yu gen. Bipo mi bin go longwe long yu planti taim, tasol nau mi sori long ol rong bilong mi, na mi no laik lusim yu gen.

Planti manmeri i no save bilip long eterniti, olsem na ol i no save bilip long heven na long hel. **Tasol yumi ol kristen manmeri i bilip strong long eterniti, na yumi bilip tu olsem heven na hel i no save pinis. Heven na hel bai i stap inap oltaim oltaim.** Olsem na sapos yumi westim laip bilong yumi na yumi no wari long sol bilong yumi, orait yumi bai i go stret long hel, na God bai i no inap long givim nupela sans long yumi. Na long hel olgeta hop bai i pinis, long wanem God i no inap long helpim yu na kisim yu i go long heven. Nogat olgeta. Taim bilong marimari i pinis.

Olsem na yumi mas wok hat bilong i go long heven, long wanem eterniti i wetim yumi. Na sapos yumi no redim yumi yet nau long dai

wantaim grasia bilong God, orait yumi lus pinis, long wanem God bai i givim pe inap long pasin yumi bin mekim. **Olgeta de na aua yumi stap laip, em i wanpela presen God i save givim long yumi, bai yumi ken stretim laip bilong yumi.** Goan! Hariap! No ken westim taim bilong yu nating! **Stretim laip bilong yu hariap na redim yu yet long i dai wantaim grasia bilong God.**

Lukim mi, gutpela God bilong mi, na tokim mi long pasin mi mas mekim bilong sevim sol bilong mi, long wanem mi laik i go long heven. Planti taim mi bin givim baksait long yu, tasol nau mi sori tumas. Marimari long mi, Bikpela, na no ken larim mi i lusim yu gen. Mi laikim yu moa long olgeta samting, na mi laik pas wantaim yu inap oltaim.

O santu Virgo Maria, helpim mi long stap gut inap long las de bilong laip bilong mi.

39

Oltaim yumi mas tingting long indai

Ol manmeri i save givim ol yet long amamas bilong graun, ol i les olgeta long tingting long indai bilong ol, long wanem ol i no laik i dai na lusim ol samting bilong ol. **Tasol maski ol i no laik, indai bai i bungim ol tu.** Na taim ol i wok long givim ol yet long amamas bilong graun na ol i lustingting long sol bilong ol, ol i wok long lusim heven na winim hel. **Yumi olgeta i mas i dai, na i no gat wangepela man o meri i ken tok olsem em bai i abrusim indai na em bai i stap laip inap oltaim oltaim.** Nogat tru. Na indai i save bungim yumi wangepela taim tasol, olsem na yumi mas redi gut long dispela de. **Sapos yu no redi, orait God bai i no givim namba tu sans long yu.**

O God bilong mi! Mi tenkim yu long givim save long mi nau! Bipo mi no bin tingting tumas long indai bilong mi, olsem na mi bin westim planti taim tumas. Tasol nau mi laik tingting oltaim long

indai na long eterniti, olsem na mi laik givim mi yet olgeta long yu. Mi laik bihainim laik bilong yu oltaim.

Bipo planti monk i save go long ol ples nating, na ol i stap long dispela ples inap long indai bilong ol. Ol i mekim olsem long wanem ol i laik i stap longwe long ol samting bilong dispela graun. Na ol i save kisim tupela samting tasol i go wantaim ol: wanpela buk bilong Jisas, na wanpela bun bilong het bilong wanpela man i dai pinis. Na oltaim ol i save lukim dispela bun bilong het na i tok: **«Bodi bilong mi bai i kamap wankain olsem dispela bun, tasol sol bilong mi bai i stap laip yet. Na sol bilong mi bai i go we?»**. Na dispela tingting i helpim ol long redim ol yet gut long indai. Ol i les long ol samting bilong graun, long wanem ol i mangalim ol samting bilong heven tasol.

O Bikpela bilong mi, mi laik tok tenkyu long yu, long wanem yu no bin larim indai i kisim mi long taim mi bin gat mortal sin. Mi sori tumas long ol sin mi bin mekim, na mi tingim blut bilong yu na trastim yu. O gutpela Jisas bilong mi, mi laik lusim ol samting i no stret long laip bilong mi, na mi laik givim amamas long yu oltaim.

I gat stori bilong wanpela monk klostu i laik i dai, long wanem em i lapun na i sik nogut tru. Na taim em i stap long bet na em i wetim indai i kam na bungim em, em i lap na amamas oltaim, wankain olsem ol liklik pikinini i pilai. Na ol manmeri i kirap nogut long lukim em i lap na amamas, olsem na wanpela man i askim em olsem: «Olsem wanem na yu amamas na lap?». Na dispela monk i bekim tok

olsem: «**Oltaim mi bin tingting long indai bilong mi, na mi bin wok hat bilong redim mi yet gut. Mi save olsem indai i kam klostu nau, tasol mi no pret. Mi redim mi yet gut, olsem na mi wetim indai i kam, na mi amamas**».

Ol manmeri bilong mekim sin i save pret nogut tru long indai. Ol i laik abrusim indai, na ol i les olgeta long harim olsem wanpela de ol tu bai i dai. Tasol ol manmeri i bin bihainim God i no pret long indai, long wanem ol i save pinis olsem ol bai i go long heven na amamas inap oltaim oltaim.

O Sevia bilong mi! Indai bilong mi tu i wok long kam klostu nau. Na mi skelim mi yet na mi luksave olsem mi no pulap long planti gutpela pasin. Nogat. **Yu bin givim laip bilong yu bilong kisim bek mi, tasol planti taim mi bin givim baksait long yu.** Olsem na nau mi laik pas wantaim yu wantaim olgeta strong bilong mi. Mi no laik westim nating taim bilong mi. Bipo mi bin mekim planti sin, tasol nau mi sori tru. Mi laik givim amamas long yu. Yu mas givim lait na strong long mi. Yu laik bai mi givim mi yet olgeta long yu, na mi tu i laik givim mi yet long yu. Helpim mi wantaim grasia bilong yu, long wanem mi trastim yu.

Na mi trastim yu tu, santu Maria, long wanem yu Mama na hop bilong mi.

40

Ol samting bilong graun em i samting nating

Laip bilong yumi em i wanem samting? Laip bilong yumi em i olsem smok, na win i kam na rausim em hariap. Buk Baibel i tok: ***Laip bilong yupela i olsem smok i save kamap na i stap liklik taim tasol na i pinis olgeta*** (Jems 4:14). Taim smok i go antap long heven, lait bilong san i mekim em i sain na i kamap nais. Tasol wantu win i kam na i rausim em, na smok i pinis. **Orait, ol samting bilong graun i olsem smok, na i no longtaim bai i pinis.** Yumi lukim ol bikman bilong graun: taim ol i stap laip, planti manmeri i save pret long ol na mekim wok bilong helpim ol. Tasol bihain ol i dai, na ol manmeri i save amamas long indai bilong ol na tok baksait long ol. Long indai ol gutpela samting bilong graun i pinis. Maski yumi gat nem na namba na planti manmeri i soim rispekt long yumi. Indai bai i pinisim tru ol dispela samting.

O God bilong mi! Givim save long mi, bai mi ken save gut olsem yu olgeta gutpela samting bilong mi! Mi laik i stap wantaim yu tasol, na laikim yu wantaim olgeta strong bilong mi.

Indai em i olsem wanpela stilman i kam long taim papa bilong haus i no save long em bai i kam. Indai i save kam na rausim ol gutpela samting bilong yumi. Ol king i gat ol bikpela na naispela haus king bilong ol, tasol long taim bilong indai ol manmeri i save putim ol long wanpela bokis na kisim ol i go long matmat. **Na wankain samting bai i kamap long ol maniman na long ol bikman bilong graun. Ol tu bai i dai na lusim olgeta samting long graun.** Ol wokboi bilong ol bai i kisim bodi bilong ol na putim insait long matmat, na bihain ol binatang bai i kam na kaikaim ol. Bipo ol manmeri i pret long ol na mekim wok bilong helpim ol, tasol nau ol manmeri i lustingting long ol, na i no gat wanpela i save bihainim tok bilong ol moa.

O sori long mi, Bikpela, long wanem mi bin westim taim bilong mi! Planti taim mi bin givim mi yet long amamas bilong graun, na mi bin lusim yu. Tasol nau mi laik i stap wantaim yu, long wanem yu winim tru ol samting bilong dispela graun. Olsem nau mi laik givim lewa bilong mi long yu.

Buk Baibel i tok: ***Ol manmeri i kamap long graun tasol. Ol i samting nating. Olsem na ol i no ken apim nem bilong ol yet. Taim ol i stap laip yet, mak bilong dai i stap pinis long ol... Maski yu stap king nau, tumora yu inap i dai. Taim ol manmeri i dai pinis, ol snek na lang na binatang bai i lukautim ol*** (Sirak 10:9-

11). Em i olsem God i tokim yumi olsem: «Harim mi nau. I no longtaim yu bai i dai, na bodi bilong yu bai i kamap das. Olsem wanem na yu tingting tumas long amamas bilong graun? Yu mas tingim oltaim long indai bai i kam na rausim olgeta samting bilong yu. **Na sapos yu sot long ol gutpela pasin, orait sol bilong yu bai i go we?** Eterniti bilong yu bai i olsem wanem?». O Bikpela bilong mi! Mi laik tenkim yu, long wanem oltaim yu save givim planti gutpela advais long mi. Yu laik bai mi go long heven na sevim sol bilong mi, olsem na yu save skulim mi oltaim. Mi askim yu long marimari long mi na pogivim mi. Yu save laikim tumas ol manmeri i givim ol yet long yu, olsem na nau mi laik givim mi yet olgeta long yu, bai yu ken laikim mi na kisim bek mi.

O Maria, oltaim yu save pre long Jisas bilong helpim mi! Yu hop bilong mi.

41

**Ol samting bilong graun
i no inap helpim yumi liklik**

Long Buk Baibel i gat tok bilong Jop olsem: «*Mi bagarap pinis na taim bilong mi i dai em i klostu tru. Na matmat tasol i wetim mi*» (Jop 17:1). De bilong asde i go pinis... na ol olupela yia i go pinis tu... na planti amamas bilong bipo tu i go pinis... na planti pren i save laikim yumi tu i lusim yumi pinis... na planti gutpela samting bilong bipo i no stap moa... Na i no longtaim indai bai i bungim yumi, na yumi tu bai i tok wantaim Jop olsem: «*...taim bilong mi i dai emi klostu tru*». Na ol bai i kisim bodi bilong yumi na putim insait long matmat. Na bai i no gat wangepela man o meri i was long matmat. Nogat. Ol bai i lusim yumi nating long matmat. Na i no longtaim, sori bilong ol lain i bin krai long indai bilong yumi bai i pinis, na ol bai i lustingting long yumi, na lap na amamas gen wankain olsem bipo. **O sori long yumi!**

Sapos yumi tingting tumas long ol samting bilong graun, yumi bai i krai nogut tru long taim bilong indai, long wanem yumi bai luksave olsem ol dispela samting i no inap helpim yumi liklik.

O indai bilong mi! Mi laik tingting long yu oltaim, long wanem mi no laik givim lewa bilong mi long ol samting bilong dispela graun. O God bilong mi! Givim lait na gutpela save long mi nau, bai mi ken skelim gut ol samting.

Long Buk bilong Profet Aisaia i gat tok olsem: *«Mi olsem man i dai pinis. Laip bilong mi i lus pinis olsem haus sel ol man i brukim na i karim i go. Na laip bilong mi i olsem laplap ol man i wok long lumim. Mi bin ting em bai i go longpela, tasol wantu ol i katim na rausim long masin bilong lumim laplap. God, wantu tasol yu pinisim laip bilong mi»* (38:12). Planti manmeri i save dai taim ol i bisi long mekim gutpela bisnis, na planti yangpela boi na gel i save dai long taim ol i go long skul yet, na planti pikinini tu i save dai taim ol i liklik yet. **Indai i save kam na pinisim olgeta samting.** Na long taim bilong indai, ol manmeri i bin givim lewa bilong ol long ol samting bilong dispela graun, i save krai nogut tru na komplein, long wanem ol i luksave olsem ol dispela samting i no inap helpim ol liklik. Taim ol dispela manmeri i stap laip yet na i gat strong, ol i tingting olsem ol amamas bilong graun i bikpela samting tumas. Tasol taim indai i bungim ol na klostu ol i laik i dai, ol i luksave olsem ol dispela amamas bilong graun em i samting nating tru! **Amamas bilong graun em i olsem smok i save stap liklik taim, na**

bihain win i kam na pinisim em hariap. Long taim bilong indai ol manmeri nogut i save luksave olsem ol i bin westim taim bilong ol nating, tasol nau ol i no inap long stretim ol dispela rong. Maski yu bin winim planti mani o yu bin gat bikpela nen na namba long ai bilong ol manmeri, long taim bilong indai bilong yu, ol dispela samting bai no inap long mekim yu i stap gut. Indai i save kam na pinisim olgeta samting.

O God bilong mi! Givim grasia bilong yu long mi! Bipo mi bin lusim grasia bilong yu planti taim, long wanem mi bin mekim planti sin tumas. Tasol nau mi krai sori long ol rong mi bin mekim. O Jisas bilong mi, marimari long mi!

Maski yu maniman na yu pulap long gol na silva, long taim bilong indai ol bai i putim yu insait long wanpela bokis, na ol bai i karamapim bodi bilong yu wantaim wanpela laplap. Na em tasol. Na mani bilong yu bai inap long helpim yu? Nogat tru! Ol pren bilong yu bai i putim bilong yu long matmat, na em tasol. Na olgeta amamas bilong bodi yu bin kisim taim yu stap laip bai inap helpim yu? Nogat tru! Ol binatang bai i kam na kaikaim bodi bilong yu, na yu bai i smel nogut tru na bai i no gat wanpela man o meri i laik lukim yu gen, long wanem bodi bilong yu i bagarap olgeta.

O gutpela Ridima bilong mi! Mi save pinis olsem ol sin bilong mi i save bagarapim grasia bilong yu. Na planti taim mi bin mekim mortal sin na lusim grasia bilong yu. Tasol nau mi askim yu long pogivim mi, long wanem yu bin i dai bilong kisim bek mi. Mi luksave long bikpela

laik bilong yu i kam long mi, olsem na mi no laik mekim sin moa. O Gutpela Papa bilong mi, yu gutpela tumas! Mi laikim yu tumas, na mi no laik i stap longwe moa long yu. Helpim mi long i stap gut inap long las de bilong laip bilong mi.

O Maria, yu Mama bilong mi, pre long Jisas bilong helpim mi.

42

**Long taim bilong indai ol manmeri nogut
i save pret long kot bilong God**

Long taim bilong indai planti manmeri i save pret long sanap long kot bilong God. **Ol i pret nogut tru, long wanem ol i save olsem God bai i skelim olgeta pasin bilong ol.** Jisas yet bai i kotim yumi long stretpela kot bilong em, na kot bilong em i stret olgeta. **Taim bilong marimari bai i pinis,** na yumi bai i lusim dispela graun na i go long eterniti. Olsem na ol sin yumi i bin mekim bai kamap ples klia long ai bilong yumi, na yumi bai i pret nogut tru long sanap long ai bilong Jisas. Santu Maria Magdalena bilong ples Pazzi i save guria taim em i tingting long kot, long wanem em i tingting olsem em i no redi long sanap long ai bilong Jisas. Na wampela pris i tokim em olsem em i no ken pret, tasol em i bekim tok bilong pris olsem: **«O pater, Jisas yet bai i kotim mi na em bai i kamap jas bilong mi! Dispela em i bikpela samting**

tumas!». Na yumi no ken lustingting olsem santu Maria Magdalena em i wanpela santu, na em i bin bihainim Jisas long taim em i liklik pikinini inap long indai bilong em. Na em i pret nogut tru. **Na yumi olsem wanem?** Mi no ting olsem ol pasin bilong yumi i winim pasin bilong dispela santu, olsem na yumi mas pret moa moa yet.

Na i gat stori bilong wanpela pris, nem bilong em Agaton. Em i bin givim em yet long Jisas na mekim planti penans na sakrifais, tasol ol taim em i save tok olsem: «Taim mi sanap long kot, bai mi go we? Jisas bai i givim wanem pe long mi?». **Olsem na yumi mas pret moa moa yet, long wanem yumi bin mekim planti sin tumas!** Ol manmeri bilong sin i mas pret long kot bilong God, long wanem ol i no save wanem pe God bai givim long ol. Olsem na yumi mas wok hat long pas wantaim Jisas na askim em long marimari long yumi, nogut kot bilong God i kam no yumi i no redi.

O Jisas bilong mi! Yu Ridima bilong mi! Wanpela de yu bai i kotim mi, olsem na nau mi askim yu: **marimari long mi, dia Jisas**. Na marimari long mi pastaim long kot bilong yu i kam, long wanem mi save olsem kot bilong yu i stret olgeta, olsem na mi pret. Mi bin mekim planti rong long yu na lusim yu planti taim, tasol nau mi sori na mi kam bek long yu. Bipo mi bin mekim planti giaman promis long yu, tasol nau mi laik senisim ol pasin nogut bilong mi. Pogivim mi, Bikpela bilong mi, long wanem mi laik tanim bel tru. Mi sori long olgeta taim mi bin givim baksait long yu. Marimari long mi.

Na taim kot i pinis, orait Jisas bai i givim pe long yumi inap long pasin yumi bin mekim. Pe bilong em bai i olsem: o amamas inap oltaim long heven, o paia i no save dai inap oltaim long hel. O Jisas bilong mi! Planti manmeri i no save wari liklik long dispela samting! Tasol nau mi laik lusim olgeta amamas bilong graun, na wok hat bilong kamap santu na go long heven. O God bilong mi! **Mi tenkim yu long gutpela save yu givim nau long mi, long wanem mi luksave olsem indai na kot em i bikpela samting tumas.** Dia Jisas, yu tingim Pen na Indai bilong yu, na marimari long mi. Mi no laik lukim yu i kros long kot. Nogat olgeta! Mi laik lukim yu i amamas long ol gutpela pasin bilong mi. Olsem na mi askim yu long helpim mi na strongim mi. Mi laikim yu tumas, olsem na mi sori long ol sin mi bin mekim. Bipo mi bin lusim yu, tasol nau mi wok long painim yu wantaim olgeta strong bilong mi. Mi mangal long yu tasol, dia Jisas.

O Maria, Mama bilong mi, askim Jisas long marimari long mi.

43

Long taim bilong indai tingting bilong yumi bai i paul

Jisas i tok: «*Yupela tu i mas redi. Pikinini Bilong Man bai i kam long wanpela taim yupela i no ting em bai i kam*» (Luk 12:40). «*Yupela i mas redi*», Jisas i tok, long wanem em i no laik bai yumi westim taim nating. Nogat. Em i laik bai yumi i redi nau, nogut indai i kam olsem stilman na yumi i lus olgeta. Jisas i no laik bai yumi pulim taim na wet inap long las de bilong yumi bilong tanim bel. Nogat tru! **Em i laik bai yumi tanim bel nau!** Na em i tok olsem yumi mas redi oltaim, long wanem taim indai i bungim yumi, tingting bilong yumi bai i paul, na em bai hat long tanim bel long las minit. Santu Ogastin i tok: «**Sapos yu inap long lusim ol sin bilong yu nau na yu les, orait yu no ken komplein long taim yu lus long kot**».

No, God bilong mi, mi no laik pulim taim na westim nating taim bilong mi! Mi sori long olgeta taim mi bin givim eskus long yu, na

nau mi laik harim tok bilong yu na bihainim yu gut. Yu tok tasol, na mi bai i bihainim ol tok na lo bilong yu.

Taim bilong indai em i olsem taim bilong tudak, long wanem long tudak yumi no inap long mekim wanpela samting. Jisas yet i tok: «*Nau em i tulait yet, na yumi mas mekim wok bilong God... Tudak bai i kamap, na ol man bai i no inap mekim wanpela wok*» (Jon 9:4). Long taim bilong indai planti pen na sori na kain kain tingting bai i kirap insait long bel bilong yumi, olsem tingting bilong yumi bai i paul olgeta, na em bai hat long yumi tanim bel long las minit. Na planti manmeri bilong sin i tok olsem ol bai i tanim bel long las de, **tasol ol bai i no inap**, long wanem long de bilong indai tingting bilong ol bai i paul. Na Buk Baibel i tok: *Na Bikpela bai i bekim rong bilong ol na mekim save long ol. Sotpela taim tasol na bai ol i pundaun na bagarap olgeta* (Lo 32:35).

O God bilong mi, mi laik tenkim yu, long wanem yu givim taim yet long mi, bai mi ken tanim bel na kam bek long yu! **Nau em i taim bilong marimari na kot bilong yu i no kamap yet.** Olsem na mi no laik lusim grasia bilong yu moa. Nogat. Mobeta mi laik i dai pastaim. Yu olgeta gutpela samting bilong mi, na mi laikim yu tru!

Bai mi givim wanpela tok piksa long yu. Sapos yu stap long bot namel long solwara, na bikpela win i kirap na solwara i wok long kalap planti, na bot tu i bruk na solwara i wok long kam insait long em... yu bai i mekim wanem samting? **Yu bai i no inap long tingting long God**, long wanem yu bai bisi long stretim bot na long rausim

wara i wok long kam insait. **Olsem tasol ol manmeri bilong sin: long taim bilong indai, ol bai i no inap long tingting long God, na tingting bilong ol bai i paul olgeta.** Sori tumas long ol! Long taim bilong indai tingting bilong ol bai bisi long planti samting, tasol ol bai i no tingting long God. **Goan! Nau em i taim bilong tanim bel! Nau em i taim bilong stretim dinau wantaim Jisas na redim yu yet long i go long heven!**

O God bilong mi! Yu bin kapsaitim blut bilong yu bilong kisim bek mi, olsem na yu no ken larim mi i lus olgeta. Yu yet i bin tok olsem yu bai i pogivim ol manmeri i save sori long sin bilong ol, olsem na tude mi kam long yu na mi tok sori long yu. Mi laikim yu, Bikpela bilong mi. Mi laikim yu moa long olgeta samting. Mi no laik sakim tok bilong yu gen. Yu bin marimari long mi planti taim, olsem na mi no laik givim pen long yu gen. Mi no laik mekim sin moa. Nogat. Mobeta mi laik i dai pastaim.

O Maria, yu Mama bilong mi! Yu mas askim Jisas long strongim mi, bai mi no ken mekim sin gen.

44

**Piksa bilong wanpela man
nau tasol i dai pinis**

God yet i tok: «*Mi bin wokim yu long graun, na bai yu go bek gen long graun*» (Stat 3:19). O brata na susa bilong mi! Yu mas tingim oltaim olsem God i bin wokim yu long graun, na i no longtaim yu mas go bek gen long graun. Nau yu stap laip, olsem na yu inap long lukluk, wokabaut, toktok na pilim ol samting. Tasol wanpela de bai i kamap, na yu bai i no inap long lukluk moa... yu bai i no inap long wokabaut moa... yu bai i no inap long toktok moa... na yu bai i no inap long pilim wanpela samting moa... **Taim sol bilong yu i lusim bodi bilong yu, orait ol binatang bai i kaikaim bodi bilong yu, na sol bilong yu bai i go long eterniti.** Na God bai i givim eterniti long yu inap long pasin yu bin mekim.

O God bilong mi! Ol pasin bilong mi inap long tude i no gutpela tumas, olsem na mi sapos long go long hel! Tasol yu no laik long mi

lusim hop. Nogat. Yu laik bai mi laikim yu na hop long yu oltaim.

Nau yu mas tingting long wanpela man nau tasol i dai pinis. Lukim bodi bilong em i no gat laip. Bodi bilong em i stap yet long bet, na het bilong em i slip long bros bilong em. Ol gras bilong em i tuhat yet, long wanem nau tasol em i dai pinis. Tupela ai bilong em i lusim lait pinis, na ol i no inap lukim wanpela samting. Kala bilong skin bilong em i wok long senis, na maus na tang bilong em i wok long kamap blak. Na i no longtaim bikpela smel nogut bai i kamap tu, na ol manmeri bai i les long stap klostu long em, na ol bai i laik traute.

Wankain olsem tasol bai i kamap long yu. Nau yu bisi long givim amamas long bodi bilong yu, tasol i no longtaim ol dispela samting bai i kamap long yu tu.

O God bilong mi! Mi no laik givim eskus moa long yu! Oltaim yu wok long singautim mi long senisim ol pasin nogut bilong mi, tasol mi no save harim yu. Mi save tingting tumas long givim amamas long bodi bilong mi, tasol taim amamas i pinis, mi save luksave long rong mi bin mekim. Mi no laik mekim sin moa. Nogat. Mobeta mi laik i dai pastaim.

Yu tingting gen long dispela man nau tasol i dai pinis. Bodi bilong em i wok long kamap narakain, long wanem skin bilong em i wok long bagarap. Na bihain long sampela aua, bikpela smel nogut i wok long pulapim rum em i stap long em. Ol manmeri i save opim ol windo na tromoi ol samting i gat gutpela smel, long wanem smel nogut i wok long kamap bikpela moa moa yet. Olsem na planti taim

ol manmeri i laik planim em hariap, long wanem bodi i smel nogut tru na ol i les long stap klostu long em. **Maski dispela man i bin stap bikman! Maski em i bin stap maniman, na em i bin kisim planti amamas bilong bodi! Ol dispela samting i no inap helpim em liklik, na bodi bilong em i bagarap pinis nau!**

Gutpela Ridima bilong mi, mi save pinis olsem ol sin bilong mi i givim pen long yu, tasol bipo mi no bin tingting long yu na mi bin mekim planti sin tumas. Mi bin tingting long mi yet na long kisim amamas bilong bodi, olsem na planti taim mi bin lusim yu. Nau mi brukim skru long ai bilong yu, na mi askim yu long tingim blut bilong yu, na marimari long mi. Kisim mi aninit long yu gen, na mekim long mi long laik bilong yu. Mi laik bai yu givim grasia long mi gen. Na sapos yu laik panisim mi nau, orait mi redi long akseptim dispela panismen, long wanem ol pasin bilong mi bilong bipo i no gutpela long ai bilong yu. Tasol yu no ken lusim mi. Mi laikim yu. Yu lewa bilong mi. Mi laikim yu moa long mi save laikim mi yet. Helpim mi long i stap gut inap long indai bilong mi.

Maria, yu hop bilong mi, yu mas pre bilong helpim mi.

45

Piksa bilong wanpela man i stap long matmat

Obrata na susa bilong mi! Nau yu mas tingting long wanem samting bai i kamap long bodi bilong yu taim ol i putim em long matmat. Pastaim em bai i lusim kala bilong skin bilong em, olsem na em bai i kamap yello. Tasol bihain em bai i kamap blak nogut tru, na skin bai i wok long bruk nabaut. Kain kain samting nogut bai i wok long kamap long mit bilong yu tu. Ol wara samting i stap insait long bodi bai i kamap ausait, na smel nogut bai i kamap bikipela stret. Na ol dispela wara samting bai i kapsait long graun ol i planim yu long em, na planti liklik snek na binatang bai i kam na kaikaim mit bilong yu. **Na kain kain liklik animal bai i kam na kaikaim bodi bilong yu tu.** Sampela bai i go insait long maus bilong yu, na kaikaim ol samting i stap insait. Sampela bai i kaikaim mit bilong yu long ausait tasol. Na sampela bai

i go insait long bel bilong yu, na kaikaim ol samting i stap insait long bel tu. **Lukim bodi bilong yu nau! Pastaim yu bin mekim sin na givim planti amamas long bodi bilong yu! Tasol lukim em nau!**

No, God bilong mi, mi no laik givim pen moa long yu. Inap long mekim sin nau! Givim lait long mi, na strongim mi bai mi ken sakim ol traim nogut i laik pulim mi long mekim sin.

Na bodi bilong yu insait long matmat bai i bruk nabaut. Wasket bilong yu bai i lus, na lip na gras bilong yu tu. Ol bun bilong bros bai i lus, na bihain ol bun bilong han na lek tu. Na ol liklik snek na ol binatang bai i kaikaim yu inap long olgeta mit bilong yu i pinis. **Na bihain long dispela, yu bai i bun nating.** Na ol bun bilong yu bai i lus tu, na ol manmeri bai i no inap long luksave wanem bun em i bun bilong han na wanem bun em i bilong lek, long wanem olgeta bun bai i stap wantaim. **Ol dispela samting bai i kamap long yu!**

O Bikpela bilong mi, marimari long mi! Mi sapos long i go long hel, long wanem mi bin mekim planti sin tumas. Planti taim mi bin lusim yu, tasol yu no bin lusim mi. Marimari long mi, Bikpela, na helpim mi long pas wantaim yu. Na sapos traim nogut i kamap long mi na mi laik mekim sin, orait yu mas helpim mi long singaut long yu oltaim.

Nau yu mas tingting long wanpela bikman bilong bipo i bin gat planti mani. **Orait, em i stap we nau?** Ol manmeri i save tok olsem em i bikman tumas na ol i laik i stap pren bilong em. **Tasol nau em i stap we?** Yu ken go long haus bilong em, na yu bai i no inap long painim em. Bet bilong em, em ol narapela manmeri i save yusim. Na ol naispela

klos na ol gutpela samting bilong em, ol i bin tilim pinis namel long ol pikinini na ol pren bilong em. Sapos yu laik lukim dispela bikman, yu mas i go long matmat. Na yu bai i painim ol bun i gat smel nogut tasol i stap, na yu bai i kirap nogut tru na pret long lukim dispela samting.

Orait, wankain samting tasol bai i kamap long yu tu.

O yupela ol santu, yupela i ken amamas tru! Long wanem yupela i bin laikim God tasol, olsem na yupela i no bin givim yupela yet long graun. Lewa bilong yupela i mangal long heven tasol, olsem na yupela i bin mekim planti sakrifais, na nau yupela i stap santu. Ol bun bilong yupela i save stap insait long alta bilong ol haus lotu, na planti manmeri bilong olgeta hap bilong graun i save kam na onarim ol. Na taim ol bun bilong yupela i stap long ol haus lotu, sol bilong yupela i amamas long heven inap oltaim oltaim. Na long Las De bilong dispela graun, God bai i kirapim ol bodi bilong yupela, na bodi na sol bilong yupela bai i stap long heven.

O Bikpela bilong mi, mi no sori long bodi bilong mi bai i bagarap long matmat. Nogat. Mi amamas long dispela samting, long wanem mi bin mekim planti sin, olsem na mi no gutpela man tumas. Mi sori tasol long ol sin mi bin mekim, long wanem yu gut olgeta na planti taim mi bin mekim rong long yu. O Jisas bilong mi, mi laikim yu tumas! Na mi tokim yu wankain olsem santu Katerin bilong ples Genova i tokim: «**Jisas, yu lewa bilong mi. Mi no laik mekim sin moa, mi no laik mekim sin moa**».

Maria, yu gutpela Mama bilong God, yu mas pre bilong helpim mi.

46

**Bihain long indai ol manmeri
bai i lustingting long yumi**

Nau yu mas tingting long wanpela yangpela man i dai. Taim em i stap laip, em i nais tumas na em i strong. Ol pren bilong em i amamas long i stap wantaim em, na ol i save singautim em oltaim, long wanem em i gutpela pren bilong ol. Ol i amamas long harim ol stori i kam long maus bilong em. **Tasol wanpela de indai i kisim em nating. Em i dai pinis pinis, na ol pren bilong em i les olgeta long lukim bodi bilong em.** Famili bilong em tu i les long holim bodi insait long haus, olsem na ol i hariap long planim em. **Sori tumas long ol manmeri i gat planti pren long graun, tasol ol i no pren bilong God!**

O dia Ridima bilong mi! Mi no wari sapos ol manmeri i lustingting long mi. Nogat. Mi wari sapos yu lustingting long mi, long wanem mi laik i stap wantaim yu inap oltaim. Yu bin givim

laip bilong yu bilong kisim bek mi, olsem na mi sori long ol rong mi bin mekim.

Bipo ol pren bilong dispela yangpela man i dai pinis i save toktok planti long ol gutpela samting bilong em. Dispela yangpela man em i nais tumas, na em i save mekim gut planti samting, olsem na ol manmeri bilong ples i save laikim em. **Tasol nau em i dai pinis, olsem na i no longtaim ol manmeri bai i lustingting long em, na ol bai i no toktok moa long ol gutpela samting bilong em.** Taim nius bilong indai bilong em i kam kamap long ples, sampela manmeri i save tok: «Sori, em i save mekim gut planti samting». Na sampela i tok: «Sori long em, em i naispela tru na em i gat planti ol pren». Na ol manmeri bai i mekim kain kain toktok bilong soim sori bilong ol. Tasol sori bilong ol manmeri bilong ples bai i no inap long helpim dispela yangpela man long kot bilong God. Nogat. Na sampela bai i amamas long indai bilong em tu, long wanem sampela manmeri i save jeles long em. **Tasol i no longtaim ol manmeri bai i lustingting long em.** I no longtaim ol bai i lustingting long ol pasin bilong em. I no longtaim ol bai i no toktok moa long naispela bodi bilong em. Na famili bilong em tu bai i les long harim ol dispela toktok, long wanem ol bai i tingim em gen, na ol bai i sori gen. Olsem na insait long famili bilong em stret, ol tu bai i les long kolim nem bilong em na toktok long ol samting bilong em. **Lukim! Dispela yangpela na naispela man i dai, na wantu tasol ol pren na famili i lustingting long em!**

God bilong mi, mi no wari sapos dispela samting i kamap long mi tu. Mi laik i stap long lewa bilong yu, na em tasol. Mi laik pas wantaim yu tasol, na mi no wari liklik long ol manmeri bilong graun.

Na wankain samting bai i kamap long yumi. Yumi tu bai i dai. Na ol pren na famili bai i krai sori long yumi, tasol ol bai i krai sori liklik taim tasol. I no longtaim ol bai i tilim ol samting bilong yumi namel long ol yet, na ol bai i lustingting long yumi. Na rum yumi save stap long em, orait narapela man o meri bai i kam na i stap long em. Na bet yumi save slip long em, orait narapela man o meri bai i yusim. Na long haus stret we yumi bin i dai, orait i no longtaim ol manmeri bai i lap, kaikai na amamas, long wanem ol i lustingting pinis long yumi. **Na sol bilong yumi olsem wanem? Bihain long indai, sol bilong yumi bai i go we?**

Bikpela, givim taim long mi, bai mi ken krai long ol sin mi bin mekim, nogut indai i bungim mi hariap na mi no redi. **Mi no laik sakim tok bilong yu gen, nogut dispela meditesen nau mi wok long ritim em i las singaut bilong yu!** Mi save pinis olsem mi sapos long go long hel, long wanem mi bin mekim planti sim. Nau mi sori long ol pasin nogut bilong mi, long wanem mi bin tingting long amamas bilong bodi tasol, na mi bin lustingting long yu. Pogivim mi, gutpela Jisas, na givim grasia long mi, bai mi ken bihainim ol lo bilong yu inap long indai bilong mi.

O Maria, mi stap aninit long yu tu. Mi trastim yu.

47

Yu mas tingting long indai bilong yu yet

O brata na susa bilong mi, nau yu mas tingting long indai bilong yu yet. Yu mas tingting long sol bilong yu i lusim bodi, na i go long eterniti. **Sapos yu dai nau, yu bai i sori long wanem samting? Wanem gutpela pasin yu bin sapos long mekim na yu no mekim? Wanem pasin nogut yu bin sapos long abrusim na yu no abrusim?** Tasol ol dispela kain tingting bai i no inap helpim yu liklik, long wanem taim bilong yu long stretim ol samting i pinis nau. Sapos yu no bin yusim laip bilong yu bilong givim amamas long God, orait yu bin westim laip bilong yu nating, na yu bai i kisim pe inap long pasin yu bin mekim. **Tasol nau God i givim taim long yu bai yu senis.** God i givim nupela sans long yu, bai yu stretim ol rong yu bin mekim. Bihain yu bai i dai, na marimari bilong God bai i pinis tu. Nau yu mas tingting long indai bilong yu yet. Lukim bodi bilong yu i slip long bet na i painim hat long kisim

win! Lukim bodi bilong yu insait long bokis! Lukim bodi bilong yu aninit long graun long matmat! Goan! No ken westim taim!

O God bilong mi! Givim lait long mi, bai mi ken save long wanem pasin mi mas mekim. Long tude inap long las de bilong laip bilong mi, mi laik bihanim yu na givim amamas long yu.

Santu Kamilus em i wanpela santu i bin wok wantaim ol sikmanmeri. Na taim wanpela man o meri i dai na em i go planim em, oltaim em i save lukluk long bodi i stap long matmat, na i tok olsem: **«Sapos God i givim nupela sans long em, mi ting em bai i wok hat bilong kamap santu. Na God i givim taim long mi, na mi wok long mekim wanem samting? Mi wok long westim nating taim bilong mi»**. Na dispela tingting i helpim santu Kamilus long givim em yet olgeta long God long olgeta de bilong laip bilong em. **Olsem na yu, man o meri i wok long ritim dispela buk, yu mas yusim gut taim bilong yu**. God i marimari long yu na em i no larim indai i kam na bungim yu yet. **Olsem na yu no ken westim taim bilong yu**. Yu no ken pulim taim inap long indai bilong yu. **Nau em i taim bilong senisim ol pasin nogut na bilong kam bek long God**. Long wanem taim indai i bungim yumi, olgeta samting bai i pinis. Marimari bilong God tu bai i pinis. Na yumi bai i no inap long mekim wanpela samting moa bilong sevim sol bilong yumi. Ol pasin yu bin mekim taim yu stap laip, ol dispela pasin tasol bai i redim pe bilong yu. Sapos yu bin westim taim na yu bin stap longwe long God, pe bilong yu bai i hel inap oltaim oltaim.

O gutpela Jisas bilong mi! Mi olsem wanpela pikinini sipsip i lus. Yu bin kapsaitim blut bilong yu bilong kisim bek mi. Olsem na mi askim yu long givim lait na strong long mi, bai mi ken save gut long ol pasin mi sapos long mekim, long wanem mi laik yusim gut taim bilong mi.

O God bilong mi, mi pret long kamap olsem dispela diwai fik bilong Gutnius yu bin toktok long em: «*Tripela yia nau mi kam bilong painim ol pikinini fik long dispela diwai, tasol em i no karim pikinini. Olsem na yu mas katim dispela diwai. Watpo em i pinisim nating gris bilong graun?*» (Luk 13:7). Em i tru, dia Jisas! Planti yia mi stap yet long graun na mi bin westim taim bilong mi nating, wankain olsem dispela diwai fik bilong Gutnius. Mi no bin mekim planti gutpela pasin, tasol mi pulap long planti pasin nogut. Yu sapos long katim laip bilong mi na salim mi i go long hel. Tasol mi askim yu, gutpela Ridima bilong mi: wetim mi, long wanem mi laik senis nau. Givim liklik taim moa long mi, bai mi ken stretim ol pasin nogut bilong mi. Mi no laik indai i bungim mi nau, long wanem mi no redi gut. Mi les olgeta long ol sin mi bin mekim. Na long nau inap long indai bilong mi, mi laik pas wantaim yu na adorim yu oltaim. Mi laikim yu, dia Jisas, long wanem yu olgeta gutpela samting bilong mi. Helpim mi oltaim.

Santu Maria, yu hop bilong mi. Sambai long mi oltaim.

48

Indai nogut bilong wanpela man bilong sin

Lukim! Dispela man em i sik nogut tru! Sori long em!
Bodi bilong em i pen nogut tru! I luk olsem indai i wok
long kam klostu nau. Tuhata bilong em i kamap kol, na
em i painim hat long kisim win. Tupela ai bilong em i save raun.
Na taim em i opim ai bilong em, em i laik toktok, tasol em i no
inap. Em i no gat strong. Em i painim hat long harim ol manmeri
i toktok long em. Na indai i kam klostu tru nau. **Dispela man i
no tingting long God. Nogat. Em i tingting long pen bilong em
tasol.** Em i laik bai ol dokta i givim marasin long em na helpim
em. Em i no wari long sol bilong em, long wanem em i bisi long
tingting long bodi bilong em tasol. Na ol manmeri i sanap klostu
long em, ol tu i no tokim em long em i mas tok sori long God.
Nogat. Sampela i toktok long ol dokta, na sampela i pasim maus
tasol, long wanem ol i no laik distarbim em. Tasol namel long ol

manmeri i stap wantaim em, i no gat wanpela i givim gutpela advais long em.

O God bilong mi! Mi no laik i dai olsem dispela man! Helpim mi oltaim!

Na pris i kam lukim em. Na pris i tokim em olsem: «Harim, mobeta yu mas redim yu yet long indai. Em bai gutpela long yu tok sori long God na kisim ol sakramen pastaim long yu dai». Na taim pris i tok olsem, dispela man i krai moa moa yet, long wanem em i no laik lusim dispela graun. Lewa bilong em i pas yet long ol samting bilong graun, olsem na em i les long i dai. Na ol sin dispela man i bin mekim i kamap ples klia long em. Em i tingim olgeta taim God i bin singautim em, tasol em i bin les long tanim bel. Em i tingim tu ol giaman promis em i bin mekim long God, na em i pret nogut tru nau. Em i tingim olgeta yia em i bin stap laip, na em i sori tumas, long wanem em i bin westim nating taim bilong em. **Olsem na nau tasol em bai i tingting long eterniti, na em bai i pret na guria. O God bilong mi! Ol manmeri bilong sin i save pret tumas long indai, long kot, long hel na long eterniti!**

O Jisas bilong mi, marimari long mi! No ken lusim mi! Pogivim olgeta sin bilong mi, long wanem planti taim mi bin sakim tok bilong yu. Mi sem nogut tru na mi krai sori long ol sin mi bin mekim. Helpim mi, God bilong mi, na strongim mi, bai mi ken tanim bel hariap.

Na dispela sikman klostu i laik i dai bai tok olsem: «Mi longlong tumas! Mi westim nating laip bilong mi! Mi inap long kamap santu, tasol mi bin les long bihainim Jisas. Nau mi no inap long mekim wanpela samting. Het bilong mi i pen nogut tru, na mi no inap long tingting gut. Tingting bilong mi i paul, olsem na mi no inap long mekim wanpela gutpela tingting bilong tok sori long God. **I no longtaim indai bai bungim mi, na mi bai i go we?** Mi no ting olsem bai mi go long heven. Mi no ting olsem God bai i givim gutpela pe long mi».

Dispela man i laik bai God i givim moa taim long em, bai em i ken stretim ol rong em i bin mekim. **Tasol nogat! Taim i pinis nau.** Na em bai i tok olsem: «Sori long mi! Tuhata bilong mi i kol nogut tru, na dispela em i mak bilong indai i kam pinis. Ai bilong mi i no inap lukim wanpela samting, na tudak i karapim mi. Mi painim hat long kisim win gut. Mi no inap long toktok. Mi no inap long mekim wanpela samting moa». Na namel long ol pen na sori bilong em, dispela man i dai... Bodi bilong em i stap yet long bet, tasol sol bilong em i kamap wantu tasol long kot bilong God. **Na Jisas i kotim em. Na kot bilong Jisas i stret olgeta. Na Jisas bai i givim pe long em inap long pasin em i bin mekim. Marimari i pinis.**

O Jisas bilong mi! Indai bilong yu em i hop bilong mi! Mi laikim yu moa long olgeta samting. Na mi sori long ol sin mi bin mekim.

Maria, yu Mama bilong God, yu mas pre long Jisas bilong helpim mi.

49

Naispela indai bilong wanpela gutpela man

Ol gutpela manmeri i save amamas long indai bilong ol, long wanem ol i save olsem pe bilong ol i redi pinis long heven. Ol gutpela manmeri i no save pret long indai. Nogat. Ol i save mangal long indai, long wanem ol i laik go hariap long heven wantaim Jisas. Ol dispela manmeri i save pinis olsem indai em i pinis bilong ol pen na ol sin na ol traim nogut, olsem na ol i amamas long indai i kam na kisim ol. Taim ol pris i save kam visitim ol, ol i save amamas tumas, long wanem dispela em i mak olsem klostu ol bai i go long heven. **Ol manmeri bilong sin i save les long pris i tokim ol olsem klostu ol bai i dai, tasol ol gutpela manmeri i save amamas long harim dispela tok.** Ol gutpela manmeri i no wari long lusim dispela graun, long wanem lewa bilong ol i stap pinis long heven wantaim God. Ol i no wari long lusim ol samting bilong ol, long wanem ol i save pinis olsem God i bin redim

wanpela naispela pe long heven, na dispela pe i winim olgeta samting bilong graun. Ol i no save wari long lusim famili bilong ol, long wanem lewa bilong ol, em i bilong God tasol. Long taim ol i stap laip, ol i save tok: «God, yu olgeta gutpela samting bilong mi». Olsem na taim indai i kam klostu, ol i save mekim dispela tok planti taim moa yet, long wanem i no longtaim ol bai i lukim God long heven.

Ol gutpela manmeri klostu i laik i dai, i no save komplein long ol pen ol i wok long karim. Ol i amamas long ol dispela pen, long wanem ol i save ofarim ol pen long Jisas, na Jisas bai i givim pe long ol. Ol gutpela manmeri i save tingim oltaim Pen na Indai bilong Jisas, olsem na ol i save ofarim long em ol pen bilong ol. **Ol i save pinis olsem indai em i pinis bilong ol samting nogut bilong graun, olsem na ol i amamas long lusim dispela graun.** Na maski Satan i laik traim ol long lusim hop, ol bai i trastim Jisas moa moa yet. Na sapos ol sin bilong ol i kamap ples klia long ol na i laik daunim ol, orait ol bai i tingim long olgeta taim ol i bin tok sori long God, na ol bai i amamas gen.

O Jisas bilong mi! Yu save bekim gut long ol manmeri i bin bihainim yu! Yu gutpela tumas long ol manmeri i bin wok hat long painim yu na pas wantaim yu!

Ol manmeri bilong sin i save pret long indai, long wanem ol i pret nogut tru long hel. Tasol ol gutpela manmeri i save amamas long indai, long wanem ol i amamas long go long paradais. Planti taim ol i bin tokim God olsem ol i laik lukim em, na dispela toktok

bilong ol klostu bai i kamap tru. Na taim pris i kisim santu komunio i kam long ol, ol i save amamas tumas, long wanem ol i luksave olsem Jisas i no lustingting long ol. I gat stori bilong santu Filip Neri i olsem: taim em i sik nogut tru na klostu em i laik i dai, wangepela pris i kisim santu komunio i kam long em. Na taim Filip i lukim santu komunio, em i tok amamas olsem: «**Lukim Jisas! Jisas em i olgeta gutpela samting bilong mi!**».

Dia Jisas, mi no save sapos mi bai inap long mekim dispela toktok bilong santu Filip, long wanem planti taim mi bin lusim yu. Tasol mi bai i toktok olsem santu Bernard i tokim yu: «**Pen na Indai bilong yu em i hop bilong mi**».

O God bilong mi! Sapos mi gat grasia long sol bilong mi, yu ken kam na kisim mi hariap. Mi laik kam hariap long lukim yu, long wanem na mi laik pas wantaim yu inap oltaim oltaim. Mi pret long lusim yu gen. Nogat, dia Jisas. Givim grasia long mi na kisim mi hariap.

Maria, yu Mama bilong mi, helpim mi long i dai wantaim grasia bilong God.

50

Tingting long las minit bilang laip bilang yu

Sapos dispela em i las minit bilang laip bilang mi na klostu mi bai i dai, orait wanem pasin mi bin sapos long mekim na mi no mekim? Wanem lo bilang God mi bin sapos long bihainim, na no bihainim? Sori long mi! Mi bai i laik i stap laip liklik taim moa bilang stretim ol samting nogut bilang mi, tasol em bai i no inap. Sori long mi nau sapos mi save long ol dispela samting na mi no senis! Buk Baibel i gat tok olsem: *Bikpela i bin bungim olgeta sin bilang mi na em i pasim ol strong na putim long nek bilang mi. Ol dispela sin i bevi tumas na i pinisim tru strong bilang mi. Na Bikpela i bin putim mi long han bilang ol birua, na mi no gat strong bilang pait long ol* (Krai 1:14). Long taim bilang indai mi bai i tingim olgeta sans God i bin givim long mi, na mi bai i krai sori. Dispela taim nau God i wok long givim long mi em i mak bilang

bikpela marimari bilong em. Tasol sapos mi no yusim gut dispela taim na mi no senisim laip bilong mi, orait long taim bilong indai mi bai i krai sori tumas!

O Jisas bilong mi! Yu bin givim laip bilong yu bilong kisim bek mi, tasol mi no bin mekim wanpela samting bilong givim amamas long yu. Mi bin tingting tumas long ol samting bilong dispela graun, na mi no bin mekim wok bilong yu. Nau mi tingting long ol pasin nogut bilong mi, na mi sori tumas.

O sol bilong mi, olsem wanem na yu les long bihainim God? God i givim taim yet long yu, olsem wanem na yu westim taim bilong yu nating? Ating yu laik wet inap long indai bilong yu, a? Ating yu laik wet inap long las minit bilong laip bilong yu, a?

O God bilong mi! Mi no laik westim nating ol grasia bilong yu! Bipo mi bin westim nating ol grasia bilong yu, na mi bin givim mi yet long ol samting bilong graun. Tasol nau yu givim lait long mi, bai mi ken luksave long ol dispela samting, olsem na mi laik tenkim yu. **Nogut tude em i las de bilong mi. Nogut dispela gutpela advais yu givim long mi nau em i las advais yu laik givim?** Mi trastim yu, na dispela taim yu givim long mi em i mak olsem yu laikim mi tumas. Yu laik marimari long mi, olsem na yu wetim mi inap long tude. O dia Jisas bilong mi, mi sori tumas long ol taim mi bin lusim grasia bilong yu. Na mi sori tu long ol taim mi bin sakim tok bilong yu. Mi promis olsem bai mi wok hat bilong tanim bel na abrusim ol sin.

O God! Planti kristen manmeri i save dai, na ol i no save sapos ol bai i go long heven o long hel. **Ol i tingim olgeta yia ol i bin stap laip, na ol i luksave olsem ol i bin westim nating taim bilong ol. Na dispela tingting i mekim ol i sori na krai nogut tru.** Nau ol i mas sanap long stretpela kot bilong yu, na ol i pret nogut tru.

Gutpela Jisas, mi no laik bai dispela samting i kamap long mi tu. Nogat. Mi laik i dai wantaim yu. Olsem na mi laik bihainim olgeta tok bilong yu, na senisim ol pasin nogut bilong mi. Bipo mi bin givim baksait long yu planti taim, tasol nau mi sori long ol rong bilong mi, na mi laikim yu moa long olgeta samting.

O Maria, yu ples hait bilong ol manmeri bilong sin, askim Jisas long kisim sol bilong mi i go long heven.

51

Yumi mas stretim laip bilong yumi hariap

Olgeta manmeri manmeri i laik i go long heven, tasol i no olgeta manmeri i save redim ol yet gut long indai. Sapos wanpela man o meri i bin i stap longwe long God long taim em i bin stap laip, em bai i no inap long i dai wantaim God. Nogat tru. **Man o meri i save stap longwe long God, em bai i dai longwe long God tu.** Ol santu i bin wok hat bilong i dai wantaim God: ol i bin lusim ol samting bilong ol, ol i bin lustingting long ol amamas bilong dispela graun, na ol i bin mekim planti penans na sakrifais. Ol i bin i stap long graun, tasol lewa bilong ol i bin i stap long heven. Ol i pret nogut tru long hel, olsem na ol i bin wok hat bilong abrusim ol samting nogut bilong dispela graun.

O God bilong mi! Mi sapos long go long hel, long wanem mi bin westim taim bilong mi nating! Mi bin go longwe long yu planti taim, olsem na yu sapos long panisim mu. Tasol yu pulap long marimari,

olsem na mi hop long yu. Mi sori tumas long ol sin mi bin mekim. Marimari long mi na pogivim mi. Na strongim mi, bai mi no ken lusim yu gen.

God i save tokim ol manmeri bilong sin olsem: «***Na bai yupela i wok long painim mi, tasol bai yupela i no lukim mi. Na yupela i no inap i go long ples mi stap long em***» (Jon 7:34). Dispela tok em i tru olgeta! Long las minit ol manmeri bilong sin bai i wok long painim Jisas, long wanem ol i pret long hel. Ol i no save laikim Jisas, tasol ol i pret long hel. Ol i no laik senisim ol pasin nogut bilong ol, tasol ol i laik painim Jisas bai em i ken helpim ol long abrusim hel. **Tasol Jisas bai i haitim pes bilong em long ol, na ol bai i no inap long painim em.**

No, God bilong mi, mi no laik wet inap long indai bilong mi bilong painim yu. Nogat. Nau mi wok long painim yu na mi mangal long yu. Em i tru olsem bipo mi bin givim baksait long yu, tasol nau mi sori tumas na mi laik konpes. Na yu no laik bai mi lusim hop, tasol yu laik bai mi amamas long painim yu. Yu yet i tok: ***Ol man i save go klostu long Bikipela, ol i ken amamas tru*** (Buk Song 105:3). Yes, Bikipela bilong mi, mi wok long painim yu, na mi laikim yu tru.

Sori tumas long ol manmeri i no save krai long ol sin bilong ol! Ol i gat sans bilong tanim bel na kisim grasia bilong Jisas gen, tasol ol i les, long wanem ol i save amamas long ol sin bilong ol. **Tingting bilong ol i pas olgeta na i stap long tudak, na lewa bilong ol i strong olsem wanpela ston. Ol mangal nogut bilong bodi i bosim**

ol, olsem na ol bai i no inap long i dai wantaim Jisas. Sapos ol i les long God na ol i no laik senisim ol pasin nogut bilong ol, orait God i no inap long helpim ol.

O God, sori tumas long ol manmeri i no save stretim laip bilong ol! Long taim bilong indai ol bai i go stret long hel! No, God bilong mi, mi no laik bai dispela samting i kamap long mi tu. Nau tasol mi laik kam bek long yu na laikim yu. Mi sori long ol sin mi bin mekim, na mi laikim yu wantaim olgeta strong bilong mi. No ken larim mi i givim baksait long yu gen. Nogat. Mobeta mi laik i dai pastaim.

O santu Maria, yu Mama bilong mi, helpim mi long i stap gut inap long indai bilong mi.

Kot

52

Yumi mas stretim dinau wantaim Jisas pastaim long kot

Jisas yet i tok: «*Yupela tu i mas redi. Pikinini Bilong Man bai i kam long wanpela taim yupela i no ting em bai i kam*» (Luk 12:40). Taim bilong indai em i no taim bilong stretim dinau wantaim Jisas. Nogat. Yumi mas stretim dinau pastaim long indai bilong yumi, olsem na taim indai i kam na kisim yumi, yumi bai i redi pinis. **Sapos yu laik i dai wantaim grasia bilong God na wantaim bel isi, orait yu mas redim yu yet nau.** Long las minit bilong laip bilong yumi em bai hat long yumi lusim ol sin na senisim laip, long wanem ol sin bilong yumi bai planti tumas na bikpela tru. Jisas i tok moa olsem: «*Tudak bai i kamap, na ol man bai i no inap mekim wanpela wok*» (Jon 9:4). Jisas i tok olsem taim bilong indai em i olsem tudak, long wanem yumi bai i no inap mekim wanpela samting bilong senisim ol pasin nogut bilong yumi.

Long taim bilong indai tingting bilong ol manmeri nogut i save paul, na lewa bilong ol i kamap strong olsem ston, na ol i pret nogut tru, na ol i les olgeta long lusim dispela graun, olsem na ol i no inap tingting long Jisas na tok sori long em. Nogat tru. **Tingting na lewa bilong ol i save bisi yet long ol samting bilong dispela graun, olsem na ol bai i dai wantaim ol sin bilong ol.** Na ol pasin nogut ol i bin mekim, ol dispela pasin tasol bai i go wantaim ol long kot. Sapos yu gat grasias bilong God insait long sol bilong yu oltaim, orait yu bai i dai wantaim grasias bilong God. Tasol sapos yu no gat grasias bilong God insait long sol bilong yu oltaim, orait yu bai i no i dai wantaim grasias bilong God.

O Pen na Indai bilong Jisas! Mi adorim yu! Mi laikim yu na mi trastim yu!

Ol santu i bin wok hat bilong redim ol yet long indai. Ol i bin mekim planti penans, na ol i bin prea oltaim, na ol i pulap long planti gutpela pasin. Tasol ol yet i save skelim olsem ol dispela samting ol i save mekim, em i samting nating. **Na maski ol i pulap long planti gutpela pasin, sampela santu i save pret long indai tu!** I gat stori bilong bilong santu Jon bilong ples Avila i olsem: taim em i sik nogut na klostu em bai i dai, em i tok olsem: **«Sori long mi! Mi laik gat liklik taim moa bilong redim mi yet long indai!»**. Dispela man em i santu, na em i pret long indai! Yumi no santu, olsem na yumi bai i mekim wanem kain toktok? Lukim! Dispela santu i pret long indai, na yu no pret? **Yu no santu, olsem na yu mas pret moa moa yet!**

No, God bilong mi, mi no laik i dai wantaim ol sin bilong mi. Sapos indai i bungim mi nau, sol bilong mi i pulap long planti sin na pasin nogut. Olsem na nau mi laik senisim ol pasin nogut bilong mi. Mi laik krai long ol sin mi bin mekim, na mi laik pas wantaim yu wantaim olgeta strong bilong mi. O Bikpela, yu mas helpim mi long bihainim yu gut! Mi laik mekim ol gutpela pasin bilong givim amamas long yu, long wanem yu bin i dai bilong kisim bek mi.

Aposel santu Pol i tok: ***Ol brata, mi tok olsem, taim i sotpela nau*** (1 Korin 7:29). Yes, taim i sotpela nau! Yumi no gat planti taim bilong stretim dinau wantaim Jisas. Nogat. Olsem na yumi mas hariap long stretim dinau wantaim em nau! Holi Spirit i skulim yumi olsem: ***Sapos yu mekim wanpela wok, orait taitim bun na mekim save tru. Long wanem, bai yu no inap mekim wok o tingting o kisim gutpela tingting na save long ples bilong ol man i dai pinis, dispela ples bai yu go long em*** (Eklisiastis 9:10). I min olsem: sapos tude yu inap long mekim wanpela gutpela wok, orait yu mas mekim! Yu no ken tok: «Tude maski, tumora bai mi mekim». Nogat olgeta! No ken pulim taim na givim eskus! Nogut yu wok long pulim taim na indai i kisim yu! Sori long yu sapos indai i kisim yu, na yu no bin stretim ol pasin nogut bilong yu pastaim!

O Bikpela bilong mi! Planti yia mi bin i stap longwe long yu! Tasol peisens bilong yu i bikpela tumas, olsem na yu bin wetim mi. Nau yu singautim mi long mekim penans na senisim ol pasin nogut bilong mi. Na mi laik tenkim yu, gutpela Sevia bilong mi, long wanem yu

no bin larim indai i bungim mi long taim mi bin i stap longwe long yu. Mi laik go long heven na stap wantaim yu inap oltaim oltaim. Profet Devit i tok: *Bikpela, oltaim bai mi singim song i tok long sori bilong yu. Long olgeta taim bai mi tokaut long yu no save senisim tok bilong yu. Mi save yu laikim mipela oltaim oltaim* (Buk Song 89:1-2). Em i tru, Jisas, bipo mi no bin laikim yu tumas. Tasol nau mi laikim yu wantaim olgeta strong bilong mi, na mi laikim yu moa long olgeta samting. Mi laikim yumoa long mi save laikim mi yet. Mi mangal long yu tasol. Mi sori long ol taim mi bin givim pen long yu, dia Jisas. Helpim mi long bihainim yu oltaim.

Maria, yu Mama bilong mi, helpim mi long bihainim olgeta tok bilong God.

53

Kot bilong wanpela man i dai pinis

Buk Baibel i tok klia olsem: *Olgeta man i mas i dai wanpela taim tasol, na bihain ol i mas kamap long kot* (Hibru 9:27). Bilip bilong yumi i tok strong olsem: **bihain long indai ol manmeri bai i sanap long kot na kisim pe inap long pasin ol i bin mekim.** Na tu bilip bilong yumi i tok moa olsem: **I gat tupela pe tasol: heven o hel, inap oltaim oltaim.**

Nau yu mas tingting long indai bilong yu, na lukim yu yet i sik nogut tru na i slip long bet, na klostu yu laik i dai. Yu laik i dai klostu tru, na yu save pinis olsem i no longtaim bai yu sanap long kot bilong Jisas. Orait, ating bai yu pret long ol sin bilong yu, o nogat? Yes, yu bai i pret nogut tru!

O gutpela Ridima bilong mi! Yu mas pogivim mi pastaim long mi sanap long kot! Planti taim mi bin mekim sin, na mi sapos long

go long hel! Tasol mi no laik sanap long kot bilong yu wantaim ol sin bilong mi. Nogat. Mi laik bai sol bilong mi i klin olgeta. Olsem na mi askim yu long pogivim mi na marimari long mi. Mi sori, gutpela Jisas, long ol sin bilong mi.

O God bilong mi! **Sori tumas long ol manmeri bilong sin i sanap long kot na i lukim Jisas i kros! Sori tumas long ol, long wanem pes bilong Jisas bai i drai olgeta!** Ol dispela manmeri bai i lukim ol pen Jisas i bin karim bilong kisim bek ol, na ol bai i no gat tok. Ol bai i lukim ol grasia Jisas i bin givim long ol, na ol bai i sem nogut tru. Na ol bai i lukim tu olgeta gutpela samting i stap long heven, tasol ol bai i save pinis olsem ol bai i go long hel. Ol bai i luksave olsem ol i lusim heven, long wanem ol i bin givim ol yet long amamas bilong dispela graun. **Tasol long kot i no gat marimari. Nogat. Marimari i pinis.** Long taim bilong indai yumi no inap long mekim wanpela samting bilong helpim yumi. Nogat. Na long kot God bai i no askim yu sapos yu maniman o rabisman, o sapos yu bikman o man nating. Nogat tru! Em bai i skelim ol pasin bilong yu tasol, na givim pe inap long pasin yu bin mekim, maski yu bikman tumas o yu man nating.

O Jisas bilong mi! Long kot bilong mi, mi no laik bai yu kros long mi o pes drai long mi. Nogat. Nau mi laik mekim penans na stretim ol rong bilong mi, bai yu ken amamas long taim bilong kot. Mi no laik givim pen long yu gen, dia Jisas, mi laik pas wantaim yu inap oltaim.

Long taim bilong indai ol gutpela manmeri bai i amamas tumas, long wanem ol i bin givim ol yet long God long taim ol i bin stap laip, olsem na nau ol i no pret long sanap long kot bilong Jisas.

Na maski ol gutpela manmeri tu i save pundaun long sin, ol i save mekim penans tu, olsem na ol sin ol i bin mekim i no stap moa long sol bilong ol. Sol bilong ol i klin, olsem na ol i no pret. **Tasol ol manmeri bilong sin bai i pret nogut tru na gurial!** Ol bai i tok olsem: «Liklik taim moa na mi bai i sanap long ai bilong Jisas, na em bai i kotim mi. Mi no senisim yet ol pasin nogut bilong mi. Planti taim mi bin promisim planti samting long Jisas, tasol bihain mi no bin inapim ol promis bilong mi. Planti taim mi bin givim eskus long Jisas. Na nau bai mi go we? Bai mi kisim wanem pe?».

O Jisas, yu jas bilong mi! Mi laik tenkim yu long bikpela peisens bilong yu, long wanem yu bin wetim mi inap long tude. Mi sapos long i go long hel, tasol yu bin wetim mi na marimari long mi. Mi no laik lusim yu gen, dia Jisas. Tingim Pen na Indai bilong yu, na kisim mi olsem wampela wokboi nating bilong yu. Mi sori, dia Jisas, long wanem planti taim mi bin sakim tok bilong yu. Mi laikim yu moa long olgeta samting! Dia Jisas bilong mi, mi no laik lusim yu gen.

O Maria, pre long Jisas bilong helpim mi. Na yu tu, Maria, no ken lusim mi.

54

Sol i kamap long kot

Sampela taim i save kamap olsem ol man nogut i save pret nogut tru long sanap long ai bilong jas bilong graun, long wanem jas i ken salim ol i go long kalabus. Pastaim ol dispela man nogut i save litimapim nem bilong ol yet na lap long ol pasin nogut bilong ol. Tasol taim ol i mas sanap long kot long ai bilong jas, ol i save tuhat na guria, long wanem jas bai i salim ol i go planti yia long kalabus. **Orait, na taim yu mas sanap long kot bilong God bai yu pret o nogat? Kot bilong Jisas em i stret olgeta, na i no gat wanpela pasin bilong yumi i ken i stap hait long ai bilong em.** Nogat. Olgeta pasin, na toktok na tinging yumi bin mekim i ples klia long ai bilong Jisas. Long Buk Baibel i gat stori bilong tupela man i save autim tok giaman long nem bilong God, olsem na God yet i tok: «*Mi Bikpela, mi save long pasin bilong tupela na mi tokaut pinis long em*» (Jeremaia

29:23). Bikpela i save pinis long olgeta samting! Olsem na long kot Jisas bai i tokim ol manmeri bilong sin olsem: «Mi jas bilong yu. Mi witnesim olgeta pasin nogut bilong yu. Mi lukim olgeta samting. I no gat wanpela pasin bilong yu i hait long mi. Nogat. Yu bin mekim planti sin tumas».

Mi tu i sapos long harim dispela tok bilong yu, Jisas bilong mi, tasol yu bin marimari long mi. Mi no sanap yet long kot, olsem na mi gat taim bilong lusim ol sin bilong mi. Mi laik bai yu lustingting ol sin mi bin mekim, long wanem yu yet i tok: «***Mi no ken tingim moa ol sin em i bin mekim bipo. Nau em i mekim stretpela pasin, olsem na em bai i stap gut***» (Esekiel 18:22).

Planti saveman bilong Sios i save tok olsem: **long ples stret we man o meri i dai, long dispela ples tasol God i save kotim em**. Ol manmeri i no inap lukim, tasol kot bilong God i save kamap long ples dispela man i bin i dai long em. Na dispela kot bai i tok olsem sapos dispela man bai i go long heaven o long hel. Tasol sapos dispela man i dai wantaim ol mortal sin bilong em, em bai i no gat tok long ai bilong Jisas. Jisas bai i mekim save long em long olgeta singaut Jisas i bin mekim long em, tasol em i bin les long kam bek long Jisas. Olsem na dispela man bai i no gat tok bilong bekim long Jisas, na em bai i lus olgeta.

O Jisas, yu Ridima bilong mi! **Yu save salim i go long hel ol manmeri bilong sin i les long senisim laip bilong ol**. Tasol yu no save salim i go long hel ol manmeri bilong sin i laikim yu na i sori

long ol sin bilong ol. Mi man bilong sin, tasol mi laikim yu moa long mi laikim mi yet. Na tu mi sori long ol sin mi bin mekim. Olsem na mi askim yu long pogivim mi na marimari long mi, nogut mi sanap long kot wantaim ol sin bilong mi.

Jisas i tok: «***Yupela tu i mas redi. Pikinini Bilong Man bai i kam long wanpela taim yupela i no ting em bai i kam***» (Luk 12:40). O Jisas bilong mi, yu jas bilong mi tu! Mi save pinis olsem long kot bai mi lukim ol sua bilong Pen na Indai bilong yu, na mi bai i pret. Mi bai i pret long wanem yu bin laikim mi inap long givim laip bilong yu bilong kisim bek mi, tasol mi no bekim gut long yu, na mi no save laikim yu tumas. Yu bin i dai bilong kisim bek mi, tasol mi mekim planti sin tumas. Tasol ol sua bilong yu bai i givim hop long mi, na mi hop olsem yu bai i pogivim mi. O gutpela Ridima bilong mi! **Yu no laik long mi i lus long hel, olsem na yu bin hangamap long diwai kros bilong kisim bek mi.** Helpim mi, Jisas, long wanem yu bin kapsaitim blut bilong yu bilong helpim mi.

O Jisas bilong mi! Marimari long mi, long wanem mi olsem wanpela pikinini sipsip i lus. Yu bin kapsaitim blut bilong yu bilong helpim mi. Mi laikim yu tumas, na mi sori long ol sin mi bin mekim. Givim gutpela save long mi, bai mi ken save long ol pasin mi mas mekim. Mi no laik givim baksait moa long yu. Longpela taim tumas mi bin i stap longwe long yu, olsem na nau mi laik kam bek long yu na stap wantaim yu inap oltaim.

O Maria, yu Mama bilong marimari, helpim mi na sori long mi.

55

Jisas bai i skelim olgeta pasin bilong yumi

Long ples stret we yumi bai i dai, long dispela ples tasol Jisas bai i kotim yumi. Long dispela ples tasol kot bai i kamap, na Jisas bai i givim pe long yumi inap long pasin yumi bin mekim. Santu Pol i tok: *Long wanem, ol man bipo tru God i tok pinis long kisim bek ol, em i makim ol tu, bilong kamap wankain olsem Pikinini bilong em* (Rom 8:29). I min olsem: **sapos yumi laik i go long heven, orait laip bilong yumi i mas wankain olsem laip bilong Jisas**. Na long dispela as tasol santu Pita tu i tok: «*Sapos i hat tru long kisim bek ol stretpela man, orait olsem wanem long ol man i save givim baksait long God na mekim sin?*» (1 Pita 4:18).

O Jisas bilong mi! Laip bilong mi i no wankain olsem laip bilong yu! Tasol Pen na Indai bilong yu i givim hop long mi. Mi man bilong sin, tasol yu inap long senisim laip bilong mi na mekim mi i kamap santu. Mi trastim yu, long wanem yu gutpela tumas.

Wanpela santu, nem bilong em Aloisius bilong Ponte, i save tingting oltaim long kot bilong God, na em i guria nogut tru. **Olsem na yumi tu i mas pret na guria, na wok hat bilong painim Jisas hariap**, long wanem nau em i laik bai yumi i painim em. Buk Baibel i tok: ***Nau Bikpela i stap klostu long yupela na i wetim yupela, olsem na nau em i taim bilong yupela i mas beten long em na i go klostu long em*** (Aisaia 55:6). Long taim bilong indai em bai hat long painim Jisas, olsem na nau yumi mas wok hat bilong beten long em na go klostu long em. Yumi mas laikim em na sori long ol sin bilong yumi.

Jop i tok: «***Orait taim God i kam bilong kotim mi long dispela pasin nogut, bai mi bekim wanem tok long em?***» (31:14). Na mi olsem wanem? Bai mi bekim wanem tok long God? Em i bin pulapim mi long planti grasia na singautim planti taim long tanim bel, tasol mi no bin senisim yet laip bilong mi.

No, Bikpela bilong mi, mi no laik givim baksait moa long yu. Mi laik givim lewa bilong mi long yu. Planti taim mi bin mekim sin, tasol yu bin kapsaitim blut bilong yu bilong wasim ol sin bilong mi. Long taim bilong kot yu no ken lustingting long mi, long wanem yu bin kisim bek mi long blut bilong yu. Mi sori tumas, Jisas. Yu olgeta gutpela samting bilong mi. Mi laikim yu wantaim olgeta strong bilong mi. Marimari long mi.

O Maria, yu Mama bilong mi, no ken lusim mi.

56

**Jisas bai i givim pe
inap long pasin yumi bin mekim**

Ol manmeri i redim ol yet gut long indai, ol i ken amamas! Long taim bilong kot, ol bai i lukim Jisas i amamas long ol. Jisas bai i welkamim ol long kot wantaim bikpela smail, na em bai i toktok isi long ol. Na taim kot i pinis, Jisas bai i tok: **«*Yu gutpela wokboi, yu bin mekim gutpela wok tru*»** (Matyu 25:21).

O Jisas bilong mi! Sapos tude mi mas sanap long kot bilong yu, mi no ting olsem yu bai i kolim mi **«*gutpela wokboi*»**, long wanem mi bin givim baksait long yu planti taim tumas. Bipo mi bin mekim planti sin, olsem na mi no gutpela wokboi tumas inap long sanap long kot bilong yu. Tasol mi laik senisim ol pasin nogut bilong mi, na mi no laik mekim sin moa. Nogat. Mobeta mi laik i dai pastaim, tasol mi no laik lusim grasia bilong yu gen. Na yu mas helpim mi long inapim gut dispela promis nau tasol mi mekim.

Ol gutpela manmeri bai i amamas long kot, tasol ol manmeri nogut bai i pret nogut tru, long wanem ol bai i lukim belhat bilong Jisas. Ol manmeri i no gat grasia long sol bilong ol i save lus long kot. Olsem na taim wanpela man o meri bilong sin i dai, wantu tasol em bai i save olsem em bai i lus olgeta. Na ol bai i lukim pes bilong Jisas i drai olgeta, na em bai i kros long ol na i tok strong olsem: «*Yupela manmeri bilong lus, yupela klia long mi na yupela go long paia i no save dai, em dispela paia ol i redim pinis bilong Satan wantaim ol ensel bilong em*» (Matyu 25:41). Jisas bai i rausim ol i go longwe long em, na salim ol i go long paia i no save dai. Jisas bai i les long lukim ol gen, olsem na ol bai i stap long hel inap oltaim oltaim.

O Bikpela bilong mi! Planti taim mi sapos long harim dispela tok bilong yu, long wanem mi bin mekim planti mortal sin. Long taim bilong indai, yu bai i kamap jas bilong mi. **Tasol nau mi stap laip yet, olsem na mi no lukim yu olsem jas, tasol mi lukim yu olsem Ridima bilong mi.** Olsem na mi askim yu long pogivim mi, long wanem mi sori long ol rong mi bin mekim. Na mi no sori long wanem mi mas i go long hel. Nogat. Mi sori long wanem mi bin mekim rong long yu na givim pen long yu. Yu bin givim laip bilong yu bilong kisim bek mi, tasol mi bin bagarapim yu long ol sin bilong mi. Na dispela em i as bilong sori bilong mi.

Taim sol i lusim bodi na wanpela man i dai, planti taim i ol manmeri i stap klostu long em, ol i no save sapos dispela man i dai

pinis o nogat. Olsem na ol i save toktok na tingting planti, long wanem ol i no klia sapos em i dai o nogat. **Tasol taim ol manmeri i bisi long mekim ol dispela toktok, sol bilong dispela man i go pinis insait long eterniti.** Na i no longtaim pris i save kam na pre bilong helpim sol bilong dispela man i dai pinis. Pris i save tok: «O yupela, ol ensel bilong God, yupela kam na kisim sol bilong em i go long ai bilong Bikpela». **Tasol sapos dispela man i dai wantaim ol sin bilong em, orait dispela prea i no inap helpim em liklik.** Maski pris i askim ol ensel na ol santu long helpim dispela man, ol bai i no inap helpim em.

O yupela, ol ensel na santu bilong God! O was ensel bilong mi! O santu Maikel! O santu Josep! O santu Maria, yu gutpela Mama bilong mi! Yupela olgeta i mas helpim mi nau, long wanem sapos mi dai wantaim ol sin bilong mi, yupela bai i no inap helpim mi long kot! **Na yu, Sevia bilong mi, pogivim ol sin bilong mi na marimari long mi.** Mi sori tumas long ol rong mi bin mekim long yu. Mi laikim yu wantaim olgeta strong bilong mi. Helpim mi, Bikpela, bai mi ken sanap strong na abrusim ol sin.

O Maria, sambai long mi oltaim!

57

Las Kot bilong God

Buk Baibel i save kolim las de bilong dispela graun olsem «De bilong belhat» na «De bilong bagarap». **Na em i tru, long wanem ol manmeri bilong sin bai i lukim belhat bilong God, na ol bai i kisim bikpela bagarap.** Long dispela Las Kot olgeta sin bilong ol bai i kamap ples klia long ai bilong ol manmeri. Na olgeta pasin nogut ol i bin mekim long ples hait o long tudak, bai i kamap ples klia olsem san. Ol santu na ol manmeri i stap long heven bai i les long ol na givim baksait long ol, olsem na ol bai i go long kalabus bilong hel, na long dispela ples ol bai i karim pen inap oltaim oltaim. Santu Jerom i bin mekim penans planti yia insait long groto bilong Betlehem, tasol taim em i tingting long Las Kot bilong God, em i save pret na guria. Na i gat stori bilong wanpela santu, nem bilong em Giovenale, i olsem: taim em i yangpela, em i save tingting long amamas bilong graun tasol. Tasol wanpela de em i go long

wanpela funeral, na em i harim olsem pater i givim skul na i toktok long Las Kot bilong God, olsem na em i pret nogut tru. Na taim pater i tok olsem Las Kot em i «**De bilong belhat**» na «**De bilong bagarap**», em i kirap nogut tru, olsem na em i lusim olgeta samting bilong em na i kamap rilijis.

O Jisas bilong mi! **Long Las Kot bilong yu, bai mi mekim wanem samting? Bai mi stap long han sut wantaim ol santu bilong heven, o long han kais wantaim ol manmeri bilong hel?** Mi save pinis olsem mi sapos long go long han kais wantaim ol manmeri nogut, tasol yu givim taim yet long mi, bai mi ken sori long ol rong bilong mi na kam bek long tu. Mi sori tumas long ol sin mi bin mekim. Yes, mi sori tru, na mi promis olsem bai mi wok hat bilong abrusim ol sin na stap gut. Mi no laik mekim sin gen. Nogat. Mobeta mi laik i dai pasatim.

Las Kot bilong God bai stap «De bilong belhat» na «De bilong bagarap» long ol manmeri bilong sin. Tasol ol gutpela manmeri bai i amamas tumas, long wanem God bai i tokaut klia olsem ol bai i stap long heven inap oltaim oltaim, na olgeta manmeri bai i harim. God bai i mekim save long olgeta manmeri olsem ol dispela lain bai i go long paradais wantaim em inap oltaim oltaim.

O Jisas bilong mi! Blut bilong yu em i hop bilong mi. Yu mas lustingting long olgeta rong mi bin mekim, na yu mas helpim mi long laikim yu wantaim olgeta strong bilong mi. Mi laikim yu, dia Jisas, na long Las Kot mi laik sanap long han sut wantaim ol santu bilong heven.

O sol bilong mi, yu mas skelim nau: o heven o hel. Yu laik kisim pe bilong oltaim long paradais wantaim God, ol santu, ol ensel na santu Maria? O yu laik kisim pe bilong oltaim long kalabus bilong hel? Long hel yu bai i krai nogut tru inap oltaim oltaim, long wanem God bai i lusim yu olgeta.

Long santu Misa yumi save tok: «**Lem bilong God, yu tekewe sin bilong olgeta manmeri, marimari long mipela**». O gutpela Lem bilong God! Yu laik kisim bek mipela, olsem na yu bin givim laip bilong yu bilong helpim mipela. Olgeta blut bilong yu i kapsait long diwai kros! Olsem na mipela i askim yu: marimari long mipela! Tasol mi askim yu long marimari moa yet long mi, long wanem ol sin bilong mi i winim tru ol sin bilong ol narapela manmeri. Olsem na nau mi laik bai laikim pasin bilong mi i go long yu i ken winim tu laikim pasin bilong ol manmeri. Mi sori tumas long ol rong mi bin mekim, na mi hop olsem long Las Kot, mi bai i sanap wantaim ol gutpela manmeri na ol ensel, na singsing amamas long bikpela marimari bilong yu. Jisas bilong mi, helpim mi long laikim yu tru. Mi mangal long yu tasol.

O Maria, yu Kwin bilong mi, mi askim yu long sanap klostu long mi long Las Kot.

58

Olgeta manmeri bai i bung long ples daun bilong Jehosafat

Buk Baibel i tok: *God i tok olsem, «Ol lain manmeri i mas redi na i kam long dispela ples daun, ol i kolim Jehosafat. Mi Bikpela, bai mi sindaun long dispela ples na kotim olgeta lain pipel bilong ol kantri»* (Joel 3:12). Na Jisas yet i tok moa olsem: *«Long las de bilong dispela graun bai i olsem tasol. Ol ensel bai i kam na kisim ol man nogut i stap namel long ol stretpela man»* (Matyu 13:49).

Bai mi givim wanpela tok piksa: wanpela bikpela de bilong lotu i kamap, na haus lotu i pulap stret. Olgeta manmeri bilong ples i stap insait long haus lotu. Na yu tu i stap, na yu sindaun namel long ol. Orait wanpela man i kam insait, na em i stat long autim strong ol pasin nogut bilong yu long ai bilong ol manmeri, na ol manmeri bilong ples i harim. Na bihain dispela man i rausim yu long haus lotu,

na ol manmeri i amamas long yu i go ausait, na ol i no laik bai yu kam insait moa. Olsem wanem? Bai yu amamas o bai yu sem nogut tru? Yu bai i sem nogut tru! Orait, long Las Kot dispela samting bai i kamap, long wanem God bai i rausim ol manmeri nogut i go longwe long ol gutpela manmeri. **Na sapos yu wanpela bilong ol dispela manmeri nogut, orait yu bai i sem nogut tru, long wanem olgeta manmeri bilong graun bai i lukim na harim God i kros long yu, na rausim yu i go longwe long em.**

Taim yumi stap yet long dispela graun, ol manmeri nogut na ol gutpela manmeri i stap wantaim. **Tasol long las de nogat!** Long Las Kot God bai i skelim ol manmeri, na em bai i salim ol gutpela manmeri i go antap long heven, na ol manmeri nogut i go long hel. Santu Pol i tok: ***Long dispela taim yumi... bai i go antap long klaut wantaim ol dispela manmeri, na yumi olgeta bai i bungim Bikpela. Na yumi bai i stap wantaim Bikpela oltaim oltaim*** (1 Tesalonaika 4:17). Tasol ol manmeri nogut, nogat! Ol bai i sanap long han kais wantaim Satan na ol spirit nogut, na Jisas bai i kam na givim pe nogut long ol long ai bilong olgeta manmeri. O sori tumas long yupela, ol manmeri bilong sin! Yupela i longlong tumas! Nau yupela i tok bilas long ol santu na long ol manmeri i save bihainim ol mandato bilong God, tasol long Las Kot yupela bai i kisim bikpela bagarap na lukim belhat bilong God! Na long dispela kot yupela bai i no inap long mekim wanpela samting. **Yupela bai i laik long kam bek long Jisas, tasol nogat, long wanem marimari i pinis.** Yupela bai i kisim bagarap inap oltaim oltaim.

Na long dispela de ol santu bai i amamas planti tumas! Olgeta santu na ol gutpela manmeri bai i bung wantaim long dispela ples daun. Ol bai i tingim ol sakrifais na penans ol i bin mekim taim ol bin stap yet long graun, na ol bai i amamas moa moa yet. Ol santu i bin les long ol mani samting na long amamas bilong dispela graun, olsem na long dispela de God bai i pulapim ol long planti gutpela samting i winim tru ol samting bilong dispela graun. Planti santu i bin go i stap planti yia long ples nating bilong mekim penans... Na sampela i bin kamap monk na i stap insait long monasteri olgeta de bilong laip bilong ol... Na sampela i bin kapsaitim blut bilong ol bilong givim witnes long Jisas, olsem na ol i kamap martir... Ol dispela lain manmeri bai i stap long haus bilong Jisas long heven inap oltaim oltaim.

Tasol sori tumas long ol manmeri nogut! Sori tumas long king Herot, long Ponsias Pailat, long king Nero! Taim ol i stap laip, ol i gat bikpela namba na strong. Tasol long Las Kot, ol bai i sanap long han kais wantaim Satan, na ol bai i go long paia i no save dai inap oltaim oltaim. Sori tumas long ol manmeri bilong sin! Long wanem ol bai i go long hel inap oltaim oltaim.

O Jisas bilong mi! Mi laik holimpasim strong diwai kros bilong yu. Mi les long ol samting bilong dispela graun! Mi les long ol mani samting! Mi les long kisim biknem! Mi les long amamas bilong bodi! Mi laikim yu tasol, na mi mangal long yu tasol.

O sol bilong mi, yu bai i sanap long han sut o long han kais bilong God? Sapos yu laik sanap long han sut, orait yu mas lusim

ol pasin nogut bilong yu nau. Sapos yu go het long ol sin bilong yu na yu wokabaut long rot i go long han kais, yu bai i lus olgeta.

O Lem bilong God, yu kam long graun bilong tekewe ol sin bilong olgeta manmeri! Marimari long mi. Mi sori tumas long ol sin mi bin mekim. Mi laikim yu moa long olgeta samting. Strongim mi, long wanem mi no laik givim baksait gen long yu. Mi les long ol samting bilong dispela graun. Mi mangal long grasia bilong yu tasol. Mi laik pas wantaim yu inap long las de bilong laip bilong mi.

O Maria, yu ples hait bilong mi! Yu hop bilong mi!

59

**God bai i givim pe
inap long ol pasin bilong yumi**

Lukim! Heven i op, na ol ensel na ol santu bilong heven i kam daun, long wanem Las Kot bai i kamap. Na santu Maria, em i Kwin bilong heven, em tu i kam. **Na Jisas, em i Jas bilong oltaim, em i kam las, wantaim bikipela bilas na glori bilong em.** Ol gutpela manmeri bai i amamas long lukim Jisas, na bel bilong ol bai i pulap long bel isi. Tasol ol manmeri nogut bai i lukim belhat bilong Jisas, na ol bai i pret nogut tru. Buk bilong Revelesen i tok: *Na ol i singaut long olgeta maunten na ston olsem, «Yupela i mas karamapim mipela, na haitim mipela long pes bilong Man i sindaun long sia king bilong em, na bai Pikinini Sipsip i no ken kam wantaim bikipela belhat bilong em na mekim save long mipela. Long wanem, dispela bikipela De bilong tupela i belhat long ol manmeri na i bekim pe nogut long ol, nau em i kamap pinis. Na husat inap*

sakim strong bilong tupela na i stap gut?» (6:16-17). Ol manmeri nogut bai i laik long ol maunten i karamapim ol, long wanem ol i pret nogut long belhat bilong Jisas, em i Pikinini Sipsip. Jisas i bin wok hat bilong kisim bek ol, tasol ol i bin les long em, olsem na nau em i taim bilong belhat na bilong bagarap.

O Jisas bilong mi! Yu jas bilong mi! Mi sori tumas long oltaim mi bin givim baksait long yu. Pogivim mi, na helpim mi long stap gut. Long Las Kot mi no laik lukim belhat bilong yu!

Profet Daniel i tok: ***Na kot i kamap, na ol i opim ol buk*** (7:10). Taim bilong haitim ol sin i pinis nau. Jisas i save pinis long olgeta sin yumi bin mekim long ples hait. Olgeta sin bilong yumi i stap insait long dispela buk Profet Daniel i tok long em, na Jisas yet bai i ritim na autim long ples klia, bai olgeta manmeri i ken harim. Santu Pol i tok: ***Bikpela bai i kisim olgeta samting i hait i stap long tudak na putim long lait.*** *Na em bai i kamapim ples klia tingting bilong olgeta man. Na long dispela taim God bai i tokim yumi olgeta wan wan long wok bilong yumi em i gutpela, o nogat* (1 Korin 4:5). I min olsem: **olgeta sin yumi bin mekim long ples hait, na ol pasin i gat sem na ol pasin nogut bilong yumi, bai i kamap ples klia long ai bilong olgeta manmeri.**

O gutpela Ridima bilong mi! Yu save pinis long ol sin bilong mi! Marimari long mi, nogut mi lus long kot!

Long Las Kot Jisas bai i soim bikpela bilas bilong em long ai bilong ol manmeri, na ol manmeri bai i save gut long em. Buk Baibel i tok: *God i soim pasin bilong em long ol man long taim em i mekim kot* (Buk

Song 9:17). Long dispela graun planti manmeri i save lusim God, long wanem ol i save bihainim ol pasin nogut. Ol i bisi long painim amamas bilong bodi na ol samting nogut, olsem na ol i no save tingting long God. Olsem na long Las Kot God bai i tokim ol olsem: «***Mi Bikpela, mi God bilong mekim gutpela na stretpela pasin olgeta, na husat tru i olsem mi? I gat wanpela man i stap i save mekim wankain pasin olsem mi, a?***» (Aisaia 40:25). Na God bai i belhat long ol, na tokim ol moa olsem: «Olsem wanem? Yu lusim mi long wanem yu laik mekim sin? O sori long yu nau, long wanem yu bai i kisim bikpela bagarap! Yu lusim mi pinis! Yu tingting olsem amamas bilong bodi i winim grasias bilong mi, olsem na yu bin lusim mi!». O God bilong mi! Na sapos dispela samting i kamap long mi, bai mi bekim wanem tok? Sapos mi lukim belhat bilong yu, bai mi tok wanem long yu? O sori long mi! Maus bilong mi bai pas olgeta! Olsem na tude mi tokim yu olsem: Jisas bilong mi, mi save pinis olsem wanpela de yu bai i kamap jas bilong mi. Tasol dispela de i no kamap yet, olsem na nau yu no jas bilong mi. Nogat. Nau yu Ridima bilong mi tasol. Yu mas tingim oltaim Pen na Indai bilong yu, long wanem yu bin dai bilong kisim bek mi. Mi sori tumas long ol sin mi bin mekim, na mi redi long givim laip bilong mi, long wanem mi no laik mekim sin moa. O Jisas bilong mi! Pogivim mi, na helpim mi long laikim yu wantaim olgeta strong bilong mi.

O Maria, yu helpim bilong ol manmeri bilong sin! Helpim mi long i stap gut, nogut mi lus long kot.

60

Pe nogut bilong ol manmeri bilong sin

Nau yu mas tingting long belhat na bel nogut bilong ol manmeri bilong sin, taim ol i lukim ol gutpela manmeri i kisim gutpela pe long han bilong Jisas. Jisas bai i tokim ol gutpela manmeri olsem: «*Yupela kam kisim kingdom Papa i bin redim na makim bilong yupela pinis*» (Matyu 25:34). Tasol long ol manmeri bilong sin, Jisas bai i belhat na tokim ol olsem: «*Yupela manmeri bilong lus, yupela klia long mi na yupela go long paia i no save dai*» (Matyu 25:41). Na olgeta manmeri bilong graun bai i harim dispela tupela pe Jisas bai i givim: heven o hel inap oltaim oltaim.

O gutpela Ridima bilong mi! Mi no laik lus long kot! Yu bin dai bilong kisim bek mi, olsem na mi no laik long blut bilong yu i lus nating. Nogat! Mi laik sevim sol bilong mi.

«*Yupela manmeri bilong lus, yupela klia long mi na yupela go long paia i no save dai*» (Matyu 25:41). Dispela em i las toktok

ol manmeri bilong sin bai i harim. Dispela em i pe bilong ol. Ol bai i stap long paia i no save dai inap oltaim oltaim. Ol bai i stap longwe long God, na God bai i lustingting long ol. Sori tumas long ol kristen manmeri i no save tingting long indai bilong ol! Planti kristen manmeri i bilip long hel, tasol ol i no save lusim ol pasin nogut bilong ol.

O God bilong mi! Wanem samting bai i kamap long mi, sapos mi tu i harim dispela tok yu mekim long ol manmeri bilong sin? Wanem samting bai i kamap long mi, sapos yu salim mi i go long paia i no save dai? Mi trastim yu, Jisas, na mi askim yu long tingim blut bilong yu na helpim mi. Givim save long mi, bai mi ken save gut long ol pasin mi mas mekim bilong redim mi yet long kot. Marimari long mi, Bikpela!

Na taim kot i pinis, orait long dispela ples daun we kot bai i kamap long em, wanpela traipela hul bai i kamap. Na ol manmeri bilong lus wantaim Satan na ol spirit nogut bai i pundaun long em. **Na taim ol i go insait pinis, orait dua bilong hel bai i pas, na em bai i stap olsem inap oltaim oltaim.** O yupela, ol sin nogut! Yupela i bin pulim planti manmeri i go long hel inap oltaim oltaim! **Wanpela mortal sin tasol em i inap long kisim ol manmeri i go long hel.** O yupela, ol manmeri bilong lus! Yupela i bin amamas long mekim sin, na nau yupela bai i kisim pen inap oltaim oltaim.

O God bilong mi! Na mi olsem wanem? **Bai mi go we?** Mi no pret long paia bilong hel. Nogat. Mi pret long i stap longwe long yu. Yu

olgeta gutpela samting bilong mi, olsem na mi pret tasol long lusim yu. Dia Ridima bilong mi, planti taim mi bin givim baksait long yu. Tasol nau mi laikim yu wantaim olgeta strong bilong mi. Lewa bilong mi em i bilong yu tasol. Na mi save pinis olsem, ol manmeri i laikim yu tru, ol i no save go long hel. Olsem na mi askim yu long mekim laik bilong mi i go long yu i kamap bikpela moa moa yet. Yu mas pasim mi long yu, wankain olsem ol man i save pasim ol samting long sen. Helpim mi long pas wantaim yu, long wanem mi no laik lusim yu gen.

O Maria, yu save helpim ol manmeri bilong sin long tanim bel, yu mas helpim mi!

61

Gutpela pe bilong ol gutpela manmeri

Jisas i tok: «*Yupela kam kisim kingdom Papa i bin redim na makim bilong yupela pinis*» (Matyu 25:34). Dispela em i tok ol gutpela manmeri bai i harim long las de. I gat stori bilong santu Fransis bilong Asisi i olsem: wangepela de Jisas i tokim em olsem: «Fransis, mi makim yu pinis bilong i go long heven». Olsem na taim Fransis i harim dispela tok bilong Jisas, em i pilim bikpela bel isi na klostu em i laik i dai. Nau yu mas tingting long ol gutpela manmeri, long wanem wangepela de ol tu bai i harim dispela tok long maus bilong Jisas: «*Yupela kam kisim kingdom Papa i bin redim na makim bilong yupela pinis*».

O God! Planti taim mi bin lusim dispela kingdom, long wanem mi bin mekim planti sin tumas. Tasol mi tingim Pen na Indai bilong yu, na mi hop long yu. Dia Ridima bilong mi, mi laikim yu na mi trastim yu!

Taim God i wok long putim ol santu long han sut bilong em na mekim ol i sindaun long ol bikipela sia king, ol i amamas tru! Ol i pilim bikipela amamas tru, na ol i wok long stori na tok amamas long wanpela narapela. Ol i save pinis olsem ol bai i stap long heven inap oltaim oltaim, na bai i no gat wanpela samting i ken mekim ol i lusim God. Nogat tru. Ol bai i stap wantaim God inap oltaim oltaim. Long dispela de God bai i givim bikipela pe long ol long ai bilong ol manmeri, na ol bai i singsing amamas long em! O yupela, ol santu, yupela i ken amamas tru! God i redim pinis bikipela pe bilong yupela long heven!

Olsem na yumi mas sanap strong long bilip bilong yumi, na yumi mas bilip olsem: **wanpela de yumi bai i sanap long Las Kot long ples daun bilong Jehosafat, na bihain yumi bai i kisim pe long han bilong Jisas.** Dispela pe i olsem: heven o hel, inap oltaim oltaim. Olsem na sapos nau yumi no klia wanem pe Jisas bai i givim long yumi, orait yumi mas wok hat bilong kisim heven! Yumi mas wok hat bilong lusim ol pasin nogut, na bilong lusim ol samting i save pulim yumi long mekim sin. **Yumi mas kisim ol sakramen, yumi mas pre na mekim ol meditesen, na yu yumi mas ritim ol samting bilong Jisas na bilong Katolik bilip.** Ol dispela samting bai i helpim yumi long senisim laip na i go long heven. **Tasol sapos yumi i sot long ol sakramen na long prea na meditesen, orait em bai hat long go long heven.**

O dia Jisas bilong mi! Yu jas bilong mi tu! Mi tingim blut bilong yu, na mi trastim yu. Olsem na mi no laik lus long Las Kot, na long

dispela as tasol mi askim yu long marimari long mi nau. Mi tu i laik harim dispela tok yu bin mekim long santu Maria bilong taun Makdala: «***Mi lusim pinis ol sin bilong yu***» (Luk 7:48). Mi sori tumas long ol sin bilong mi, olsem na mi askim yu long pogivim mi. Na tu mi askim yu long givim grasia long mi, bai mi ken laikim yu inap long las de bilong laip bilong mi. Mi laikim yu, Jisas, yu olgeta gutpela samting bilong mi. Wantaim yu mi no sot long wanpela samting. Profet Devit i tok: ***Orait God, mi laikim yu moa yet. Mi no laikim olgeta samting bilong graun olsem mi laikim yu*** (Buk Song 73:25). O God bilong mi, mi mangal long yu tasol.

O Maria, yu inap long helpim mi, na yu tu i laik long mi i go long heven! Mi trastim yu!

62

Long Las Kot ol daimanmeri bai i kirap bek

Wanpela de bai i kam na dispela graun wantaim olgeta samting i stap long em bai i pinis. Tasol pastaim long Jisas i kam bilong mekim kot long ol manmeri, bikpela paia bai i lusim heven na i kam long graun, na dispela paia bai i kukim na pinisim olgeta samting. Santu Pita yet i tok olsem: ***Tasol De bilong Bikpela bai i kamap wantu tasol olsem ol stilman i save kam. Long dispela De skai bai i pairap bikpela na i pinis olgeta. Na olgeta liklik samting God i bin wokim graun long em, paia bai i kukim ol na ol bai i pinis. Olsem na graun wantaim olgeta samting ol i wokim i stap long em, ol bai i no i stap moa*** (2 Pita 3:10). Olsem na long dispela de olgeta samting bai i kamap olsem sit bilong paia.

O God! Sori tumas long ol manmeri i bin givim ol yet long dispela graun! Sori tumas long ol manmeri lewa bilong ol i pas yet long ol

samting bilong dispela graun! Paia bai i kukim na pinisim olgeta samting, na ol dispela manmeri bai i krai nogut tru! Maski yu maniman, o yu bikman, o yu strongpela king! **Bikpela paia bai i kam na kukim olgeta samting bilong yu!** Yu longlong tumas sapos yu putim lewa bilong yu long ol samting bilong dispela graun! I no longtaim skai bai i pairap bikpela na paia bai i kukim dispela graun! Na ol manmeri i bin givim lewa bilong ol long ol samting bilong dispela graun, ol bai i lusim God inap oltaim oltaim!

Buk Baibel i tok: ***Dispela bai i kamap wantu tasol, long taim bilong las biugel i krai. Yes, biugel bai i krai, na ol man i dai pinis bai i kirap*** (1 Korin 15:52). Dispela biugel bai i kirapim ol daimanmeri na singautim ol long sanap long Las Kot bilong God. Ol santu na ol gutpela manmeri bai i kirap wantaim wanpela naispela bodi i pulap long lait na glori! Jisas i tok: «***Long dispela taim ol stretpela manmeri bai i lait olsem san***» (Matyu 13:43). Tasol ol man nogut bai i kirap na bodi bilong ol bai i nogut tru! Bodi bilong ol manmeri nogut bai i bagarap olgeta, na bagarap bilong ol bai i winim olgeta sik bilong dispela graun! Taim ol i bin stap long graun, ol i bin givim planti amamas long bodi bilong ol. Tasol nau dispela bodi bai i senis, na em bai i pen nogut tru, na ol bai i no inap long givim amamas long em gen. Nogat. Ol bai i no inap long painim alivim long pen bilong ol. Ol i bin tingting tumas long amamas bilong bodi, olsem na dispela tok bilong Jisas bai i kamap ples klia: «***Na ol bai i tromoi ol i go long bikpela paia. Long dispela paia ol bai i krai***

nogut na skrapim tit bilong ol» (Matyu 14:42). O yupela, ol manmeri i bin stap gut, yupela i ken amamas! O yupela, ol manmeri i bin mekim penans na sakrifais, yupela i ken amamas! Long wanem yupela i no bin tingting long amamas bilong bodi, olsem na nau bodi bilong yupela i nais tumas, na yupela bai i kisim olgeta amamas i winim tru amamas bilong dispela graun.

O Jisas bilong mi! Mi askim yu: ***Yu no ken hait long mi, nogut mi dai na mi go long ples bilong ol man i dai pinis*** (Buk Song 143:7). No, dia Jisas, yu no ken haitim pes bilong yu long mi. Yu sapos long haitim pes bilong yu, long wanem planti taim mi bin givim baksait long yu. Tasol mi no laik mekim sin moa, olsem na mi askim yu long marimari long mi. Pogivim mi, dia Jisas. Mi no laik mekim sin moa. Nogat. Mobeta mi laik i i dai pastaim.

Na taim ol daimanmeri i kirap pinis, orait ol ensel bai i singautim ol long go sanap long ples daun bilong Jehosafat. Long dispela ples tasol Las Kot bai i kamap long ai bilong ol manmeri. Buk Baibel i skulim yumi olsem: ***Planti tausen manmeri bai i bung long ples daun bilong mekim kot. Liklik taim tasol na De bilong Bikpela bai i kamap long dispela ples*** (Joel 3:14).

O God bilong mi! Mi tu bai i kam long dispela ples daun, na mi no save sapos mi bai i sanap wantaim ol stretpela manmeri, o wantaim ol manmeri bilong lus. Dia Ridima bilong mi, blut bilong yu em i hop bilong mi! Sori tumas long mi, long wanem planti taim mi mekim sin, olsem na mi sapos long go long hel! No, dia Jisas bilong mi, nau

mi laik senisim ol pasin nogut bilong mi, na mi laik pas wantaim yu. Strongim mi bai mi no ken lusim yu gen. Yu save pinis olsem mi wik na planti taim mi laik mekim sin, olsem na yu mas helpim mi. No ken lusim mi, dia Jisas bilong mi!

O Maria, yu save sambai long mi oltaim! Helpim mi long bihainim ol gutpela pasin inap long indai bilong mi.

Hel

63

Hel i no save pinis

Sapos yumi tok olsem hel i gat pinis o arere bilong em, orait yumi rong olgeta. Hel i save stap inap oltaim oltaim. Long dispela graun ol liklik sik i no save givim bikipela pen long yumi. Nogat. Tasol ol bikipela sik i save i stap longpela taim tumas, ol i save givim bikipela pen, na yumi save krai nogut tru. Sapos long olgeta de bilong laip bilong yu, yu save kaikai wankain kaikai tasol, na yu save harim wankain musik tasol, na yu save stap long wanpela ples tasol, mi ting olsem i no longtaim yu bai i les olgeta long ol dispela samting. Tasol long hel mi no tok olsem yu bai i stap sampela mun o sampela yia. Nogat. **Yu bai i stap long em inap oltaim oltaim! Eterniti i wetim yu!** Olsem na yumi i longlong tumas taim yumi mekim sin, long wanem **wanpela sin i save pinis hariap i pulim yumi long i stap long eterniti long hel!** Ol manmeri i stap long hel i laik i dai, tasol indai i save ranawe long

ol, olsem na ol bai i stap laip namel long paia i no save dai inap oltaim oltaim.

O God bilong mi! Helpim mi long grasia bilong yu! Sori tumas long mi, sapos mi givim baksait gen long yu! Yu bin marimari long mi planti taim pinis, olsem na nau mi no laik lusim yu gen. God bilong mi, was long mi oltaim, na no ken haitim pes bilong yu long mi!

Bilip bilong yumi i tok klia olsem: **man o meri i go long hel bai i stap long dispela ples inap oltaim oltaim. Na tu i no gat hop long God i marimari long ol na kisim ol i go long heven. Nogat. Long wanem taim bilong marimari i pinis.** Jisas i tokaut klia olsem: «*Na ol dispela lain bai i go bilong kisim pe nogut, em pen i save stap oltaim*» (Matyu 25:46). Man o meri i go insait long kalabus bilong hel, bai i no inap long go ausait. Nogat. Em bai i stap long dispela ples inap oltaim oltaim. Olsem na sapos ol manmeri bilong lus i tok: «Orait, i no longtaim God bai i marimari long mi na kisim mi i go long hel», ol bai kranki olgeta! **Ol i save pinis olsem pen bilong ol long hel bai i no gat pinis!** Hel bai i stap inap long God i stap God. I min olsem: inap oltaim oltaim.

O dia Ridima bilong mi! Mi save pinis olsem bipo mi bin lusim grasia bilong, olsem na mi sapos long go long hel. Olsem na mi askim yu long pogivim mi, gutpela Jisas bilong mi! Mi krai sori long ol sin mi bin mekim, na mi no laik givim baksait long yu moa.

Taim ol manmeri bilong sin i stap yet long dispela graun, ol i save pret long indai. **Tasol taim ol i go long hel, ol bai i laik i dai hariap,**

bai ol pen bilong ol i ken pinis hariap. Tasol nogat! Ol bai i no inap i dai, na ol bai i stap laip inap oltaim oltaim long paia i no save dai. Buk bilong Revelesen i tok: ***Long dispela taim ol manmeri bai i wok long painim rot bilong i dai, tasol ol bai i no inap i dai. Ol bai i laikim tumas long i dai, tasol dai bai i ranawe long ol*** (9:6). Na long hel bai i no gat wanpela man o meri i ken sori long ol na mekim gut long ol. Nogat. Long hel ol manmeri i save hetim wanpela narapela, na ol i amamas long lukim ol narapela manmeri i kisim pen nogut tru. Dispela pen nogut tru bai i stap oltaim oltaim, na ol bai inap harim biugel bilong God i tokim ol olsem: **«Eterniti! Inap oltaim oltaim! No gat hop long ranawe long hel!».**

O Jisas bilong mi! Mi sapos long i stap long hel wantaim ol manmeri bilong lus, long wanem planti taim mi bin mekim mortal sin. Tasol yu no bin larim indai i bungim mi yet, olsem na yu givim sans long mi long stretim ol pasin nogut bilong mi. Helpim mi long stap gut, long wanem mi no laik lusim yu gen.

Mi laikim yu, Jisas, yu olgeta gutpela samting bilong mi! Marimari long mi na pogivim mi. Mi sapos long go long hel, bai paia bilong hel i kukim mi olgeta. Tasol mi askim yu long kukim mi wantaim paia bilong laikim pasin bilong yu.

O Maria, Maria, mi hop long yu!

64

Paia bilong hel i no save dai

Yumi save pinis olsem: **hel em i olsem wanpela traipela hul i gat paia, na ol manmeri bilong lus i stap long em inap oltaim oltaim.** Long dispela graun tu paia i save mekim nogut long yumi, na sapos yumi kukim bodi bilong yumi, orait yumi save pen nogut tru. **Tasol paia bilong hel i winim tru paia bilong dispela graun, na paia bilong dispela graun i olsem samting nating.** God i bin kamapim paia bilong graun bilong helpim yumi long mekim planti samting. Tasol paia bilong hel em i narakain olgeta. God i bin kamapim paia bilong hel bilong bagarapim ol manmeri bilong lus tasol. Paia bilong graun em i no wanpela samting nogut. Nogat. Em i save helpim yumi long mekim planti samting, na sapos yumi yusim em gut, orait yumi no ken pret. **Tasol paia bilong hel em i narakain, long wanem em i strong tumas, na God i bin kamapim em bilong givim pen long ol manmeri nogut.** Jisas yes i skulim yumi olsem paia bilong hel i no save dai: «*Yupela*

manmeri bilong lus, yupela klia long mi na yupela go long paia i no save dai, em dispela paia ol i redim pinis bilong Satan wantaim ol ensel bilong em» (Matyu 25:41). Sori tumas long ol manmeri bilong lus! Paia bilong dispela graun em i samting nating! Paia bilong hel bai i kukim ol long san na long nait inap oltaim oltaim! Na dispela pen bai i winim tru olgeta pen! Na taim yumi stap yet long graun, yumi no inap long save gut long dispela paia em i olsem wanem, long wanem dispela paia em i bikpela tumas na i winim tru tingting bilong yumi.

O God bilong mi! Mi sapos long go long paia bilong hel, tasol yu bin wetim mi inap long tude. Mi laik bai yu kukim mi long paia bilong laikim pasin bilong yu. Mi laikim yu, na mi laik i stap wantaim yu inap oltaim oltaim. Yu olgeta gutpela samting bilong mi.

Paia bilong dispela graun i save kukim bodi bilong yumi long ausait tasol, tasol paia i no inap long kam insait long bodi bilong yumi. Tasol paia bilong hel em i narakain olgeta, olsem na em i inap long kam insait na kukim yumi long insait tu. Buk Baibel i tok: ***Tru tumas, bai God i kros na i daunim ol, na bai paia i kukim ol olgeta*** (Buk Song 21:9). Olgeta manmeri bilong lus bai i kamap olsem wanpela bikpela paia i save kukim ol yet long ausait na long insait tu. Lewa bilong ol bai i paia insait long bros bilong ol, na ol samting i stap insait long bel tu. Het wantaim ol samting i stap insait long em bai i paia olgeta. Blut bilong ol bai i boil, na ol samting i stap insait long ol bun tu. **Na yupela ol manmeri bilong sin, yupela i tok wanem nau?** Yupela i save komplein sapos wanpela liklik hap paia i kalap na i kukim han bilong yupela.

Olsem wanem na yupela i no save pret long paia bilong hel? Yupela i save komplein sapos wangepela kendel i kukim pinga bilong yupela. Olsem wanem na yupela i no wok hat long abrusim paia bilong hel? Yupela i save les long stap long ol rum i hat tumas. Olsem wanem na yupela i laik i go long hel, em i olsem solwara i gat paia tasol? Long hel yupela bai i laik i dai, tasol indai bai i ranawe long yupela.

Profet Aisaia i tok: ***Belhat bilong Bikpela, em i olsem strongpela paia i save lait oltaim na pinisim olgeta samting. Husat bilong yumi inap i stap wantaim dispela paia?*** (33:14). Wankain olsem wangepela strongpela laion i kaikai wangepela liklik animal, wankain olsem tasol paia bilong hel bai i kaikaim ol manmeri bilong lus. Tasol laion i save kilim i dai dispela liklik animal, tasol paia bilong hel bai i no inap kilim i dai ol manmeri bilong lus, long wanem ol bai i stap laip inap oltaim oltaim. Santu Pita Demian i tok: «O yu, man bilong sin! Goan! Yu go het long mekim sin! Go het long givim amamas long bodi bilong yu! **Wangepela de bai i kam, na ol amamas bilong bodi yu bin kisim bai i mekim paia bilong hel i kamap bikpela moa moa yet!** Na yu bai i stap long hel inap oltaim oltaim!».

O God bilong mi! Mi givim baksait long yu, na mi mekim sin planti taim tumas! Pogivim mi, na no ken larim mi i lusim yu gen. Mi sori tumas long ol sin mi bin mekim. Givim grasia bilong yu long mi, long wanem mi laik pas wantaim yu inap oltaim oltaim. Mi mangal long yu tasol.

O santu Virgo Maria, helpim mi long abrusim hel.

65

Pen bilong memori, tingting na laik bilong ol manmeri bilong lus

Ol manmeri bilong lus bai kisim bikpela pen long bodi na long sol bilong ol. Long las meditesen yumi bin toktok long pen bilong paia i save kukim bodi, olsem na nau bai yumi toktok long pen bilong sol. Yumi mas save olsem: **ol manmeri bilong lus bai kisim bikpela pen long sol bilong ol, na dispela pen bai bagarapim memori, tingting na laik bilong ol.**

Pastaim yumi toktok long memori. **Ol manmeri bilong lus bai i tingim gut olgeta yia ol i bin i stap laip**, na ol i bin westim nating taim bilong ol. Ol bin i stap laip planti yia, olsem na ol i bin inap long senisim ol pasin nogut bilong ol, tasol ol i bin les. Olsem na dispela kain tingting bai i mekim ol i pil nogut tru. Nau ol i save pinis i no gat hop long stretim ol rong, olsem na ol bai i lus inap oltaim oltaim. **Ol bai i tingim tu olgeta taim God i bin singautim ol long kam**

bek long em, tasol ol i bin givim kain kain eskus long em. **Ol bai i tingim olgeta taim God i bin redi long marimari long ol**, tasol ol i olsem ol yaupas, na ol i no bin harim ol singaut bilong em. Tasol nau taim bilong marimari i pinis, olsem na ol bai i krai na skripim tit bilong ol inap oltaim oltaim.

O Jisas bilong mi! Blut na Indai bilong yu em i hop bilong mi! No ken larim mi i go long hel! Mi no laik westim nating ol grasia bilong yu!

Ol manmeri bilong lus bai i kisim bikpela pen tu long tingting bilong ol. Oltaim ol bai i tingting long amamas bilong heven, tasol long laik bilong ol yet ol i bin lusim dispela amamas. **Ol i save pinis olsem i no gat hop long go long heven!** Ol i save tu long bikpela amamas bilong ol stretpela manmeri long heven, na dispela tingting i mekim ol i belhat na i kros moa moa yet.

O gutpela Ridima bilong mi! Sapos mi bin dai wantaim ol sin bilong mi, mi tu i mas i go long dispela ples bilong kisim pen. Na sapos dispela samting i bin kamap long mi, olgeta hop bilong mi bai i pinis. Yu bin givim laip bilong yu bilong kisim mi i go long heven, tasol mi bin tingting long mi yet, na mi bin mekim planti sin. Mi laikim yu, Bikpela, na mi sori long ol sin bilong mi. Pen na Indai bilong yu i givim hop long mi!

Ol manmeri bilong lus bai i kisim bikpela pen tu long laik bilong ol. Ol bai i mangal long planti samting, tasol ol bai i no inap kisim wanpela samting. Ol bai i kisim planti pen nogut na ol bai i laik bai wanpela man o meri i helpim ol, tasol nogat! Dispela pen bai i

kamap bikpela moa moa yet long olgeta de! Olgeta gutpela samting ol manmeri bilong lus i mangal long em, bai i no i stap long hel. Na olgeta samting nogut ol manmeri bilong lus i les long em, bai i pulap long hel. Ol bai i laik long ranawe long paia bilong hel na painim bel isi, tasol nogat! Ol dispela pen nogut bai i bagarapim ol long san na long nait, inap oltaim oltaim. Olsem na ol bai i hetim God wantaim olgeta strong bilong ol. Ol bai i save olsem God em i olgeta gutpela samting, tasol ol bai i les olgeta long em, na ol bai i hetim em.

O God bilong mi! Yu gutpela tumas na yu pulap long marimari! Planti taim mi bin lustingting long yu, long wanem mi bisi long amamas bilong dispela graun. Mi sori long ol rong mi bin mekim, na mi no laik mekim sin moa. Nogat. Mobeta mi laik i dai pastaim. Mi laikim yu, long wanem yu olgeta gutpela samting bilong mi! Marimari long mi, dia Jisas, na helpim mi long bihainim yu gut. Mi les olgeta long ol amamas bilong graun, na mi mangal long yu tasol. Mi laik i stap oltaim olsem samting bilong yu tasol. Na mi laik bai yu stap oltaim long lewa bilong mi. Mi trastim yu, gutpela God bilong mi! Yu olgeta gutpela samting bilong mi, na mi mangal long yu tasol.

O Maria, yu inap long mekim olgeta samting wantaim strong bilong God! Helpim mi long kamap santu.

66

Pen bilong sol bilong ol manmeri i stap long hel

Planti taim yumi tingting olsem pen bilong paia i kukim ol bodi em i nambawan pen bilong hel. Tasol nogat. Paia i no nambawan pen bilong hel. Na tudak tu i nogat. Na ol smel nogut tu i nogat. **I gat wanpela pen i save winim olgeta pen bilong hel, na em i olsem: yu lusim God na yu bai i stap longwe long em inap oltaim oltaim.** God i bin kamapim sol bilong yumi bai em i ken i go long heven, na lukim em na i stap wantaim em inap oltaim oltaim. God em i as bilong laip bilong yumi. God em i olgeta gutpela samting bilong yumi. God tasol i pulap long olgeta gutpela samting i winim tru tingting bilong yumi. Amamas i stap wantaim God i winim tru ol amamas bilong dispela graun. Olsem na maski yu kisim olgeta amamas bilong graun, sapos yu no go i stap wantaim God, yu bai i lus olgeta. **Olsem na dispela pen i winim tru ol arapela pen**

bilang hel: ol manmeri bilang lus i save pinis olsem ol bai i no inap long lukim God na stap wantaim em. Ol bai i stap longwe long God inap oltaim oltaim, na hop bilang ol bai i lus.

O Jisas, yu Ridima bilang mi! Yu hangamap long diwai kros bilang kisim bek mi, olsem na yu hop bilang mi. Sori tumas long ol sin mi bin mekim!

God i bin kamapim sol bilang yumi, na insait long sol em i bin putim dispela mangal bilang i go long heven wantaim em. Olgeta manmeri bilang graun i laik amamas oltaim long heven, maski ol i manmeri nogut. Sapos yu askim ol manmeri nogut, ol tu bai i tok olsem ol i laik amamas long heven inap oltaim oltaim. I no gat wanpela man o meri long graun i laik kisim pen inap oltaim oltaim. Nogut. Olgeta manmeri i laik amamas inap oltaim oltaim. Na dispela samting i kamap long wanem **God yet i bin putim dispela mangal na tingting insait long sol bilang yumi.** Orait, taim wanpela man o meri i save givim em yet long ol amamas bilang bodi na bilang graun, dispela mangal long i go stap wantaim God i save kamap liklik, na tudak i save karamapim sol bilang dispela man o meri. **Dispela man o meri i bisi long amamas bilang bodi, olsem na em i no inap tingting long amamas bilang sol.** Tasol taim dispela man o meri i dai, na sol i lusim bodi na i go sanap long eterniti, dispela mangal bai i kamap ples klia gen long em, tasol em bai i no inap long mekim wanpela samting. **Long indai tasol dispela man o meri bai i klia na save gut olsem God em i as bilang olgeta amamas, na olgeta**

trupela amamas i stap long em tasol. Tasol taim i pinis. Em bai i pilim bikpela laik long i go stap wantaim God, tasol sol bilong em bai i no inap. Sol bilong dispela man o meri i pas pinis long sen bilong sin. Na ol bai i pulim dispela sen na tromoi em i go long hel. Na long hel em bai i luksave olsem God em i olgeta gutpela samting, tasol em bai i no inap long lukim em. Long hel ol gutpela amamas bilong God bai i kamap ples klia long ai bilong dispela man o meri, tasol em bai i no inap long mekim wanpela samting bilong i go long dispela amamas. Long hel em bai i save olsem God em i gutpela tumas na yumi sapos long laikim em, tasol em bai i no gat strong moa bilong laikim God. Em bai i hetim God, long wanem sol bilong em i pulap long sin. Em bai i les olgeta long God, long wanem em i save pinis olsem God i lusim em na i givim baksait pinis long em.

O Bikpela, marimari long mi!

Dispela man o meri i stap long hel bai i kisim save tu long olgeta grasia Jisas i bin givim long em taim em i bin i stap laip, na dispela bai i mekim pen bilong em i kamap bikpela moa moa yet. Oltaim dispela man o meri i save givim kain kain eskius long Jisas, na em i no save lusim ol sin na ol samting nogut i save pulim em long mekim sin.

Long hel ol bai i luksave long bikpela laik bilong Jisas i go long ol, long wanem Jisas i bin dai bilong kisim bek ol. Pen na Indai bilong Jisas bai i kamap ples klia long ai bilong ol manmeri bilong lus, na ol bai i luksave long pasin marimari bilong Jisas. Tasol nau ol i no inap

long sori long ol sin bilong ol, long wanem taim i pinis. **Olsem na ol bai i kisim bikpela pen long lukim Pen na Indai bilong Jisas**, long wanem ol bai i save olsem Jisas i bin dai bilong helpim ol, tasol ol i bin givim baksait long em. Ol i bin bisi tumas long amamas bilong graun, olsem na ol i bin lustingting long Jisas. **Nau olgeta hop bilong tanim bel na tok sori long Jisas i pinis.**

O God bilong mi! Sapos mi go long hel, mi bai i no inap long laikim yu moa. Sapos mi go long hel, mi bai i no inap long sori long ol rong bilong mi. Tasol mi stap laip yet, olsem na mi sori long ol rong mi bin mekim. Mi laikim yu moa long olgeta samting. Helpim mi oltaim long tingim ol pen bilong hel, bai dispela tingting i ken helpim mi long laikim yu moa moa yet.

O Maria, yu gutpela ples hait bilong ol manmeri bilong sin! No ken lusim mi.

67

Long hel i gat pen tasol

Taim yumi i stap yet long dispela graun, yumi save karim pen tu. Kain kain sik, na kain kain samting nogut i save kamap long yumi, olsem na yumi karim pen. Tasol yumi gat planti samting bilong alivim pen bilong yumi tu, olsem na yumi ken stap gut na yumi no karim pen long san i go inap long nait. Ol sikmanmeri i karim bikpela pen, tasol long nait ol i inap long slip, olsem na taim ol i slip ol i no pilim pen moa. Pen bilong yumi hia long graun i gat alivim bilong em tu. **Tasol sori tumas long ol manmeri i stap long hel! Long hel i no gat wanpela samting inap long alivim pen bilong ol!** Ol i no save painim gutpela taim na ol i no save slip, olsem na pen bilong ol i no save pinis! Ol i save krai oltaim, na karim pen oltaim, na ol samting nogut i wok long givim pen long ol i no save pinis.

O Jisas bilong mi! Mi sapos long go long hel na kisim pen inap oltaim oltaim, long wanem mi bin mekim planti sin tumas. Sapos mi

bin dai wantaim ol sin bilong mi, orait nau mi sapos long i stap long hel. Gutpela Ridima bilong mi, mi laik karim pen nau taim mi stap yet long graun, bai dispela sakrifais bilong mi i ken winim heven long mi. Mi laikim yu tumas.

Planti taim i save kamap olsem: yumi sik, olsem na yumi karim pen nogut tru. Tasol sapos dispela sik i stap longpela taim, orait isi isi yumi bai i no pilim moa dispela pen nogut, olsem na pen bai i kamap liklik. Maski sik i stap yet, pen bilong em i wok long kamap liklik. **Orait, dispela samting i save kamap long hel tu o nogat? Nogat olgeta!** Long hel ol pen i no save kamap liklik, na olgeta de yumi stap long em yumi bai i karim wankain pen tasol. Maski yu stap 100-pela yia o planti tausen yia long hel, pen bilong yu bai i wankain tasol.

Buk Baibel i tok: *Bikpela, yu mas harim prea bilong mi, na kisim bek mi kwiktaim* (Buk Song 31:2). Bikpela, mi save pinis olsem ol sin bilong mi i mas pulim mi i go long hel, tasol yu no save amamas long ol manmeri i lus. Nogat. Yu amamas long ol i tanim bel na i kam bek long yu. Olsem na mi no laik mekim sin moa. Mi laikim yu moa long mi save laikim mi yet. **Givim grasia bilong yu long mi, long wanem grasia bilong yu em i laip bilong mi.**

Taim yumi stap yet long graun i save kamap olsem: sapos wanpela man o meri i karim bikpela pen tru, orait ol famili na pren bilong em i save givim alivim long ol, long ol gutpela pasin na toktok. Na dispela samting i save mekim dispela man o meri i stap gut. Tasol sapos dispela man o meri i karim bikpela pen tumas, na ol pren na famili

bilong em i kam na paitim em na tok nogutim em, em bai i karim bikpela pen moa moa yet! **O sori tumas long ol manmeri bilong lus, long wanem dispela samting i save kamap long hel!** Ol manmeri bilong lus i kisim bikpela pen nogut tru, na ol narapela manmeri nogut na ol spirit nogut i amamas long pen bilong ol! **Na God tu i no inap long alivim ol, long wanem ol i birua bilong em.** Santu Maria tu i no inap long helpim ol. Na tu i no gat wanpela ensel o santu i ken na givim malolo long ol. Nogat. **Ol lain bilong heven i save amamas long lukim ol manmeri nogut i kisim pen long hel, long wanem stretpela kot bilong God i kamap ples klia.** Ol manmeri bilong lus i bin mekim sin long laik bilong ol, olsem na ol santu bilong heven i amamas long lukim pe nogut bilong ol sin bilong ol.

O Maria, yu Mama bilong mi, marimari long mi! Nau em i taim bilong marimari, long wanem kot i no kamap yet. Olsem na yu mas sori long mi na askim God long helpim mi.

Na yu, Jisas bilong mi, yu mas tingim Pen na Indai bilong yu, na helpim mi oltaim. Yu bin hangamap long diwai kros bilong kisim bek mi, olsem na yu mas sevim mi. Mi sori, Bikpela, long ol sin mi bin mekim. Na mi laikim yu wantaim olgeta strong bilong mi.

68

Hel i no gat marasin bilong em

Nambawan wok bilong yumi i mas olsem: sevim sol bilong yumi. Dispela wok i winim tru olgeta bisnis na olgeta samting bilong graun. Sapos yu lusim sol bilong yu, orait yu lusim em inap oltaim oltaim.

Sapos yu save mekim bisnis na yu mekim wanpela rong na yu lusim mani, orait bihain yu ken stretim dispela rong. O sapos yu bagarapim wanpela samting bilong yu, orait bihain yu ken stretim em o baim wanpela nupela samting. **Tasol sapos yu lustingting long salvesen bilong yu, nau i no gat rot bilong stretim dispela rong.** Nogat. Eterniti i wetim yu. Olsem na sapos yu go long hel, sori tumas long yu! I no gat wanpela rot bilong stretim dispela rong yu bin mekim, olsem na yu bai i stap long hel inap oltaim oltaim. Wanpela taim tasol yumi save i dai, na yumi gat wanpela sol tasol. Olsem na sapos yu dai na yu lusim sol bilong yu, orait yu bai i lus inap oltaim oltaim. **I no**

gat namba tu sans. Nogat. Wanpela sans tasol: sapos yu lusim em, yu lusim olgeta samting.

Lukim mi Jisas! Nau mi kam long yu, long wanem mi laik tok sori long ol sin mi bin mekim. Mi sapos long go long hel, long wanem mi bin mekim planti sin tumas. Tasol yu wetim mi na yu givim sans long mi i tanim bel. Marimari long mi, gutpela Jisas.

Ol manmeri i stap long hel i no gat rot bilong stretim ol rong ol i bin mekim, olsem na ol i save krai nogut tru na singaut oltaim: «**Rong bilong mi! Rong bilong mi, tasol!**». Tasol maski ol i krai na komplein, pen bilong ol i no gat marasin bilong em.

O Ridima bilong mi! Sapos mi go long hel, mi bai i no inap long tok sori long yu na laikim yu. Olsem na mi laik tenkim yu, long wanem peisens bilong yu i bikpela tumas. Yu bin wetim mi inap long tude, long wanem yu no laik long mi i lus. Nogat. Nau em i taim bilong mi i mas tanim bel na laikim yu. Mi sori long ol sin mi bin mekim, na mi laikim yu moa long olgeta samting. Mi laikim yu moa long mi save laikim mi yet. O Jisas bilong mi, helpim mi long pas wantaim yu oltaim.

Ol manmeri bilong lus i save pinis olsem ol i stap long hel long ol rong ol yet i bin mekim. Taim ol i stap yet long graun ol i save pinis long ol sin ol i save mekim, tasol ol i no wari liklik. Na ol dispela sin tasol i bin pulim ol i go long hel. Olsem na dispela tingting i mekim ol i karim bikpela pen moa yet, **long wanem ol i go long hel long ol rong bilong ol na long lespasin bilong ol yet!**

Bai mi givim wanpela tok piksa: sapos yu lusim wanpela naispela ring, yu bai tingting planti na bel hevi. Na sapos yu lusim wanpela mani gol o silva, yu bai i sori moa moa yet. Olsem na sori tumas long ol manmeri i stap long hel! Long wanem ol i no bin lusim wanpela ring o wanpela mani silva, tasol ol i bin lusim sol bilong ol! Ol i save tok oltaim olsem: **«Long laik bilong mi tasol mi bin mekim sin! Long rong bilong mi tasol mi i stap long hel! Mi lusim sol bilong mi! Mi lusim heven! Mi lusim God yet... Mi lusim olgeta gutpela samting long rong bilong mi tasol! Mi lusim olgeta gutpela samting long lespasin bilong mi tasol!».**

O Gutpela Sevia bilong mi! Mi no laik lusim yu. Nogat. Na sapos bipo mi bin bikhet long yu na mi bin mekim planti sin, orait nau mi sori wantaim olgeta strong bilong mi. Mi laikim yu moa long olgeta samting. Yu no bin salim mi i go long hel yet, long wanem yu laikim mi. Olsem na mi tu i laik laikim yu na stap wantaim yu. Stongim mi, dia Jisas, bai mi ken bihainim yu gut na stretim ol rong bipo mi bin mekim.

O santu Virgo Maria, yu hop bilong mi!

69

Long hel ol manmeri bilong lus i givim pen wanpela narapela

Planti manmeri i save tok: «Sapos mi go long hel, orait mi bai i stap wantaim planti pren bilong mi na planti arapela manmeri». Na mi tokim ol olsem: Yu longlong tumas! Yu no save long wanpela samting! Olgeta manmeri i stap long hel i save tok olsem: «Sori long mi! Mi laik i stap wanpis, tasol planti spirit nogut na planti manmeri nogut i stap wantaim mi!». **Long hel olgeta manmeri i save krai nogut tru na singaut strong oltaim, olsem na ol manmeri i save harim, na pen bilong ol i kamap bikpela moa yet.** Bai mi givim wanpela tok piksa: sapos long nait wanpela dok i wok long singaut strong oltaim, yu bai i les long harim dispela dok, o nogat? Yes! Yumi olgeta i save les long harim ol dok i singaut long nait, long wanem yumi laik slip. Na sapos wanpela pikinini i wok long krai long nait oltaim na yu no inap long

slip, yu bai i les long harim dispela pikinini o nogat? Yes, long wanem yu laik i slip, tasol dispela pikinini i wok long krai na mekim nois oltaim. **Orait, long hel ol manmeri bai i singaut nogut tru oltaim, olsem na ol singaut bilong ol bai i bagarapim stret yau bilong yu!** I no wanpela nait tasol ol bai i singaut. I no 10-pela nait tasol ol bai i krai. Nogat. **Ol bai i krai na singaut strong inap oltaim oltaim.** Bai i no gat wanpela minit we ol bai i pasim maus bilong ol. Nogat. Oltaim yu bai i harim ol singaut bilong ol, na yu bai i no inap long ranawe.

Narapela samting nogut bilong hel i olsem: **bodi bilong ol manmeri bilong sin bai i smel nogut tru, na smel bilong ol i winim tru smel nogut bilong ol manmeri i dai pinis.** Profet Aisaia i tok: *Na bodi bilong ol, bai ol man i no inap planim. Nogat. Bai ol i stap sting nabaut long graun na ples bai i smel nogut tru* (34:3). Buk Baibel yet i tok olsem bodi bilong ol manmeri bilong lus bai sting na smel nogut tru.

Narapela samting nogut i olsem: **olgeta manmeri bilong lus bai i stap wantaim na givim pen wanpela narapela,** wankain olsem ol man i save krungutim ol pikinini wain long bikpela tang ston bilong mekim wain. Buk Baibel i tok: *Em bai i krungutim ol pikinini wain long bikpela tang ston i makim bikpela belhat bilong God I Gat Olgeta Strong* (Revelesen 19:15). Olsem na ol manmeri long hel i no inap muv na go long hap o long hap. Nogat. Ol bai i stap wantaim tasol, wankain olsem ol manmeri bung bilong ol i dai pinis, na ol i no

inap long muv liklik. Sapos wanpela man i pundaun long hel long baksait bilong em, orait em bai i stap olsem inap oltaim oltaim. Na sapos narapela i pundaun long het bilong em, orait wankain samting bai i kamap long em. Long wanem posisen wanpela man o meri i pundaun long hel, long dispela posisen tasol em bai i stap inap oltaim oltaim. Ol manmeri long hel i no inap helpim wanpela narapela liklik, long wanem ol i no inap muvim han o lek bilong ol. Na ol bai i stap olsem inap oltaim oltaim.

O sin nogut, yu save giamanim planti manmeri! **Plant i amamas long mekim sin, tasol bihain yu save pulim ol i go long hel!** Ol manmeri i olsem ol aipas i no inap lukim wanpela samting! **Ol i save bisi na wari long ol samting bilong graun, tasol ol i lustingting long eterniti.** Plant i save wok hat bilong winim mani o bilong kisim biknem long ai bilong ol narapela manmeri, tasol i no plant i save wok hat bilong sevim sol bilong ol! Sapos yu lusim olgeta samting bilong graun tasol yu sevim sol bilong yu, orait God bai i givim pe long yu i winim tru dispela graun wantaim olgeta gutpela samting i stap long em. Tasol sapos yu lusim sol bilong yu, orait i no gat wanpela samting i ken helpim yu. Jisas yet i tok: *«Sapos wanpela man i kisim olgeta samting bilong graun, tasol laip bilong em yet i lus, orait dispela olgeta samting bai i helpim em olsem wanem?»* (Matyu 16:26).

O God bilong mi! Givim save long mekim bai mi no ken mekim rong gen. No ken lusim mi nau. Plant i taim mi bin givim sol bilong

mi long Satan, long wanem mi bin givim amamas long bodi bilong mi, olsem na mi lusim grasia bilong yu. Mi sori tumas, gutpela God bilong mi! Mi laikim yu, olsem na mi no laik lusim yu gen.

O Maria, yu Mama bilong God! Helpim mi long abrusim hel! Helpim mi long abrusim ol sin!

70

Bikpela sori bilong ol manmeri i stap long hel

Ol manmeri bilong lus i stap long hel i save krai na sori long 3-pela samting.

Namba wan samting em i olsem: ol manmeri bilong lus i save krai na sori, long wanem ol i luksave olsem ol sin ol i bin mekim i bin givim liklik amamas tasol long ol, na ol dispela sin i bin mekim ol i lusim amamas bilong oltaim long heven. Taim wanpela man o meri i mekim mortal sin, orait amamas em i kisim long sin i save stap hamaspela taim? Liklik taim tasol, na dispela amamas i pinis. Yu givim amamas long bodi bilong yu, na dispela amamas bai i stap sampela minit tasol, na bihain em bai i pinis... na yu bai i lusim sol bilong yu. Ol man na meri klostu i laik i dai, i save tok olsem dispela laip i save pinis hariap. Maski ol i bin stap laip 50-pela o 60-pela yia, ol i save tok

olsem laip i go hariap. Orait sapos yu bin kisim olgeta amamas bilong graun inap long 60-pela krismas bilong yu na bihain yu dai, eterniti bilong yu bai i olsem wanem? 60-pela yia em i samting nating, long wanem eterniti bai i stap oltaim oltaim. Sapos yu go long hel, yu bai i stap long em 100 milion yia, na bihain long ol dispela yia, ol bai i tokim yu olsem: «Nau tasol eterniti i bigin». Na yu bai i singaut strong olsem: «Mi longlong tumas! Amamas bilong sin mi bin mekim i bin stap liklik taim, na eterniti bai i stap inap oltaim oltaim! **Sori long mi! 10-pela minit bilong amamas bilong graun i pulim mi long i stap inap oltaim oltaim long paia bilong hel!** God i lusim mi pinis, long wanem mi lusim em pastaim na mi mekim sin!».

O God bilong mi! Mi tenkim yu, long wanem indai i no bungim mi yet! Marimari long mi!

Namba tu samting em i olsem: ol manmeri bilong lus i save krai na sori, long wanem ol i luksave olsem em i bin isi long bihainim Jisas, tasol ol i bin les, na nau ol i no inap long stretim ol rong ol i bin mekim. Ol manmeri bilong lus i save tok: «Taim mi stap yet long graun mi sapos long konpes tasol, tasol mi bin les! Mi sapos long beten tasol, tasol mi bin les! Mi sapos long abrusim ol sin tasol, tasol mi bin les! Em i bin isi long tanim bel, tasol mi bin les! Olsem na nau mi i stap long hel inap oltaim oltaim! **Jisas i no bin askim planti samting long mi, tasol mi bin les long harim ol singaut bilong em!** Mi bin sapos long sevim sol bilong mi, tasol nau

em i leit tumas. **Planti taim God i bin singautim mi long tanim bel, tasol mi bin givim eskus long em!** Nau i no gat marasin bilong oraitim dispela rong bilong mi». Sori tumas long ol manmeri bilong lus! Long ol hel ol i save singaut strong olsem: «**Mi longlong tumas! God i bin givim sans long mi long stap amamas inap oltaim oltaim, tasol mi bin les long harim em. Nau mi bai i stap long dispela paia inap oltaim oltaim!**».

O Jisas bilong mi! Marimari long mi na pogivim mi hariap! Mi laikim yu, long wanem yu olgeta gutpela samting bilong mi. Mi sori long ol sin mi bin mekim.

Namba tri samting em i olsem: ol manmeri bilong lus i save krai na sori, long wanem ol i luksave olsem ol i lusim God long rong bilong ol yet, long wanem ol i bin mekim sin long laik bilong ol yet. Long hel ol i luksave olsem God i bin pulapim ol long planti grasia, na em i bin sinagutim ol planti taim. Ol i lukim Pen na Indai bilong Jisas, na ol i luksave olsem Jisas i bin laikim ol tumas. Ol i tingim ol sakramen ol i bin kisim taim ol i liklik pikinini. Na tu ol i tingim bikpela lespasin bilong ol, long wanem long lespasin bilong ol yet, ol i bin lusim ol sakramen, na ol i no bin wari liklik long Jisas. Olsem na ol i singaut strong olsem: «**Mi lus pinis! Pen na Indai bilong Jisas i no inap helpim mi moa! Ol prea bilong santu Maria tu i no inap helpim mi! Ol santu tu i no inap long mekim wanpela samting bilong helpim mi! Olgeta hop bilong mi i lus pinis!**».

O God bilong mi, sapos mi bin dai wantaim ol sin bilong mi bilong bipo, orait mi sapos long go stret long hel. Yu mas lustingting long ol sin mi bin mekim, na mi askim yu long givim grasia long mi. Mi laikim yu tumas, na mi laik bihainim yu inap long las de bilong laip bilong mi.

O Maria, yu save helpim mi long prea bilong yu! Yu mas askim Jisas long pogivim mi.

Jisas na Maria

71

Jisas i dai bilong kisim bek yumi

Dispela stori bilong God I Strong Olgeta i bin kamap man na i dai bilong kisim bek ol manmeri, em i tru o nogat? **Yes, em i tru olgeta!** Tasol tingting bilong yumi i liklik tumas, olsem na yumi no inap long save gut long dispela bikpela marimari bilong em! Bilip bilong yumi i tok klia olsem: ***Krais i bin laikim yumi tru na givim laip bilong em yet bilong helpim yumi*** (Efesus 5:2). Sampela yia i go pinis God I Strong Olgeta i bin hangamap long diwai kros, na em i bin givim laip bilong em bilong kisim bek yumi. **Na olsem wanem em i mekim olsem? Em i mekim olsem long wanem em i laikim yumi tumas.** Olsem na yumi ol kristen manmeri i bilip long Jisas i mas laikim em tumas wantaim olgeta strong bilong yumi.

Yes, Bikpela, mi bilip long yu na long bikpela sakrifais yu bin mekim long Pen na Indai bilong yu. Tasol laik bilong mi i go long yu

em i liklik tumas, na tu mi bin mekim sin planti taim. Olsem na mi askim yu: tingim Pen na Indai bilong yu, na pogivim mi. Mi no laik mekim sin moa. Nogat. Mi laik pas wantaim yu tasol.

Na yumi mas save gut olsem: God i bin gat planti rot bilong kisim bek yumi. Wanpela liklik blut bilong em, em i inap long kisim bek yumi. Na sapos em i pre tasol, dispela pre bilong em tu bai inap long kisim bek yumi. **Tasol long bikpela laik bilong em i kam long yumi, em i laik hangamap long diwai kros, bai laik bilong em i ken kamap ples klia long yumi.**

Dia Jisas, yu bin laik dai long diwai kros bilong soim laik bilong yu i kam long mi! Santu Bonaventura i tok: **«God bilong mi, olsem wanem na yu laikim mi tumas i go inap long indai bilong yu? Mi wanem samting?»**. O gutpela wasman bilong mi! Mi olsem wanpela sipsip i lus, na yu kamap man bilong painim mi. Planti taim mi bin ranawe long yu, tasol yu no bin lustingting long mi. Planti taim yu bin singautim mi long kam bek long yu. Olsem na nau mi tingim Pen na Indai bilong yu, na mi tokim yu: Jisas, mi laik kam bek long yu. Mi no laik i stap longwe long yu moa. Jisas, yu lewa bilong mi! Mi laikim yu tumas, na mi sori long ol sin bilong mi.

Santu Bernard i tingim Pen na Indai bilong Jisas na i tok: «O Ridima bilong mi! Yu bin mekim wanem rong na ol i hangamapim yu long diwai kros? Yu no bin mekim wanpela rong. Yu gut olgeta na yu santu olgeta, long wanem yu yet yu God». Na Jisas i bekim tok bilong em olsem: **«Mi no bin mekim wanpela rong, tasol yu**

bin mekim planti sin, olsem na mi dai bilong pogivim ol sin bilong yu. Olsem na mi no dai long wanem Ponsias Pailat i givim mi long han bilong ol soldia. Nogat. Mi dai long wanem yu bin mekim sin».

O dia Ridima bilong mi! Mi tingim Pen na Indai bilong yu, na mi krai sori! Mi no krai sori long wanem mi sapos long go long hel. Nogat. **Mi krai sori long wanem mi yet i bin hangamapim yu long diwai kros.** O God bilong mi, yu hangamap long diwai kros! Long tude inap long las de bilong laip bilong mi, mi laik pas wantaim yu tasol. Helpim mi, long wanem mi wik tumas na planti taim mi laik mekim sin. Givim grasia long mi, bai mi ken i stap gut.

Maria, yu Mama bilong mi! Helpim mi long laikim Jisas wantaim olgeta strong bilong mi. Mi mangal long Jisas, tasol.

72

Jisas i hangamap long diwai kros

Bilip bilong yumi i tok: **Pikinini bilong God i kamap man na i dai long diwai kros.** Yes, bilip bilong yumi i tok olsem! God Papa I Strong Olgeta i bin salim Pikinini bilong em i kam long graun bilong kisim bek yumi. **Na ol i bin paitim em nogut tru, spetim em, wikipim em na nilim em long diwai kros.** Yes, bilip bilong yumi i tok olsem. Taim Jisas i kamap narakain long maunten Tabor, Moses na Elaija i toktok long bikpela laik bilong Jisas i kam long yumi. Gutnius i tok: *Tupela i kamap wantaim lait bilong God, na tupela i toktok long ol samting Jisas bai i mekim long Jerusalem, na em bai i lusim dispela graun na i go* (Luk 9:31). **Jisas em i God yet, na em i bin hangamap long wanpela kruse! Em i God yet, na em i bin dai!** Em yet i bin kamapim heven na graun na olgeta samting i stap long em, tasol em i daunim em yet i go inap long em i dai long diwai kros.

O gutpela Ridima bilong mi! Mi no inap long bekim dispela bikpela pasin bilong i dai bilong yu! Nogat. God tasol inap long bekim, long wanem mi man nating na yu God tru. Na sapos mi kapsaitim olgeta blut bilong na i givim laip bilong mi, orait dispela sakrifas bilong mi tu bai i no inap.

Olsem na yumi mas tingting long Pen na Indai bilong Jisas na laikim em tumas! Jisas i mangal long givim laip bilong em bilong kisim bek yumi. **Em i laikim yumi tumas inap long em i mangal long kapsaitim blut bilong em bilong helpim yumi.** Jisas yet i tok: *«Mi mas kisim wanpela kain baptais. Nau mi no kisim yet, na bel bilong mi em i hevi tru»* (Luk 12:50). Dispela baptais Jisas i toktok long em, em i Pen na Indai bilong em. Na dispela tok bilong Jisas em i olsem Jisas i tok: *«Mi mas kisim baptais long blut bilong mi. Yes, long wanem blut bilong mi bai i tekewe ol sin bilong olgeta manmeri. Olsem na bel bilong mi i hevi tru, long wanem mi laik bai dispela baptais i kamap hariap».* **O sol bilong mi! Lukim Jisas i hangamap long diwai kros!** Lukim blut bilong Jisas i kapsait long graun! Lukim ol sua bilong em! Ol sua bilong em i singautim yu olsem: *«Kam long mi!»*. Jisas i dai bilong soim laik bilong em i go long yu, olsem na yu mas laikim em tru wantaim olgeta strong bilong yu.

O gutpela Jisas! Yu no bin les long givim blut na laip bilong yu long mi, olsem na mi no laik les long givim olgeta samting bilong mi long yu. Yu bin givim yu yet olgeta long mi, olsem na mi laik givim mi yet olgeta long yu.

Santu Pol i tok: ***Krais i bin givim bel bilong em long mipela, na dispela i save kirapim mipela long wok, long wanem, mipela i save pinis olsem, wanpela man i bin kisim ples bilong yumi olgeta na i dai*** (2 Korin 5:14). Na santu Fransis bilong Sales i tok: «Taim yumi tingim Pen na Indai bilong Jisas yumi mas tingim olsem, **dispela man i hangamap long diwai kros em i God yet!** Na Pen na Indai bilong em i mas kamap olsem wanpela rop i pasim yumi long em. Olsem na yumi mas laikim Jisas wantaim olgeta strong bilong yumi, na tingim oltaim Pen na Indai bilong em. Goan! Yumi givim yumi yet long Jisas! Maski sapos yumi mas mekim planti sakrifais na yumi mas i dai! **Yumi mas givim yumi olgeta long em, long wanem em i bin hangamap bilong helpim yumi.** Em i bin givim em yet olgeta long yumi, olsem na yumi mas givim yumi yet long em. Yumi mas pas wantaim em oltaim. O Jisas, yu lewa bilong mi! Sol bilong mi i mangal long yu tasol».

Maria, yu Mama bilong God, helpim mi long givim mi yet olgeta long Jisas.

73

Pen na Indai bilong Jisas i kirapim laik bilong yumi

Jisas yet i tok olsem em i kam long graun bilong kirapim paia bilong laikim pasin insait long lewa bilong ol manmeri. Na em i laik bai dispela paia i lait hariap. Em i tok: «***Mi bin kam bilong tromoi paia long graun, na mi laikim tumas bai dispela paia i lait hariap***» (Luk 12:49). Planti manmeri i bin tingting long Pen na Indai bilong Jisas, na paia bilong laikim pasin i lait tumas insait long lewa bilong ol! Olsem na ol i bin lusim olgeta samting bilong ol, na i givim ol yet long Jisas. Jisas i bin givim laip bilong em long yumi, olsem na em i no inap long mekim wanpela samting moa bilong soim laik bilong em i kam long yumi. **Taim Jisas i givim laip bilong em long yumi, em i givim olgeta samting bilong em long yumi.** Santu Fransis bilong Pola i tingting long indai bilong Jisas na i singaut strong: «O laikim pasin bilong Jisas! O laikim pasin bilong Jisas!».

O God bilong mi! Olsem wanem na planti manmeri i no save wari liklik long sakrifais bilong Jisas long diwai kros? Olsem wanem na planti i no save tingting long Pen na Indai bilong em? O brata na susa bilong mi! Sapos wanpela man nating i bin givim laip bilong em bilong helpim yu, mi ting olsem yu bai i laikim em na tingim em oltaim. **Orait olsem wanem na yu no save tingim Jisas?** O God bilong mi! Na dispela man i hangamap long diwai kros em i husat tru? Dispela man i hangamap em i dispela God tasol i bin kamapim mi, na nau em i dai bilong kisim bek mi. Mi lukim diwai kros bilong Jisas, na mi lukim rop i gat nil i bin sutim het bilong em, na mi lukim ol nil i bin sutim han na lek bilong em, na mi harim olsem ol dispela samting i singaut strong long mi olsem: «Yu mas laikim mipela! Yu mas laikim mipela!».

Santu Fransis bilong Asisi i tok: **«Mi laik i dai bilong laikim yu, dia Jisas bilong mi, long wanem yu bin dai bilong laikim mi»**. Tasol sapos yumi i dai bilong soim laik bilong yumi i go long Jisas, orait dispela sakrifais bilong yumi bai i no inap long bekim sakrifais bilong em. Na sapos yumi i dai tausen taim, dispela tu bai i no inap. Tasol Jisas i no laik bai yumi dai. Nogat. **Jisas i laik bai yumi givim lewa bilong yumi long em**. Tasol em i no laik bai yumi givim wanpela liklik hap bilong lewa bilong yumi. Nogat. Em i laikim olgeta lewa bilong yumi. **Jisas i laik kamap papa na masta bilong lewa bilong yumi**, na em i les long serim lewa bilong yumi wantaim ol samting bilong graun. Long dispela as tasol santu Pol i tok: ***Krais***

tu i dai na i kisim laip gen bai em i ken i stap Bikpela bilong ol man i dai pinis na bilong ol man i stap laip (Rom 14:9).

O dia Ridima bilong mi! Mi no laik lustingting gen long yu. Mi no laik tingting moa long ol samting bilong dispela graun. Mi lukim yu i hangamap long diwai kros na mi laik givim mi yet olgeta long yu tasol. Na tu mi no ken lustingting olsem ol sin bilong mi i bin kilim yu i dai. O Jisas bilong mi! Helpim mi, long wanem mi mangal long yu tasol. Strongim mi long bihainim yu gut.

O Maria, yu hop bilong mi! Helpim mi long prea bilong yu.

74

Ol nil bilong Jisas i mas sutim lewa bilong yumi

Santu Bernard i tok: «Ol sua bilong Jisas i gat strong bilong mekim malumalum lewa bilong ol manmeri lewa bilong ol i strong olsem ston. Pen na Indai bilong Jisas i gat strong bilong laitim paia insait long lewa bilong ol manmeri lewa bilong ol i kol». Na dispela tok bilong santu Bernard i tru olgeta, long wanem **sapos yu tingim Pen na Indai bilong Jisas, orait paia laikim pasin bai i lait insait long lewa bilong yu, na yu bai i laikim em tru.** Ol i solapim Jisas, na yu bai i les long laikim em? Ol i wipim em na paitim em nogut tru, na yu bai i les long laikim em? Ol i putim rop i gat nil long het bilong em, na yu bai i les long laikim em? Ol i nilim em long diwai kros na em i dai, na yu bai i les long laikim em? Oltaim santu Fransis i tingting long dispela samting na i krai sori olsem: **«Jisas i laikim yumi, tasol i no planti manmeri i laikim em!».**

O Jisas bilong mi, mi tu i no save laikim yu tumas! Planti yia pinis mi stap yet long dispela graun, na mi no bin givim mi yet olgeta long yu. Tasol mi no laik i stap longwe long yu inap oltaim. Nogat. Nau tasol mi laik givim mi yet olgeta long yu. Kisim mi olsem samting bilong yu, na helpim mi oltaim.

Long de bilong tingim Ol 7-pela sori bilong santu Maria, long taim bilong misa ol pris i save tok: «Lukim! Lukim God bilong yu! Em i pulim win pinis, na em i dai nau. Het bilong em i daun na i slip long bros bilong em. Na tupela han bilong em i op. Na sait bilong em ol i sutim long spia». Lukim! Jisas i dai bilong soim bikpela laik bilong em i go long yu. **Em i opim tupela han bilong em bilong holimpasim yu. Em i daunim het bilong em bilong givim kis long yu. Na sait bilong em i op, long wanem em i laik givim hat bilong em long yu.**

Yes, Jisas, mi laik laikim yu tru! Yu lewa bilong mi! Yu olgeta gutpela samting bilong mi! Yu God bilong mi na yu bin dai bilong kisim bek mi, olsem na mi laik givim lewa bilong mi long yu tasol!

Santu Pol i tok: ***Krais i bin givim bel bilong em long mipela, na dispela i save kirapim mipela long wok, long wanem, mipela i save pinis olsem, wanpela man i bin kisim ples bilong yumi olgeta na i dai*** (2 Korin 5:14). O Ridima bilong mi! Yu bin dai bilong kisim bek ol manmeri, tasol planti bilong ol i wok long givim baksait yet long yu! O sori tumas long ol! Ol i no wari liklik long Pen na Indai bilong yu, olsem na ol i no save laikim yu. Tasol sapos ol i kisim save long indai

bilong yu, mi ting olsem ol tu bai i laikim yu. Santu Fransis bilong Sales i tok: «**Taim yumi tingim Pen na Indai bilong Jisas yumi mas tingim olsem, dispela man i hangamap long diwai kros em i God yet!** Na Pen na Indai bilong em i mas kamap olsem wanpela rop i pasim yumi long em. Olsem na yumi mas laikim Jisas wantaim olgeta strong bilong yumi, na tingim oltaim Pen na Indai bilong em».

O dia Sevia bilong mi! Bipo mi bin lustingting long Pen na Indai bilong yu, tasol nau mi laik pas wantaim yu inap oltaim. Mi laikim yu moa long mi save laikim mi yet. Mi sori tru long olgeta taim mi bin givim pen long yu long ol sin bilong mi. O Jisas bilong mi, marimari long mi! Helpim mi long laikim yu tru. Kisim lewa bilong mi olsem samting bilong yu yet. Mi laik mangal long yu tasol.

O Maria, yu Mama bilong mi, helpim mi long laikim Jisas.

75

Indai bilong Jisas

O bikipela misteri! God I Strong Olgeta i dai bilong kisim bek ol manmeri! **Em i kamapim yumi ol manmeri, na bihain em i givim laip bilong em na i dai bilong helpim yumi!** Em i hat tru long bilipim dispela samting, tasol bilip bilong yumi i tok olsem, olsem na yumi i bilip. Kaunsil bilong Nisea i tok: «Mi bilip long Jisas Krais, em i wanpela tasol i Pikinini bilong God. Ol i nilim em long diwai kros bilong kisim bek yumi. Em i karim pen, em i dai na ol i planim em».

Sapos ol kristen manmeri i bilipim dispela samting, orait olsem wanem na i no planti kristen manmeri i save laikim Jisas tru? Mi tu i wanpela bilong ol, na mi no save laikim yu tumas, gutpela Ridima bilong mi! Mi no laikim yu tumas, na tu planti taim mi bin tingting long amamas bilong graun tasol, na mi bin mekim sin. Planti taim pinis mi lusim grasia bilong yu.

O Bikpela na God bilong mi! Olsem wanem na planti taim mi no bin wari liklik long Pen na Indai bilong yu? Olsem wanem na planti taim mi bin givim baksait long yu? Yu, gutpela Sevia bilong mi, yu bin lusim heven na i kam long graun bilong kisim bek ol manmeri i lus. Yu yet i tok: «***Pikinini Bilong Man i kam bilong painim ol man i lus na kisim bek ol***» (Luk 19:10). Olsem na mi trastim yu, Jisas, long wanem yu bin kam bilong painim mi.

Yes, Jisas bilong mi, mi hop long yu bai i pogivim ol sin bilong mi. Yu mas tingim Pen na Indai bilong yu, na marimari long mi.

Taim mi tingim ol sin mi bin mekim long yu, Jisas, mi laik i dai! Mi pilim bikpela sori tru, olsem na mi laik givim laip bilong mi, bilong givim amamas long yu. Mi laik stretim ol rong mi bin mekim, dia Jisas. Yu tok tasol, na bai mi bihainim gut ol tok bilong yu. Mi laik tingim oltaim Pen na Indai bilong yu, na dispela tingting bai i helpim mi long abrusim ol sin.

God i bin dai bilong kisim mi! Mi no mangal long narapela samting moa! Nogat! Mi mangal long yu tasol, God bilong mi! Na lewa bilong mi em i bilong yu tasol.

Jisas bilong mi, mi no laik givim mi yet olgeta moa long ol samting bilong dispela graun. Yu bin laikim mi tumas, olsem na nau mi tingting long yu tasol. **Plantu taim mi bin mekim sin, olsem na yu gat olgeta rait long lusim mi. Tasol mi lukim yu na mi luksave olsem yu laikim mi tumas.** Yu no save tait long singautim mi long tanim bel. Oltaim yu save wetim mi, dia Jisas. Olsem na nau mi laik

senisim ol pasin nogut bilong mi, na mi laik givim mi yet olgeta long yu. Laik bilong mi i go long yu i liklik tumas, tasol mi askim yu long helpim mi, bai em i ken gro na i kamap bikpela moa moa yet. Mi laikim yu, gutpela Ridima bilong mi. Yu lewa bilong mi. Yu olgeta gutpela samting bilong mi.

O Maria, yu hop bilong mi! Yu mas pre long Pikinini bilong yu na helpim mi.

76

Indai bilong Jisas i kisim bek yumi

Bihain long sin bilong Adan, God i lukim olgeta manmeri bilong graun i lus pinis, olsem na em i marimari long ol. Tasol em i no inap long marimari nating long ol. Nogat. Stretpela pasin bilong em i tok: «**Sakrifais. Yes, wanpela sakrifais i mas i kam pas**». God i laik stretim ol rong bilong ol manmeri wantaim wanpela sakrifais, tasol ol manmeri i olsem samting nating long ai bilong em, olsem na ol i no inap long ofarim wanpela gutpela sakrifais. Olsem na God i mekim wanem samting? Em i salim Pikinini bilong em i kam long graun na i kamap man, na God i bin putim olgeta sin bilong yumi antap long em. Buk Baibel i tok: ***Em i bin mekim wokman bilong em i karim ol dispela pen yumi yet i mas karim*** (Aisaia 53:6). Ol manmeri bilong graun i no inap long mekim gutpela sakrifais bilong daunim belhat bilong God, tasol Pikinini bilong em i inap, long wanem em tu i God. Na long dipela sakrifais

bilang Pikinini bilang God, orait God i kisim bek ol manmeri.

O God bilang oltaim! Yu bin givim Pikinini bilang yu yet long mipela, na mipela i kilim em i dai! Dispela wanpela Pikinini yu laikim em tumas, yu givim long mipela, long wanem yu laikim mipela tumas! Tasol planti taim mi no save tingting long dispela, na mi save go het long ol sin bilang mi. **O God Papa, tingim Pen na Indai bilang Pikinini bilang yu, na marimari long mi.** Mi sori tru long ol sin mi bin mekim, olsem na mi laik senisim ol pasin nogut bilang mi. Strongim mi, bai mi ken laikim yu wantaim olgeta strong bilang mi.

Na taim God Papa i lukim Pikinini bilang em i karim pen, em i no marimari long Pikinini. Nogat. Em i larim Pikinini i go het long Pen na Indai bilang em inap long indai bilang em. Wanpela liklik sakrifais bilang Jisas bai inap long tekewe ol sin bilang olgeta manmeri, tasol God Papa i laik bai Jisas i mekim sakrifais inap long indai bilang em. Profet Aisaia i tok: ***Bikpela yet i bin daunim wokman bilang em na mekim em i karim pen, long wanem... wokman i givim laip bilang em yet olsem ofa bilang rausim sin bilang ol manmeri*** (53:10). God Papa i laikim yumi tumas, olsem na em larim Pikinini stret bilang em i karim bikpela pen bilang helpim yumi. Olsem na ol i bin wipim dispela wanpela Pikinini, ol i bin putim rop i gat nil long het bilang em, na ol i bin nilim em long diwai kros, na em i bin hangamap long diwai kros inap long em i pulim las win bilang em.

O Bikpela! Sapos Katolik bilip i no tokim mi olsem mi mas bilipim dispela samting, mi bai i no inap! Bikpela samting tumas! Gutpela God bilong mi, helpim mi long tenkim yu oltaim long Pen na Indai bilong Pikinini bilong yu. Givim lait long mi, bai mi ken save gut long dispela sakrifais Jisas i bin mekim bilong kisim bek mi. Na givim strong tu, bai mi ken bihainim em gut inap long las de bilong laip bilong mi. Tingim Pikinini bilong yu, na givim lait na strong long mi.

Lukim Jisas! Em i no gat wanpela rong na em i klin olgeta, tasol em i laik karim bikpela pen bilong inapim laik bilong Papa bilong em. **Jisas i laik karim pen bilong tekewe ol sin bilong yumi, long wanem em i save pinis olsem dispela sakrifais bilong em bai i kisim bek yumi.** Olsem na Jisas i daunim em yet olgeta, bai yumi ken lukim em na luksave long bikpela laik bilong em i kam long yumi. Olsem na Jisas i no les long i dai long diwai kros, long wanem laik na daun pasin bilong em i mas kamap ples klia. Santu Pol i tok: ***Em i daunim em yet na i bihainim tok bilong God, i go inap long em i dai, yes, inap long em i dai long diwai kros*** (Filipai 2:8).

O naispela Sevia bilong mi! Mi laik toktok wantaim Heseia olsem: ***«Yu bin laikim mi tumas na yu no bin larim mi i go long ples bilong ol man i dai pinis. Na yu bin lusim tingting olgeta long ol sin bilong mi»*** (Aisaia 38:17). Ol sin bilong mi i sapos long pulim mi i go long hel, tasol yu bin pogivim mi long Pen na Indai bilong yu. Mi bin givim baksait planti taim long yu, tasol yu bin karim ol sin

bilong mi long diwai kros. Olsem na nau mi no laik mekim sin gen. Nogat. Gutpela Jisas bilong mi, yu lewa bilong mi! Mi sori long ol pen mi bin givim long yu. Mi laik givim mi yet olgeta long yu nau. Helpim mi long stap wantaim yu inap long las de bilong laip bilong mi, long wanem mi no laik lusim yu gen.

O santu Virgo Maria, yu Mama bilong mi! Yu mas pre long Pikinini bilong yu, bai em i ken kisim mi olsem samting bilong em yet.

77

Lem bilong God i laik i dai bilong tekewe ol sin bilong yumi

Taim Jon bilong Baptais i lukim Jisas i wokabaut i kam long em, em i singaut strong olsem: «**Lukim. Em i Lem bilong God. Em i kam bilong rausim sin bilong olgeta manmeri bilong graun**» (Jon 1:29). Jon i kolim Jisas «Lem», long wanem em i save pinis olsem Jisas i mas kapsaitim blut bilong em olsem sakrifais bilong tekewe ol sin bilong yumi.

Nau yumi lukim Jisas i sanap long kot bilong Ponsias Pailat! Em i luk olsem wanpela pikinini sipsip, long wanem em i stap isi na em i no opim maus bilong em. Ol i paitim em nogut tru, ol i wipim em na putim rop i gat nil long het bilong em. **Tasol Jisas i no opim maus bilong em.** Dispela tok profet bilong Aisaia i kamap ples klia: ***Ol man i bin mekim nogut long dispela wokman, tasol em i daunim em yet na karim pen. Na em i no bin mekim wanpela tok. Em i pasim***

maus olsem pikinini sipsip ol i kisim i go bilong kilim (53:7). Jisas i no opim maus bilong em. Em i no komplein. Em i no mekim wanpela tok. Long wanem, long laik bilong em yet em i laik karim pen bilong kisim bek yumi.

O yupela, ol ensel bilong God, yupela tu i mas singsing amamas long Jisas! O gutpela Ridima bilong mi, marimari na laik bilong yu i no gat pinis! Yu laikim mipela ol manmeri tumas, i go inap long indai bilong yu. **Mipela i bin mekim sin, tasol yu stretim dinau bilong mipela.**

Lukim! Nau ol i pasin Jisas long rop, na ol i pulim em i go long Kalvari. Na long dispela ples stret, bikpela sakrifais bilong tekewe ol sin bilong ol manmeri bai i kamap! Profet Jeremaia i gat tok profet olsem: *Mi olsem wanpela pikinini sipsip ol man i bringim i go bilong kilim i dai* (11:19).

O Jisas bilong mi! Ol dispela lain nogut i pulim yu i go we? Na yu bai i bekim tok bilong mi olsem: «**Ol i pulim mi i go long indai bilong mi. Tasol mi no les. Mi amamas long givim laip bilong mi bilong kisim bek yu. Pen na Indai bilong mi i soim laik bilong mi i go long yu**». Na mi Jisas? Olsem wanem na mi no save laikim yu tumas? Mi save bagarapim yu moa yet long ol sin bilong mi. Planti taim mi bin lusim grasia bilong yu na mi bin givim baksait long yu. Tasol nau mi sori, gutpela Jisas! Yu lewa bilong mi! Mi laikim yu tumas!

I gat stori bilong santu Fransis bilong Asisi i olsem: olgeta taim em i lukim wanpela sipsip ol i karim bilong kilim em i dai, em i save

tingim Jisas na i krai sori olsem: «Wankain olsem ol dispela man i karim dispela sipsip bilong kilim em i dai, wankain olsem tasol ol bin karim Bikpela bilong mi bilong kilim em i dai».

O Jisas bilong mi! Yu no bin les long givim laip bilong yu bilong helpim mi, olsem na mi no laik les long givim laip bilong mi long yu. Yu laikim wanpela samting tasol: yu laik long mi givim lewa bilong mi long yu. Yu yet i tok: «***Yupela i mas laikim God, Bikpela bilong yumi... long bel bilong yupela na long spirit bilong yupela na long tingting bilong yupela***» (Matyu 22:37). Na mi mangal long dispela samting tasol, Jisas. Mi laik givim mi yet olgeta long yu. Mi no laikim narapela samting. Nogat. Mi laikim yu tasol. Mi sori tumas long ol sin mi bin mekim. O gutpela Lem bilong God! Mi givim mi yet olgeta long yu nau. Kisim mi, dia Jisas, olsem samting bilong yu yet, na strongim mi long grasia bilong yu.

O Maria, yu Mama bilong Sevia bilong mi! Helpim mi long prea bilong yu.

78

Pen na Indai bilong Jisas i stretim dinau bilong yumi

Profet Aisaia i kolim Jisas «**Man bilong karim pen**». Profet i tok: *Bikpela i bin larim wokman bilong em i kamap olsem wanpela diwai nating i save kamap long ples drai. Dispela wokman i no gat nem, long wanem, em i no luk nais liklik long ai bilong ol man. **Em i man bilong karim pen.** Na em i no gat wanpela gutpela samting bilong mekim ol man i lukim em na laikim em. Ol man i bin givim baksait long em na rabisim em na ol i no laikim em tru. **Oltaim em i bin pulap long sori na ol kain kain hevi.** Na ol man i no save laik lukim em, na ol i save haitim pes bilong ol. **Na ol i givim baksait olgeta long em.** Na yumi bin lukim em olsem man nating (53:2-3).*

Yes, Jisas em i «Man bilong karim pen», long wanem long taim em i liklik bebi yet i go inap long indai bilong em long diwai kros, oltaim em i bin karim pen. Jisas i bin kisim olgeta sin bilong yumi na putim long sol

bilong em, olsem ol man i save karim ol samting. **Em i tru olsem Jisas inap long kisim narapela rot bilong kisim bek yumi, long wanem em i God na em i inap long mekim olgeta samting.** Wanpela prea bilong em bai inap long stretim dinau bilong yumi na kisim bek yumi. **Tasol nogat. Em i laik karim pen.** Na long dispela as tasol, laip bilong em i pulap long kain kain pen long taim em i liklik bebi yet i go inap long indai bilong em. Em i laik i stap olsem rabisman na las man tru. Profet Aisaia yet i tok: *Na yumi bin lukim em olsem man nating* (53:3).

O Jisas bilong mi! Olgeta manmeri i givim baksait long yu na haitim pes bilong ol! Yu laik i stap olsem man nating, long wanem mi bin mekim sin! Sori long yu, dia Jisas! Mi no laik mekim sin moa! Mi sori tumas long ol pen mi bin givim long yu!

O God bilong mi! **I gat narapela man o meri i bin karim pen wankain olsem Jisas? Nogat tru!** Em i tru olsem planti manmeri i save karim pen, tasol pen bilong Jisas i winim tru pen bilong ol. Ol manmeri i karim pen i save painim alivim long pen bilong ol, tasol Jisas nogat. **Em i no painim alivim long pen bilong em.** Na em i bin karim bikipela pen long taim santu Maria i karim em inap long taim ol i hangamapim em long diwai kros. Yes! Oltaim Jisas i bin stap olsem rabisman na las man tru, olsem na long dispela as Profet Aisaia i kolim em «Man bilong karim pen». Yes, Jisas em i «Man bilong karim pen», long wanem i no gat narapela man o meri i winim Jisas long pen bilong em.

O Jisas bilong mi! Sori tumas long ol manmeri i no save laikim yu! Yu laikim ol tumas i go inap long indai bilong yu, tasol ol i save givim

baksait yet long yu! Strongim mi, dia Jisas, bai mi ken laikim yu tasol. Mi no laik laikim narapela samting. Nogat. Mi laik laikim yu tasol na mangal long yu tasol.

Narapela samting i olsem: ol manmeri i karim pen, ol i no save long wanem samting bai i kamap bihain long ol. **Tasol Jisas em i God tru, olsem na em i save long olgeta samting bai i kamap long em.** Olsem na olgeta de bilong laip bilong em, em i save pinis long em bai i dai long diwai kros. Long taim em i liklik yet Jisas i save pinis olsem ol bai i wipim em, ol bai i putim rop i gat nil long het bilong em, ol bai i sutim han na lek bilong em, na ol bai i kilim em i dai long diwai kros.

O Jisas bilong mi! Santu Maria Magdalena bilong ples Pazzi i kolim yu «Man bilong bikpela laik». Na em i tru, long wanem yu karim pen bilong helpim mi, na oltaim mi save givim pen long yu. Yu karim pen bilong helpim mi, na oltaim mi save givim baksait long yu. Olsem na laik bilong yu i kam long mi em i bikpela tumas, na i winim tru tingting bilong mi. Olsem na nau mi laik senisim ol pasin nogut bilong mi, na mi laik givim lewa bilong mi long yu. Yes, mi les long laikim ol samting bilong graun. Mi laikim yu tasol. Helpim mi na strongim mi, Jisas bilong mi. Yu lewa bilong mi! Mi laik kamap santu na givim amamas long yu long ol gutpela pasin bilong mi. Yu laik kamap masta bilong lewa bilong mi, olsem na nau mi laik givim mi yet olgeta long yu.

O Maria, yu hop bilong mi!

79

**God i dai bilong helpim mi,
na mi bai i givim baksait yet long em?**

Santu Pol i tok: *Mi bilip long Pikinini Bilong God em i bin laikim mi tru na em i lusim laip bilong em yet bilong helpim mi* (Galesia 2:20). Dispela stori bilong God i bin lusim laip bilong em bilong kisim bek yumi em i narakain olgeta! I no gat narapela stori i winim dispela. Nogat tru. I no gat stori bilong wanpela bikman long graun i givim laip bilong em bilong helpim wanpela wokboi bilong em. I no gat stori bilong wanpela king i bin givim laip bilong em bilong helpim wanpela wokboi bilong em. Nogat tru. Tasol i gat stori bilong wanpela God i bin givim laip bilong em bilong helpim yumi. Yes, em i tru olgeta! God I Strong Olgeta em i Bikpela bilong heven na graun, tasol em i bin dai bilong kisim bek mi. Mi olsem liklik binatang long ai bilong em, na mi man nogut tu, tasol em bin laikim mi tumas, olsem na em i bin lusim laip bilong em

bilang helpim mi. Santu Bernard i tok: «**God i no laik lusim ol manmeri, olsem na em i laik lusim laip bilang em yet**». God i laik marimari long mi, olsem na em i no laik marimari long em yet, na em i lusim laip bilang em long diwai kros.

O Jisas bilang mi! Mi bilip olsem yu bin dai bilang kisim bek mi. Olsem na mi askim long mi yet: olsem wanem na mi save givim baksait long yu yet? Olsem wanem na planti yia mi bin stap longwe long yu?

Na yu, gutpela Ridima bilang mi, yu bin givim laip bilang helpim mi taim mi man nogut na mi man bilang mekim planti sin tumas. Planti taim mi bin givim baksait long yu. Planti taim mi bin tingting long amamas bilang graun tasol, na mi bin mekim sin. **Planti taim tumas mi bin lusim grasia bilang yu, tasol yu save laikim mi tumas inap long indai bilang yu.** Yu bin wok hat bilang singautim mi long kam bek long yu, tasol oltaim mi bin stap olsem yaupas. Olsem na mi sapos long go long hel. Tasol mi tingim laik bilang yu i kam long mi, na mi hop long yu. Mi save pinis olsem sapos mi kam bek long yu, yu bai i amamas na welkamim mi. Pogivim mi, Jisas bilang mi, long wanem mi luksave pinis long ol rong mi bin mekim. Mi sori tumas, na mi pret long mekim sin gen. Nogat, dia Jisas, mi no laik mekim sin moa. Helpim mi, long wanem yu olgeta gutpela samting bilang mi.

O dia Sevia bilang mi! **Dispela pasin bilang lusim laip bilang yu bilang kisim bek mi i winim olgeta pasin yu bin mekim.** I no gat

wanpela pasin bilong yu i soim laik bilong yu i kam long mi olsem dispela pasin bilong lusim laip bilong yu. Nogat tru. **Long Pen na Indai bilong yu bikpela laik bilong yu i kam long mi i kamap ples klia olgeta.** Yu yet i tok: «*Sapos wanpela man i laikim tumas ol pren bilong em na i lusim laip bilong em yet bilong helpim ol, orait **dispela pasin bilong laikim ol arapela i winim tru ol arapela pasin bilong laikim ol arapela manmeri***» (Jon 15:13). Gutpela Jisas, yu bin inapim gut dispela toktok, long wanem yu bin lusim laip bilong yu bilong laikim mi. Mi laik kam bek long yu hariap, gutpela Jisas. Mi no laik i stap longwe long yu moa. Nogat. Nogut indai i bungim mi na mi stap yet longwe long yu.

Mi laikim yu, Jisas bilong mi! Yu lewa bilong mi. Yu bin givim yu yet olgeta long mi, olsem na mi laik givim mi yet olgeta long yu. Pasim mi wantaim yu long rop bilong laikim pasin bilong yu, long wanem mi no laik lusim yu gen. Mi laik i dai wantaim yu, gutpela Jisas.

O Maria, yu Mama bilong mi! Karamapim mi long marimari bilong yu, na helpim mi long laikim God moa moa yet, long wanem em i bin lusim laip bilong em bilong kisim bek mi.

80

Jisas em i King bilong laikim pasin

Taim santu Fulgens i tingting long bebi Jisas i mas ranawe na i go long Isip, long wanem king Herot i laikim em i dai, em i tok: «O Herot, yu pret long wanem samting? Jisas em i King, tasol em i no kam bilong tekewe kingdom bilong yu. Jisas i no kam bilong pait wantaim yu. Nogat. **Jisas i kam bilong laikim yumi, na bilong givim laip long yumi long indai bilong em.** Olsem na yumi mas kolim Jisas “King bilong laikim pasin”».

O Jisas, yu gutpela King bilong mi! Bipo mi no bin laikim yu tumas, na mi bin mekim planti sin tumas! Yu bin karim pen 33-pela yia olgeta, long wanem yu no laik long mi i lus long hel, **tasol planti taim mi bin givim mi yet long amamas bilong graun, olsem na mi bin lusim yu.** Yu olgeta gutpela samting bilong mi. O God Papa, marimari long mi, na givim kis bilong bel isi long mi.

O yupela, ol judaman! Olsem wanem na yupela i givim baksait long King bilong yupela? Em i laikim yupela tumas, tasol yupela i bin hangamapim em long diwai kros. Yupela yet i tok: «*Mipela i no gat narapela king. Sisar wanpela tasol!*» (Jon 19:15). Sisar i no laikim yupela, ol Judaman! Sisar i no redim long givim laip bilong em bilong helpim yupela! Nogat tru! **Jisas tasol em i trupela King i lusim heven na i kam long graun bilong givim laip bilong em bilong kisim bek yupela.** Na yupela i givim baksait long em na i nilim em long diwai kros.

O naispela Sevia bilong mi! Planti manmeri i no laik akseptim yu olsem King bilong ol, tasol mi laik tokaut strong olsem: **yu tasol i King bilong mi.** Mi save pinis olsem yu laikim mi wantaim olgeta strong bilong yu. Yu tasol i bin kapsaitim blut bilong yu bilong helpim mi. Na i no gat narapela man o meri i save laikim mi olsem yu yet i save laikim mi. Mi sori tumas long ol sin mi bin mekim. Bipo mi tu i bin givim baksait long yu wankain olsem ol judaman. Tasol nau mi kam bek long yu na i askim yu olsem: pogivim mi, King bilong mi, long wanem yu bin dai bilong tekewe ol sin bilong mi.

Santu Pol i tok: ***Krais i dai na i kisim laip gen bai em i ken i stap Bikpela bilong ol man i dai pinis na bilong ol man i stap laip*** (Rom 14:9). Dia King bilong mi, dia Jisas bilong mi, yu bin dai bilong kamap masta bilong hat bilong mi, olsem na nau mi laik givim hat bilong mi long yu. Mi no laik tingting moa long ol samting bilong graun. Nogat tru. Olsem na mi askim yu long akseptim mi olsem

wokboi nating bilong yu. O King bilong mi! Kisim lewa bilong mi wantaim olgeta samting bilong mi, long wanem mi bilong yu tasol. Mi no laik givim baksait moa long yu. Nogat. Mobeta mi laik i dai pastaim. Yu bin dai bilong helpim mi, gutpela King bilong mi, olsem na mi laik pas wantaim yu tasol. Yu King bilong mi na yu lewa bilong mi! Yu olgeta gutpela samting bilong mi.

O Maria, yu tu i Kwin bilong mi, na yu Mama bilong Jisas! Helpim mi long inapim gut ol promis mi mekim long Jisas.

81

Amamas bilong Jisas long painim sipsip i lus

Jisas i tok olsem em yet em i dispela wasman bilong ol sipsip i gat 100 sipsip, tasol wanpela i lus. Olsem na em i save wok hat bilong painim dispela wanpela sipsip bilong em inap em i lukim. Em i tok olsem em i redi long lusim ol 99 narapela sipsip long ples nating, na em bai i wok hat long painim dispela pikinini i lus. Na taim Jisas i painim dispela sipsip, orait em i save slipim em long sol bilong em, na em bai i amamas na karim em i kam bek long ples. Na em bai i tok: «*Yupela amamas wantaim mi! Wanpela sipsip bilong mi em i lus, na mi painim na kisim bek pinis!*» (Luk 15:6).

O gutpela Wasman bilong mi! Mi dispela sipsip i lus, na yu bin wok hat bilong painim mi. Yu bin painim mi pinis, na mi tu i bin painim yu. Olsem na nau mi no laik lusim yu gen. Nogat tru. Mi laikim yu

tasol. **Mi no laik lus gen, dia Jisas.** Helpim mi long i stap oltaim wantaim yu, long wanem yu lewa bilong mi.

Dia Jisas bilong mi! Taim yu painim pinis dispela sipsip i lus, yu save singautim ol pren bilong yu long kam na amamas wantaim yu. Olsem wanem na yu save mekim olsem? Mobeta yu mas tok olsem ol i mas amamas long sipsip, long wanem sipsip i painim yu gen, long wanem yu God bilong em! **Yu no nidim ol sipsip, dia Jisas, tasol ol sipsip i nidim yu.** Tasol yu save laikim mipela tumas, olsem na yu amamas long painim mipela. Olsem na mi laik pas wantaim yu oltaim na mi no laik lus gen.

Profet Aisaia i tok olsem taim God i harim wanpela man o meri i sori long ol sin bilong em, orait wantu tasol em i save marimari long dispela man o meri na pogivim em. Profet i tok: *Bikpela i stap redi tasol long marimari long yupela na mekim gut long yupela. Taim yupela i singaut na beten long em, wantu tasol em bai i harim singaut bilong yupela na helpim yupela* (30:19).

Olsem na nau mi kam long ai bilong yu, God bilong mi, na mi askim yu long marimari long mi. Mi sori tumas long ol sin bilong mi, na mi askim yu long pogivim olgeta rong bilong mi. Na yu bekim wanem tok long mi? **Goan, harim singaut bilong mi na pogivim mi hariap!** Mi no laik i stap longwe long yu, na mi no laik givim baksait gen long yu. Yu olgeta gutpela samting bilong mi, na mi mas givim lewa bilong mi long yu tasol. Bipo mi bin givim baksait long yu, tasol nau mi laikim yu moa long olgeta gol na silva bilong dispela graun.

Sapos yu laik panisim mi nau na givim pen long mi, orait mi redi long karim pen bilong stretim ol rong mi bin mekim. **Tasol mi askim yu: no ken lusim mi, gutpela Wasman bilong mi, na no ken haitim pes bilong yu long mi!** Bikpela, mi laikim yu wantaim olgeta strong bilong mi. Mi no laik i stap longwe moa long yu. Helpim mi long strong bilong yu.

O Maria, yu mas pre bilong helpim mi!

82

Jisas i stretim dinau bilong mipela

Profet Aisaia i tok: *Dispela wokman i bin karim ol hevi na pen bilong yumi. Long asua bilong sin bilong yumi tasol em i bin kisim bagarap. Ol i bin paitim em nogut na skin bilong em i bin bruk nabaut, na long dispela pen em i karim em i mekim yumi i kamap orait gen, na yumi stap gut tru* (53:4-5). O bilip bilong mi, sapos yu no tok olsem, mi bai i no inap long bilipim dispela samting! *Dispela wokman i bin karim ol hevi na pen bilong yumi*. Man i mekim sin, na Jisas i karim pen bilong helpim em! O Jisas bilong mi, olsem wanem: **mi mekim sin na yu karim pen?** Mi sapos long go long hel, na yu laik i dai long diwai kros bilong pogivim mi? **Yu laik marimari long mi, olsem na yu no bin marimari long yu yet.** Olsem na nau mi no laik givim pen long yu moa, dia Jisas, mi laik givim amamas tasol long yu. No, dia Sevia bilong mi, mi gat bikpela

dinau wantaim yu, olsem na mi no laik mekim sin moa. Mi bilong yu tasol, olsem na mi laik bihainim laik bilong yu oltaim, na givim amamas long yu.

Profet Aisaia i tok: ***Long asua bilong sin bilong yumi tasol em i bin kisim bagarap*** (53:5). O sol bilong mi! Lukim Jisas i karim pen bilong helpim yu! Lukim ol soldia i wipim em nogut tru long haus bilong Ponsias Pailat! Lukim ol rop i gat nil ol i putim long het bilong em! **Bodi bilong Jisas i bruk nabaut long ol sin bilong yu!** Lukim blut i kapsait long het inap long lek bilong em! Na lukim Jisas i tokim yu olsem: «**Lukim mi, pikinini. Mi ofarim dispela sakrifais bilong helpim yu**».

O gutpela Ridima bilong mi! Bodi bilong yu i bruk olgeta bilong helpim mi! Olsem wanem na mi save go het long ol sin bilong mi? Inap nau long mekim sin! Yu bin karim planti pen bilong painim mi, tasol mi bin lusim yu na mi bin givim mi yet long amamas bilong graun. O amamas bilong graun, mi les olgeta long yu nau! Mi no laikim yu moa! Yu bin bagarapim Ridima bilong mi!

I gat stori bilong santu Margaret bilong ples Kortona i olsem: oltaim em i save tingim Pen na Indai bilong Jisas, em i save krai sori tumas long ol sin em i bin mekim. Na wanpela de wanpela pris i tokim em olsem: «Margaret, inap long krai long ol sin bilong yu. God i bin pogivim yu pinis». Tasol Margaret i bekim tok olsem: «O pater, mi no inap long mekim olsem yu tok. Ol sin bilong mi i bin givim bikpela pen long Jisas, olsem na mi bai i krai sori oltaim!».

O dia Jisas biong mi, mi tu i bin mekim planti sin, olsem na mi tu i bin givim pen long yu. Santu Margaret i save krai sori long ol sin bilong em, na mi olsem wanem? Mi no save krai sori yet, Jisas, long wanem mi no save laikim yu tumas. Mi sori long ol pen mi bin givim long yu, gutpela Jisas. Mi laikim yu moa long mi save laikim mi yet, long wanem yu Ridima bilong mi. Goan! Kirapim paia bilong laikim pasin insait long lewa bilong mi, bai mi ken givim amamas long yu na laikim yu tasol Yu bin pulapim mi long planti grasia na gutpela samting, olsem na nau mi no laik givim baksait gen long yu.

O Maria, ol prea bilong yu inap long helpim mi long kamap santu! Olsem na mi askim yu long pre long Jisas bilong helpim mi.

83

Yumi mas onarim santu Maria

Jisas em i namel man bilong stretpela pasin, na santu Maria em i namel meri bilong olgeta grasia. Santu Bernard, na santu Bonaventura, na santu German, na santu Antoni na planti arapela santu i tok olsem: **God yet i laik bai olgeta grasia i kamdaun long yumi long han bilong santu Maria, na God yet i bin makim Maria bilong mekim dispela wok bilong tilim ol grasia.**

Taim ol santu i pre bilong helpim yumi, orait ol prea bilong ol em i olsem ol prea bilong ol pren bilong God. **Tasol taim Maria i pre bilong helpim yumi, orait ol prea bilong em, em ol prea bilong Mama bilong em stret, olsem na God i no inap long sakim tok bilong Mama bilong em.** Ol manmeri i save trastim santu Maria oltaim, ol i ken amamas tru! Na i gat wanpela pasin santu Maria i save laikim tumas. Na dispela pasin i olsem: oltaim yumi mas singaut long em na i tok: **«O Maria, yu mas pre long Jisas bilong helpim mi».**

Jisas em i God tru, olsem na long strong bilong em yet, em i inap long mekim olgeta samting. Tasol Maria tu inap long mekim olgeta samting long grasia i kam long God. Olsem na taim em i pre, em i inap long kisim olgeta grasia. Santu Antoni i tok: **«Sapos Maria i askim Jisas long wanpela samting, orait Jisas bai i givim long em, long wanem Jisas i no inap long sakim tok bilong Mama bilong em»**. Jisas i amamas long harim ol prea bilong Mama bilong em. Na Jisas i amamas tru long givim long em olgeta samting em i askim. Na santu Bernard i tok: **«Sapos yumi i laik i go long heven, orait yumi mas askim Maria, long wanem Jisas i save harim oltaim ol prea bilong Mama bilong em»**.

O Maria, yu Mama bilong marimari, yu mas marimari long mi! Yu save tok olsem yu ples hait bilong ol manmeri bilong sin. Orait, mi man bilong sin, olsem na mi kam long yu nau. Mi hop long yu!

Olsem na yumi no ken pret long askim olgeta samting long santu Maria. Maski long tubel! Oltaim Maria bai i harim olgeta singaut bilong yumi. Na em i gat bikpela strong bilong givim olgeta grasia long yumi. Oltaim God i save harim ol prea bilong em, long wanem Maria em i Mama bilong God. **Maria i save amamas tumas taim yumi singaut long em, long wanem em i laik helpim yumi oltaim.** Na sapos yu sot long wanpela grasia na yu askim long santu Maria, orait i no longtaim yu bai i kisim dispela grasia. Na ol sin bilong yu i no ken pasim yu long beten long em, long wanem Maria i save helpim ol manmeri bilong sin tu. Em i laik bai yumi singaut

long em oltaim, long wanem em i laik bai yumi go long heven wantaim em. Maria em i ples hait bilong ol manmeri bilong sin, **na i no gat wangepela man o meri i singaut long em na i lus.** Nogat olgeta! Sapos yu singaut long Maria, em bai i harim yu. Sapos yu no singaut long em, orait yu bai i lus.

O Maria, yu Mama na hop bilong mi! Mi putim mi yet aninit long yu, na mi askim yu long holim mi strong. Lukim ol sin bilong mi na marimari long mi. Askim Jisas long pogivim olgeta sin bilong mi. Strongim mi bai mi ken stap gut. Helpim mi long bihainim Jisas oltaim. Helpim mi long i dai wantaim grasia bilong God. Helpim mi long go long heven. Mi hop long yu na mi trastim yu, naispela Mama bilong mi! Yu inap long mekim olgeta samting wantaim strong bilong God. Helpim mi long kamap santu, long wanem mi save pinis olsem yu strong tumas na yu inap long helpim mi. O Maria, mi trastim yu! Mi putim olgeta hop bilong mi long han bilong yu.

84

Santu Maria i save laikim olgeta manmeri

Pasin bilong laikim God na pasin bilong laikim ol narapela manmeri i go wantaim. Buk Baibel i tok olsem: *Dispela lo yumi kisim long Krai, em i olsem. Man i save laikim tru God, em i mas laikim tru ol arapela manmeri* (1 Jon 4:21). Na santu Tomas i tok olsem man i save laikim tru God, em bai i laikim tu olgeta samting God yet i save laikim. Na wanpela de santu Katerin i tokim God olsem: «God, yu laik bai mi laikim olgeta manmeri, tasol mi save laikim yu tasol». Na wantu tasol God i bekim tok bilong em olsem: «Man o meri i save laikim mi, em bai laikim olgeta samting mi save laikim». **Na namel long olgeta manmeri i no gat wanpela i ken winim Maria long pasin bilong laikim God, na olsem i no gat wanpela i ken winim em long pasin bilong laikim ol manmeri tu.** Long Buk Baibel i gat tok olsem: «*Ol i bin kisim gutpela diwai bilong kantri Lebanon na wokim dispela sia bilong king olsem wanpela liklik*

haus» (Song bilong Solomon 3:9). Na wanpela saveman bilong Sios i tok olsem dispela sia bilong king i luk olsem wanpela liklik haus em i bel bilong santu Maria, long wanem God i yet i bin redim santu Maria bilong kamap man, na yusim bel bilong Maria olsem sia king bilong em.

Taim Maria i stap yet long dispela graun em i pulap long laikim pasin, na em i bin helpim olgeta manmeri, maski ol i no bin askim em pastaim. Long marit long taun Kana ol i no askim santu Maria long helpim dispela man i marit, tasol Maria i save pinis olsem ol i sot long wain, olsem na em i tokim Jisas: «*Ol i no gat wain*» (Jon 2:3).

Taim wanpela man o meri i sot long sampela samting, wantu tasol Maria bai i kam na helpim ol hariap! Taim em i go helpim kandere bilong em Elisabet, Gutnius i tok: *Maria i kirap na i hariap i go long ples maunten* (Luk 1:39). Santu Maria i no save westim taim na givim eskus. Nogat tru! Gutnius i tok olsem ***Maria i kirap na i hariap i go*** helpim kandere bilong em.

Sapos yumi laik luksave long bikpela laik bilong Maria i kam long yumi, orait yumi mas tingim olsem em i bin givim pikinini bilong em stret long yumi. Maria i larim Jisas i dai bilong helpim yumi. **Maria i no pasim Jisas long dai bilong helpim yumi. Nogat tru. Maria i wanbel long Jisas i mas i dai bilong kisim bek yumi.** Santu Bonaventura i tok: «Maria i laikim tumas ol manmeri bilong dispela graun, olsem na em i givim pikinini bilong em yet long ol». Na em i tok moa olsem: «Na nau Maria i stap long heven, na dispela

laikim pasin bilong em i kam long yumi, i kamap bikpela moa moa yet! Nau Maria i inap long save long olgeta samting yumi i sot long em, na wantu tasol em bai i kam na helpim yumi. Bipo, taim Maria i stap long graun, marimari bilong em i bikpela tru. Tasol nau marimari bilong Maria i bikpela moa moa yet». Na wanpela ensel i tokim santu Brigit olsem: «**I no gat wanpela man o meri i singaut long Maria, na Maria i bin les long helpim dispela man o meri. Nogat tru**». Sapos Maria i no pre bilong helpim yumi, orait yumi bai i lus olgeta. Na Jisas yet i tokim santu Brigit moa olsem: «Sapos Mama bilong mi i no pre bilong helpim ol manmeri, orait ol manmeri bai i lus olgeta».

Long Buk Baibel God i tok olsem: *Ol man i save harim gut tok bilong mi, ol i ken amamas. Olgeta de ol i save kam sanap klostu long dua bilong haus bilong mi na wetim mi, na mi save givim tok long ol* (Provep 8:34). Na yumi i ken tok: Ol man i save harim gut tok bilong Maria, ol i ken amamas! Na ol man i save bihainim ol gutpela pasin bilong Maria, ol i ken amamas moa yet! Santu Gregori i tok olsem: «**Sapos yu laik bai Maria i laikim yu, orait pastaim yu mas laikim ol narapela manmeri**». Jisas yet i tok: «*Yupela i mas i stap stretpela manmeri tru, olsem Papa bilong yupela i stap long heaven em i stap stretpela tru*» (Matyu 5:48). Na Maria i tokim yumi olsem: «Yupela i mas i stap manmeri bilong marimari tru, olsem Mama bilong yupela i stap long heaven em i stap meri bilong marimari tru». Long Gutnius bilong santu Luk Jisas i tokim yumi olsem: «**Yupela i mas givim ol**

samting long ol arapela, na bai God i givim ol samting long yupela... Skel yupela i save givim long ol arapela man, long dispela skel tasol God bai i bekim long yupela» (6:38). I min olsem: God na Maria bai i yusim long yumi wankain skel yumi i save yusim bilong helpim ol arapela manmeri. Santu Metodius i tok: «Taim yu helpim ol tarangu, yu opim dua bilong paradais long yu yet». Na santu Pol i tok tu olsem: *Sapos yumi trening long mekim pasin bilong God i kamap strong long yumi, dispela bai i helpim yumi moa yet. Em inap long helpim yumi long dispela laip nau yumi stap long em, na long laip yumi bai kisim bihain tu* (1 Timoti 4:8). Na long Buk bilong ol Prosep i tok: *Sapos yu marimari long rabisman na yu givim samting long em, i olsem yu larim Bikpela i dinau long yu, na bihain Bikpela bai i bekim dispela dinau* (19:17). Na santu Jon Krisostom tu i tok: «Taim yu helpim ol tarangu em i olsem yu helpim God yet, olsem na God yet i dinau long yu».

85

Santu Maria em i meri bilong harim tok

Santu Maria i laikim tumas dispela pasin bilong harim tok bilong God. Olsem na taim ensel Gebriel i kamap long em na i tokim em olsem em bai i kamap mama bilong Jisas, Maria i kolim em yet «wokmeri». Gutnius i tok: ***Na Maria i tok olsem, «Harim. Mi wokmeri bilong Bikpela. Em i ken mekim long mi olsem yu tok»*** (Luk 1:38). Na santu Tomas i tok: «I no bin gat wanpela taim Maria i bin sakim tok bilong God. Nogat tru. Oltaim Maria i bin lustingting long laik bilong em, na em i bin bihainim laik bilong God tasol». Na God i bin laikim tumas dispela pasin bilong santu Maria long harim tok, olsem Maria yet i tok: ***«Mi wokmeri bilong em, tasol em i lukim daun pasin bilong mi na em i marimari long mi»*** (Luk 1:48). Ol gupela wokmeri i save harim tok bilong masta bilong ol oltaim, na olsem tasol Maria i bin harim tok bilong God oltaim. Santu Ogastin i tok: ***«Pasin bilong harim tok bilong santu***

Maria i stretim ol samting nogut Iv i bin mekim taim em i bin sakim tok bilong God».

Maria i winim tru olgeta manmeri long pasin bilong harim tok. I no gat wanpela man o meri i ken winim em. Nogat. Maria i go pas oltaim, na em i winim ol santu. Long wanem ol santu sampela taim i painim hat long harim tok bilong God, tasol Maria i bin harim tok bilong God oltaim wantaim bikpela amamas. Maria i no gat sin bilong Adam, olsem na sol bilong em i redi oltaim long bihainim laik bilong God. Santu Bernardin i tok olsem: **«Maria oltaim i redi long harim tok bilong God na inapim laik bilong em».**

Oltaim Maria i save bihainim laik bilong God tasol. Taim Maria i gat bel, em i harim tok bilong God na em i lusim ples Nasaret na i go long Betlehem, bai gavman i ken kisim nem bilong em na santu Josep. **Maski Maria i gat bel na em i tarangu, em i save pinis olsem dispela samting em i samting bilong God yet, olsem na em i no givim eskus, na i go hariap long ples Betlehem.** Na taim i kamap pinis bilong Maria i karim pikinini Jisas, na em i karim pikinini Jisas na i putim em long bokis kaikai bilong ol bulmakau. Na wankain samting i kamap taim Holi Famili i ranawe na i go long Isip. Maria tu i save olsem dispela samting em i samting bilong God yet, olsem na em i no komplein, na em i go long Isip. Na long dispela nait stret, Maria i bin harim tok bilong santu Josep tu, long wanem dispela ensel i bin givim toksave olsem Herot i laik kilim pikinini Jisas, i bin kamap long santu Josep na i no bin kamap long

santu Maria. Santu Maria i harim tok bilong God na tok bilong santu Josep wantaim. Na taim Maria i lukim pikinini bilong em i dai long diwai kros, dispela pasin bilong harim tok i kamap bikpela moa moa yet long em. Long Gutnius i gat stori i olsem: *Na wanpela meri i stap namel long ol em i singaut olsem, «Dispela meri i bin karim yu na i givim susu long yu, em i ken amamas». Tasol Jisas i tok, «Mobeta yumi tok olsem, ol man i harim tok bilong God na i bihainim, em ol i ken amamas»* (Luk 11:27-28). **I min olsem: long ai bilong Jisas pasin bilong harim tok na bihainim i winim tru pasin bilong stap mama bilong em.** Long dispela as tasol Beda i tok: «Amamas bilong Maria taim em i harim tok bilong God i winim amamas bilong em taim em i karim Jisas».

Maria i save laikim tumas ol manmeri bilong harim tok. Wanpela stori i tok olsem: wanpela de santu Maria i kamap long wanpela pris, na tupela i toktok na stori. Na taim tupela i wok long toktok, wanpela sikman i singautim dispela pris, olsem na em i lusim Maria i stap wan na i go lukim dispela sik man. Na taim pris i kam bek long haus, em i lukim Maria i sindaun i stap na i wok long wetim em. Olsem na dispela pris i sori liklik long westim taim bilong santu Maria, tasol Maria i tok olsem em i amamas tumas long pasin bilong harim tok i stap long em. Tasol narapela stori i tok olsem: wanpela de wanpela pris i mas mekim wanpela wok, tasol em i bisi long mekim ol prea, olsem na em i lustingting long wok em i mas mekim. Na Maria i kamap long em, na i tokim em olsem: «Mi no amamas long yu, long

wanem yu no bin harim tok, olsem na yu no bin inapim gut wok bilong yu».

Wanpela de santu Maria i tokim santu Brigit olsem: «**Pasin bilong harim tok bilong God na tok bilong ol pris i save helpim ol manmeri long go long heven**». Na santu Filip Neri i tok: «**Long taim bilong kot, God bai i skelim sapos yumi bin harim tok o nogat**». Gutnius i tok: *Na Jisas i tokim ol disaipel olsem, «Man i harim tok bilong yupela, em i harim tok bilong mi. Na man i givim baksait long yupela, em i givim baksait long mi. Na man i givim baksait long mi, em i givim baksait long God, em i bin salim mi na mi kam»*. Olsem na taim yumi harim tok bilong ol pris em i olsem yumi harim tok bilong Jisas yet. Na santu Maria i tokim santu Brigit moa olsem: «**Jisas i amamas tumas long pasin bilong harim tok i stap long mi, olsem na em i tokim mi em bai i pogivim ol manmeri bilong sin i save singaut long mi**».

Marimari bilang God

86

Peisens bilong God

Ino gat wanpela man o meri i gat peisens olsem God. Nogat tru. God i save wetim yumi tumas, na oltaim em i save singautim yumi long tanim bel na mekim penans long ol sin bilong yumi. **Maski yumi i bin mekim planti sin tumas, God i bin wetim yumi inap long tude!**

O God bilong mi! Sapos mi bin mekim rong long wanpela brata bilong mi wankain olsem mi bin mekim rong long yu, orait dispela brata bai i rausim mi longwe long em. Na sapos mi bin mekim rong long papa bilong mi wankain olsem mi bin mekim rong long em, orait papa bai i haitim pes bilong em long mi. Tasol yu nogat. Long wanem yu pulap long peisens na marimari. Buk Baibel i tok: *Putim nupela spirit insait long mi na bai mi bihainim yu tasol. Nogut yu rausim mi na mi stap longwe long yu. Spirit bilong yu yet i stap long mi, na yu no ken rausim long mi* (Buk Song 51:10-11). O Bikpela, marimari long mi.

Na dispela saveman i bin raitim Buk bilong Gutpela na Stretpela Tingting i tok olsem: ***Tasol yu save marimari long olgeta man, long wanem, yu inap long wokim olgeta samting. Yu no mekim save wantu long ol man i mekim sin, long wanem, yu laik givim taim long ol, bai ol i ken tanim bel*** (11:23).

Planti taim i save kamap olsem: sapos wanpela man i kisim rong long narapela, orait dispela man bai i bekim rong long em. Sapos em i no bekim rong, orait em i no bekim rong, long wanem em i gutpela man tumas, olsem na em i laik kamap olsem jas. Tasol sampela taim ol man i no save bekim rong, long wanem ol i no gat strong bilong bagarapim dispela man o meri i bin mekim rong long ol, olsem na ol i mas daunim ol yet tasol. **Tasol God i gat olgeta rait long kotim yumi na bagarapim yumi, tasol em i save daunim em yet na em i no save bekim rong long yumi.** O God, olsem wanem? Mi mekim rong long yu, na yu no bekim rong long mi? Ol manmeri i givim baksait long yu, na yu wetim ol yet? Ol i mekim kain kain giaman promis long yu, na yu aipas? O gutpela God bilong mi, yu bin wetim mi planti yia i kam inap nau!

O God bilong mi, yu olgeta gutpela samting! Mi no laik givim baksait moa long yu. Mi no laik mekim rong long yu gen. Nogat. **Nogat mi go het long ol sin bilong mi na peisens bilong yu i pinis, na yu salim mi i go long hel.** Mi sori tumas long ol rong mi bin mekim long yu. Mi no laik mekim sin gen. Nogat. Mobeta mi laik i dai pastaim. Yu Bikpela bilong mi! Yu bin kamapim mi! Yu bin kisim bek mi long blut

bilong yu! Yu tasol i save laikim mi tumas! Olsem na mi givim lewa bilong mi long yu, long wanem mi laik laikim yu tasol.

O sol bilong mi, olsem wanem na planti yia i kam inap nau yu bin givim baksait long God? **Taim yu mekim sin, orait God inap long kilim yu i dai na salim yu i go long hel.** Tasol God i bin wetim yu, na em i no laik panisim yu. **Long laik bilong em yet yu stap laip yet.** Oltaim God i bin pulapim yu long planti grasia na gutpela samting. Tasol yu no bin bekim gut long em. Yu sapos long laikim em na bihainim ol lo bilong em. Tasol yu bin go het long ol sin bilong yu inap long tude.

O Bikpela bilong mi! Mi laik tenkim yu, long wanem yu bin wetim mi inap long tude. Mi sori tumas long ol rong mi bin mekim, na mi laikim yu wantaim olgeta strong bilong mi. **Mi sapos long stap long hel nau, na long dispela ples mi bai i no inap long tok sori long yu na laikim yu.** Tasol yu givim taim long mi, bai mi ken tanim bel na kam bek long yu. Mi laikim yu moa long olgeta samting! Mi laikim yu long mi yet. Pogivim mi, na helpim mi long pas wantaim yu tasol. Mi no laik givim lewa bilong mi long narapela samting. Nogat. Mi laik givim lewa bilong mi long yu tasol. Yu laikim mi tumas, olsem na mi mas laikim yu tumas tu. Mi laik givim amamas long yu wantaim ol gutpela pasin bilong mi, long wanem yu bin dai bilong kisim bek mi. Tingim Pen na Indai bilong yu, na helpim mi oltaim.

O Maria, yu Mama bilong God, helpim mi long prea bilong yu.

87

Marimari bilong God i singautim ol manmeri long mekim penans

Taim Adam i mekim sin pinis, orait em i hait namel long ol diwai, long wanem em i pret long God. Tasol God i wok long painim em, na i tok: «***Yu stap we?***» (Stat 3:9). God i wok long painim Adam wankain olsem wanpela papa i wok long painim pikinini bilong em i lus. **O bikpela marimari bilong God! Adam i mekim sin, tasol God i no lusim em!** Nogat. God i wok long painim Adam na i tokim em: «Adam, yu stap we? Mi wok long painim yu, long wanem mi lusim yu pinis». Wankain olsem tasol God i save mekim long sol bilong yumi. Yumi i bin lusim em long ol sin bilong yumi, tasol em i no givim baksait long yumi. Nogat. Oltaim em i wok long painim yumi, na em i save kirapim planti gutpela tingting insait long bel bilong yumi, bai yumi i ken kam bek long em. Ol dispela tingting

i save kirap insait long bel bilong yumi, i kam long marimari bilong God tasol.

O God bilong marimari! Yu God bilong laikim pasin! Olsem wanem na planti taim mi bin lusim yu? Olsem wanem na planti taim mi bin givim baksait long yu?

Sapos wangepa papa i lukim pikinini bilong em i go antap long wangepa maunten na i laik kalap na i dai, orait dispela papa bai singautim em na ran i kam long em hariap, long wanem em i no laik bai dispela pikinini i dai. **Orait, wankain olsem tasol God i save mekim long yumi.** Taim yumi mekim sin na yumi sapos long go long hel, God i save helpim yumi long stap laip, bai yumi i ken tanim bel na kam bek long em.

O Bikpela bilong mi! Laik bilong yu i kam long mi i kamap ples klia long ai bilong mi nau! Mi laik go long heven na singsing amamas oltaim long marimari bilong yu. Mi tu i laik tok olsem Profet Devit: ***Bikpela, oltaim bai mi singim song i tok long sori bilong yu. Long olgeta taim bai mi tokaut long yu no save senisim tok bilong yu*** (Buk Song 89:1). O gutpela Jisas bilong mi! Mi save pinis olsem yu laik kisim mi i go long heven. Tasol mi no save sapos yu bin pogivim pinis olgeta sin bilong mi, o i no yet. Olsem na mi askim yu tupela samting. Namba wan samting, mi askim yu long kirapim bikpela sori insait long sol bilong mi, bai mi ken sori tru. Na namba tu samting, mi askim yu long kirapim bikpela laikim pasin insait long lewa bilong mi, bai mi ken laikim yu wantaim olgeta strong bilong mi. Sapos yu

givim dispela tupela samting long mi, orait dispela em bai i mak bilong yu i pogivim mi pinis.

O Sevia bilong mi! Olsem wanem na planti taim mi no save trastim long marimari bilong yu? Olsem wanem na planti taim mi save tok olsem yu no inap long pogivim mi? **Yu yet i save singautim mi oltaim long kam bek long yu, na sapos mi kam bek long yu, yu bai i holimpasim mi wantaim bikipela amamas tru.** Yes, dia Jisas, mi laik kam bek long yu. Mi luksave long olgeta rong mi bin mekim long yu, na mi sori tru. **Na maski mi bin mekim planti sin tumas, laik bilong yu i kam long mi i no bin senis, na yu laikim mi wantaim olgeta strong bilong yu.** Pogivim mi, Jisas bilong mi, long wanem mi no laik mekim sin moa. Na tu yu mas kirapim paia bilong laikim pasin insait long lewa bilong mi, bai mi ken laikim yu tru olsem yu save laikim mi. Mi sapos long go long paia bilong hel, tasol nau mi askim yu long kukim mi wantaim laikim pasin bilong yu. Mi laikim yu, Jisas. Yu olgeta gutpela samting bilong mi. Yu lewa bilong mi.

O Maria, yu save sambai long mi oltaim! Helpim mi long bihainim laik bilong God inap long indai bilong mi.

88

God i laik kisim yumi i go long heven

Buk Baibel yet i tok olsem God i laik bai yumi olgeta i sevim sol bilong yumi. Yes, God i no laik bai wanpela pikinini bilong em i lus. Nogat. Em i laik kisim yumi olgeta i go long heven. Santu Pol i tok: ***Em i laik kisim bek olgeta manmeri, bai ol i ken save long as bilong tok tru*** (1 Timoti 2:4). Na santu Pita tu i tok: ***Em [Bikpela] i no laik bai wanpela man i lus. Em i laik bai olgeta man i mas tanim bel*** (2 Pita 3:9). Na long dispela as tasol Pikinini bilong God i lusim heven na i kam long graun, long wanem em i laik kisim bek yumi. God i kamap man na em i stap inap 33-pela yia olgeta long dispela graun. Em i tuhat tumas na i karim bikpela pen bilong kisim bek yumi, inap long indai bilong em long diwai kros.

O Sevia bilong mi! Yu bin wok hat long olgeta de bilong laip bilong yu bilong kisim bek mi! Olsem wanem na mi wok long westim nating laip bilong mi? Olsem wanem na mi sot yet long ol gutpela pasin? Mi

sapos long go long hel, long wanem ol pasin bilong i no stret long ai bilong yu. **Tasol yu no amamas long ol manmeri i lus. Nogat. Yu amamas tumas taim wanpela man o meri bilong sin i tanim bel na i kam bek long yu.** Yu yet i tok long Buk bilong Profet Esekiel olsem: *«Mi God, Bikpela, mi save stap oltaim, na tru tumas mi no save amamas long taim ol man bilong mekim sin, ol i dai. **Mi save amamas long ol dispela man i givim baksait long pasin bilong sin na ol i stap gut...** Yupela i mas givim baksait long pasin nogut yupela i save mekim na kam bek long mi. Bilong wanem yupela i laik i dai?»* (33:11). Yes, God bilong mi, mi laik lusim ol pasin nogut bilong mi, na mi laik givim mi yet olgeta long yu. Mi laikim yu, na mi sori tumas long ol sin mi bin mekim. Kisim mi olsem wokboi nating bilong yu, na helpim mi long stap wantaim yu oltaim.

Nau yumi tingting liklik long ol santu. Ol i mekim wanem kain sakrifais bilong i go long heven? **Ol i bin mekim planti sakrifais na penans, long wanem ol i pret nogut tru long lusim God!** Planti bikman na king i bin lusim olgeta samting bilong ol, na i bin kamap monk! Planti yangpela man na meri i bin lusim haus na kantri bilong ol, na i bin go stap long ol ples nating, longwe long ol samting bilong graun! Planti martir i bin kapsaitim blut bilong ol! Na ol santu i bin mekim ol dispela sakrifais olsem wanem? Ol i mekim olsem long wanem ol i laik sevim sol bilong ol. **Na mi olsem wanem? O sori tumas long mi, long wanem indai i wok long kam klostu nau, na mi no save wok hat bilong sevim sol bilong mi!**

No, God bilong mi, mi no laik i stap longwe moa long yu. Mi wok long westim nating taim bilong mi. Tasol nau mi laik tanim bel, nogut indai i bungim mi na mi no redi. Helpim mi long kam bek long yu, na long redim mi yet gut long indai.

O God, Jisas i bin pulapim mi long planti grasia, long wanem em i laik kisim mi i go long heven! Em i mekim mi i kamap long wanpela kantri i kristen. Mi kisim baptais insait long trupela Sios bilong em. Planti taim mi bin konpes na em i bin pogivim olgeta sin bilong mi. Em i bin givim planti gutpela tingting long mi, long taim mi harim ol skul bilong ol pris na long taim bilong prea. Planti taim mi bin kisim em long santu komunio tu. Na oltaim em i save singautim mi long kam bek long em. O Jisas, yu bin pulapim mi long planti grasia! **Na planti arapela manmeri i no bin kisim planti grasia olsem mi.** Nogat. Yu bin givim planti grasia long mi, na long planti arapela manmeri bilong graun yu bin givim liklik grasia tasol. Na mi olsem wanem? **Olsem wanem na mi pulim taim na givim eskius yet? Olsem wanem na mi no givim mi yet olgeta long yu inap long tude?**

O Jisas bilong mi! Mi kam bek long yu nau. Mi no laik givim eskius moa long yu! Yu bin mekim planti samting bilong kisim bek mi, olsem na mi laik givim lewa bilong mi long yu nau. Kisim mi olsem wokboi nating bilong yu, dia Jisas. Mi man bilong mekim sin, tasol mi laikim yu tumas. Mi laikim yu, God bilong mi. Yu lewa bilong mi. Marimari long mi.

O Maria, yu hop bilong mi!

89

God i laik kisim bek ol manmeri bilong sin

Yumi no ken lustingting: sin em i samting nogut tru. Taim yumi mekim sin, yumi save givim baksait long God I Strong Olgeta. Yumi i olsem ol liklik binatang long ai bilong God, na long sin bilong yumi, yumi save givim pen long em. **God i bin pulapim yumi long planti grasia na em i bin givim laip bilong em bilong kisim bek yumi. Tasol ol sin bilong yumi i save daunim em na bagarapim nem bilong em.** Tasol God i gutpela tumas, na yumi mas kirap nogut tru long marimari bilong em! Oltaim em i save singautim yumi long tanim bel na mekim penans, na oltaim em i save ofarim marimari bilong em long yumi. **Na God i no nidim yumi. Nogat olgeta. Yumi i nidim God.** Tasol God i save wok hat long painim yumi, long wanem em i laikim yumi tumas.

O Jisas bilong mi! Yu wok long painim mi, na mi wok long painim yu. Yu laik long mi i kam bek long yu, na mi tu i mangal long dispela samting tasol.

Santu Pol i tok: *Mipela i save autim tok bilong Kraus yet long olgeta man, na mipela i tokim ol olsem, “Mobeta yupela lusim pasin birua na kamap wanbel wantaim God”* (2 Korin 5:20). Na santu Jon Krisostom i tok: «Jisas i save daunim em yet, na em i pre long ol manmeri bilong sin. Na Jisas i save askim wanem samting long ol? Em i askim ol long tanim bel na kam bek long God».

O Jisas, yu Ridima bilong mi! Olsem wanem na yu laikim mi tumas? Mi man bilong sin! Olsem wanem na yu save wok hat long painim mi? Mi sori tumas long ol sin bilong mi, na mi askim yu long givim bikpela sori long mi, long wanem mi laik krai long ol sin mi bin mekim. Mi no pret long hel, dia Jisas, mi pret tasol long givim pen long yu gen. Yes, gutpela Jisas. Yu gutpela tumas na yu save laikim mi, olsem na mi no laik givim pen moa long yu.

Jop i tok: «*Mipela ol manmeri i wanem samting na yu save tingting tumas long mipela? Bilong wanem yu save lukluk long mipela oltaim?*» (7:17). O God, olsem wanem na yu save tingting tumas long mi? Mi mekim wanem samting bai yu laikim mi tumas? Mi no bin mekim wanpela samting bai yu ken laikim mi tumas, Bikpela. Olsem wanem na oltaim yu save singautim mi long kam bek long yu? Ating yu lustingting pinis long olgeta taim mi bin givim baksait long yu, a? Ating yu lustingting pinis long olgeta taim mi bin

lusim grasia bilong yu, a? Tasol yu laikim mi tumas, olsem na nau mi laik givim mi yet olgeta long yu. Yu Ridima bilong mi, gutpela Jisas!

Yes, mi laikim yu wantaim olgeta strong bilong mi. Mi laikim yu moa long mi yet. Olsem na mi laik bihainim gut ol lo na mandato bilong yu, na mi no laik sakim tok bilong yu gen. **Taim mi tingting long ol rong mi bin mekim, mi laik krai nogut tru, long wanem mi luksave long bikpela pen mi bin givim long yu.** Mi laik stretim ol rong bilong mi, dia Jisas, long wanem mi laik givim amamas tasol long yu. Helpim mi oltaim. Tingim blut bilong yu i kapsait long diwai kros, na strongim mi.

O Maria! Tingim laik bilong yu i go long Jisas, na helpim mi long tanim bel.

90

**Yumi no inap long trikim
marimari bilong God**

Satan i gat tupela rot bilong mekim ol manmeri i go long hel. Namba wan rot em i olsem: em i save pulim ol manmeri long mekim sin, na mekim ol i tingting olsem bihain long mekim sin, ol bai inap long konpes, na God bai i marimari long ol. Namba tu rot em i olsem: taim ol manmeri i mekim sin pinis, orait em i save mekim ol i tingting olsem God i no inap long pogivim ol, olsem na ol dispela manmeri i lusim hop na i no laik konpes. Na dispela namba wan rot i save pulim planti manmeri i go long hel! Planti manmeri bilong sin i save tok olsem: «God i pulap long marimari, olsem na oltaim em bai i pogivim mi». Na dispela toktok bilong ol i kranki olgeta! Santu Maria yet i tok: «*Em [God] i save marimari long ol manmeri i aninit long em*» (Luk 1:50). I min olsem: God i save marimari

long ol manmeri i aninit long em tasol, na em i no save marimari long ol manmeri i go het long sin bilong ol.

O Bikpela bilong mi! Mi tenkim yu, long wanem nau tasol mi luksave long peisens bilong yu. Yu bin wetim mi inap long tude. Mi tu i bin mekim dispela kranki toktok bilong ol manmeri bilong sin, na mi tu i bin mekim planti sin tumas na pilai long marimari bilong yu.

Em i tru olsem God i pulap long marimari, tasol God i pulap long stretpela pasin tu. Ol manmeri bilong sin i laik God i marimari long ol, tasol ol i les long God i kotim ol long stretpela kot bilong em. Tasol sapos God i marimari tasol na em i no panisim ol sin bilong ol manmeri nogut, orait em bai i sot long stretpela pasin. Na God i no inap long sot long stretpela pasin, olsem na yumi mas tokaut klia olsem: **God i save panisim ol sin bilong ol manmeri i les long tanim bel.** Santu Jon bilong ples Avila i tok: «Sapos God i no panisim ol manmeri nogut, orait em bai i no gutpela God, long wanem em i mas soim stretpela pasin bilong em na panisim ol manmeri nogut». God i mas panisim ol manmeri nogut i les long kam bek long em. **Olsem na God i save wetim ol long kam bek long em, tasol em i no save wetim ol inap oltaim.** Nogat. **Peisens bilong God i gat arere bilong em tu.**

O Bikpela! Yu no bin panisim mi yet, long wanem yu laik long mi kam bek long yu. Sapos indai i bin bungim mi bipo, orait mi sapos long stap long hel nau. Tasol nogat. Mi laik tanim bel nau. Mi no laik

givim baksait gen long yu. Bipo mi bin mekim planti sin tumas, na mi sori tru. Tasol long tude inap long las de bilong laip bilong mi, mi laik bihainim yu gut na laikim yu. Yu bin soim bikpela peisens bilong yu long mi, olsem na mi laik laikim yu moa long ol arapela manmeri.

Santu Pol i tok: ***Nogut yupela i giamanim yupela yet na yupela i ting yupela inap long trikim God. Yupela bai i no inap tru*** (Galesia 6:7). Yumi no inap long trikim God. Nogat. Sapos yu go het long sin bilong yu, orait yu mas save olsem yu bai i no inap long go long heven. Santu Pol i tok moa olsem: ***Yu planim pikinini bilong wanem kain kaikai, em dispela kain kaikai tasol bai i kamap long gaden bilong yu*** (Galesia 6:8). Sapos yu planim ol gutpela pasin, orait yu bai i kisim gutpela pe long heven. Tasol sapos yu planim ol pasin nogut, orait yu bai i kisim pe nogut long hel. Ol manmeri nogut i save go het long mekim sin na i tingting olsem God bai i marimari long ol, long wanem God i pulap long marimari. Tasol Buk Baibel yet i tok: ***«Ol manmeri bilong mekim ol pasin nogut bai i painim ol kain kain rot bilong abrusim belhat bilong God. Tasol bai ol i no inap tru. Bai ol i wet tasol long dai i painim ol»*** (Jop 11:20). I min olsem: ol manmeri nogut i tingting olsem ol bai inap long abrusim hel, tasol ol bai i no inap tru, na belhat bilong ol bai i bagarapim ol stret. Bai mi givim wanpela tok piksa: sapos wanpela wokboi nating i paitim olgeta de bikman bilong em, long wanem bikman em i gutpela man tumas, ating dispela bikman bai gat peisens inap oltaim, a? Nogat tru.

Wanpela de bai i kamap, na peisens bilong dispela bikman bai i pinis, na em bai i bagarapim tru dispela wokboi nogut.

O Jisas bilong mi! Mi bin mekim wankain olsem dispela wokboi nogut. Planti taim mi bin mekim sin na bihainim ol amamas bilong graun, long wanem mi tingting olsem yu bai i wetim mi inap oltaim. Mi sori tumas na mi les long mekim sin gen. Mi laikim yu wantaim olgeta strong bilong mi. Mi laikim yu moa long mi yet. Mi no laik givim pen long yu moa. **Sori tumas long mi sapos mi mekim mortal sin gen!** O Bikpela bilong mi, holim mi strong, long wanem mi no laik mekim sin gen. Mobeta mi laik i i dai pastaim.

O Maria, yu Mama bilong ol gutpela pasin! Helpim mi long prea bilong yu.

91

Na sapos God i les long singautim mi gen?

Buk Baibel i tok strong long yumi olsem: *Sapos yu mekim wanpela promis long God, orait yu no ken wet longtaim bilong mekim ol samting yu bin promis. Sapos yu no bihainim promis, yu olsem longlong man. Na God i no save amamas long dispela kain man. Olsem na yu mas bihainim promis bilong yu. Sapos yu mekim promis long God na yu no bihainim dispela promis, orait dispela i no gutpela pasin. Sapos yu no inap bihainim promis bilong yu, orait mobeta yu no mekim promis. Nogut yu promis nating na mekim sin... Watpo yu laik mekim God i belhat long yu? Nogut yu mekim em i belhat* (Eklisiastis 5:4-6). God yet i toksave long yumi olsem yumi mas tanim bel hariap. Sapos yumi laik sevim sol bilong yumi, orait yumi no ken westim taim. **Long wanem sapos yumi no bihainim ol promis na yumi givim eskus oltaim, orait belhat bilong God bai i bagarapim yumi, na em bai i les long marimari**

long yumi. Na sapos indai i bungim yumi long ol sin bilong yumi, orait yumi bai i lus olgeta. Olsem na long Buk Baibel God i givim dispela advais long yumi, long wanem em i laikim yumi tumas na em i no laik long yumi i lus.

O God bilong mi! Mi luksave pinis olsem yu laik kisim mi i go long heven. Mi luksave pinis olsem yu laik marimari long mi. Olsem na mi no laik givim baksait moa long yu.

Planti manmeri i bin harim dispela advais bilong God, tasol ol i no bin bihainim ol promis ol i bin mekim, olsem na nau ol i stap long hel. Long hel ol i luksave long bikpela marimari bilong God i bin wok hat bilong kisim bek ol, tasol ol i pulap long eskius, olsem na ol i no bin tanim bel hariap.

O Jisas bilong mi! Mi sapos long karim bikpela pen long hel, long wanem yu bin pulapim mi long planti gutpela grasia. Tasol nau mi laik senisim ol pasin nogut bilong mi, na mi no laik givim baksait gen long yu. Mi laik bihainim laik bilong yu tasol, olsem na yu tokim wanem samting mi mas mekim, na bai mi mekim. Mi sori tumas long ol pen mi bin givim long yu. Na long tude inap long las de bilong laip bilong mi, mi no laik bihainim laik bilong mi moa. Nogat. Mi laik bihainim laik bilong yu tasol, na givim amamas long yu.

Planti manmeri i save tingting planti na wok hat bilong mekim bisnis. Ol i laik bai bisnis bilong ol i kamap gut, olsem na ol bai i inap winim planti mani. Olsem na sapos bisnis i no wok long kamap gut, ol i save tok: «Olsem wanem? Wanem samting bai i kamap long mi?».

Tasol ol dispela manmeri i no save tingting long eterniti, olsem na ol i no wari liklik long sol bilong ol. Ol i mas tingting long sol bilong ol na i tok: «Olsem wanem? Wanem samting bai i kamap long mi?». **Yes! Long wanem sapos yu lusim olgeta mani bilong yu, orait laip bilong yu bai i stap yet. Tasol sapos yu lusim sol bilong yu, yu bai i lus olgeta inap oltaim oltaim.** Indai i no save givim namba tu sans. Nogat. Yu bai i dai wanpela taim tasol. Olsem na sapos yu lusim sol bilong yu, orait yu bai i lus inap long ol eterniti.

O dia Ridima bilong mi! Yu bin givim laip bilong yu bilong givim grasia long mi, tasol planti taim mi bin lusim grasia bilong yu nating. Pogivim mi, dia Jisas, long wanem mi sori long ol pasin nogut bilong bipo. Yu bin mekim planti samting bilong kamap masta bilong lewa bilong mi, olsem na nau mi laik givim lewa bilong mi long yu. Mi laikim yu, Jisas, long wanem yu olgeta gutpela samting bilong mi. Mi laikim yu moa long mi yet. Helpim mi long pas wantaim yu oltaim, long wanem mi no laik lusim yu gen.

O Maria, yu Kwin bilong mi! Sambai long mi oltaim.

92

God i save amamas long ol manmeri i tanim bel

Sapos wanpela wokboi i mekim rong long king bilong em, orait dispela king bai i rausim dispela wokboi na bagarapim em tru. Na maski wokboi i tok sori long king, dispela king bai i belhat na panisim dispela wokboi. **Tasol Jisas em i narakain olgeta**, olsem na em i no save bagarapim ol manmeri bilong sin i kam bek long em. Em yet i tok: «*Man i kam long mi, mi no inap tru long rausim em*» (Jon 6:37). Jisas i no save rausim wanpela man i daunim em yet na i sori long sin bilong em. Buk Baibel i tok: *Mi save, yu no givim baksait long man i pilim bevi long sin na i daunim em yet* (Buk Song 51:17).

O Jisas bilong mi! Yu no sapos long pogivim mi, long wanem mi bin mekim planti sin tumas. Tasol yu mas save olsem: mi sori tumas long ol sin bilong mi, na mi laik kam bek long yu.

Olsem na mi no ken pret long kam bek long yu, dia Jisas. Yu yet i save singautim mi oltaim long kam bek long yu. Yu yet i laik pogivim mi na kisim mi aninit long yu gen. Mi no ken tubel long kam bek long yu, Bikpela bilong mi. Yu laik welkamim mi gen na holimpasim mi strong. Yu yet i tok: **«Tasol nau mi tokim yupela olsem, yupela i mas kam bek long mi, na bai mi kam helpim yupela»** (Sekaraia 1:3).

Bikpela bilong mi, no ken haitim pes bilong yu long mi. Nau mi laik kam bek long yu na givim mi yet olgeta long yu, long wanem yu olgeta gutpela samting bilong mi. Mi mekim planti sin tumas, tasol nau mi laik bihainim yu gut.

Na God i promisim olsem: sapos yumi tanim bel na kam bek long em, orait em bai i lustingting long olgeta sin yumi bin mekim. Em yet i tok: **«Tasol sapos wanpela man nogut i lusim sin bilong em, na em i bihainim ol lo bilong mi na mekim stretpela pasin tasol, orait bai em i no inap i dai. Nogat. Em bai i stap gut. Mi no ken tingim moa ol sin em i bin mekim bipo. Nau em i mekim stretpela pasin, olsem na em bai i stap gut»** (Esekiel 18:21-22). O bikpela promis tumas! Yu gutpela tumas, Jisas! Yu no save tingim moa long ol sin bilong ol manmeri i kam bek long yu!

Dia Sevia bilong mi, mi no laik lustingting long ol sin mi bin mekim, long wanem mi laik krai sori long ol oltaim. Tasol mi laik long yu i lustingting, Jisas. Mi save pinis olsem yu save laikim tumas ol manmeri i tanim bel na i kam bek long yu. Olsem na nau mi laik

lusim ol pasin nogut bilong mi, na givim mi yet olgeta long yu. Mi laikim yu, dia Jisas, na mi save olsem yu laikim mi tu. Yu yet i tok long Buk Baibel: «***Na wanem ol manmeri i wok strong long painim mi, bai ol i lukim mi. Wanem ol manmeri i laikim mi, mi tu mi laikim ol tumas***» (Provep 8:17). Em i tru: bipo mi no bin laikim yu tumas, na yu sapos long belhat long mi na bagarapim mi. Tasol nau mi laikim yu, olsem na yu no ken larim belhat bilong yu i bagarapim mi. Mi askim yu long lustingting long ol rong mi bin mekim. Pogivim mi, dia Jisas. Holimpasim mi strong long yu. No ken larim mi i lusim yu gen.

O Maria, ol prea bilong yu i ken helpim mi!

93

Bikpela laik bilong God i givim Pikinini bilong em yet long yumi

God i laikim ol tumas yumi ol manmeri, olsem na em i pulapim yumi long planti grasia na gutpela samting. Tasol i gat wanpela samting i winim tru ol arapela samting God i bin givim long yumi: **God i bin givim Pikinini stret bilong em long yumi.** Jisas yet i tok: *«God i gat wanpela Pikinini tasol i stap. Tasol God i laikim tumas olgeta manmeri bilong graun, olsem na em i givim dispela wanpela Pikinini long ol. Em i mekim olsem bilong olgeta manmeri i bilip long em ol i no ken lus. Nogat. Bai ol i kisim laip i stap gut oltaim oltaim»* (Jon 3:16).

Taim yumi stap yet long dispela graun, yumi save karim kain kain pen, long wanem dispela laip i no isi. Na yumi i olsem liklik binatang long ai bilong God. **Tasol God i laikim yumi tumas, olsem na em i salim Pikinini stret bilong em i kam long graun bilong kisim bek**

yumi. Na dispela Pikinini i bin stap olsem rabisman na las man tru. Em i bin karim planti pen tumas inap long indai bilong em long diwai kros. Na taim em i hangamap long diwai kros, em i singaut strong olsem: «*God bilong mi, God bilong mi, bilong wanem yu lusim mi?*» (Matyu 27:46).

O gutpela God bilong mi! I no gat wanpela samting i ken winim yu. Nogat tru! Laik bilong yu i kam long mipela i winim tru olgeta samting! Yu laikim mipela tumas inap long yu givim Pikinini stret bilong yu long mipela! Olsem na mi laikim yu, gutpela God bilong mi! Na mi givim mi yet olgeta long yu nau.

Santu Pol i tok: ***God i no bin pasim Pikinini bilong em yet. Nogat. Em i bin salim em i kam bilong helpim yumi olgeta*** (Rom 8:32). O God bilong mi, mi laik askim yu: olsem wanem na yu salim Pikinini bilong yu i kam long graun? Mipela i save mekim planti sin tumas na sakim tok bilong yu oltaim! Olsem wanem na yu laik bai Pikinini bilong yu i dai bilong kisim bek mipela? Jisas i klin olgeta! Em i no bin mekim wanpela rong! Oltaim em i save harim tok bilong yu! Yu laikim em tumas! Olsem wanem na yu laik givim em long mipela, ol manmeri nogut? Na God Papa bai i bekim tok olsem: «Em i tru. Pikinini bilong mi i klin olgeta na em i no gat rong. Oltaim em i save harim tok bilong mi na givim amamas long mi. Mi laikim em tumas wantaim olgeta strong bilong mi. **Tasol mi laik givim Pikinini stret bilong mi long yupela, bai laik bilong mi i kam long yupela i ken kamap ples klia olgeta.**»

O bikpela samting tumas! Olgeta samting long heven na long graun i mas singsing amamas long marimari bilong God! Olgeta samting i mas kalap na amamas long bikpela laikim pasin bilong God! O God! Mipela i olsem wokboi nating bilong yu, tasol yu laikim mipela tumas, olsem na yu laik bai Pikinini bilong yu i dai long diwai kros bilong helpim mipela. Olsem na mi askim yu: tingim Pikinini bilong yu na pogivim mi. Yes, mi laik bai yu marimari long mi, long wanem mi laik givim mi yet olgeta long yu. Yes, mi laik pas wantaim yu inap oltaim oltaim.

Santu Pol i tok moa olsem: *Tru, rong bilong yumi em i kilim yumi na yumi dai pinis. Yumi stap olsem ol man i dai pinis olgeta. Tasol marimari bilong God em i pulap tru na em i givim bel bilong em moa yet long yumi. Olsem na em i mekim yumi i stap laip wantaim Krai. Yes, long marimari bilong God tasol em i kisim bek yupela* (Efesus 2:4-5). O bikpela marimari bilong God! Yumi stap olsem ol man i dai pinis, tasol God i bin givim laip gen long yumi long indai bilong Pikinini bilong em! I no gat wanpela pasin bilong God i winim dispela pasin bilong givim Pikinini bilong em long yumi.

Bikpela bilong mi, yu bin laikim tumas ol manmeri bilong graun, tasol i no planti manmeri i save laikim yu. Orait, mi laik i stap wanpela bilong dispela liklik lain manmeri i save laikim yu. Bipo mi bin givim baksait planti taim long yu, tasol nau mi sori tumas long ol sin bilong mi, na mi laikim yu wantaim olgeta strong bilong mi. Na sapos olgeta manmeri i laik givim baksait long yu, orait mi nogat! Mi

no laik lusim yu gen, God bilong mi. Yu lewa bilong mi. Yu olgeta gutpela samting bilong mi.

O Maria, helpim mi long pas oltaim wantaim Bikpela bilong mi.

94

God i laikim tumas sol bilong yumi

God i laikim tumas sol bilong yumi. Na tingting bilong yumi i no inap long save gut long dispela laik bilong em, long wanem laik bilong em i bikpela tumas na tingting bilong yumi i liklik. **Laik bilong God i kam long yumi i winim tru tingting na save bilong yumi.**

Bipo bipo tru, taim dispela graun i no bin kamap yet, God i laikim yumi pinis. Long taim em i stap God, em i laikim yumi. God i laikim yumi long eterniti. Buk Baibel i tok: «*Oltaim mi save laikim yupela tumas na mi save mekim gutpela pasin long yupela, bilong mekim yupela i kam klostu long mi*» (Jeremaia 31:3). Na long bikpela laik bilong God i kam long yumi, em i mekim dispela graun i kamap, bai yumi ken stap laip na i save long em. Santu Pol i tok olsem **God i laik bai ol i stap gut tru wantaim em oltaim oltaim** (2 Timoti 2:10). Tasol ol manmeri i mekim sin, na ol i no pren bilong God moa.

Olsem na God i salim Pikinini bilong em i kam long graun na i kamap man, bai long Pen na Indai bilong dispela Pikinini, yumi ken stap gut gen wantaim em.

O God bilong mi! Dispela graun i no kamap yet, na yu save pinis long mi! Heven na graun i no stap yet, na yu laikim mi pinis! Yu bin givim laip bilong yu bilong kisim bek mi! Olsem wanem na planti taim mi bin givim baksait long yu?

Lukim! Pikinini bilong God i lusim heven na i kam long graun! O bikpela samting tumas! **Em i laikim ol manmeri i stap long graun, olsem na em i laik i dai bilong kisim bek ol.** Na taim em i kisim bek yumi pinis, orait em i save singautim ol ensel long amamas wantaim em: «*Yupela amamas wantaim mi! Wanpela sipsip bilong mi em i lus, na mi painim na kisim bek pinis!*» (Luk 15:6).

Gutpela Ridima bilong mi! Yu lusim heven na yu kam long graun bilong painim mi. Em i tru, bipo mi bin ranawe na i stap longwe long yu. Tasol nau mi no laik ranawe moa. Nogat. Mi laikim yu tumas. Na mi laik long yu pasim mi wantaim yu inap oltaim. Mi laik i stap wantaim yu long taim mi i stap laip na long taim mi i dai.

Olsem na long bikpela laik bilong God i kam long yumi, em i bin givim Pikinini bilong em long yumi. Na Pikinini i bin givim blut na laip bilong em long yumi. Olsem wanem na planti taim mi bin givim baksait long ol? Mi longlong tumas! Planti taim mi bin mekim sin na i givim sol bilong mi long Satan!

God bilong mi, yu bin givim olgeta samting long mi, inap long yu givim Pikinini stret bilong yu bilong kisim bek mi. Tasol planti taim mi bin tingting tumas long amamas bilong graun na bilong bodi, olsem na mi no pren bilong yu moa. Yu bin wetim mi wantaim bikpela peisens bilong yu, long wanem yu laik bai mi tanim bel na krai long ol sin bilong mi. Mi laikim yu tumas! Yu olgeta gutpela samting bilong mi! Helpim mi long tingim oltaim olgeta samting yu bin mekim bilong kisim bek mi! Mi no laik lusim yu gen. Yu olgeta gutpela samting bilong mi. Helpim mi long laikim yu oltaim, na mekim long mi long laik bilong yu.

O Maria, yu Mama bilong God! Jisas i no inap sakim tok bilong yu, olsem na mi askim yu long pre bilong helpim mi, bai mi ken i go long heven.

95

God i save givim em yet olgeta long ol manmeri i laikim em tru

God yet i tok: «*Na wanem ol manmeri i wok strong long painim mi, bai ol i lukim mi. Wanem ol manmeri i laikim mi, mi tu mi laikim ol tumas*» (Provep 8:17).

Tasol God i no save givim em yet long ol manmeri i save laikim ol samting bilong dispela graun. Nogat. I gat stori bilong santu Terese i olsem: Terese em i sista pinis, tasol em i no bin givim lewa bilong em olgeta long God yet. Em i save laikim tumas famili bilong em, olsem na oltaim em i save tingting tumas long ol. Tasol wanpela de em i tingting gut, olsem na em i tokim God olsem em i laik givim lewa bilong em olgeta long God, na em i no laik tingting moa long famili bilong em. Na taim em i tokim olsem, orait em i harim maus bilong God i tokim em: «**Terese, nau tasol yu givim yu yet olgeta long mi, olsem na nau mi tu mi givim mi yet olgeta long yu**».

O God bilong mi! Mi laik givim mi yet olgeta long yu nau, tasol i gat planti samting i pasim mi yet long dispela graun. Helpim mi, na kukim mi long paia bilong laikim pasin bilong yu. Mi no laik tingting moa long ol samting bilong dispela graun, long wanem mi laik givim lewa bilong mi olgeta long yu. Mi laik mangal long yu tasol.

Long Buk bilong Song bilong Solomon i gat tok olsem: ***Mi gat wanpela pren tasol. Em i namba wan tru na mi laikim em tumas*** (6:9). Dispela toktok em i toktok God i save mekim long sol bilong yumi. Em i save laikim sol bilong yumi tumas, wankain olsem wanpela man i laikim meri bilong em. God tu i save tok olsem sol bilong yumi em i «namba wan tru».

I gat narapela stori bilong santu Terese i olsem: taim em i dai pinis, orait em i kamap long wanpela sista, na i tokim em olsem: «Laik bilong God i go long ol manmeri i wok hat bilong kamap santu i winim tru laik bilong em i go long ol manmeri i gat grasia tasol ol i no wok hat long kamap santu». I min olsem: yumi no ken amamas tumas sapos yumi gat grasia tasol. Nogat. **Yumi mas wok hat oltaim bilong kamap santu!** Grasia bilong God em i bikpela samting tumas, tasol yumi mas wok hat oltaim bilong kamap santu!

O God bilong mi! Planti yia i go pinis mi bin sapos long givim mi yet olgeta long yu, tasol mi bin givim kain kain eskus long yu! Tasol mi no laik bai indai i bungim mi longwe long yu. Nogat. Helpim mi long lustingting long ol samting bilong dispela graun, long wanem mi laik givim mi yet olgeta long yu.

Jisas i save givim em yet olgeta long yumi. Santu Pol i tok: ***Krais i bin laikim yumi tru na givim laip bilong em yet bilong helpim yumi*** (Efesus 5:2). Na santu Jon Krisostom i tok: «God i bin givim em yet olgeta long yu, olsem na em i laik long yu givim yu yet olgeta long em». Na em i tru, long wanem **Jisas i bin givim em yet olgeta long Pen na Indai bilong em, na tu long Santu Yukaris.** Na santu Fransis bilong Sales i tok moa olsem: «Wanpela lewa tasol em i no inap long laikim God. Nogat. Yumi nidim planti lewa bilong laikim em, long wanem laik bilong em i kam long yumi em i bikpela tumas, inap long em i lusim laip bilong em bilong kisim bek yumi». Olsem na yumi no ken givim lewa bilong yumi long ol samting bilong dispela graun, long wanem God tasol i mas stap masta bilong em. Yumi mas tokim God wankain olsem dispela meri bilong Buk bilong Song bilong Solomon i tokim poro bilong em: «***Pren bilong mi, mi laikim yu tumas***» (2:5). Mi laikim yu tumas. Yu lewa bilong mi. Yu olgeta gutpela samting bilong. Mi laik givim mi yet olgeta long yu.

O Maria, yu Mama bilong mi! Helpim mi long laikim God tasol.

96

Laik bilong God i winim olgeta samting

God em i Strong Olgeta, husat inap long winim em? I no gat wanpela man o meri o ensel inap long winim God. Nogat. Tasol santu Bernard i tok: «I gat wanpela samting tasol i save winim strong bilong God. Dispela samting em i olsem: laikim pasin bilong em». Yes. **Laikim pasin bilong God i winim tru strong bilong em.** Na dispela laikim pasin bilong em i kamap ples klia long Pen na Indai bilong em.

O bikpela laik bilong God! Sori tumas long ol manmeri i no save laikim yu!

Taim ol haiden i lukim Jisas i bruk nabaut na i hangamap long diwai kros, ol i save tok: «Dispela man i no trupela Pikinini bilong God. Nogat. God i no inap larim Pikinini bilong em i dai long diwai kros». Tasol bilip bilong yumi i tokaut strong olsem: **Jisas Krai em i trupela Pikinini bilong God, na ol i bin nilim em long diwai kros,**

long wanem em i laik kisim bek yumi long sakrifais bilong em.

Sapos yumi harim stori bilong wanpela king i laik kamap binatang bilong helpim ol binatang, yumi bai i no inap bilipim dispela stori.

Na tu yumi bai i tok olsem dispela king em i longlong tumas. Orait,

God i laik kamap man bilong helpim yumi, na em i givim laip

bilong em bilong kisim bek yumi. Na dispela stori bilong Jisas i

winim tru dispela giaman stori bilong king i laik kamap binatang.

Santu Maria Magdalena bilong ples Pazzi i tingting oltaim long Pen

na Indai bilong Jisas, na em i save tok: «O Jisas bilong mi, laik bilong

yu i winim olgeta samting, na tingting bilong mi i liklik tumas na i

no inap save gut long em». O sori long mi! God i laikim mi tumas

inap long givim laip bilong em long mi, tasol planti taim mi bin

mekim rong long em long ol sin bilong mi!

O sol bilong mi! Lukim! Yu mas lukluk i go antap na lukim dispela

man i hangamap long diwai kros. Bodi bilong em i bruk nabaut. Em

i karim bikpela pen tumas. Em i painim hat long kisim win, na klostu

em bai i dai. Yu save dispela man em i husat, o nogat? **Dispela man**

em i God bilong yu! Nau yu askim em: olsem wanem na yu mekim

dispela sakrifais, God bilong mi? Na em bai bekim tok bilong yu

olsem: «**Laik bilong mi i go long yu i pulim mi long i dai long**

diwai kros». O bikpela laik bilong yu, gutpela Jisas! Yu laikim mi

tumas, olsem na yu no bin les long karim pen bilong helpim mi!

O Jisas bilong mi! Yu laikim mi tumas! Nau mi lukim yu i hangamap

long diwai kros, na mi tingting olsem ol sin bilong mi i bin givim pen

long yu, na dispela tingting i mekim mi i sori na krai nogut tru. Mi laikim yu tumas, Ridima bilong mi. Mi laikim yu wantaim olgeta strong bilong mi. Mi no inap long givim baksait moa long yu. Nogat. Yu bin givim blut bilong yu long mi, olsem na mi laik givim lewa bilong mi long yu. Mi laikim yu tru, Jisas. Yu lewa bilong mi. Yu olgeta gutpela samting bilong mi.

O santu Virgo Maria! Helpim mi long laikim Jisas moa moa yet.

97

Grasia bilong God em i bikpela samting tumas

Planti manmeri i no save gut long gracia bilong God em i wanem samting, olsem na ol i tingting em i liklik samting. Planti manmeri i lusim gracia bilong God nating, long wanem ol i mekim mortal sin. **Tasol gracia bilong God em i bikpela samting tumas.** Buk Baibel i tok olsem ol manmeri i no inap long pinisim ol gutpela samting God i save tilim long ol, na tingting bilong ol manmeri i liklik tumas long save gut long gracia em i olsem wanem.

Grasia i save mekim ol manmeri i kamap pren bilong God. Buk Baibel i tok: *Ol manmeri i save kisim ol dispela gutpela samting na wok gut wantaim ol, ol i kamap pren bilong God* (Gutpela na Strepela Tingting 7:14). Bipo ol haiden i save tok olsem ol manmeri i no inap long kamap pren bilong God, long

wanem God i stap Antap tru, na ol manmeri i stap long graun. Tasol dispela toktok bilong ol i kranki olgeta. Grasia bilong God i save mekim yumi i kamap pren tru bilong em. Jisas yet i tok: *«Sapos yupela i mekim olsem mi bin tokim yupela, orait yupela i stap pren bilong mi... Olsem na mi kolim yupela “pren”»* (Jon 15:14-15). Na God i save tokim sol bilong yumi olsem: ***Naispela pren bilong mi, yu kam ausait, na yu kam wantaim mi*** (Song bilong Solomon 2:10).

O God bilong mi! Taim sol bilong mi i gat grasia, mi stap pren bilong yu. Tasol taim mi mekim sin, mi givim sol bilong mi long Satan, olsem na mi kamap birua bilong yu. Mi tenkim yu tumas, long wanem yu givim taim long mi bilong senisim ol pasin nogut bilong mi, na kisim grasia bilong yu gen. Bikpela bilong mi, mi sori tumas long lusim grasia bilong yu! Marimari long mi na givim grasia bilong yu gen long mi. Na helpim mi long i stap gut, long wanem mi no laik lusim grasia bilong yu gen.

Sapos wanpela wokboi nating i kamap trupela pren bilong king bilong em, dispela wokboi bai i amamas tru! Tasol ol king i no save stap pren bilong ol wokboi bilong ol. Nogat. **Tasol God em i narakain olgeta, olsem na em i givim sans long yumi long kamap pren bilong em.** Yes, God i laikim yumi tumas, olsem na em i givim sans long kamap pren bilong em. Santu Ogastin i tok: «Sapos mi laik kamap pren bilong king Sisar, em bai hat nogut tru, na mi bai i no inap. Tasol sapos mi laik kamap pren bilong God, orait dispela

samting i stap long han bilong mi yet. God i redi long kamap pren bilong mi. Sapos mi laik, mi bai inap. Sapos mi les, em bai nogat». Yes, dispela tok bilong santu Ogastin em i tru olgeta! Long wanem em i isi tru long kamap pren bilong God. **Sapos yu sori tru long ol sin bilong yu na yu konpes, yu kamap pren pinis!** Sapos yu laikim em tumas, yu kamap pren pinis tu! Santu Pita bilong ples Alkantara i tok: «I no gat wanpela man o ensel i ken save gut long bikpela laik bilong God i kam long ol manmeri i gat grasia long sol bilong ol».

O God bilong mi! Mi gat grasia long sol bilong mi, o nogat? Mi save pinis olsem bipo mi bin mekim sin, olsem na mi bin lusim em. Tasol yu bin givim em bek long mi, o nogat? O Bikpela! Mi laikim yu tumas, na mi sori long ol sin mi bin mekim. Marimari long mi na pogivim mi.

Ol manmeri i gat grasia ol i stap pren bilong God. **Tasol ol manmeri i bin mekim mortal sin na i lusim grasia bilong God, ol i birua bilong em.** Ol i tingting tumas long amamas bilong graun, olsem na ol i stap longwe long God, em i as bilong olgeta gutpela samting. **Dispela kain sol em i no bilong God moa, na God i no save was moa long em.** God i no save laikim ol sol i bin lusim grasia bilong em. Nogat. Em i save les olgeta long ol na givim baksait long ol. Pastaim, taim ol i gat grasia, God i save laikim ol tumas na givim planti blesing. Tasol taim ol i mekim sin na i lusim grasia, God i save givim baksait long ol, wankain olsem yumi save givim baksait long ol birua bilong yumi.

O God bilong mi! Bipo mi tu i bin lusim grasia bilong yu, olsem na mi no stap pren bilong yu moa. Tasol nau mi kam bek long yu, na mi askim yu long kisim mi bek insait long lain bilong ol pren bilong yu. Yu no ken rausim mi i go longwe long yu, dia Jisas. Nogat. Yu yet i tok long Buk Baibel olsem: «***Na wanem ol manmeri i wok strong long painim mi, bai ol i lukim mi. Wanem ol manmeri i laikim mi, mi tu mi laikim ol tumas***» (Provep 8:17). Mi laikim yu, Jisas. Yu olgeta gutpela samting bilong mi. Mi askim yu long laikim mi wantaim olgeta strong bilong yu. Mi no laik lusim grasia bilong yu gen. Nogat. Mobeta mi laik i dai pastaim.

O Maria, harim prea bilong mi, na helpim mi long stap gut oltaim.

98

God i save kaunim ol grasia em i givim long yumi

God i save kaunim ol grasia em i givim long yumi. **Long taim yumi no kamap yet, God i save pinis hamaspela grasia em bai i givim long yumi. Na taim yumi abrusim dispela mak, em bai i pinis nau: God bai no givim wanpela grasia moa long yumi.** Olsem na yumi mas pret na guria, nogut yumi tingting olsem God bai pulapim yumi long planti grasia long laik bilong yumi, tasol wanpela de God bai i tok: «Inap nau. Mi givim planti grasia long yu, na yu lusim ol nating. Mi no ken givim grasia gen long yu». Na yumi no save long dispela mak God yet i bin makim, olsem na yumi mas pret oltaim, nogut dispela grasia God i givim mi long tude, em i las grasia em i laik givim... nogut dispela singaut bilong em long tanim bel, em i las singaut bilong em... nogut dispela gutpela tingting em i bin kirapim insait long bel bilong mi, em i las tingting em i laik kirapim...

O God bilong mi! Yu bin givim planti grasia long mi, tasol mi bin lusim ol nating! Marimari long mi, na no ken lusim mi.

Na yumi mas save gut olsem: **dispela mak bilong ol grasia God yet i bin makim, em i no wankain long olgeta manmeri.** Nogat. Long sampela manmeri God i save givim planti grasia, tasol long narapela em i save givim liklik. Na yu, brata bilong mi, yu olsem wanem? **God i bin givim hamaspela grasia long yu? Ating yu save pinis long mak bilong ol grasia bilong yu, a?** Na sapos yu go het long lusim ol grasia nating long sin bilong yu, ating bai yu go long heven, a? Planti manmeri i bin dai longwe long God, long wanem ol i bin lusim ol grasia nating, olsem na God i tok: «Inap nau. Mi no inap givim moa grasia long yu. Ol grasia bilong yu i pinis nau». Olsem na yu mas pret na tingting gut, nogut God i mekim wankain toktok long yu. O brata bilong mi! Yu mas tanim bel hariap! No ken givim eskius na pulim taim! **Nogut yu mekim mortal sin gen na God i lusim yu! Nogut yu mekim sin gen na marimari i pinis na yu lus olgeta!** Sori long yu, brata bilong mi, sapos yu givim eskius yet na yu no tanim bel!

O God bilong mi! Mi no laik lusim yu gen. Nogat. Mi save pinis olsem Satan bai i wok hat bilong pulim mi long mekim sin na i go longwe long yu, tasol mi laik singaut long yu oltaim, gutpela Jisas bilong mi. Mi trastim yu na mi save olsem yu bai i helpim mi.

Sapos God i bin givim planti grasia long yu, tasol yu no tanim bel yet, orait yu man nogut stret. **Na yu mas pret na guria, nogut God i les long givim moa grasia long yu gen.** Sapos yu yusim gut ol

grasia bilong em na yu tanim bel, orait yu ken i go long heven. Tasol sapos yu lusim ol grasia bilong em nating, orait dispela em bai i kamap mak i tok klia olsem yu bai i lus long hel.

O God bilong mi! Mi laik tenkim yu, long wanem yu no bin lusim mi yet. Ol gutpela tingting i bin kirap nau insait long bel bilong mi, ol i kam long grasia bilong yu. Na dispela sori i bin kirap tu insait long sol bilong mi, em tu i wanpela grasia bilong yu. Na ol dispela grasia nau tasol yu bin givim long mi, i soim long mi olsem yu no bin lusim mi yet. Tenkyu, gutpela Jisas. Mi tu i no laik lusim yu gen. Mi no laik mekim sin na givim baksait long yu moa. Mi laik i stap wantaim yu olgeta de bilong laip bilong mi. Mi laikim yu tumas, dia Jisas. Yu olgeta gutpela samting bilong mi. Tingim Pen na Indai bilong yu, na helpim mi oltaim.

O Maria, yu Kwin bilong mi! Helpim mi oltaim.

99

**Tok piksa bilong papa
i gat tupela pikinini man**

Long sapta 15 bilong Gutnius bilong santu Luk, yumi ken painim tok piksa bilong papa i gat tupela pikinini man. Na namba 2 pikinini i les long i stap wantaim papa bilong em, olsem na em i askim papa long givim olgeta samting papa i laik tilim long em wantaim brata bilong em. Na taim papa i givim olgeta samting long em, orait em i givim baksait long papa na i go long wanpela longwe ples. Na long dispela longwe ples em i mekim kain kain sin na pinisim olgeta mani bilong em. **Orait dispela pikinini em i piksa bilong ol manmeri bilong sin.** Long wanem God i save givim planti gutpela samting long ol manmeri, tasol ol manmeri nogut i save mekim sin na westim nating ol gutpela samting God i givim long ol. **Ol manmeri bilong sin i save givim baksait long God wankain olsem dispela pikinini i bin givim baksait long papa bilong em.**

O Bikpela na Papa bilong mi! Planti taim mi bin mekim wankain olsem dispela pikinini. Planti taim mi bin givim mi yet long amamas bilong graun, na mi bin givim baksait long yu. Planti taim tumas mi bin go longwe long yu na lusim grasia bilong yu.

Na tok piksa i tok moa olsem: i no longtaim bikpela hangre i kamap long dispela longwe ples, na pikinini i hangre nogut tru. Na em i no gat wanpela samting. Em i lukim ol pik i kaikai ol skin bilong bin, na em i gat bikpela laik tru long kisim sampela na pulapim bel bilong em. **Orait dispela hangre em i piksa bilong ol samting nogut i save kamap long ol manmeri bilong sin.** Man i lusim God na i go longwe long em, em i no inap long stap gut na painim bel isi na gutpela taim. Olgeta amamas bilong graun i no inap long givim trupela amamas long ol manmeri bilong sin, olsem na ol i no save bel isi na ol i bel hevi oltaim.

Tasol dispela pikinini i luksave long rong em i bin mekim, olsem na em i tok: «***Bai mi kirap na mi go bek long papa bilong mi***» (Luk 15:18). O sol bilong mi! Yu mas mekim wankain toktok! Yu mas lusim ol amamas bilong graun na ol sin bilong yu, na yu mas go bek long Papa bilong yu i stap long heven! Sapos yu kam bek long em, orait em bai i no rausim yu.

Yes, God na Papa bilong mi, mi save olsem mi mekim sin pinis. Mi bin givim baksait long yu. Mi bin go longwe long yu. Mi bin givim mi yet long amamas bilong dispela graun. Tasol nau mi laik kam bek long yu, na mi sori tru long ol sin mi bin mekim. Olsem na mi askim

yu: no ken rausim mi, gutpela God bilong mi! Mi no laik lusim yu gen. O Papa bilong mi, pogivim mi! Givim kis bilong bel isi long mi, na welkamim mi gen long lain bilong ol pren bilong yu.

Tok piksa i tok olsem taim dispela pikinini i kam bek long haus, em i tokim papa olsem: *«Papa, mi bin mekim sin long God na long yu. Nau mi no gutpela man moa inap long yu kolim mi pikinini bilong yu»* (Luk 15:21). Na taim papa i lukim pikinini i kam bek long haus, em i sori long em na i holimpasim em. **Wantu tasol papa i lusim ol rong bilong dispela pikinini, na tupela i amamas tumas.**

O gutpela Papa bilong mi! Mi tu i laik kam bek long yu, long wanem mi save pinis long ol rong mi bin mekim. Mi tu i no gutpela man moa inap long yu kolim mi pikinini bilong yu. Planti taim mi bin lusim yu na mi bin go longwe, long wanem mi laik mekim long laik bilong mi yet, na mi bin les long harim ol tok bilong yu. **Tasol nau mi save pinis: yu gutpela Papa tumas, na yu no save rausim ol pikinini i kam bek long yu.** Em i tru olsem bipo mi no bin laikim yu tumas, tasol nau mi laikim yu wantaim olgeta strong bilong mi. Helpim mi long grasia bilong yu, long wanem mi laik bihainim yu oltaim.

O Maria, God em i Papa bilong mi, na yu Mama bilong mi! Olsem na mi askim yu long tingim mi oltaim.

FATHERS OF THE INSTITUTE OF THE INCARNATE WORD

www.ive.org - ive.png@gmail.com



**Buk bilong Gutnius
wantaim ol explanesen**

509 pes



Santu Alfons Maria bilong Liguori

**Santu Hat
bilong Jisas**
96 pes



Santu Alfons Maria bilong Liguori

**Visitim Jisas
long Santu Sakramen**
142 pes



Santu Alfons Maria bilong Liguori

**Ol 7-pela sori
bilong santu Maria
na ol gutpela pasin
bilong santu Maria**
213 pes



Santu Alfons Maria bilong Liguori

**Indai, Kot,
Heven na Hel**
165 pes



Santu Alfons Maria bilong Liguori

Rot bilong Salvesen
230 pes



Santu Alfons Maria bilong Liguori

**Ol meditesen
bilong Krismas**
177 pes



Santu Alfons Maria bilong Liguori

**Novena bilong
santu Maikel**
68 pes



Santu Alfons Maria bilong Liguori

**Rot bilong Diwai Kros
na 15-pela meditesen
bilong Pen na Indai
bilong Jisas**
168 pes



**Ol prea
bilong Divain Mersi**

52 pes

